


born

43



22 m



no lot many D. And
Chloro. ca. 1. And





02727

T45

1740x

Spec

Coll

Suis se abluit undis.




INSTITUTIONES
PHILOSOPHIÆ
WOLFIANÆ,
IN
USUS ACADEMICOS
ADORNATÆ
OPERA
LUDOVICI PHILIPPI
THÜMMIGII,
PROFESSORIS MATHESIOS ET PHILOS.
ORDINARII, REG. SOC. SCIENT.
BOR. SODALIS.



TOMUS PRIOR.
EDITIO NOVA CUM PRIVILEGIIS.


FRANCOFURTI ET LIPSIAE, MDCCLX.
Prostant in Officina Libraria RENGIERIANA.





LECTORI BENEVOLO

SALUTEM.



U^T has PHILO-
SOPHIÆ WOL-
FIANÆ institutio-
nes delinearem, eas-
que in publicum
prodire permetterem,
non una eademque mihi fuit ratio.

Quintus jam volvitur annus, ex
quo tempore in Lectionibus privatis
& privatissimis Philosophiam univer-
sam explanavi, Systemate, ad cuius fi-
lum amplissimi hujus studii lineas tra-
derem, mentibusque auditorum meo-

PRÆFATIO.

rum inscriberem usus VIRI incomparabilis & philosophi nostra ætate summi CHRISTIANI WOLFII, quod tum lingua vernacula conscriptum luci publicæ committere cœperat.

Accuratæ terminorum definitiones, exquisitissimæ experientiarum evolutiones, rara in observando circumpectio, limatissima in judicando acies, felicissima in inveniendo sagacitas ac genuinus in demonstrando rigor systema non vanis aut consuetis artificiorum lenociniis, sed solidissimis argumentis commendabant, ut necessum haud fuerit, ex cœco quodam in præceptorem affectu aut præpostero partium studio idem reliquis anteferre.

Decantatum istud: non esse in verba magistri jurandum, minime me fugiebat; sed nec hoc ignorabam, immotis assertorum rationibus probeque ruminatis assensum denegare aut fuggillationibus illudere, mentem veritatis impatientem & ex alienæ famæ jactu-

PRÆFATIO.

jactura gloriolam captantem ac ventositatem prodere.

Quamobrem cum in eodem exponendo strenue desudarem, animadverti primum, volumina majoris molis esse, quam ut ad lectiones academicas intra definitas temporum periodos absolvendas debita accuratio-
ne adhiberi queant. Deinde & hoc senseram, quoniam celeb. autor stylo utitur puro & ipsos terminos technicos apud latinos autores sæpius nescio quam barbariem præ se ferentes ad genium linguæ vernaculæ componit, plerosque non tanta linguæ teutonicæ capacitate instructos esse, quin subinde ad verba hæreant atque exinde difficultates nectant. Denique in plerisque Academiis, ubi latino idiomate prælegere mos est, idem systema aut plane non, aut non sine gravissimis incommodis prælectionibus inservire.

Huic malo ut obviam iremus, id unicum excogitari poterat remedium, libellum prelo parare, qui succinctis

PRÆFATIO.

thesibus PHILOSOPHIAM WOLFIANAM Romano habitu exornatam contineret. Vix autem mihi hoc enatum erat consilium, inopinata quædam & ad seculorum ætatem memoranda hujus Philosophiæ periodus novas suppeditavit rationes, cur eidem exequendo omnem applicarem operam.

Fama per totum propemodum terrarum orbem tulit, quam teterri-
mas insidias celeberrimo Philosopho
struxerint adversarii, quibusve cla-
moribus ac verborum illusionibus
huic Philosophiæ atheismi labem asper-
gere conati fuerint. His non suffe-
cerat privatis consuluisse rebus, sed
affectuum acerbitate eo usque in trans-
versum agebantur, ut quasi victo-
res aliis omnibus per vim impone-
rent, se nescio quod egregium & lau-
dabile egisse opus, dum periculosissi-
mas sibi fingerent theses, quas alteri
maxime invito ac omni modo easdem
detestanti sub causæ DEI titulo obtru-
derent, etsi ipsimet faterentur & qua-
si re

si re bene gesta gloriarentur, thesibus istis allatis Systema Philosophi in contradictionum chaos degenerare, quod alias pulcherrimo consensu omnium sese commendat.

Ut itaque coram omnium & æquatis & veritatis amantium conspectu iniquissimæ ejuscemodi imputationes sisterentur, nec earum illecebris, quas mira arte hinc inde disseminant incauti ab æquitate seducantur, has succinctas **PHILOSOPHIÆ WOLFIANÆ** institutiones multum profuturas non ex vano speramus.

Equidem ab ipso Philosopho varia prodire scripta, quibus innocentiam suam apertissime demonstravit, quorumque agmen merito ducunt *Commentatio luculenta* de differentia nexus rerum sapientis & fatalis necessitatis, nec non Systematis Harmoniæ præstabilitæ & Hypothesium Spinosæ, itemque *Monitum*, quod ad istam Commentationem adjecit: enimvero cum in iisdem plurima ex suo Systemate supponat, omnibus præcipue idiomatis germa-

PRÆFATIO.

nici rudibus vel toto systemate non bene imbutis eadem vix satisfacere posse arbitramur.

Evolvant itaque, quibus veritas cordi & omne partium studium remotissimum est, legant ac perlegant has institutiones, neque quicquam aut bonis moribus aut revelationi divinæ contrarium aut adversum deprehendent.

Sinistrum verborum sensum construere, aut extra connexionem phrasas excerpere & inde deductis consequentiis mille alias superstruere consequentiarum consequentias, hoc & Philosopho & Theologo nil indignius, nil turpius. Nemo negat Philosophum ad consequentiam ex assertionibus suis fluentem adstringi: enimvero nec hoc negandum, iniquum prorsus esse, ad creandam auctori invidiam consequentias coacervare consequentiarum, cum unica eademque absurda legitimeque illata nil amplius, quam theseos falsitatem auctorisque errorem, quos omnes exue-
re

re humanæ fortis non est, evincat. Hinc vero in autorem devolvere propositum bonos mores & religionem subvertendi & quæ sunt hujus commatis convitia plura, vir candidus abhorret. Hæc refutandi si invalesceret methodus, valde vereor, ne optimo cuique & ab omni fraude remotissimo mali nominis stigma inuri queat. Applicemus eandem ad Patrum sanctorum erroneas, quas multo fervore defendebant, sententias, quæ modo attulimus, abundantissime patebunt.

Talia non eo a me proferuntur animo, quasi errorum quorundam periculiosorum celeberrimum philosophum ipse suspicarer reum; sed ut evidentissime appareat, adversarios omnes humanitatis nedum candoris transilisse circulos in eo persequendo.

Hypothesis philosophica est, quæ **HARMONIA PRÆSTABILITA** dicitur, & qua usus est illustris **LEIBNITIVS** immortale Germa-

PRÆFATIO.

niæ ornamentum in explicando commercio mentis cum corpore, quod omni ætate Philosophis cruces fixerat insuperabiles. Vix lucem aspexerat ingeniosissimum hoc systema, variis magnorum ingeniorum objectionibus impetutum fuit. **FOUCHERIUS, BÆLIUS, LAMY, TOURNEMINIUS, NEWTONUS** &c. difficultates prima fronte speciosissimas urgebant, quibus Systema premi opinabantur. Horum vero nullus inventori molestus fuit in corradendis consequentiarum consequentiis, quæ magis ad invidiam creandam, quam Systema impugnandum faciunt, nec Philosophos inter se decertantes decent. Videatur celeberrimi **Matheos & Moraliæ Professoris Tubingensis** (nunc **Phyficæ Petropolitani**) **BÜLFFINGERI** commentatio hypothetica de Harmonia animi & corporis humani maxime præstabilita, itemque clarissimi **KOEHLERI** Schediasma, quod **Monadologiæ** subjunxit de Leibnitiana defensione Systematis Harmoniæ præstabilitæ. Jam longe

longe alia controversiæ hujus scena emerfit. Adversarii enim objectiones dudum solutas recoquunt & quidem ob defectum debitæ cognitionis mutilas nec primis natalibus similes, hancque hypothesein ceteris tanquam probabiliorem præferentes, si rationis judicio standum, generis humani inimicos declamant.

Risu equidem nostra ætate dignum est, ob hypothesein philosophicam tantos movere strepitus, quæ in disciplinas morales & Facultates, quas superiores dicunt, non influit: enimvero ne inanibus rixis denuo afferri pabulum videatur, in Psychologia rationali peculiaribus capitibus tria Philosophorum systemata in explicando mutuo mentis cum corpore commercio exhibui, appositisque cujuslibet rationibus liberum Lectori reliqui, cui calculum adjicere velit: quo ipso, arbitror, dilucide constabit, omnem Philosophiam Wolfianam, quemadmodum nugantur adversarii, huic hypothesei minime esse superstructam, nec posito, sed non
con-

PRÆFATIO.

concesso, esse illam adeo absurdam, ut nihil sani contineat, in ejus gratiam etiam optime dicta esse in sensum auctori molestum, quemadmodum iidem fieri debere contendunt, detorquendum.

Denique benevolum lectorem non potui non monere, ut in perlegendis hisce placitis philosophicis perpetua connexionione inter se cohærentibus animum lento gradu progredi & ad quælibet verba suo ponderanda sensu subsistere, aut iisdem penitus supersedere jubeat. In coarctandis enim tot propositionibus concinnitate opus erat, quæ nimium festinanti obscuritatem parit, ut deinde sibi fingat, quæ a mente auctoris multis parasangis distant, præsertim si eo animo ad lectionem accedat, ut dogmata periculosa ibi quærat.

Neque hoc sicco pede prætereundum nobis est, si quæ in his institutionibus desint dogmata, præsertim rationis lumini impervia, non eo animo accipienda esse, quasi negarentur
aut

PRÆFATIO.

aut in dubium vocarentur, cum quæ ab altiore lumine pendent Theologis discutienda sint: nec ubi solida scientiarum principia traduntur, omnes conclusiones, quæ porro hinc deduci possunt, una locum inveniant.

Nemini ego litem moveo, nec ut mihi moveat, confido, qui virtutem amat & mores vitiligatoris execratur. Volumina voluminibus opponere, factiones factionibus, ætates ætatibus, omnia sollicitare, turbare, miscere, idem est ac sempiternis laboribus nihil scire & illud etiam dubium facere, utrum sciri possit aliquid.

Hac in opera gloriam nullam venor, cum id unice pro fine habeam, ut eminentioris eruditionis propagationem quovis modo promoveam, ex quo divina providentia has officii mei partes esse voluit, ut commodis juventutis academicæ invigilem.

Quod præstiti in nova thesium Wolfianarum connexione & variis accessionibus consistit, quæ ad philosophi

PRÆFATIO.

phi mentem .penitius introspectendam
multum faciunt.

Institutiones partiti sumus in duas
partes, quarum prima Philosophiam
Theoreticam complectitur; altera Pra-
cticam. Disciplinas singulas eo ordine
collocavimus, quo una ab altera suppo-
nitur, ne in definitionibus utendum sit
vocibus nondum explicatis, nec in pro-
batione principiis nondum probatis.

Faxit Supremum Numen, ut quæ
hactenus in salutem Ecclesiæ & Rei-
publicæ lætissima segete effloruerunt
dogmata, impofterum quibusve in-
sultibus superiora persistant neque qua-
vis arte excogitatis technis concutian-
tur. Casselis die IX. Decembr.

1724.

INSTI.

INSTITUTIONES
LOGICÆ,
SEU
PHILOSOPHIÆ
RATIONALIS.

(*Thüm. Instit. Log.*)

A

IN-





INSTITUTIONES LOGICÆ,

SEU

PHILOSOPHIÆ RATIONALIS

PROLEGOMENA.

§. 1.


P*hilosophia rationalis seu Logica est habitus utendi facultate cognoscitiva in veritate investiganda & dijudicanda. Sumitur hic Facultas cognoscitiva generaliter, ita ut præter intellectum sensus & imaginatio una comprehendantur, cum etiam harum facultatum in veritate cognoscenda sit usus.*

§. 2.

Mens, dum cognoscit, ad certas regulas se attemperat, quas naturaliter confuse tantum percipit, atque in istarum regularum confusa perceptione consistit *Logica naturalis docens*, quemadmodum in illarum executione *Logica naturalis utens*. Distincta earundem regularum cognitio *Logicam artificialem docentem*, distincta denique earundem applicatio *Logicam artificialem utentem* absolvit.

§ 3

Ufus Logicæ consistit i. in *inveniendō* & quidem vel *a posteriori* seu per experientiam beneficio sensuum, vel *a priori* seu per rationem beneficio intellectus stricte sic dicti: 2. in *dijudicandō* & quidem vel veritates, vel vires ad istas cognoscendum requisitas: 3. in *discendō*, nempe in legendis & dijudicandis libris: 4. in *docendō*, scilicet in convincendo, refutando & disputando.



PARS I.

DE THEORIA LOGICÆ,

SEU

TRIBUS MENTIS OPERATIONIBUS.

CAP. I.

DE NOTIONIBUS.

§. 4.

Prima notio
rationis
Prima mentis operatio est *simplex rei apprehensio* seu *Notio*, quæ per representationem objecti in mente definitur. v. gr. Horologium simpliciter apprehendimus, dum ipsum vel imaginem absentis oculis quasi oberrantem nude intuemur.

§. 5.

Notandum itaque, notionem vel esse claram
vel

vel obscuram. ^{Clara} Clara dicitur, quæ habet unde rem repræsentatam agnoscere possumus, veluti cum novimus, eandem esse, cui hoc vel istud nominis tribuitur, quam hoc vel in isto loco antea vidimus: ^{Obscura} Obscura vero, quæ ad rem repræsentatam agnoscendam insufficiens deprehenditur, veluti si utcumque meminerim alicujus termini technici, nec quantum satis rem denotatam agnoscere valeo.

§. 6.

Dantur autem varii obscuræ notionis gradus ex defectu notarum, unde objectum agnoscitur enati. Etenim aut aliquas saltem notas in re repræsentata animadvertimus, quas antea nos in ea notasse recordamur, aut vix unius alteriusve meminisse possumus. In posteriori casu notionem majoris obscuritatis esse, quam in priori nemo non capit.

§. 7.

Cum notas, in quas notio clara resolvi potest, enumerare aut ^{certe} minimum distinguere valemus, notio clara dicitur ^{non per se} distincta. Sic notio *matrimonii* distincta est, quod sit conjunctio maris & feminae sobolis procreandæ ac educandæ gratia facta. Notio ^{in distinctis} confusa e contrario dicitur, cum rem repræsentatam agnoscimus quidem & ab aliis distinguimus, sed unde eam agnoscamus, notas recensere non valemus. Sic notio coloris rubri clara equidem est, at confu-

fusa. Atque hinc est, quod notio distincta verbis mediantibus in alterius animo excitetur, cum contra confusa non prodeat, nisi objecto monstrato.

§. 8.

Notio distincta vel completa vel incompleta est. ^{completam} Completa voco, si notæ, quas recensemus, sufficiunt ad rem in quolibet statu agnoscendam & a cæteris distinguendam: ^{incompleta} Incompleta, si notarum recensio insufficiens fuerit. Notio *avaritia* completa est affirmantibus, quod sit cupido plura habendi, quam usus vitæ exigat & rerum fert conditio.

§. 9.

Notio denique distincta vel est adæquata vel inadæquata. ^{adæquata} Adæquata est, cum notarum singularium ingredientium rursus notiones distinctas habemus: ^{inadæquata} Inadæquata vero, si tantummodo confusas. Tenendum vero, hanc notionum analyfin perfectam dare nec posse homines, nec etiam necesse habere. Ibi subsistere possumus, ubi finem consecuti sumus, cujus gratia eam instituimus. Instituitur autem vel in usum explicationis, vel demonstrationis.

§. 10.

Oblivione notiones deteriorantur. Quod ne fiat, repetitione opus est & cavendum præ-

præterea, ne simultanea diversarum rerum tractatione confusione nos involvamus.

§. II.

Quicquid rerum existentium observamus, illud *singulare* est, in quo quæcunque insunt, certa quidam ratione determinata sunt. Omni-modæ enim illorum, quæ rebus insunt, determinatio est illud, quod veteres *Principium individuationis* appellarunt. Quod si plura singularia inter se conferimus, observatu facile est, nonnulla in iisdem eodem modo determinata esse, cæteris diversis existentibus. Cum adeo similia sint, quatenus eodem modo determinata sunt (§. 23. *Ontol.*); similitudo singularium seu individuorum notionem ^{de quibus supra} *speciei* largitur. Quod si jam ulterius progressi species ut modo individua inter se conferamus; illarum quidem similitudo ^{aliquammodo} *Generis* notionem suppeditat & ita porro ad *Genera superiora* ascenditur. Atque hinc capimus etiam, quidnam sit illud, quod *differentiæ specificæ* nomine insigniatur. Scilicet, quæ diverso modo determinari possunt cæteris manentibus iisdem, differentiam specificam largiuntur.

§. 12.

Quatenus notiones vel pluribus individuis vel speciebus pluribus conveniunt, *Universales* audiunt. Quamobrem Universalium utilitas ex eo potissimum elucet, quod iudicia fieri possint pluribus rebus convenientia.

§. 13.

Quæ a rebus perceptis abstrahuntur notiones (§. II.) & inde ulterius derivantur, de earum realitate dubitari nequit, utpote experientia nixarum. Enimvero ubi quædam ad arbitrium determinantur, vel a priori, vel a posteriori probandum, istiusmodi determinationes fieri posse.

§. 14.

Notio distincta completa vocatur *Definitio*: veluti cum obligatio dicitur motivi connexio cum actione.

§. 15.

1. Omnis adeo definitio notas continere debet, quæ simul sumptæ nisi rei definitæ competere nequeunt (§. 7. 8.): 2. notæ autem illi perspectæ sint necesse est, cui rem definire volueris: atque ideo 3. in disciplinis ^{max habens notio p m.} termini definitionem ingredi prohibentur, qui non antea fuerint explicati, vel jure tanquam aliunde noti supponuntur, veluti termini geometrici in definitionibus astronomicis, aut metaphysici in moribus, aut morales in juridicis: 4. a verbis etiam impropriis abstinendum, nisi improprius significatus ab usitato diversus ante fuerit explicatus.

§. 16.

Dividuntur definitiones in nominales & reales. ^{Max & p m.} Nominalis est sufficiens notarum ad rem

rem ab alijs sui similibus discernendam enumeratio: ^{ca. 8. §. 1. de lib. v. 12} *realis* verò distincta notio possibilitatis rei. Talis est definitio obligationis (§. 14.). Prioris exemplum est definitio *Legis*, quod sit regula, ad quam actiones liberas dirigere obligamur.

§. 17.

1. Definitionem adeo nominalem ingredi nequeunt, nisi quæ rei definitæ constanter insunt. Cavendum porro, 2. ne explicationes synonymicæ usurpentur, veluti cum infinitum definitur per id, quod limitibus destituitur: vel 3. circulus in definiendo committatur, veluti cum Lex definitur, quod sit Jussus superioris inferiori promulgatus ipsumque obligans, & contra Superior, quod sit persona habens potestatem ferendi leges. Hic enim notio Superioris ingreditur notionem Legis & vicissim notio legis notionem Superioris. Istiusmodi *Circuli extra systemata* facillime committuntur. <sup>existens dicitur in
sanguine mixto
Esprit (Esprit)</sup> Utinam autem definitionibus nominalibus vel, ut unumquodque proprio suo nomine compellemus, vel tanquam principiis demonstrationum. Definitiones reales usui posteriori destinantur. *d. i. gub. principia ab.*

§. 18.

Ad definitionem realem duo requiruntur. Primo ea debent esse perspecta, quæ ad rem producendam requiruntur: deinde tenendum

A 5

est,

est, quidnam unumquodque eorum ad rei genesin conferat (§. 16.).



CAP. II.

DE USU VERBORUM, *s. Terminorum, s. Vocum.*

§. 19.

Cum verba sint signa, quibus cogitationes nostras exprimimus: ut colloquentes mutua animi sensa intelligant, easdem notiones cum verbis iisdem jungere tenentur.

§. 20.

Fieri autem plerumque solet, ut, dum verba recitamus, ad notiones ipsas non attendamus, contenti, quod obscure meminermus, nos eas olim habuisse. Hinc contingit, ut nobis videamur intelligere verba, quibus singulis sigillatim notio sua respondet, in compositione autem nulla. Huc refero lignum ferreum & in Geometria biangulum rectilineum.

§. 21.

Res itaque a verbis discreturus 1. nullam admittere tenetur notionem, nisi realitate ejus evicta (§. 13.). Notandum tamen, 2. fieri posse, ut verbis adhæreat aliqua notio rei actu existentis, etiamsi ^{nos}ne claram quidem, nedum distinctam ~~nos~~ habeamus. Exemplum est
ani-

animal nobis non visum, cujus tamen innotuit nomen. Atque hinc 3. arguitur, non ideo verba esse sine mente sonos, quod nullam cum iis notionem ne claram quidem connectere valeamus: nec id 4. ab aliis fieri posse negandum, dum idem in potestate nostra positum non reperimus.

§. 22.

Ut *Logomachia* evitentur, verborum significatus determinatus atque constans sit: qui ut alteri patet, in dictione cautio adhibenda est.

§. 23.

Verbi notionem, quam ipsi usus loquendi tribuit, rimaturus 1. ad casus quosdam speciales attendat, ubi eodem utimur: 2. singulis excussis, quæ in re denotata occurrunt, scrutetur, cujus gratia illud proferatur.



CAP. III.

DE PROPOSITIONIBUS.

§. 24.

Dum varia cum re, quam apprehendimus, nobis repræsentamus, quæ tanquam ab ipsa diversa, attamen ad eandem vel pertinentia vel non pertinentia consideramus, *judicare* dicimur: ut adeo *Judicium*, (quæ secunda
men-

mentis operatio est,) fit notionum connexio, vel separatio.

§. 25.

Judicium verbis propositum vocatur *Enunciatio* item *Propositio*. Est igitur ea oratio, qua aliquid rei competere, vel non competere significamus. Quamobrem in omni ut judicio, sic propositione tria considerata sunt 1. *Subiectum*, quo denotatur res, de qua dicitur: 2. *Prædicatum*, seu quod de ea dicitur: 3. *Copula*, quæ est signum nexus inter Subiectum & Prædicatum, qui vel ponitur vel tollitur. Copula exprimitur per verbum substantivum *est*, quod tamen pro linguæ genio sæpiissime implicite ponitur, veluti cum dicimus: Petrus scribit, quod idem est, ac Petrus est scribens.

§. 26.

Contingit subinde, ut Propositiones forma legitima destituantur, quando nempe Subiectum & Prædicatum non distincte ponuntur: quæ ipsarum immutatio *Cryptis* appellatur, v. gr. vivitur parvo bene.

§. 27.

Quoniam in propositione Subiectum cum Prædicato vel connectitur vel ab eodem removetur (§. 25.); ideo propositiones *abeunt* in affirmativas & in negativas. Et quia in negativa nexus inter Subiectum & Prædicatum tollitur,

litur, negatio Copulam ^{non mißzu est qd forme} afficere debet, aliter
 mentitur tantum formam negativæ, re ipsa au-
 tem affirmativæ æquipollet, diciturque pro-
 positio infinita. Est igitur infinita, ubi præ- ^{Infinita}
 dicatum negativum, quod affirmativi loco po- ^{gnat na}
 nitur, connectitur cum Subiecto. Veluti cum ^{io. Dicitur}
 dicimus, *hæc res non involvit contradictionem*. ^{Luigaso}
 & propositionem ita interpretamur, *hæc res*
est istiusmodi quid, quod contradictionem non
involvit. contradictionis expert.

§. 28.

Ratio, cur prædicatum conveniat Subiecto
 aut non conveniat, vel est in ipso Subiecto vel
 extra ipsum. In priori casu prædicatum enun-
 tiatur de omni Subiecto, in posteriori tantum
 de quodam, quod nempe in determinato quo-
 dam statu existit, diciturque in isto *propositio*
universalis: in hoc *particularis*. Quodsi status
 is determinatur, prædicatum omni subiecto in
 eodem constituto competit, sicque particula-
 ris universalis evadit. E. gr. Quidam lapis est
 calidus, quia scilicet diu soli æstivo expositus.
 Quare omnis lapis diu soli æstivo expositus, est
 calidus.

§. 29.

Signum universalitatis est particula *Omnis*.
 Particularitatis vero vox *Quidam*. Utrum-
 que vel expresse ponitur, vel subintelligitur;
 in casu posteriori propositio indefinita dici-
 tur.

§. 30.

§. 30.

Si idem prædicatum de eodem subiecto simul affirmatur & negatur: *propositiones* oriuntur *contradictoriae*. Prædicatum vero contradicit Subiecto, quando eidem tribuit, quod una cum iis, quæ notio Subiecti involvit, consistere nequit, seu cum iisdem Subiecto una inesse vel competere non potest.

§. 31.

Qui nexum Subiecti & Prædicati distincte perspicit, ^{sub iis, quæ in eodem} *propositionem concipit*: qui contradictionem inter Subiectum & Prædicatum perspicit, *non potest concipere eam*: nullum vero ejus *conceptum* habet, qui nec nexum, nec contradictionem perspicere valet.

§. 32.

Dividuntur etiam *propositiones* imprimis a mathematicis in *Theoreticas* & *Præcticas*. Theoreticæ ^{indemonstrabiles} *axiomata*, demonstrabiles ^{Theoremata} *Theoremata*: practicæ ^{Postulata} *indemonstrabiles*, demonstrabiles ^{Problema} *Problema*ta audiunt. Terminus *demonstrabilis* infra (§. 50.) distinctius evolvetur.

CAP. IV.

DE RATIOCINATIONE,

SEU

SYLLOGISMIS.

§. 33.

Si ob notas in Subiecto obvio animadversas
judicamus, eidem competere definitionem
(§. 4.); inferimus, quod eidem etiam competat
definitum seu nomen rei ex istis notis agnoscen-
dæ impositum. E. gr. Videmus Titium de
magnitudine mali imminentis contristari, cum-
que definitio succurrat, qui de magnitudine
mali imminentis contristatur, est ~~pusillanimis~~; *trepidans*.
statim inferimus: Ergo Titius est ~~pusillanimis~~. *trepidans*.
Similiter si judicemus, subiectum quoddam
obvium ad hoc vel istud genus, seu hanc vel
istam speciem pertinere, atque succurrat præ-
dicatum, quod generi isti vel speciei tribuitur,
idem quoque subiecto obviotribuendum esse
inferimus.

§. 34.

In hac definitionum atque propositionum
generalium applicatione *ratiocinia affirmativa*
consistunt, quorum adeo fundamentum est
vulgo sic dictum *Dictum de omni*: Cui compe-
tit definitio, isti etiam competit definitum, &
quicquid prædicatur de omni genere vel omni
spe

specie five absolute, five in certo statu spectato, illud etiam prædicandum est de omni specie sub genere contenta, vel de omni individuo sub specie contento, five absolute, five in eodem statu spectato.

§. 35.

Non absimili modo definitum de subiecto negatur ob notas definitionem ingredientis in eo non animadversas : & prædicatum de Subiecto, quod ad hoc vel istud genus aut hanc vel istam speciem pertinere intelligimus, negamus propterea quod idem de integro genere vel specie negari recordamur. V. gr. Ubi intelligimus, Titium esse avarum, nobisque occurrit, nullum avarum esse forte sua contentum, extemplo inferimus: Titium non esse forte sua contentum.

§. 36.

Oriuntur hoc pacto *ratiocinia negativa*, dum enunciamus, definitionem quandam vel propositionem universalem ad subiectum datum applicari non posse, quorum adeo fundamentum est vulgo sic dictum *Dictum de nullo*: Cui non competit definitio, illi nec competit definitum, & quicquid negatur de omni genere, vel omni specie, five absolute, five in certo statu spectato, illud etiam negandum est de omni individuo sub specie contento, five absolute, five in eodem statu spectato.

§. 37.

§. 37.

Ratiocinii (quæ tertia mentis operatio est), distincta expressio *Syllogismus* audit. Omnes autem Syllogismi vi dicti de omni & nullo ad has formas tandem reducuntur:

1. Cui competit ^{animal rationale} definitio, illi competit ^{homo} definitum.

Atqui ipsi ^{And.} A competit definitio.

Ergo eidem ^{And.} A competit definitum.

2. Quicquid continetur sub ^{homo} A, eidem competit ^{rationalis} C.

Atqui B continetur sub A.

Ergo ipsi B competit C.

3. Cui non competit ^{homo} definitio, illi nec competit ^{animal rationale} definitum.

Atqui A est ex eorum numero, quibus ^{Asinus} non competit definitio.

Ergo eidem A nec competit definitum.

4. Quicquid continetur sub ^{homo} A, eidem non competit ^{quadrupedem esse} C.

Atqui B continetur sub A.

Ergo eidem B non competit C.

§. 38.

Omnis adeo Syllogismus tribus constat propositionibus, quarum binæ priores, ex quibus tertia infertur, *Suntiones* seu *Præmissæ* appellantur, sicuti quæ ex iisdem infertur *Conclusio* vocatur.

§. 39.

Tres istæ propositiones ex tribus terminis
(*Thüm. Inst. Log.*) B com.

componuntur habentque præmissæ terminum communem, quem *medium* vocant. Disponitur is in una præmissa cum Subiecto, in altera cum prædicato Conclusionis, diciturque illa *propositio minor*, hæc vero *propositio maior*.

§. 40.

Patent hinc regulæ Syllogismorum generales:

1. *Syllogismus non plures, quam tres habere potest terminos (§. 39.).*
2. *Medius terminus ingredi nequit conclusionem, quemadmodum vi Dicti de omni & nullo (§. 34. 36.) perspicuum est.*
3. *Ex puris particularibus nihil sequitur (§§. cit.)*
4. *Ex puris negativis nihil sequitur (§. 36.).*

§. 41.

Medius terminus in præmissis diversimode disponi potest. Aut enim in maiore subicitur, in minore prædicatur; aut in utraque præmissa prædicatur; aut in utraque subicitur; aut denique in maiore prædicatur, in minore subicitur. Atque ita enascuntur quatuor *Syllogismorum figurae*. Tribus prioribus contenti sunt cum *Aristotele* Logici: quarta a *Galeno* addita *Galenica* vocari solet.

§. 42.

Formæ illæ Syllogismorum generales vi Dicti de omni & nullo constitutæ (§. 37.), sunt Syllogismi primæ figuræ (§. 41.). Est itaque prima figura possibilis atque ratio argumentandi maxime naturalis (§. 33. 35.).

§. 43.

§. 43.

Manifestæ præterea sunt ex eadem ratione (vi §. 37.) syllogismorum primæ figuræ regulæ speciales:

1. Major semper sit universalis.
2. Minor semper sit affirmans.
3. Minor & conclusio eandem habent quantitatem, seu utraque vel universalis vel particularis est.
4. Si minor negans, conclusio negans.

§. 44.

Cum vi harum regularum in Syllogismis primæ figuræ vel utræque præmissæ universaliter affirmantes, vel major universaliter negans, minor universaliter affirmans, aut major universaliter affirmans, minor particulariter affirmans & denique major universaliter negans, minor particulariter affirmans esse queant, adparet dari quatuor primæ figuræ modos quos veteres sequenti characteristica expresserunt:

bArbArA, cElArEnt, dArII, fErIO,

ubi notandi versiculi:

asserit A, negat E, sed universaliter ambæ.
asserit I, negat O, sed particulariter ambæ.

§. 45.

Quodsi in syllogismo una præmissarum deest, Syllogismus dicitur *Enthymema*: e. gr.

Titius est tristis.

Ergo caret tranquillitate.

B a

Hic

Hic major propositio deest: qui tristis est, caret tranquillitate.

§. 46.

Syllogismorum hypotheticorum seu conditionalium formas generales ita possumus concipere:

Si A est, etiam est B,

sed est A,

Ergo est B.

aut

Si A non est, non est B,

Atqui B non est

Ergo non est A.

§. 47.

Interdum Syllogismos construimus, qui *disjunctivi* dicuntur & ita se habent:

Aut A aut B est,

Atqui A est, vel Atqui B est.

Ergo non est B. Ergo non est A.

Item

Aut A, aut B est,

Atqui B non est, vel Atqui A non est.

Ergo est A. Ergo est B.

§. 48.

Syllogismi, qui in formam & regulas fundamentales impingere videntur, *contracti* vel *cryptici* sunt. Prioris generis est:

A est B, quia est C.

posterioris:

Quicquid tranquillitatem turbat, hoc fugiendum est.

At-

Atqui tristitia tranquillitatem turbat.
Ergo tristitiam evitemus necesse est.

§. 49.

Qui ad se animum advertit & demonstrationes geometricas accuratius evolvit, perperam a recentioribus quibusdam Syllogismos rejici deprehendet, cum non tantum criterium veritatis optimum, sed & medium sint inveniendi veritatem.

§. 50.

Series Syllogismorum concatenatorum *Probatio*, quemadmodum series Syllogismorum eorumque inter se connexorum, donec occurrant, quorum præmissæ definitionibus, experienciis indubitatis, axiomatibus, propositionibus identicis &c. constant, *Demonstratio* salutatur. Dicuntur autem Syllogismi *concatenari*, si conclusiones anteriorum fiant præmissæ sequentium, vel si plures conclusiones per Syllogismos inter se minime connexas, illatæ considerentur instar notionis complexæ, cujus ope formatum judicium tanquam præmissa ingreditur syllogismum sequentem.

PARS II. DE USU LOGICÆ.

DE USU LOGICÆ IN INVE- NIENDO.

§. 51.

Quicquid cognoscimus vel ad notiones vel ad judicia refertur, cum rem obviam vel simpliciter apprehendamus vi primæ mentis operationis (§. 4.), vel de eadem judicemus per operationem secundam (§. 24.). Ratiocinium, quod est tertia mentis operatio non producit nisi judicium (§. 33. 35.).

§. 52.

Notiones & Judicia investigare licet *a posteriori* seu per *experientiam*. Experiri autem dicimur, quicquid ad perceptiones nostras attenti cognoscimus : quæ ratio est, ut ad experientiam provocans casum singularem allegare teneatur, nisi is sit obvius, aut alteri, cum quo nobis res est, minimum notus.

§. 53.

Consequimur autem experientia duce notionem rei distinctam, si quæ in eadem distinguuntur, non fuerint numero nimis multa, eorumque discrimen observatu facile; nos ve-

to attentione usi singula primum sigillatim contemplemur, mox eadem inter se conferentes, ordinem, quo se invicem sequuntur, ac nexum, quo inter se cohærent, perspiciamus. Unde simul patet, quonam in casu notio fiat adæquata (§. 9.).

§. 54.

Dum ea, quæ rei insunt, vel adsunt, vel ab eadem proficiscuntur, tanquam ab ipsa diversa distinguimus, eadem tamen vel ut inexistentia, vel ad ipsum quomodocunque pertinentia consideremus, judicia formamus experientia eadem duce, quæ *intuitiva* appellantur.

§. 55.

Cum experientiæ sint rerum singularium (§. 2.), judicia intuitiva quoque singularia sunt. Ad universalia tamen revocantur, si expendamus, num prædicatum subiecto competat absolute, an in determinato quodam statu. Quod si enim absolute competit, omni subiecto convenit, adeoque propositio universalis est (§. 28.): si determinato quodam in statu competit, omni subiecto in eodem statu convenit, atque adeo accedente determinatione subiecti propositio denuo universalis est (§. cit.).

§. 56.

Cavendum vero, ne, quod vulgo accidit,

B 4.

ex-

experientiis hypotheses admisceamus præconceptas, atque judicia formaturi confusa quadam illationis specie inferamus, quod in experientia minime continerur. Quod hic committitur vitium, *subreptionis vitium* appellamus, idemque in causa est, ut subinde in terminis contradictoriis uterque ad experientiam provocet.

§. 57.

Quodsi rerum affinium notiones inter se conferantur, atque determinationibus diversis rejectis retineantur, quæ sunt eadem, ex notionibus specierum investigantur notiones generum (§. II.). Quodsi contraria ratione tot, quibus fieri potest, modis determinentur, quæ in notione generis indeterminata relinquuntur, ex dato genere investigantur species. Nec ab simili modo ex notione unius speciei eruuntur alia, vel etiam ex notione unius generis genera alia, diversa nimirum ratione determinando, quam in notione data determinata sunt. E. gr. Lex in genere definitur per regulam, juxta quam actiones liberas dirigere obligamur. Si modus obligandi diversimode determinetur, prodibunt Legis species, nempe Lex naturalis, ob obligationem naturalem, divina ob divinam, civilis ob civilem, herilis ob herilem & ita porro. Atque hæc est methodus investigandi notiones *a priori*.

§. 58.

Judicia a priori investigantur per definitionum & propositionum universalium applicationem vi syllogismi factam (§ 33. 35.), atque concatenatione syllogismorum opus est, qualem demonstratio exigit (§. 50.). *Judicia per ratiocinia* ex aliis propositionibus ante notis investigata dicuntur *discursiva*. Adparet autem ad ea invenienda opus esse definitionibus & propositionibus ante cognitis, neque adeo hunc laborem tyronibus convenire.

§. 59.

Quemadmodum vero hinc constat, syllogismum esse medium inveniendi veritatem, etsi non unicum, ceu in Metaphysicis uberius patebit; ita ejus usus est præclarus, ubi propositionem aliquam methodo mathematica demonstrare voluerimus. Etenim si probatio propositionis ad syllogismos formales reducat, ita ut præmissæ continuo per novos probentur syllogismos, donec occurrant non nisi definitiones, vel axiomata vel judicia intuitiva &c.; tum quidem patebit, quænam definitiones, axiomata & observationes tanquam principia præmitti debeant & quomodo syllogismi sint concatenandi, ut demonstratio prodeat.

§. 60.

En rei arduæ exemplum facile! Aërem esse

gravem probatur experimento, quod scilicet globus æneus evacuatus & ad bilancem appositus levior deprehendatur, quam aëre plenus. Si demonstratio desideretur ad formam mathematicam reducta, instituatur probatio syllogismis formalibus hunc in modum:

Quicquid lanci impositum eam deprimit, illud est grave.

Atqui aer lanci impositus eam deprimit.

Ergo est gravis.

Major probatur hoc prosyllogismo.

Quicquid nititur deorsum versus centrum terræ, illud est grave.

(2.) Atqui quicquid lanci impositum eam deprimit, illud nititur deorsum versus centrum terræ.

Ergo quicquid lanci impositum eam deprimit, illud est grave.

(1.) Major patet ex definitione gravitatis, quod sit nitus deorsum versus centrum terræ.

Minor refertur inter notiones communes seu axiomata, atque non indiget ulteriori probatione.

Nil itaque restat, quam ut minor syllogismi primarii probetur: id quod hunc in modum fit:

(4.) Quicquid globo evacuato superadditur, dum ab æquilibrio recedit & lanx deprimitur, illud lanci impositum eam deprimit.

At.

Atqui aër globo evacuato superadditur, dum ab æquilibrio recedit & lanx deprimitur.

Ergo aër lanci impositus eam deprimit.

(3.) Major continetur tanquam casus specialis sub notione communi generali, quod corpori ad bilancem appenso adjectum tollit æquilibrio, id lanci impositum eam deprimit.

(5.) Minor est iudicium intuitivum vi experimenti formatum.

Integra igitur probatio absoluta est.

Quodsi jam præmissas syllogismorum consideres, quibus definitionibus, axiomatis & experientiis opus sit, nulla superest difficultas demonstrationem ad formam mathematicam revocandi hoc modo:

Definitio.

1. Gravitas est nifus continuus deorsum versus centrum terræ.

Axioma 1.

2. Quod lanci impositum eam deprimit, illud nititur deorsum versus terræ centrum.

Axioma 2.

3. Illud lanci impositum eam deprimit, quod corpori ad bilancem appenso adjectum æquilibrio tollit.

Corollarium.

4. Ergo lanci impositum eam deprimit, quod glo-

globo evacuato superadditur, dum ab æquilibrio recedit & deprimitur lanx.

Experimentum.


5. Si globus ab aëre ope antliæ pneumaticæ evacuatus & bilanci impositus cum pondere ex altera parte constituto ad æquilibrium reducitur, & deinde aperto epistomio aër externus in ejus cavitatem irruit, æquilibrium tollitur & lanx, cui impositus est globus, deprimitur.

Theorema.

Aër est gravis.

Demonstratio.

Cum globus evacuatus & in balance ad æquilibrium redactus ab eodem recedat, lance depressa, dum aperto epistomio aër in cavitatem irruit (§. 5.); hunc esse depressionis causam patet (§. 4.). Quoniam igitur aër versus centrum terræ deorsum nititur (§. 2.), quin gravis sit, dubitari nequit (§. 1.). *q. e. d.*



CAP. II.

DE USU LOGICÆ IN DIJUDICANDA VERITATE.

§. 61.

COgnitio nostra vel est objecto seu rebus cognitis conformis, vel difformis. Illa vocatur *vera*; hæc autem *falsa* sive *erronea*.
Quam-

Quamobrem cum omnis cognitio vel ad notiones vel ad iudicia sive intuitiva sive discursiva referatur (§. 51.); illæ erunt veræ, si rei repræsentatæ similes (§. 4.); erunt falsæ, si fuerint dissimiles: contra hæc vera erunt, si prædicatum conveniat suo subiecto; falsa, si non conveniat.

§. 62.

Si quis propositionem demonstrare, hoc est, ex principiis immotis, definitionibus scilicet, axiomatis & experienciis claris concatenata syllogismorum serie deducere noverit (§. 50.); eam *scire* dicitur: habitus vero demonstrandi, quod affirmamus, vel negamus, *Scientia* vocatur.

§. 63.

Quodsi in præmissis occurrant propositiones, de quarum veritate nondum certo constat neque per experientiam neque per demonstrationem; propositio insufficienter probata *Opinio* appellatur. Unde apparet, fieri posse, ut alter sciat, quod tibi in opinionum numero est. Patet simul, eas esse mutabiles & cum formidine oppositi conjunctas.

§. 64.

Si definitiones & principia contradictionem involventia tanquam præmissæ syllogismorum assumantur, vel in argumentando in regulas syllogisticas inapungatur; in *errorem* inci-

vidimus : qui adeo arcetur, si probatio in syllogismos redigatur atque hi examini subjiciantur, num præmissæ sint veræ & forma legitima.

§. 65.

De propositionibus itaque judicatur vel examinando experientiam, si judicium referant intuitivum (§. 54.), vel syllogismos, quibus continetur probatio, si discursivum (§. 58.): de notionibus autem & definitionibus applicando regulas de iis supra traditas.

§. 66.

Assensus, qui propositioni propter alterius testimonium datur, ^{per alium} *fides* dicitur, pertinens ad facta, quæ demonstrari nequeunt, perperam vero extensa ad dogmata, quæ suis comprobanda rationibus, ubi *præjudicium autoritatis* gignit.

§. 67.

Ne in credulitatem degeneret, certi sumus necesse est, 1. narrantem omnes facti circumstantias nosse, vel quod testis oculatus adfuerit & attentus, vel quod ab oculato, quæ narrat, acceperit; 2. non desiderari in eo candorem, cum absit suspicio, cur falsa studio fingat, ex principiis moralibus dijudicanda.

CAP. III.

DE USU LOGICÆ IN LIBRIS DIJUDICANDIS & LEGENDIS.

§. 68.

Libri vel sunt *historici*, facta sive naturæ sive hominum recensentes; vel *dogmatici*, veritates universales docentes.

§. 69.

In scriptis historicis attendendum 1. ad veritatem, juxta regulas fidei examinandam (§. 67.); 2. ad ordinem ex circumstantiis præsertim temporis dijudicandum; 3. num sint completa: id quod ex scopo æstimatur.

§. 70.

In historia naturali vel res naturales describuntur, ut earum adipiscamur notiones; vel effectus naturæ ad fundandam rerum naturalium cognitionem recensentur.

§. 71.

In historia ecclesiastica, prudentiam ecclesiasticam salutem ecclesiæ curando; in civili prudentiam civilem salutem reipublicæ promovendi & iura summarum potestatum: in utraque simul regulas providentiæ divinæ & hinc pendentem gloriam Numinis, itemque prudentiam moralem ad virtutis cultum & vitiorum fugam adeo necessariam: in lite-

raria denique cognitionem graduum perfectionum, ad quos scientiæ evectæ, cum genuinis doctrinarum sedibus & incrementum artis inveniendi intendimus.

§. 72.

In scriptis dogmaticis sequentium potissimum ratio habetur: 1. num omnia de argumento, quod tractant, reperta contineant, aut quæ ad scopum specialem sufficiunt; vel num prolixitate peccent: 2. num Autor in sola experientia adquiescat, atque hoc in casu incerta certis misceat: num 3. rationibus theses, quas defendit, suffulciat: 4. num terminos sufficienter explicet (§. 50.): 5. num dogmata inter se connectat, rationes sequentium ab antecedentibus petens (§. cit.) & terminis non utens in definitionibus nisi in superioribus explicatis (§. 15.): 6. num perspicuitati licet, dum terminis non utitur nisi ante definitis, aut quorum notiones supponere licet (§. 19.).

§. 73.

Ad scripta historica legenda sufficit attentata & iterata lectio eo modo instituta, quo ad notiones distinctas investigandas utimur (§. 53.), si non intendimus, nisi ut memoriæ mandentur, quæ legimus. Quodsi de probabilitate, de ordine ac perfectione iudicium fieri, aut veritates historicæ ad varios usus applicari debent, cum argumentandi ha-

habitu opus est, principiis moralibus & politicis, imo dogmatis aliarum quoque disciplinarum (§. 33. 35. 71.).

§. 74.

Scripta dogmatica lecturus 1. Scopum Autoris partim ex libri titulo, partim ex præfatione colligat, ut appareat, quænam ex eo cognitio petenda. 2. Veritates in singulis periodis obviæ in sua distinguantur genera, in definitiones scilicet (§. 14.), axiomata, postulata, problemata & theoremata (§. 32.). 3. Investigentur notiones cum singulis vocibus jungendæ (§. 23.), quæ non sunt definitæ, ne sensum alienum Autori affingamus (§. 19.). 4. Examinentur singula veritatum genera per regulas competentes (§. 65.).



CAP. IV.

DE USU LOGICÆ IN CONVINCENDO, REFUTANDO & DISPUTANDO.

^{über §. 75. in d. 1. u. 2. u. 3. u. 4. u. 5. u. 6. u. 7. u. 8. u. 9. u. 10. u. 11. u. 12. u. 13. u. 14. u. 15. u. 16. u. 17. u. 18. u. 19. u. 20. u. 21. u. 22. u. 23. u. 24. u. 25. u. 26. u. 27. u. 28. u. 29. u. 30. u. 31. u. 32. u. 33. u. 34. u. 35. u. 36. u. 37. u. 38. u. 39. u. 40. u. 41. u. 42. u. 43. u. 44. u. 45. u. 46. u. 47. u. 48. u. 49. u. 50. u. 51. u. 52. u. 53. u. 54. u. 55. u. 56. u. 57. u. 58. u. 59. u. 60. u. 61. u. 62. u. 63. u. 64. u. 65. u. 66. u. 67. u. 68. u. 69. u. 70. u. 71. u. 72. u. 73. u. 74. u. 75. u. 76. u. 77. u. 78. u. 79. u. 80. u. 81. u. 82. u. 83. u. 84. u. 85. u. 86. u. 87. u. 88. u. 89. u. 90. u. 91. u. 92. u. 93. u. 94. u. 95. u. 96. u. 97. u. 98. u. 99. u. 100.}
Veritatis *convincimur*, dum propositioni assensum ob rationes sufficientes præbemus, hoc est, quod eam sufficienter explicatam (§. 15.) & satis probatam (§. 50.) intelligimus.
 (Thüm. Inst. Log.) C §. 76.

§. 76.

Alterum itaque conviçturus 1. singulos, quibus utitur, terminos definire tenetur, nisi eosdem alteri perspectos, vel ex notionibus clavis obviis satis cognitos supponere licet (§. 19.): 2. demonstrationem conditurus præmissas syllogismorum tamdiu probet, donec ad tales pervenerit, quæ ab altero non vocantur in dubium (§. 50.). Unde usus citationum in scriptis Mathematicorum & philosophia *Wolfiana* elucet, cum inde innotescat, quænam ordine sint addiscenda, antequam conviçtioni locus detur.

§. 77.

significat Requiritur autem a parte convincendi, ut non modo attentionem afferat, sed ut dispositionem quoque ad conviçtionem habeat, quæ ex principiorum familiaritate oritur & ratiociniorum in conc. teneta serie continuatorum exercitio, affectibus non impedienda.

§. 78.

Si assensum præbemus rationibus insufficientibus ducti, vel quod in veritatibus concipiendis non fuerimus exercitati, vel ob præcipientiam, vel ob præjudicium autoritatis; enascitur ^{*subitaneus*} *persuasio*, quæ subinde satis firma est, ita ut cum conviçtione confundatur.

§. 79.

§. 79.

Ut igitur eam evitemus, 1. Studium Martheos puræ ea ratione tractetur, ut demonstrationes optime concipiantur: 2. ad leges definitionum & demonstrationis singula accurate examinentur: 3. ad exempla respiciendum magnorum & celebrium virorum ex præcipitantia & nimia erga se confidentia ob felices in meditando successus orta lapsorum.

§. 80.

Alterum *refutaturus* eum erroris convincere intendit, atque adeo ad eas se attemperare tenetur, quas alterum convicturo præscripsimus, regulas (§. 76.). Et ne attentionem requisitam impediat (§. 77.), a verbis, quæ contumeliam vel injuriam redolent, abstinendum est, nisi singulares circumstantiæ postulaverint, ut factus adversarii importuni retundatur, præsertim cum ad convictionem non adsit in eodem necessaria dispositio (§. 77.).

§. 81.

Cum altero *disputaturus* eum coram erroris convincere molitur, atque adeo in terminis contradictoriis versari debent disputantes, negante altero, quod alter affirmat; affirmante altero, quod alter negat.

§. 82.

Qui thesin oppugnat, dicitur *Opponens*: qui defendit, *Respondens*: qui partes Respondentis suscipit armis ad defendendum destituti, *Præses*.

§. 83.

Opponens, antequam ad oppositionem accedat, 1. terminorum explicationem a Respondente poscat, si quidem ambiguum & obscurum sensum fundant, ut evitetur *Logomachia*. 2. Syllogismo adversus thesin, quam oppugnat, insurgat, cujus conclusio est illius contradictoria (§. 81.). 3. Præmissas tamdiu novis probet syllogismis, donec occurrat, cujus ambæ a Respondente conceduntur (§. 76.).

§. 84.

Respondens 1. ab opponente propositum assumat syllogismum, hoc est, repetat, ut appareat, ipsum opponentis mentem cepisse. 2. Præmissas iterata vice repetat, notans ad singulas, num eas concedat, an probationem ulteriorem desideret, an interea transire permittat, donec altera fuerit sufficienter probata, utendo v. gr. formulis *Concedo majorem, vel transeat major; nego minorem*. 3. Si præmissas alio respectu concedat, alio neget; utatur distinctione, eamque ad argumentum applicet: quo in casu opponentis est, vel probare præmissam sub limitatione, qua negatur; vel limitationem tanquam ineptam impugnare.

§. 85.

Cum Præses vices Respondentis in se suscipiat (§. 82.), eadem, quæ Respondentis, ejus sunt officia.

F I N I S.

IN

INSTITUTIONES
ONTOLOGIÆ,
SIVE
PHILOSOPHIÆ
PRIMÆ,
METAPHYSICÆ
PARS PRIMA.

RELATIONS
OF THE
HUMAN
MIND
TO
THE
UNIVERSE
AND
TO
ITSELF



INSTITUTIONES ONTO- LOGIÆ,

SEU
PHILOSOPHIÆ PRIMÆ
PROLEGOMENA.

§. 1.

Ontologia seu Philosophia prima est scientia
entis in genere.

§. 2.

Primam constituit *Metaphysica* partem, quæ
vulgo *pars ejus universalis* audit. Est enim *Me-
taphysica* complexus quarundam disciplinarum,
veluti *Ontologia*, *Pneumatica*, hoc est, *Psycholo-
gia* & *Theologia naturalis*, atque *Cosmologia ge-
neralis*, quam Philosophus noster addidit.


§. 3.

Definiri adeo potest *Metaphysica* per scien-
tiam entis & mundi in genere rerumque imma-
terialium.

§. 4.

Cum Philosophia prima primas explicet
notiones primasque veritates, usus ejus per
disciplinas ceteras omnes sese diffundit. Lu-

cem affundit definitionibus & intellectum dirigit in inveniēdo ac demonstrando: id quod in progressu patebit.



CAP. I.

DE PRINCIPIIS PHILOSOPHIÆ PRIMÆ.

§. 5.

Prin cipia Philosophiæ primæ duo sunt, nempe *Principium ^{primum} contradictionis* ab Aristotele introductum & *Principium rationis sufficientis* a Leibnitio in Metaphysica speciali usurpatum, a Philosopho nostro in Ontologia cum principio contradictionis conjunctum.

Das Satz des Widerspruchs
Principium contradictionis

continetur his verbis: impossibile est idem simul esse & non esse. Homini adeo naturale est, prout in casibus singularibus pater, ut demonstratione nec opus habeat, nec ex principio quodam priori demonstrari possit. Quis enim concipere potest, solem simul lucere & non lucere, me simul scribere & non scribere, ens aliquod esse simul hominem & non hominem, v. gr. equum &c.?

§. 7.

Hoc ipso principio continetur notio *contradictio-*

dictionis, quæ in simultanea ejusdem affirmati-
one & negatione consistit.

§. 8.

Principium rationis sufficientis his verbis e-
nunciatur: *Nihil est sine ratione sufficiente, cur*
aliquid potius sit, quam non sit.

§. 9.

Quinud
Ratio vocatur id, unde intelligitur, cur al-
terum sit. Unde principii rationis sufficientis
hic est sensus: Si aliquid ponatur esse, semper
erit aliquid, unde intelligi potest, cur illud
sit.

§. 10.

Illud principium perinde ac principium
contradictionis per experientiam animis ho-
minum sese insinuat, quamvis majori atten-
tione ad exempla opus sit, quam in priori casu,
Demonstrationis loco esse potest, quod eo sub-
lato, tollatur differentia inter veritatem &
somnia. In somnio omnia fiunt sine ratio-
ne; in rei autem veritate cum ratione suffi-
ciente. E. gr. In somnio nulla adest ratio, cur
vestimentum viride mutetur in cæruleum; in
rei veritate maculam cæruleam contrahit ab
aceto effuso.

CAP. II.

*De fan
de velle
ngu. d. d. d.
Willelmus
d. d. d. d.
Engelmann*

DE ESSENTIA ET EXISTENTIA ENTIS, AGNATIONISQUE NOTIONIBUS.

§. II.

in suis for
Impossibile est, quod contradictionem involvit, veluti bilineum rectilineum: *in suis for* Possibile contra, quod nullam involvit, seu quod non est impossibile. Vocatur hæc *in suis for* *possibilitas interna* seu *intrinseca*. *possibilitas est negatio contradictionis.*

§. 12.

Cum omnia possibilialia non actu existant, supersunt alia, quæ ad id requiruntur, ut existant. Unde patet a *posse ad esse* seu a *possibilitate ad existentiam* non valere consequentiam.

§. 13.

Patet ulterius *existentiam* sive *actum* esse Complementum possibilitatis, in casibus specialibus distinctius explicandum.

§. 14.

Cum actum non consequatur, nisi quod intrinsecam habeat possibilitatem; *ab esse ad posse* seu *ab existentia ad possibilitatem* valet consequentia.

§. 15.

Ens dicitur, quicquid existere potest, sive actu existat sive non. *Non-ens* igitur est, quod existere nequit.

§. 16.

§. 16.

Ens est possibile (§. 15.), consequenter a contradictione liberum (§. II.); non ens contra impossibile, consequenter contradictionem involvit (§. cit.).

§. 17.

Non ens, quod fingitur instar entis, vocatur *ens rationis* ut equus alatus. Entia igitur rationis extra mentem non existunt (§. 15.).

§. 18.

Omni in ente varia distinguuntur, quibus concipitur, seu in mente repræsentatur. Alia sunt ita comparata, ut iis determinatis una determinenter cetera, quæ constanter insunt: alia vero per se invicem non determinantur, sed saltem sibi mutuo non repugnant. E. gr. In Parallelogrammo quatuor habemus latera & quatuor angulos. Duobus lateribus cum angulo uno, quem interceptiunt, determinatis, una determinantur cetera, nempe duo reliqua latera & anguli tres reliqui: duo autem illa latera & angulus interceptus per se mutuo non determinantur, sed tantummodo non repugnat, ut sub dato angulo invicem jungantur. Datur adeo aliquid primum in ente, unde ceterorum, quæ insunt, & inesse possunt, ratio pendet (§. 9.).


§. 19.

Primum, quod de re concipitur & unde ceterorum, quæ insunt vel inesse possunt, ratio redditur, appellatur *Essentia*. Unde patet, qui

essentiam rei intelligit, illum posse rationem reddere, quæ rei insunt. Patet ulterius, essentiam consistere in iis, quæ sibi mutuo non repugnant, quorum tamen unum per alterum non determinatur (§. 18.), adeoque possibilitate rei intrinseca absolvi (§. 11.).

§. 20.

Fieri nequit, ut possibile una impossibile sit (§. 6.). Quod vero aliter se habere nequit, immutabile est, atque adeo essentiæ rerum immutabiles sunt (§. 19.), consequenter etiam una alteri incommunicabilis, ut lignum simul ferrum esse nequeat, nec corpus una spiritus.



CAP. III.

DE GENERALIBUS ENTIS AFFECTIONIBUS.

^{hæc sunt prædicata} ^{21. Lingua} ^{quæd}
Entis ^{breve} *affectiones* sunt prædicata, quorum ^{dispositio} *dispositio* vel in essentia sola, vel una extra eandem continetur (§. 8.). Illæ dicuntur *attributa*; hæ autem *Modi*. ^{dispositio naturalis} *Attributa* nimirum per ea, quibus ens in esse suo determinatur, una determinantur; modi per essentiam sufficienter determinati non sunt, sed rationes determinantes adhuc alias requirunt. Quatenus tamen ens ad istos modos admittendos aptum est per ^{essentiam} *essentiam*; *dispositio naturalis* ad illum modum eidem tribuitur. Exempli loco est calor, quem lapis tanquam modum recipere valet.

§. 22.

§. 22.

Eadem sunt entia, quæ sibi mutuo possunt substitui salvo omni respectu, ita ut perinde sit, ac si substitutio non fuisset facta. *Diversa* vero, quæ sibi mutuo substituta mutationem producant. Ita pondera eadem sunt, quibus sibi invicem substitutis æquilibrium non tollitur, diversa vero, quibus substitutis tollitur.

§. 23.

Identitas eorum, per quæ res discerni debent, vocatur *Similitudo*. Unde *similia* sunt, in quibus eadem sunt, per quæ entia discernere debemus: *dissimilia* vero, in quibus diversa. Ideo *Leibnitius* dixit, similia non posse discerni, nisi per *compræsentiam*, hoc est, unum alteri vel immediate vel mediante aliquo tertio applicando, v. gr. si unum horologium juxta alterum simile collocetur, vel ædificia similia distinguantur per loca circumjecta.

§. 24.

Ens singulare seu *Individuum* est, quod omnimode determinatum est, ita ut in eo non occurrat, quod diversis adhuc modis determinari possit. *Universale* e contrario vocatur, quod præter ea, quæ determinata sunt, adhuc alia continet diverso modo determinabilia. E. gr. Triangulum æquilaterum in universali definitur, quod tria latera æqualia habet. In eo laterum ratio & angulorum quantitas, quæ inde

de pender, determinata est: at magnitudo laterum infinitis modis determinari potest.

§. 25.

Omnimoda igitur determinatio eorum, quæ rebus insunt ^{quidam enim eorum determinatio} *principium individuationis*, constituit, id quod ^{determinatio} *Hæccitatem* appellarunt Scholastici. *ΤΟΥΤΟΤΗΤΑ*

§. 26.

^{similitudo dicitur} Ex identitate determinationum nascitur similitudo (§. 23.), & similitudo individuorum est illud, quod *Speciem*; similitudo specierum istud, quod *Genus* dicimus. Unde porro patet, quidnam sint genera superiora.

§. 27.

^{impossibile dicitur} *Necessarium* est, cujus oppositum impossibile seu contradictionem involvit (§. II.): ^{Contingens vero} *Contingens* vero, cujus oppositum possibile, seu contradictionem non involvit (§. II.). E. gr. Deambulatio est contingens, cum eo tempore, quo deambulas, non repugnet, ut sedeas vel stes &c. consequenter ut non deambules. Vocatur necessarium hoc sensu acceptum ^{simpliciter} *necessarium absolute tale*, item *geometrice* vel *metaphysice necessarium*. ^{Fundatur adeo} *Fundatur adeo necessitas absoluta, Geometrica vel Metaphysica in determinabilitatis unitate; contingentia in ejusdem diversitate.*

§. 28.

Absolute igitur necessarium aliter esse nequit,

ac immutabile est: contingens vero aliter se habere potest, atque adeo mutabile & contra.

§. 29.

Cum essentiae rerum immutabiles sint (§. 20.); eadem necessariae sunt (§. 28.), consequenter etiam aeternae, quoniam nullum assignari potest tempus, quo ens cæperit esse possibile & quo desinet esse possibile.

§. 30.

Cujus oppositum in hypothese data impossibile, illud *hypothetice necessarium* dicitur. Ita hypothetice necessarium est, aquam ebullire, si ignis sufficiens supponatur.

§. 31.

Non igitur repugnat, ut contingentia sint hypothetice necessaria (§. 27.).

§. 32.

Quoniam attributa per essentiam entis sufficienter determinantur, modi non item (§. 21.); illa perinde ac essentiae necessaria esse debent, hi minime (§. 29.), atque adeo contingentes sunt (§. 27.).

§. 33.

Inseparabilitas eorum, per quæ ens in esse suo determinatur (§. 18.), unitatem absolvit. Atque hinc intelligitur: omne ens esse unum.

§. 34.

Si plura a se invicem distincta constituent unum, illa vocantur *Partes*; hoc *Totum*.

Part est unumquodque eorum quæ constituent unum. *Totum* est illud in quo sunt singulae partes. §. 35.

§. 35.

Quoniam similia salva similitudine quantitate differre possunt, utpote quæ non ingreditur ea, quibus ens in esse sui generis vel speciei determinatur (§. 23. & seqq.); ^{quantitas} ~~significatio~~ definiri potest per discrimen internum similitudinis. *in immutabilibus, signatibus, utraque est æqualiter digne.*

§. 36.

in signatibus ab intellectu
Æqualitas est identitas quantitatis: ut adeo æqualia audiant, quæ salva quantitate sibi mutuo substitui possunt (§. 22.). *in qualitate, latus, in universis sunt.*

§. 37.

Omnes partes simul sumtæ sunt idem cum toto (§. 34.), consequenter totum iisdem æquale (§. 36.): quæ æqualitas cum de partibus actualibus prædicetur (§. 34.), non extendenda est ad possibiles, quæ coexistere nequeunt. E. gr. 4 & 2. sunt partes senarii actuales, sed 5, 4. & 3. tantum possibiles. Unde $6 = 4 + 2$ sed non $6 = 5 + 4 + 3$.

§. 38.

Minor est, maius minus, illi duo autem, minor est
Minus est, quod alterius parti æquale: *maius est, quod illi duo autem, maior est*
Majus vero, cujus pars alteri toti æqualis est. Unde totum parte majus; pars toto minor (§. 34.).

§. 39.

ludo est
Multitudo partium vocatur Magnitudo. *ludo continua*
Unum vero in abstracto Unitas atque multitudo unitatum Numerus. Ad eundem nempe nu-

numerum referuntur entia tanquam unitates, quæ ad idem genus, vel ad eandem speciem referuntur (§. 26. 33.). Concipitur numerus ad modum magnitudinis, ita ut unitates considerentur tanquam partes.

§. 40.

Si ea, quibus ens in esse suo determinatur (§. 18. 24. & seqq.), fuerint simul; ens dicitur permanens: si continuo se invicem sequantur, ens successivum appellatur, quale est motus, cuius partes non una existunt.

§. 41.

Similitudo obvia in modo, quo res juxta se invicem collocantur, vel se invicem insequuntur, est illud, quod ordinem salutamus. Ita Euclides ordine conscripsit Elementa sua, cum propositio præcedat, quæ ingreditur demonstrationem sequentis.

§. 42.

Cum similitudo ex determinandi identitate nascatur (§. 23.), omnis ordo suas habet regulas, juxta quas determinantur, quæ juxta se invicem collocanda veniunt, vel se invicem sequi debent. Ita Euclides in ordine propositionum eam observavit regulam, ut ea priori loco ponatur, qua opus est ad demonstrandam alteram, hæc vero locum occupet posteriorem.

(Thüm. Instit. Ontol.)

D

§. 43.

§. 43.

Cum in essentia entis contineatur ratio attributorum, & in entibus aliis extra ipsum ratio modorum (§. 21.), præter attributa autem & modos nil quicquam ei convenire possit, obstante principio rationis sufficientis (§. 8.); in omni enti est veritas (§. 10.), seu omne ens est verum. Ut adeo *Veritas* sit ordo eorum, quæ rei conveniunt (§. 41.). Est nempe ordo istiusmodi, qualis in Elementis *Euclidis* occurrit (§. cit.) & principium rationis sufficientis est fons omnis veritatis (§. 8.).

§. 44.

Si in varietate rerum fuerit consensus, ita ut singula ex rationibus generalibus iisdem determinentur; dicitur is ^{+ *Wollesungen*} *perfectio*. E. gr. Quæcunque ad structuram oculi pertinent, per imaginem in oculo delineandam radiis ab objecto ammissis determinantur, in eo concurrentibus singulorum rationibus, ut eadem clara sit ac distincta, quantum ad visionem sufficit, atque propter hunc consensum oculus dicitur perfectus.

§. 45.

Wann in vier neuen Endzwecken (in 4. H. 1. 2. 3. 4.)
Si una fuerit ratio determinans generalis, in quam ceteræ resolvuntur; *perfectio* est *simplex*, si plures fuerint, *composita*: qualis in fenestra observatur, si non modo illuminatio.

tionis conclavis, sed & commoditatis prospere
 Etus habeatur ratio.

§. 46.

consentanea

Determinatio rationi conformis regulam
 parit: a qua aberratur, si rationi non conveniat,
 Atque hæc aberratio defectum gignit. *vitium* *fest* *apud auctores*

§. 47.

In perfectione composita regulæ e diverso
 fonte dimanant (§. 45.). Fieri itaque potest, ut
 inter se collidantur, una locum non habituræ.
 Ea regularum collisio *Exceptionem* parit: unde
 oritur in ente imperfectio ob perfectionem to-
 tius admittenda. Quem igitur in finem ea re-
 gula postponenda, cujus neglectus cum majore
 totius perfectione consistit: id quod in casibus
 singularibus ex rationibus determinantibus
 generalibus æstimatur, cum constet, quænam
 illarum sit potior.

§. 48.

Gaudent adeo perfectiones suis gradibus
 non modo ob regularum multipliciter (§. 45.
 46.); sed & ob modum exceptionum (§. 47.).
 Unde perfectius plures observationes genera-
 les suppeditat imperfectiori.

§. 49.

Quicquid conceipimus tanquam a nobis di-
 stinctum, illud extra nos representamus,
 Quæcunque tanquam a se invicem distincta

concipimus, illa *extra se invicem* repræsentamus, vi principii contradictionis (§. 6.).

§. 50.

Quamprimum coëxistentia extra se invicem & extra nos nobis repræsentamus, ideam *spatii* habemus, prout imaginari quidpiam conantibus apparet. Quodsi ergo distincte expendamus, quid notio spatii involvat, in ea non reperimus, nisi ordinem coëxistentium seu simultaneorum, vi cujus primum est extra secundum, quemadmodum secundum extra tertium & ita porro (§. 41.). Atque determinatus modus ceteris coëxistendi, qui enti unicuique convenit (§. 24.), est proprie loquendo id, quod *Locus* appellamus. *Situs est ordo interruptorum.*


§. 51.

Quando modum coëxistendi cum ceteris entibus ab ente ipso distinguimus, eum tanquam extra ipsum repræsentamus (§. 49.), atque hinc spatium ex locis tanquam ex partibus compositum imaginantur, quæ sibi mutuo similes non nisi numero differunt. Cavendum vero ne spatium imaginarium cum reali confundamus.

§. 52.

Qualis ordo in simultaneis observatur, talis etiam in successivis conspicitur, ubi unum est actu, vocaturque *præsens*: sublato actu præ-

præsentis sequitur alterum, quod modo in statu puræ possibilitatis constitutum erat, & ita porro. Quod ab actu recidit in statum possibilitatis, *præteritum* dicitur: quod ut a potentia ad actum traducendum consideratur, *futurum* audit. Atque hic ordo ^{successivorum} in *successivis* est, quod *Tempus* appellamus, cujus partes cum non sint simul, tempus inter entia successiva referendum (§. 40.). Est vero & circa tempus perinde ac circa spatium imaginationi locus, quæ existentiam ab existente separat & inde ens quoddam veluti *successivorum* receptaculum fingit. Quemadmodum vero notio imaginaria temporis imaginariam spatii illustrat: ita similiter vera temporis notio veram spatii notionem illustrat: id quod, notiones conferenti perspicuum est.



CAP. IV.

DE ENTE COMPOSITO.

§. 53.

E*ns compositum* dicitur, quod ex pluribus a se invicem distinctis constat, partibus. Differt notio totius a notione compositi. Nam in notione totius potissimum spectatur identitas entis cum partibus simul sumtis; in notione compositi determinatio entis

in esse suo per plura simul sumta. Atque adeo in composito habetur ratio nexus partium, qui in notione totius non attenditur.

§. 54.

Cum partes compositi a se invicem distinguantur (§. 53.), adeoque extra se invicem existant (§. 49.), quælibet illarum suum habet locum & compositum ex iis spatium replet (§. 50.), determinatam quoque habet magnitudinem (§. 39.), quæ ad aliam relata determinatæ rationis est, ob cujus determinabilitatem compositum dicitur *Mensurabile*. Nimirum *metiri* idem est, ac rationem magnitudinis ad aliam datam homogeneam investigare, v. gr. rationem, quam habet longitudo panni ad longitudinem ulnæ. Magnitudo data, ad quam exigitur ratio alterius, *mensura* vocatur. Dicuntur autem *magnitudines homogeneæ*, ^{eiusdem generis} quarum una aliquoties sumta altera fit major.

§. 55.

Magnitudo ad mensuram revocanda concipitur instar compositi ex partibus similibus atque continuis, atque adeo aliquid imaginarii habet.

§. 56.

Cum magnitudo partium multitudine determinetur (§. 39.), pluribus accedentibus com-

pe-

positum majus; aliis secedentibus, minus fieri potest.

§. 57.

Si multa a se invicem distincta tanquam in uno nobis repræsentamus, *ens extensum* concipimus: unde compositum est extensum & vice versa, omne extensum est compositum (§. 53.).

§. 58.

Quodsi in extenso partes eo ordine juxta se invicem collocentur, ut aliæ inter ipsas ordine alio interponi nequeant; compositum dicitur ^{et non} *continuum*, sive fuerit permanens, si- ^{latet} ve successivum (§. 40.). Quodsi partes alio ordine alias interpositas admittant compositum erit ^{inter interruptum} *interruptum*. Exempli loco est splendor vitri polito, qui vel continuus vel interruptus.

§. 59.

In continuo igitur non admittendæ sunt partes nisi actuales, hoc est, quæ cum in spatio (§. 50.), tum in tempore (§. 52.) per phænomena actualia designantur. Qui notionibus spatii & temporis imaginariis nixi partes possibiles cum actualibus confundunt (§. 50. 52.), in difficultates inextricabiles circa compositionem & divisionem continui incidunt (§. 37.). unde continuum Philosophorum labyrinthus dicitur.

§. 60.

Partes spatii iis distinguuntur, quæ actu existere; partes autem temporis mutationibus, quæ se invicem subsequi observantur. In exiguis adeo partibus discernendis utrobique microscopiorum usus sese commendat.

§. 61.

Extensi limes *figura* vocatur. Unde composita cum determinatam habeant extensionem (§. 57), figuram quoque determinatam habent, atque una per eandem nanciscuntur magnitudinem determinatam.

§. 62.

Cum spatium in ordine coëxistentium consistat (§. 50.); ratio hujus ordinis in rebus coëxistentibus quærenda. Spatium igitur in abstracto consideratum est indifferens ad quodlibet recipiendum. Et idem tenendum est de tempore. Unde non mirum, quod locus mutari possit, mobili non mutato: quæ loci mutatio *motus* appellatur, & palam loquitur, quod entia non necessario sint in hoc loco (§. 27.).

§. 63.

Quoniam partes compositi a se invicem distinctæ (§. 53.), nec necessario huic inhaerent loco (§. 62.); fieri potest, ut a se invicem separantur. Unde compositum *divisibile*. Etenim
divi-

divisio extensi in partium separatione consistit. Eadem ratione patet, partes posse translocari, & quod partibus caret, esse indivisibile.

§. 64.

Compositum ex partium combinatione oritur (§. 53.), atque adeo *modus compositionis* ex diversitate partium & combinationis determinandus ejus essentiam absolvit (§. 19.), & composita similia sunt, quæ eodem modo componuntur (§. 23.).

§. 65.

Quia partes non necessario loco suo inhaerent, sed ex alio in alium moveri possunt (§. 62.): fieri potest, ut nova ratione combinentur, quæ ante fuerant disjuncta & contra a se invicem separentur, quæ fuerant conjuncta. In priori igitur casu essentiae actus ponitur, in posteriori tollitur (§. 64.). Unde patet, composita posse oriri ac interire citra cujuspiam ex nihilo productionem atque annihilationem.

§. 66.

Partibus ablatis vel adjunctis vel transpositis variari potest lineis extensionis. Compositi adeo figura mutabilis. (§. 61.).

In ^{notionem distinctam formare} explicanda compositione ^{se venit q. s. in lib. 7} descenden-
D 5 dum

*in Philosophia
autem non*
dum ad partes, quæ ^{*habentur*} spectantur continuæ, e. gr.
in explicanda structura machinæ non progre-
dimur usque ad partes ligni vel ferri, ex quo
partes machinæ constant: quoniam illæ spe-
^{*habentur*}ctantur ut continuæ, nec earum differentiæ in
machinæ structura habetur ratio.

§. 68.

Quodsi ergo salva continuitate totius mu-
tatio accidat partibus, veluti si nonnullæ mo-
tu gaudeant intestino; essentia compositi per-
durat.

§. 69.

Nulla compositis mutatio accidere valet vi-
hætenus dictorum, nisi quoad figuram, magni-
tudinem, partium situm, motum intestinum at-
que locum totius (§. 53. 56. 62. 63. 66.).

§. 70.

Corpora sunt entia composita. Philosophia
igitur compositi principia præbet philosophan-
di de corporibus, siue naturalia fuerint siue ar-
tificialia.



CAP. V.

DE ENTE SIMPLICI.

§. 71.

Simplex, quod composito opponitur, voca-
tatur illud ens, quod omnibus partibus
caret.

§. 72.

§. 72.

Caret igitur magnitudine (§. 39.), extensione (§. 57.), figura (§. 61.), motu intestino (§. 62.), nec spatium replet (§. 50.), consequenter a composito prorsus differt.

§. 73.

Simplex ex composito oriri nequit. Quicquid enim ex composito oritur, id per partium divisionem, combinationem & transpositionem oritur (§. 65.). Sed cum partibus careat simplex (§. 71.), nec hoc modo oriri potest.

§. 74.

Quod partibus caret, est indivisibile (§. 63.). Ex simplici igitur uno oriri nequit aliud.

§. 75.

Quamobrem simplex aut est necessarium, aut si ortum, detur necesse est ens, quod illud in instanti produxit ob indivisibilitatem, cum antea ^{aut minimali} ^{fluminis} ^{augmelli} eius nihil esset. Suo loco ostendemus, ens simplex necessarium esse Deum & ab eo animas atque elementa rerum corporearum ex nihilo producta esse.

§. 76.

Quoniam in ortu instantaneo non dantur, quæ a se invicem distingui possunt; nec dantur, ^{ortus} simplicium distincte explicari potest. Ortus e contrario compositorum cum sit successi-

vus (§. 65.), distinctam sui explicationem admittit atque in tempore contingit (§. 52.).

§. 77.

Cum partibus careat simplex (§. 71.), nec eo modo interire potest, quo compositum interit (§. 65.), sed si desinere debet, in nihilum recidat necesse est. Transmutationem fingere haud licet: illa enim cum rationem in essentia rei contineat (§. 19.) transmutatio non esset nisi status mutatio, ente subsistente eodem.

§. 78.

Omnis mutatio in variatione modorum consistit, quæ ^{Wandelung} *modificationis* fert nomen. Quoniam vero modus variatur, salva essentia rei (§. 21.); omnis modificatio in ^{Veränderung} *limitum* variatione consistit.

§. 79.

Quodsi ergo simplex mutationibus obnoxium ponamus, limitationes habeat, atque adeo in eo detur aliquid perdurabile, quod limitari possit, necesse est. Destitutum vero limitibus, mutationum impatiens est.

§. 80.

Cum simplicia magnitudine & figura careant (§. 72.), quæ ex limitatione extensi resultant (§. 61.); non aliam in iis limitationem concipere licet nisi intensitatis, quæ graduum quædam multitudo est.

§. 81.

§. 81.

Mutationes, quæ rebus accidunt, antequam contingunt, possibiles sunt (§. 14.). Quoniam itaque entia limitata mutationum capacia sunt (§. 79.): non omnia, quæ in ente limitato possibilia sunt, actu adfunt. Cum in ente illimitato contraria obtineat ratio, quæcunque in eo possibilia sunt, ^{simul} actu eidem inesse debent. Atque hæc est differentia, quæ inter finitum & infinitum intercedit, magni sane momenti, quemadmodum suo patebit loco.

§. 82.

Vi principii rationis sufficientis in entis finiti statu præsentis continetur ratio subsequen-
tis (§. 8.), hoc est, datur in præsentis aliquid, unde intelligitur, cur subsequens sequatur (§. 9.).

§. 83.

Determinatione mutabilium enascitur *status entis*, quem adeo limitationes præsentis constituunt (§. 78.).

§. 84.

Mutatio status, cujus ratio continetur in ente, quod eundem mutat, dicitur *actio*: si vero ejusdem ratio extra ipsum continetur, *passio*.

§. 85.

Nuda agendi possibilitas vocatur *potentia* si.

sive *facultas*, conatus vero agendi *vis* sive *virtus*. Solet etiam nuda patiendi possibilitas vocari *Potentia passiva*.

§. 86.

Ex vi igitur sequitur actio, nisi impedimentum in contrarium adsit: at ex potentia minime, quæ ad actum nondum determinata sufficienter (§. 12.).

§. 87.

Ens agendi potentia præditum salutatur *Substantia*: ea destitutum *Accidens*.

§. 88.

Vis sive *Virtus* non nisi gradus admittit, nullas vero partes, atque adeo non aliam quam intensitatis limitationem (§. 80.).

§. 89.

Hæc intensitatis limitatio cum sit, quæ in simplici locum habet (§. 80.): in ente simplici vis limitata concipienda, qua status continuo mutatur ea quidem lege, ut præsens contineat rationem sequentis (§. 82.).

§. 90.

Deus
in his maym In ente igitur simplici infinito vis illimitata, qua simul actuantur, quæcunque per essentiam ejus in eo possibilia sunt (§. 81.).


§. 91.

Sunt adeo entia simplicia cum finita, tum infinitum substantiæ (§. 87.).

§. 92.

§. 92.

Quoniam suo loco ostendetur, Deum, animam & elementa mundi materialis esse substantias simplices; philosophia simplicium lucem affundit doctrinae de Deo, animæ & elementis rerum materialium.



CAP. VI.

DE RESPECTU ENTIIUM

Thyphalus

AD SE INVICEM.

§. 93.

Quod in se continet rationem alterius, vocatur *Principium*: nimirum *Principium efficiendi*, si contineat rationem, cur alterum sit possibile; *Principium cognoscendi*, si contineat rationem, cur alterum cognoscatur. Quod vero rationem sui in altero habet, *Principiatum* appellatur. *Principium efficiendi* vocatur etiam *causa*.

§. 94.

Quodsi ratio existentiae alterius sit actio quaedam entis, tum ipsum dicetur *Causa efficiens*: principiatum vero hoc in casu *effectus*. Si causa una sufficit ad actum alterius entis, *solitaria*, si plures concurrant, *causa sociæ* appellantur.

§. 95.

§. 95.

Agit autem causa vel vi propria, vel aliunde accepta. In priori casu *principalis* est, in posteriori *instrumentalis*. Nimirum in *Instrumento* tantum est potentia agendi, quæ in vim degenerat per influxum causæ principalis. Unde causa efficiens utitur *instrumento* ad agendum & ab eo juvatur in agendo.

§. 96.

Quoniam causa efficiens *sufficientem* continet rationem, cur effectus existat (§. 94.); posita causa ponitur effectus.

§. 97.

Id, cujus gratia causa efficiens operatur, dicitur *finis*. Atque adeo finis pertinet ad rationes, quibus actio efficientis causæ determinatur.

§. 98.

Causa igitur efficiens finem præcognoscat necesse est, incognitum enim intendere nequit. Unde liquet, finem præsupponere agens intelligens.

§. 99.

Quicquid rationem continet, cur finis actum consequatur, *Medium* vocatur. Unde vulgo dicitur, per medium obtineri finem.

§. 100.

§. 100.

Non confundendus est finis cum rationibus voluntatem determinantibus, ut propter hunc finem agere velimus: quæ *causa impulsiva* nomine insigniuntur & de quibus plura dicentur in Psychologia, ubi de voluntate agemus. Neque cum eo, quod pro extremo sumitur & terminum ultimum alicujus rei significat, propter quem tamen res illa non est. Quo sensu v. gr. mors dicitur finis vitæ.

§. 101.

Finis propter quem quis ita agit, ut si nullum alium finem sibi haberet propositum, tamen ageret, *principalis*; sicuti is, propter quem quis ita agit, ut si nullum alium sibi haberet propositum, non ageret, *minus principalis* fert nomen.

§. 102.

Dividitur etiam in *ultimum* & *intermedium* seu *subordinatum*. Ille est, propter quem sunt intermedii, & hic, qui propter ultimum. Ita e. gr. eruditio potest esse finis ultimus, lectio librorum & meditatio sunt fines intermedii.

§. 103.

Quicquid in ente singulari concipimus, suo modo determinatum est (§. 24.). Sunt autem quædam determinationes necessariae atque
(Thüm. Inß. Ontol.) E con-

constantes; aliæ contingentes atque variabiles. Datis quibusdam necessariis dantur quoque ceteræ (§. 18.), atque adeo inde essentia & attributa (§. 19. 21.), sicuti a variabilibus modi resultant (§. 21.). Quoniam per determinationes necessarias, quas *essentiales* appellare licet, ens in esse suo constituitur, hoc est, ab iis pendet ut ens sit hujus generis atque speciei (§. 26.); determinationes essentielles sunt *Forma* entis. Unde intelligitur, formam dare esse rei atque distingui.

§. 104.

Illud, quod determinatur, vocatur in Composito *Materia*. Unde vulgo dicitur, ens compositum ex materia constare, de qua uberius agemus in Cosmologia generali. Subinde vox materiæ latius sumitur pro eo, quod determinatur & per has determinationes specificatur in quolibet ente. Enimvero hunc significatum seponere consultius est, ne per æquivocationem simplicibus materiam tribuentes eadem, consequenter & animas, materialia statuere videantur.

§. 105.

Ens, quatenus consideratur ut habens essentiam & præter eam aliorum capax, vocatur *Subiectum*: illa vero alia, quæ essentiam consequuntur & vel attributa sunt vel modi, quibus accidentaliter ad aliquam entis
spe-

speciem refertur, *adjuncta* audiunt. Ita e. gr. homo est subjectum doctrinae & doctrina adjunctum hominis, per quam ad speciem quandam entium, nempe hominum doctorum, accidentaliter refertur.

§. 106.

Objectum contra appellari solet illud ens, quod actionem agentis determinat, seu actionis quasi limes est. Unde vulgo dicitur, agens versari circa hoc vel illud objectum. Ita color est objectum visus, quia hic actus animalis per colorem determinatur. Similiter corpora naturalia dicuntur objectum Physici, quia ipsius actiones, quas tanquam Physicus suscipit, per corpora naturalia determinantur. Scholasticis *materia circa quam* objectum est, *materia in qua* subjectum: unde materia proprie sic dicta dicitur cum addito *materia ex qua*.

§. 107.

Quodsi ex ente aliquo dato alterius praesentia, vel adventus, vel praeteritio colligitur; prius dicitur *signum*, posterius *signatum*: et quidem in primo casu *demonstrativum*, in secundo *prognosticum*, in tertio denique *rememorativum*.

§. 108.

Quodsi per rerum naturam quædam constanter connexa sint, ita ut vel coëxistant, vel se invicem subsequantur; unum alterius signum esse potest (§. 107.), veluti fumus ignis, liber ab autore conscriptus eruditionis vel scientiæ. Atque talia signa *naturalia* dicuntur.

§. 109.

Hoc nomen ipsiis tribuitur, ut distinguantur a signis *artificialibus* seu *arbitrariis*, quæ vim significandi ab instituto entis rationalis habent, quale est hedera suspensa vinum vendibile significans. Atque hinc signa hæc etiam *data* seu *signa ad placitum* dicuntur.

FINIS ONTOLOGIÆ.



INSTITUTIONES
COSMOLOGIÆ
GENERALIS,
METAPHYSICÆ
PARS SECUNDA.

INSTITUTIONES
COSMOLOGICÆ
GENÆRALTIS
METAPHYSICÆ
PARTE SECUNDA



INSTITUTIONES COSMO- LOGIÆ GENERALIS

PROLEGOMENA.

§. 1.

Cosmologia generalis est scientia mundi in ge-
nere.

§. 2.

Egregios præstat usus cum in natura men-
tis humanæ intimius perspicienda, in qua
mundus idealem existentiam habet seu idea
mundi continetur: tum in demonstrandis
existentia & attributis divinis, cum genera-
lis mundi contemplatio ad eadem nos ducat,
mundi proprietatibus generalibus in attributis
divinis tanquam primis possibilibus fundatis.


§. 3.

Atque hæc est ratio, cur Cosmologia præmit-
tatur Psychologiæ & Theologiæ naturali.

§. 4.

Sequitur Ontologiam; quia principiis u-
titur ontologicis in propositionibus demon-

strandis, tum etiam terminis ontologicis in definiendo.



CAP. I.

DE MUNDI DEFINITIONE
ET IIS, QUÆ HINC CON-
SEQUUNTUR.

§. 5.

Mundus est congeries rerum mutabilium cum simultanearum, tum successivarum inter se connexarum.

§. 6.

Definitionis hujus realitatem (§. 13. *Log.*) monstramus a posteriori, quoniam mundus, qui existit, tanquam individuum suam continet speciem seu genus, nempe mundum in genere (§. 26. *Ontol.*).

§. 7.

Quodsi enim mundi hujus adspectabilis contemplationem generalem instituamus, præter tellurem, quam incolimus, alia deprehendimus corpora totalia, veluti Solem, Planetas & Fixas, quæ tanquam partes compagem quandam constituunt. In tellure habemus corpora partialia, quæ aliquamdiu permanent. Unde elucet, dari in hoc universo res simultaneas, quæ simul existunt. Corporum partialium alia intereunt, alia ori-

orientur, & cum totalia situm erga se invicem mutant, tum partialia continuis mutationibus subjacent. Unde porro perspicuum est, dari in hoc universo quoque res successivas, quæ se invicem consequuntur. Mundus igitur seu universum in genere, est quædam simultaneorum & successivorum series.

5. 8.

Enimvero id multæ difficultatis esse videtur, num simultanea & successiva sint inter se connexa. Notandum itaque *ea inter se connexa* dici, quorum unum continet rationem alterius, nempe cur alterum una existat, vel posterius sequatur prius. Talem vero in universo nexum denuo experientia suffultum deprehendimus. E. gr. Sol est propter tellurem, quam illuminat & fecundat, ut ab hominibus & animantibus habitari queat. Pluvia terram irrigat, ne calore solis exuratur & plantis pabulum desit. Imo in corporibus organicis pars una est propter aliam. Et in eo consistit nexus simultaneorum. Nihil in natura contingit, quod non suas causas habeat efficientes, in quibus ratio existentiae suae continetur (§. 39. *Ont.*) principio rationis sufficientis conformiter (§. 8. *Ontol.*). Atque in hoc consistit nexus successivorum.

§. 9.

Cum in Theologia naturali demonstrandi
E 5 finis.

simus, mutuos rerum usus esse fines a Deo intentos ; nexum simultaneorum esse dependentiam a causis finalibus patebit : quemadmodum jam constat, nexum successivorum esse dependentiam a causis efficientibus (§. 8.).

§. 10.

Sunt adeo in mundo coëxistentia connexa quoad spatium per causas finales (§. 50. *Ontol.* & 9. *Cosmol.*), quoad tempus per causas efficientes (§. 52. *Ontol.* & 9. *Cosmol.*), quamvis finalis in alterum quoque nexum quodammodo influat, atque sic uterque nexus connectatur.

§. 11.

Per causas igitur finales & efficientes universum in esse suo determinatur, quibus variis, alius prodit mundus. Et hinc obnexum quoad spatium & tempus universum est ens unum (§. 33. *Ontol.*), corpora vero tum totalia, tum partialia cum eorum mutationibus seu statibus diversis (§. 83. *Ontol.*) veluti partes unum totum constituunt (§. 34. *Ontol.*).

§. 12.

Cum mundus ex compositis veluti partibus componatur (§. 11.), ipse quoque in numerum entium compositorum referendus (§. 53. *Ontol.*) & ejus adeo essentia in modo compositionis & diversitate partium & combinationis de-
ter-

terminando consistit (§. 64. *Ontol.*), atque in eo ratio phænomenorum universi continetur (§. 19. *Ontol.*).

§. 13.

Ceterum quia machinæ sunt entia composita, quorum operationes ad regulas motus structuræ convenienter consequuntur, idem vero obtinet cum in singulis corporibus, experientia teste, tum in toto mundo (§. 12.); corpora ac mundus *Machinæ* lingua recentiorum Physicorum appellantur & omnia in universo mechanice fieri dicuntur.

§. 14.

Apparet adeo, eum de corporibus mechanice philosophari, qui mutationes, quæ ipsis accidunt, ex eorum structuris, texturis & mixtionibus secundum regulas motus intelligibili modo explicat.

§. 15.

Ob mechanismum igitur datur in rebus naturalibus veritas (§. 43. *Ontol.*), quo sublato, *universum non distingueretur a somnio* (§. 10. *Ontol.*).

§. 16.

Cum contingentis oppositum perinde ac ipsum possibile sit (§. 27. *Ontol.*) per essentiam suam sufficienter determinatum non est (§. 19. *Ontol.*). Ut igitur existat seu possibilitas comple-

pleatur (§. 13. *Ontol.*), aliud extra ipsum adsit
 necesse est, quod actum determinet, conse-
 quenter rationem contineat, qua possibilitas
 compleri intelligitur (§. 8. *Ontol.*), consequen-
 ter causa opus habet, ut existat (§. 93. *Ontol.*).
 Quodsi igitur hæc causa itidem sit contin-
 gens, patet eandem denuo causa opus habere,
 ut existat, atque ita porro. Ut adeo actus
 contingentis naturaliter non determinari in-
 telligatur, nisi per seriem causarum, quæ a se
 invicem dependent ut effectus a sua causa
 (§. 9.). Ostendemus autem in Theologia na-
 turali hanc seriem non posse continuari in in-
 finitum, sed vi principii rationis sufficientis
 (§. 8. *Ontol.*) in causa aliqua prima necessaria
 terminandum esse.

§. 17.

Enimvero cum entia composita in univer-
 so etiam a contiguis in actu suo dependeant
 veluti existentia corporis humani viventis
 ab aëre, quem respiramus & a calore am-
 biente, quo fluiditas sanguinis conservatur,
 vi nexus simultaneorum (§. 8.); actus contin-
 gentis præter seriem causarum successivarum
 etiam rerum simultanearum inter se connexa-
 rum supponit seriem: quæ dependentia cor-
 porum in actu suo a contiguitate aliorum in
 Physica distinctius explicabitur. Contingen-
 tis

tis itaque actus naturaliter non determinatur, nisi per aliquod universum (§. 5.).

§. 18.

Unde evidens est, quod, quæ in hoc mundo actum suum consequuntur, habeant in eodem *veritatem determinatam*, & quod non nisi ea evenire possint, quæ veritatem determinatam in eodem habent, cetera vero possibilea actum non consequantur.

§. 19.

Sunt igitur hypothetice necessaria (§. 30. *Ontol.*); quæ tamen hypothetica necessitas contingentiae non officit (§. 31. *Ontol.*), cum absoluta tantum eidem repugnet (§. 28. *Ontol.*).

§. 20.

Quoniam vero eventus rerum naturales sunt hypothetice necessarij, futuritio earum certa est. Vocatur hæc necessitatis hypotheticæ species, quæ a constitutione universi & causarum serie pendet seu, ut alij loqui amant, a præsentis rerum ordine, *necessitas physica* seu *naturalis*, quia in veritatibus physicis seu rebus naturalibus obtinet atque physicae scientiæ fundamentum est, quemadmodum ob similem rationem absoluta necessitas *geometrica* & *metaphysica* appellatur.

§. 21.

Nondum nobis res est cum contingentibus

bus illis, quæ ab actionibus hominum liberis dependent: de iis enim in Psychologia agemus, ubi libertatem humanam & mentis cum corpore commercium explicabimus. Neque hujus est loci, ut inquiramus, quid Deus per concursum extraordinarium efficiat, cum hoc argumentum ad Theologiam naturalem pertineat.

§. 22.

Etsi autem hoc in universo seu præsentium rerum ordine non omnia contingentia actum consequantur (§. 18.), nondum tamen exinde cum *Spinoza* aliisque fatalis necessitatis defensoribus inferre licet, nullum alium possibilem esse ordinem rerum, quo & ipsa ad actum perducantur: quia attendenti contrarium patet. Etenim contingentia iis, quæ existunt, opposita, perinde ac eadem, quæ existunt, contradictionem minime involvunt, adeoque intrinsecam possibilitatem habent (§. II. *Ontol.*): quod nec *Spinoza* nec *Fatalistæ* negant. Concipi autem possunt causæ, a quibus perinde ac ea, quæ existunt, in actu suo determinari possunt: unde *possibilitas extrinseca* pendet. V. gr. Dum pluit, quia ventus ab occidente spirans nubes advehit in aëre rariore resolvable in pluviam, concipere licet, fore cælum serenum, si aër ab oriente spiret nullos vapores in nubes collectos

Etos secum trahens. Quemadmodum autem priori in casu causa contingens, nempe ventus spirans ab occidente & raritas aeris apud nos alterius causæ contingentis effectus est (§. 16.); ita similiter causa contingens in altero, quem ponimus, casu concipitur effectus alterius causæ contingentis & ita porro. Perinde igitur possibilis est (§. 11. *Ontol.*) aliquis rerum ordo, quo ad actum pervenire possunt ea, quæ in præsentī rerum ordine ad eundem minime perducuntur, quam præsens rerum ordo possibilis intelligitur (§. 14. *Ontol.*).

§. 23.

Quoniam itaque contingentia opposita iis, quæ ad actum in hoc universo pertingunt, existere possunt (§. 22.), etsi nunquam existant (§. 18.), nullius autem contingentis actus naturaliter determinari possit, nisi per integrum aliquod universum (§. 17.); plura omnino universa, seu, si mavis, plures mundi possibiles sunt. Mundus adeo in numerum entium contingentium referendus est.

§. 24.

Hæc totius universi contingentia instar scalæ est, qua in Theologia naturali ad Deum ascendimus, ejus existentiam necessariam & cetera attributa cognituri.

§. 25.

Cum eventus contingens, qui a causis m^o.

re naturalibus pendet, per integrum universum in actu suo determinetur (§. 17.); si ponamus, ut naturaliter eveniat contrarium ejus, quod accidit, omnis præcedens universi status ab eo, qui in præsentī rerum ordine obtinuit, diversus ponendus est. Et quoniam vi nexus seu mutuæ dependentiæ in causarum contingentium serie, una causa mutata mutantur succedentes omnes (§. 22.), in quantum antecedentes influunt in actum sequentium; si unus eventus contingens mutari ponatur in oppositum, sequens mundi pars non amplius erit eadem, quæ alias futura erat (§. 22. *Ontol.*), consequenter universum idem non subsistet (vi §. cit.).

§. 26.

Quæ hætenus de mundo seu rerum universo dicta sunt, simili quopiam illustrari possunt. Mundus enim fere se habet ut horologium. Partes, ex quibus id constructum, corpora mundi totalia repræsentant, & motus variationes, indicis præsertim horas indicantis, eventus: aut si mavis, partes horologium constituentes, quæ in universo eadem perdurant, motus observabiles, quæ continuo mutantur, repræsentant. Quemadmodum igitur in horologio omnes situs rotarum inter se atque indicis respectu orbis horarii per structuram & motum determinantur per singula quan-

quantumvis minuta tempuscula, quamdiu nihil a causa externa in structura vel motu mutatur, atque motus eodem modo continuatur; ita similiter in universo omnes eventus seu rerum materialium mutationes per structuram & motum determinantur pro singulis quantumvis minutis temporis partibus, quamdiu nihil in structura mundi vel motu corporum mutatur, atque hic certa lege continuatur. Enimvero quemadmodum fieri potest, ut in structura & motu horologii præsertim indicis, aliquid a causa externa mutetur, propterea, quod & structura, & motus mutabilis; ita similiter pro impossibili haberi nequit, ut in structura universi ejusve motu quidpiam mutetur a causa externa, si quidem talis adsit, qualem esse Deum suo loco demonstrabimus. Unde, quemadmodum in horologio nec absoluta necessitas in existendo, nec in consecutione, eorum scilicet, quæ ex structura & ejus motu consequuntur, sed necessitas tantum hypothetica, quæ ab actu structuræ & motus invariati pendet; ita similiter in mundo nec absoluta necessitas in existendo, nec in consecutione, eventuum scilicet per structuram & motum determinantum, sed tantum necessitas hypothetica, quæ ex structura & motu a causa externa non mutatis pendet. Evidentissimum igitur est, ob nexum rerum in universo, nec abso-

(Thüm. Inst. Cosmol.)


F

lu.

lutam necessitatem in existendo, nec in consecutione eventuum eidem tribui posse. Quemadmodum porro in horologio indicis motus in omni tempore sequente idem non subsistit, si a causa externa vel retroagatur vel promoveatur, nec idem inane singulis momentis rotarum situs, si in structura quidpiam mutetur; ita similiter in universo factæ mutationi conformiter per omne subsequens tempus eventus rerum variantur.

§. 27.

Apparet itaque, dum doctrina generalis de universo simili ab horologio desumpto illustratur, tertium comparationis minime esse modum agendi necessarium in oppositione ad libertatem hominis expensum, prouti argutantur, qui coram tribunali rationis causam dicere non didicerunt.



CAP. II.

DE ESSENTIA & NATURA CORPORUM AC PENDENTI- BUS INDE AFFECTIO- NIBUS.

§. 28.

Entia composita, ex quibus tanquam partibus componitur mundus (§. II.), corpora vocari solent.

§. 29.

§. 29.

Cum adeo corporibus omnes compositorum proprietates conveniant, omnia corpora sunt extensa (§. 57. *Ontol.*) & ob finitudinem determinatam habent magnitudinem & spatium determinatum replent (§. 54. *Ont.*), determinata quoque gaudent figura (§. 61. *Ontol.*), divisibilia sunt (§. 63. *Ontol.*), oriri ac interire possunt citra cuiuspiam ex nihilo productionem vel annihilationem (§. 65. *Ontol.*), locum mutare possunt, etsi ipsa maneant immutata (§. 62. *Ontol.*), non aliam autem pati possunt mutationem, nisi quoad figuram, magnitudinem, partium situm, motum intestinum & locum, quem occupant (§. 69. *Ontol.*): ipsorum denique essentia in modo compositionis consistit, nempe in diversitate partium & combinationis (§. 64. *Ontol.*), consequenter in structura, si corpora fuerint organica, veluti corpus animale, & in mixtione atque textura, si inorganica, ut metalla.

§. 30.

Corporibus mutationes accidere possunt nullæ nisi mediante motu. Aut enim mutatur figura, aut magnitudo, aut partium situs, aut locus totius corporis (§. 29.). Locum totius partiumque situm sine motu haud mutari posse manifestum est (§. 62. *Ontol.*). Figura

mutatur partibus ablatis, vel adjunctis, vel transpositis (§. 66. *Ontol.*), & magnitudinis variatio non alio modo fieri posse concipitur (§. 39. *Ontol.*), consequenter figuræ etiam ac magnitudinis mutatio sine motu, nempe loci partium mutatione fieri nequit (§. 62. *Ontol.*). Nulla igitur sine motu corporibus accidere potest mutatio.

§. 31.

Experientia docemur, corpus motui resistere: unde est, quod non quævis vis movendo corpori cuicunque par sit, quemadmodum experiri licet, si alteri lanci, quæ fulcro supposito sustinetur, pondera diversæ gravitatis successively imponas atque lancem alteram deprimere nitaris sive sola manu sive contrapondio adjuta pondus elevaturus. Illud, quo corpus motui resistit, vocatur termino Mathematicis solempni *Vis inertiae* itemque *vis passiva*.

§. 32.

Cum extensio consistat in diffusionem multorum a se invicem distinctorum, sed simul unum constituentium (§. 57. *Ontol.*); illa vis inertiae ex extensione non sequitur, sed in extenso supponitur. Quamobrem *Cartesius* a vero aberrat, dum naturam corporis in genere in sola extensione consistere arbitratur. Quoniam autem vis inertiae supponitur in eo,

eo, quod per sui diffusionem extensionem gignit; extensione prior est.

§. 33.

Extensum vi inertiae præditum *Materia corporis* nominatur. Corpus igitur ob materiam motui resistit (§. 31.).

§. 34.

Si corpus quiescens ab altero, quod in ipsum impingit, ad motum concitatur; in utroque quidpiam observare licet, quod antea non inerat. Nimirum movens movet, quiescens movetur. Cur movens moveat. ratio in ipso movente continetur, atque adeo agit (§. 84. *Ontol.*): cur quiescens moveatur, ratio extra ipsum, nempe denuo in movente quærenda, quia nimirum hac celeritate & directione impingit, consequenter ipsum patitur (§. *cit.*). Eodem modo perspicuum evadit, duo corpora in se invicem simul agere & a se invicem pati, si secundum contrariam directionem in se mutuo impingentes a se invicem recedant.

§. 35.

Corpus adeo in motu constitutum vi agendi præditum est.

§. 36.

Vis igitur activa corporum motui locali adhæret; qui cum sine dato celeritatis gradu, dataque directione concipi nequeat,

nec vis activa corporum determinata celeritate atque directione carere valet.

§. 37.

Quoniam vis illa celeritate, quemadmodum extensio figura limitatur (§. 61. *Ontol.*), modificatio vero in limitum variatione consistens (§. 78. *Ontol.*) concipi nequit sine re quadam permanente, quæ variis modis limitari potest; vis quædam permanens in corporibus existit, unde tanquam a principio motus consequuntur.

§. 38.

Quamobrem cum *vis activa* seu *motrix* motui locali adhæreat, cum viris illustribus de *Tschirnhausen* in *Medicina mentis* part. 2. p. 180. & *Leibnitio* in *Actis Erudit.* An. 1695. p. 145. omnem materiam in continuo motu concipimus, etsi extus non semper adpareat, nec totum corpus locum mutet.

§. 39.

Hæc vis activa corporum, unde actiones ejus pendent (§. 34.), est id, quod *Naturæ* nomine compellarunt veteres, ut adeo naturam habeat ens, quatenus vi activa præditum. Atque in eo corpus naturale ab artificiali distinguitur, quod illud præter essentiam atque materiam habeat naturam, hoc non nisi materiam atque essentiam.

§. 40.

§. 40.

Differt adeo natura cum a materia, quæ ex partium congerie resultat (§. 33. *Cosmol.* & §. 57. *Ontol.*), cum ab essentia, quæ in modo combinationis illarum partium consistit (§. 29.); ut adeo in corpore materia, essentia & natura distinguenda sint.

§. 41.

Cum ratio eorum, quæ rebus conveniunt, in essentia contineatur (§. 19. *Ontol.*), nulla autem corporibus mutatio sine motu (§. 30.), cui vis activa adhæret (§. 36.), concipi possit; mutationes, quæ corporibus accidunt, essentiæ ac naturæ eorum conformiter fiunt, seu per essentiam & naturam intelligibili modo explicari possunt.

§. 42.

Quoniam omnis materia in universo continuo in motu subsistit (§. 38.), vis activa per totum universum diffunditur & per corporum conflictum seu motuum impulsu continuo modificatur. Atque hæc vis in universum spectata dicitur *Natura rerum universa*, itemque *Natura simpliciter*. Liquet igitur recentiorum nonnullos vocabulum naturæ tanquam terminum ignorantia perperam rejecisse ac sine ratione Naturam a veteribus defensam pro idolo venditasse.

CAP. III.

DE LEGIBUS MOTUS.

§. 43.

Vis corporum tam passiva, quam activa in conflictu eorundem juxta certas regulas modificatur, quas *Motus regulas* appellant & in Mechanica recentiores Mathematici demonstrant. Insunt autem istis regulis principia generalia, unde demonstrari possunt atque solent, atque hæc principia *Legum naturalium motus* nomine veniunt & a Mathematicis sumuntur, non probantur: id quod Metaphysici est.

§. 44.

Quoniam corpus ob materiam motui resistit (§. 33.), se ipsum movere nequit, consequenter vi principii rationis sufficientis (§. 8. *Ont.*) causa indiget, ut moveatur (§. 93. *Ont.*).

§. 45.

Ex eodem principio rationis sufficientis sequitur, corporis motum, ad quem concitatum fuit, iterum desinere non posse, nisi adsit causa externa (§. 93. *Ontol.*).

§. 46.

Immo eodem modo patet, corporis moti directionem atque celeritatem mutari non posse, nisi adsit causa externa.

§. 47.

§. 47.

Corpus igitur unumquodque in statu suo quiescendi vel movendi uniformiter in directum, hoc est, eadem celeritate & secundum eandem directionem, permanet, nisi a causa externa statum mutare cogatur (§. 44. 45. 46.): quæ est *prima lex motus naturalis*, quam Mathematici sumunt ad regulas motus demonstrandas.

§. 48.

Dum corpus motui resistit, in corpus movens reagit. Ponamus enim globum ligneum A suspensum ex filo CD quiescere & al-
Fig. I.
terum B ex argilla molliori confectum atque ex altitudine F demissum in istum incurrere & ad motum eundem sollicitare: facto conflictu figura globi B mutabitur, superficie convexa in G complanata. Quoniam illa complanatio fieri nequit, nisi ut partes quædam moveantur juxta directionem GI, quæ antea cum ceteris globi partibus movebantur secundum directionem GH, nullam autem corpus directionem mutet, nisi a causa externa (§. 46.), evidens est, globum A motum contrarium imprimere, consequenter dum globus B in ipsum agit (§. 34.), in eundem reagere, ut adeo nulla sit in corporibus actio sine reactione.

§. 49.

Figura in globo B magis mutatur, si globus A majoris fuerit ponderis, quam si minoris fuerit, consequenter si *massa coherens*, quæ nempe cum corpore ponderat & movetur, fuerit major, quam ubi minor. Unde perspicuum est, reactionem fieri majorem si massa corporis patientis fuerit major.

§. 50.

Si globus incurrens B majoris fuerit ponderis & cum minori eadem celeritate moveatur; globum A majori velocitate movet, quam minor. Unde pater, actionem esse majorem, si massa corporis agentis fuerit major (§. 49.). Et eodem prorsus modo intelligitur, actionem ejusdem corporis majorem esse, si majori celeritate impingat, quam si minori. Globus autem B majorem celeritatem acquirit, si ex majori altitudine demittitur.

§. 51.

Quoniam vero in iisdem casibus, ubi globus B vel majori velocitate impingit, vel majoris ponderis extiterit, major figuræ mutatio observatur, consequenter, major quoque reactio adest (§. 48.); reactio ejusdem corporis patientis major est, si actio agentis major, quam si minor fuerit (§. 50.).

§. 52.

§. 52.

Cum corpus vi inertiae, quæ motui resistit (§. 31.), reagat; vis inertiae etsi per omnem materiam diffusa (§. 49.), per se tamen in determinata quantitate actionis determinatur, atque adeo in conflictu modificatur (§. 78. *Ontol.*)

§. 53.

Experiendo discimus, celeritatem corporis moti augeri, novo impulsu juxta directionem motui minime contrariam accepto, eandemque minui, si in aliud quiescens incurrat. Similiter directio non mutatur nisi novo impulsu ab alio incurrente accepto, ut adeo motus nec producat, nec sistatur, nec augeatur, nec intendatur sine percussione. Atque hæc conformia sunt Legi naturali motus primæ (§. 47.).

§. 54.

Percussio corporis majore celeritate lati, vel majorem massam possidentis major deprehenditur, quam ubi vel celeritas, vel massa fuerit minor. Cum vero major percussio tanquam effectus major a majori vi proficiscatur, minor autem a minori; vim activam corporum per integram quidem massam diffundi, sed gradu celeritatis variari patet.

§. 55.

Celeritatis variatio cum impulsui debeatur
tur

tur (§. 53.), vires corporum activas per conflictum modificari constat.

§. 56.

Cum itaque manente eadem massæ seu materiæ quantitate (§. 49.), vis cum inertia (§. 52.), tum motrix (§. 55.) per conflictum modificetur, ut nunc major, nunc minor evadat; virium modificatio ab extensione non pendet (§. 32.) neque etiam ab essentia corporum, quæ ab illa resultat (§. 29.).

§. 57.

In conflictu corporum partes se se mutuo contingentes comprimuntur: id quod in corporibus mollibus sensui obvium est, in ceteris exinde colligitur, quod post impactum resiliunt, manifesto indicio, figuram vi elastica restitui. In corporibus post impactum resiliens premonem perinde ac in corporibus mollibus fieri, figuram vero vi elastica restitui, sequenti experimento confirmatur. Pila aëre inflata allidatur parieti vel tabulæ oleo illitæ: ubi resilierit circellus in superficie oleo infectus, major deprehenderur, quam pro contactu non impingentis. Obiter monemus, per *vim elasticam* designari eam, qua compressa in statum pristinum restituuntur a vi comprimente liberata.

§. 58.

Atque adeo una liquet, in conflictu corporum

rum elasticitate præditorum partes compressas situi pristino restitui, antequam corpora in se invicem impingentia a se invicem discedunt.

§. 59.

Quoniam corpus totum eadem celeritate progreditur, quin singulæ ipsius quantacunque partes eadem celeritate moveantur, dubitari nequit.

§. 60.

Demonstratu facile est, corpora A & B durante conflictu in eodem spatio veluti immota teneri. Nam in conflictu corpus B comprimit quasdam partes corporis A vi reactionis, adeoque urget corpus A juxta directionem AH: quod cum contrariis directionibus simul moveri nequeat, ulterius juxta directionem BI progredi nequit. Sed nec corpus B secundum eandem directionem progredi valet, quamdiu juxta directionem AH redagit in corpus A, cum alias perinde contrariis directionibus una progredi niteretur, quod absurdum. Corpora igitur A & B durante conflictu se se mutuo immota tenent in spatio, ubi se invicem impingunt.

§. 61.

Duo corpora se se invicem in eodem spatio veluti immota tenere nequeunt, nisi eadem vi juxta directiones contrarias se se mutuo

tuo urgeant, cum nulla adsit ratio, cur vis unius prævaleat adversus vim alterius, absque ratione sufficiente vero nil quicquam fieri possit (§. 8. *Ontol.*): in altero casu evidens est, fortio- rem vim prævalere adversus debiliorem. In conflictu itaque corpus A & B se se mutuo eadem vi urgent (§. 60.), atque hinc manifesta est *lex motus naturalis altera*, quod actiones & reactiones corporum in conflictu sint æquales.

§. 62.

Qui difficultates nectunt circa hanc naturæ legem, non attendunt corpus A non omnem vim suam ad actionem in corpus B impendere, sed non nisi eam partem, quæ ad hujus resistantiam impenditur infringendam. Ita e. gr. equustrahens lapidem funi alligatum eam impendit vim in actionem, qua resistantiam lapidis infringit, vi residua incedit secumque trahit lapidem.

§. 63.

Quoniam corpora in conflictu, hoc est, durante actione & reactione in eodem spatio, sese veluti immota tenent (§. 60.), cohærere quasi atque unum corpus constituere intelliguntur. Unde celeritas ea ratione per utrumque distribuatur necesse est, ut utrumque eandem celeritatem acquirat & motum secundum eandem directionem.

§. 64.

§. 64.

Ex principiis hæcenus stabilitis demonstrantur regulæ motus corporum vi elastica notabili destitutorum, quemadmodum videre licet in Elementis Mechanicæ Philosophi.

§. 65.

Quodsi corpora A & B in se invicem impingentia vi elastica instructa fuerint, celeritas per conflictum acquisita modificatur per eandem. Etenim per conflictum partes in contactu comprimuntur, sed vi elastica iterum restituuntur (§. 57. 58.). Ponamus ex conflictu corpori utrique motum acquiri juxta directionem BI (§. 63.). Dum vi elastica restitutio fit in corpore B, corpus A secundum directionem AH. Fig. 2. urgetur atque adeo vis motus versus I retardatur. E contrario patet, facta restitutione in corpore A motum versus I accelerari. Quamobrem cum corpora absoluto conflictu aliquo intervallo a se invicem distent, etiamsi juxta eandem plagam & eadem fere celeritate progrediantur vi experientiæ; omnia corpora aliquo elasticitatis gradu gaudent.

§. 66.

Vis elastica æquatur vis percussionis, qua partes corporum in se mutuo impingentium comprimuntur, alias enim compressio foret

ma-

major; nisi resistentia ex vi elastica orta pressioni foret æqualis. Evidens inde est, quantitatem vis elasticæ per conflictum seu quantitate ictus determinari, perinde ac vim inertiae (§. 31.).

§. 67.

Quoniam actio corporis A in corpus B tanta est, quanta reactio corporis B in corpus A (§. 61.); vires comprimentes utrinque æquales sunt, consequenter etiam vires elasticæ quibus partes compressæ corporum A & B restituntur.

§. 68.

His ex principiis derivantur regulæ motus corporum elasticorum, juxta quas directio & celeritas in conflictu determinatur seu vis activa corporum modificatur: quemadmodum denuo videre est ex Elementis Mechanicæ Philosophi.

§. 69.

Quæ de conflictu corporum hætenus demonstrata sunt, abunde docent, communicationem motus in conflictu corporum fieri successive, adeoque non in instanti, sed in tempore (§. 52. *Ontol.*).

§. 70.

Leibnitius quidem alias adhuc proposuit leges motus naturales, ex quibus perinde ac ex hætenus explicatis motus regulæ deduci pos-

possunt, veluti quod motus perpetuus mechanicus sit impossibilis, quod effectus plenus sit viribus causæ æqualis, quod in conflictu corporum eadem conservetur virium quantitas &c. Enimvero leges istæ non eadem facilitate demonstrari possunt: quin potius ex regulis motus vi principiorum hætenus explicatorum demonstratis corollariorum instar deducuntur, aut per eas veritati consentaneæ comprobantur.

§. 71.

Ceterum cum leges motus naturales, a quibus modificatio virium in conflictu corporum pendet, ex corporis essentia atque extensionis notione minime fluant, quemadmodum ex antecedentibus patet; regulæ quoque non absolute necessariæ sunt, nec notione materiæ atque corporis essentiæ repugnat, ut leges motus ab his essent diversæ.

§. 72.

Quamobrem cum corpora vi naturæ agant & patiantur (§. 39. 42.), natura rerum ab absoluta necessitate libera est (§. 27. *Ontol.*).

CAP. IV.

DE NATURALI ET SUPER-
NATURALI.

§. 73.

Naturale dicitur, cujus ratio in essentia & natura corporum continetur, consequenter, quod per structuram organicorum & texturam mixtionemque inorganicorum atque regulas motus, juxta quas vires corporum modificantur, explicari potest (§. 29. 42. *Cosmol.* & §. 9. *Ontol.*).

§. 74.

Si quid vero contingat, cujus ratio in essentia & natura corporum non continetur, vel quod eidem prorsus contrariatur, consequenter, quod per structuram organicorum & texturam mixtionemque inorganicorum atque regulas motus, juxta quas corporum vires modificantur, explicari nequit, id *Supernaturale* vocatur seu *Miraculum*.

§. 75.

Miraculum esse possibile antecedentia loquuntur. Quoniam enim præter ea, quæ in hoc universo naturaliter actum consequuntur, alia adhuc perinde ac ipsa possibilia sunt (§. 22.), legesque motus non sint necessariae, sed salva materia atque essentia corporum diver-

diversæ esse queant (§. 71.), haudquaquam repugnat, ut contra regulas motus in universo mutationes producantur juxta eas non subsequaturæ, vel etiam in essentia corporum rationem nullam habentes. Istiusmodi igitur mutationes, consequenter miracula (§. 74.), possibilitatem intrinsecam habent (§. II. *Ontol.*). In Theologia autem naturali demonstrabimus, quod nec extrinseca possibilitate destituantur, cum per virtutem causæ primæ ad actum deduci queant.

§. 76.

Quoniam miraculum actum consequi nequit, nisi detur ens ab universo diversum, cujus virtute ad actum deducantur possibilia in hoc universo naturaliter non determinata; evidens est ratio, cur miraculorum existentiam negent athei, eademque cum *Spinoza* in Tract. Theol. Polit. c. 6. p. 67. per effectus insolitos interpretentur, quorum ratio seu causa naturalis ignoretur. Quamvis etiam hanc miraculorum notionem tueri debeant, quot quot immutabilem necessitatem in rebus naturalibus agnoscunt ob dependentiam necessariam a causa prima sive Deo, vel ex aliis etiam rationibus. Unde apparet in conclusionibus consentientes non semper in principiis consentire.

§. 77.

Notio miraculi illustratur motu indicis violento a causa externa, quemadmodum jam innuimus (§. 26.).

§. 78.

In rerum natura effectus denuo fit causa alterius effectus (§. 16.). Quamobrem si quis effectus supernaturalis seu miraculosus producat, in causam abiens naturaliter, hoc est, essentiae ac naturae corporeae conformiter (§. 41.), producet effectum alias in universo non subsequendum & ita porro per omne subsequens tempus.

§. 79.

Quodsi ergo per miraculum non restituatur effectus, qui naturaliter ex causa aliqua secutus erat miraculo non facto, seu effectu quopiam supernaturaliter in alium mutato; per omne subsequens tempus mundus differt ab eo, qui futurus fuerat, miraculo non patrato, perinde ac situs indicis in horologio per violentiam promoti vel retroacti per omne tempus, quo motus continuatur, diversi sunt ab iis, qui futuri fuerant, motu violento absente, nisi simili motu index situi restituatur, quem eo tempore habiturus erat ex horologii motu.

§. 80.

Nugantur, qui hinc arguunt, Philosophum affirmare, quod corporum mundi totalium situs per miraculum in partiali patratum mutetur.

§. 81.

Miraculum igitur agnoscitur ex defectu causæ naturalis (§. 73. 74. *Cosmol.* & §. 93. *Ontol.*). Atque hæc est ratio, cur pro miraculo reputet vulgus, si quid insoliti accidit, cujus causa later.

§. 82.

Quodsi miraculo locus sit ex defectu causæ remotæ, tum quidem ægre a nobis agnoscetur, cum in causis proximis plerumque nostra rerum naturalium cognitio terminetur: quæ etiam ratio est, cur nexus rerum in universo vulgo non agnoscatur (§. 10.).

§. 83.

Obiter notamus, miracula in sacris relata arguere defectum causæ naturalis proximæ: cujus quidem ratio infra in Theologia naturali patebit.

§. 84.

Motus, qui juxta regulas motus non consequitur, non est naturalis, sed miraculosus (§. 74.), quoniam nimirum vis motrix aliter, quam rerum fert natura, modificatur. Sed

per regulas motus nulla fit communicatio motus sine reactione mobilis seu corporis, quod movetur (§. 61.). Ergo motus corporis, qui sine reactione consequitur, non est naturalis, sed miraculosus. Eodem modo liquet, naturaliter non moveri corpus sine percussione.



CAP. V.

DE ELEMENTIS.

§. 85.

Mundus ex compositis tanquam partibus componitur (§. II.). Quod si eorum particulas quantumlibet exiguas microscopio subiciamus, eas adhuc ex partibus aliis minoribus, quæ nec oculo armato discerni possunt, componi observamus. V. gr. Particulæ minutissimæ auri per exquisitissima microscopia sunt aurum, consequenter cum aurum sit corpus ex aliis simplicioribus massis mixtum, quantumlibet exigua auri particula ex aliis particulis miscibilium componitur. Neque vero in hac particularum divisione in alias minores progredi licet in infinitum, ita ut partes minores in infinitum componerentur ex aliis minoribus, cum ita ad sufficientem compositionis rationem non perveniremus, eadem semper quæstione residua, unde vero partes illæ minores ortum trahant, quanto quanto intervallo progressus fueris. Vi igitur principii rationis sufficientis (§. 8.

On-

Ontol.), admittenda sunt simplicia partibus ea-
rentia (§. 71. *Ontol.*), unde partes composito-
rum tandem ortum trahunt. Eodem modo hic
argumentamur, quo ab existentia causarum con-
tingentium seriei argumentamur ad causam pri-
mam necessariam.

§. 86.

Hæc entia simplicia, unde compositorum
partes ortum trahunt, seu compositorum prin-
cipia (§. 93. *Ontol.*) dicuntur *Elementa*.

§. 87.

Elementa igitur magnitudine, extensione,
figura, motu intestino carent, nec spatium re-
plent, atque a composito prorsus differunt (§.
72. *Ontol.*).

§. 88.

A vero igitur aberrant, qui elementis pro-
prietates compositorum affingunt.

§. 89.

Quamobrem exigua corpuscula, ex quibus
tanquam partibus majora componuntur, pro
elementis perperam a Philosophis corpuscula-
ribus venditantur.

§. 90.

Elementa ista aut similia sunt aut dissimilia.
Quodsi similia forent, discrimine intrinseco
destituerentur (§. 23. *Ontol.*), adeoque nulla
foret ratio, cur hoc potius ordine sese invi-
cem exciperent, quam alio (§. 9. *Ontol.*), con-
sequenter permutatione facta idem compo-

situm inde resultans persistere valeret. Sed cum sine ratione sufficiente nil esse possit (§. 8. *Ontol.*), necesse est, ut singula elementa sint dissimilia, atque adeo discrimen intrinsecum admittant (§. 23. *Ontol.*).

§. 91.

Haud absimili modo de compositis seu corporibus patet, in eodem universo duo similia nec eodem tempore, nec diversis temporibus existere posse: id quod a *Leibnitio* jam notatum. Demonstrationem vero aliam superaddidit Philosophus a contingentium actus determinatione petitam. Contingentis scilicet actus cum naturaliter non nisi per aliquod universum determinetur (§. 17.); duo corpora similia producta supponerent eundem prorsus rerum ordinem per tempora antecedentia (§. 5.); id quod, utpote experientiæ contrarium, absurdum (§. 14. *Ontol.*).

§. 92.

De omnimoda loquimur similitudine: quæ enim in quibusdam differunt, non similia sunt (§. 23. *Ontol.*). Obiter hoc monemus ad arcendas exceptiunculas hominum de rebus non ex notionibus judicantium.

§. 93.

Impossibilitatem actus similium in eodem universo *Leibnitius* in apicem produxit sub nomine *Principii indiscernibilium* & foliorum
ejus

ejusdem arboris experimento comprobavit Epist. 5. §. 4. p. 94. controversiæ cum celebri Anglo *Samuele Clarckio*, agitatae.

§. 94.

Quoniam rerum materialium ultimum principium sunt elementa (§. 86.), ultimas quoque rationes eorum continent, quæ in rebus materialibus locum habent (§. 93. *Ontol.*). Atque adeo a diversitate elementorum tandem omnis in composito diversitas emanat (§. 90.), consequenter ubi composita sive corpora ab his, quæ existunt, debent esse diversa, ibi diversa quoque elementa existant necesse est: quod est magnum principium ad demonstrandam creationem universi ex nihilo.

§. 95.

Arcetur igitur materia primigenia, quam per modum massæ uniformis, seu partibus solo numero & loco differentibus constantis & instar Vertumni in quaslibet figuras mutabilis fingunt.

§. 96.

Quodsi igitur cogitemus, omnia universi spatiola, quantumvis minima, tempusculo quantumvis minimo aliter aliterque repleri, quin maximam rerum in universo varietatem stupeamus fieri nequit.

§. 97.

Elementa dissimilia sunt (§. 90.), & ejusdem

tamen generis (§. II. *Log.*), tanquam rerum materialium principia (§. 86.). Entia igitur infinita esse nequeunt, sed finita (§. 81. *Ontol.*).

§. 98.

Vim adeo habent, qua status intimus continuo mutatur, ea quidem lege, ut præsens rationem contineat sequentis (§. 82. *Ontol.*). Quamobrem cum constanter dissimilia sint (§. 90.), quovis momento in cujuslibet statu observari quidpiam datur, quod in altero haud continetur (§. 23. *Ontol.*).

§. 99.

Cum ratio sufficiens adesse debeat, cur quovis momento quodlibet elementum hoc vel isto modo cum ceteris existat (§. 8. *Ontol.*); in spatio autem ob partium uniformitatem (§. 51. *Ontol.*) & per eandem rationem in tempore (§. 52. *Ontol.*), istiusmodi ratio reperiri nequit; quærenda erit in interno elementorum statu (§. 98.): quæ conspirant cum effato, quod omnis diversitas in composito emanet ex diversitate elementorum, sive composita ut in quiete in statu momentaneo spectes, sive variata per motum.

§. 100.

Cum hoc pacto elementa inter se consentiant, ita ut status unius sit veluti interpret status alterius (§. 99.), in composito hinc nascitur perfectio (§. 44. *Ontol.*). Cum porro
com-

composita perinde ac elementa inter se conne-
ctantur, ita ut ratio status unius contineatur in
altero (§. 8.), non minus eadem inter se consen-
tiunt, atque ita enascitur totius universi perfe-
ctio (§. 44. *Ontol.*).

§. 101.

Qualis illa vis sit, qua continuo status ele-
mentorum internus variatur, nondum satis
constat. Equidem *Leibnitius* elementis rerum
materialium perinde ac substantiis simplicibus
ceteris vim percipiendi tribuit, ita ut univer-
sum repræsentent obscure, sibi minime eorum
conscia, qui repræsentant, atque omnes sub-
stantias simplices *Monades* appellat, sed cum
sic nondum adpareat, quomodo ex elementis
tāquam substantiali rerum materialium vis
motrix in compositum derivetur, *Leibnitio* non-
dum subscribit Philosophus.

§. 102.

Quoniam modus coëxistendi cum ceteris in
unoquoque elemento per id determinatur, quo
unoquovis momento a ceteris intrinsece dif-
fert (§. 99.); uniuscujusque modus coëxisten-
di cum ceteris ab alio quocunque differt, atque
adeo unum extra alterum existit (§. 49. *Ontol.*),
consequenter omnia simul spatium replent
(§. 50. *Ontol.*).

§. 103.

Patet adeo, quod ex simplici enascatur
com-

compositum: cessant autem difficultates, quod substantiæ simplices, quas elementa concipimus, differant a punctis *Zenonicis*, quæ tanquam puncta mathematica imaginamur, quorum unum ab altero non differt, nec intrinsece quidpiam habet, quo ejus ab altero contiguo inseparabilitas foret manifesta, & quod alterius contiguitatem exigit.

§. 104.

Cum exquisitissima microscopia, quibus objecta mirum quantum! augentur, in naturaliter mixtis non detegant mixti particulas (§. 85.); ut elementorum rationem a posteriori indagemus fieri sane nequit (§. 86.). Inde tamen nil incommodi in Physicam redundat, quoniam phænomenorum tantum in sensus incurrentium rationes proximas investigamus, nec de ultimis ex natura elementorum derivandis (§. 94.) solliciti sumus.


§. 105.

Interea in Metaphysicis, ubi de primis rerum principiis solliciti sumus, ad talia attendendum est, ut ex Physicis conceptus chimærici proscribantur.

§. 106.

Hinc in explicandis corporum viribus acquiescimus in fluidis subtilibus, quæ ipforum poros replent, veluti dum vim gravitatis & vim elasticam in physicis concipimus: atque
in

in divisione materiæ in corpusculis subsistimus, in minimis corpusculis cohæsionem a motu conspirante, qui fit secundum contrariam directionem eodem celeritatis gradu; in maioribus etiam a figuris derivamus.



CAP. VI.

DE PERFECTIONE ET ORDINE UNIVERSI, CURSUQUE NATURÆ.

§. 107.

Cum perfectio entis consistat in consensu in varietate rerum, hic vero inde æstimetur, quod singularum rationes tandem in rationem generalem aut plures una resolvantur (§. 44. *Ontol.*); mundus vero sit rerum mutabilium cum simultanearum tum successivarum inter se connexarum congeries (§. 5.), ita ut prius contineat rationem cur sequatur posterius (§. 8.); perfectio mundi in eo consistit, quod rationes istæ particulares tandem in rationes generales communes resolvantur, atque mundus ideo perfectionis capax, quatenus res in eodem occurrentes inter se connexæ, hoc est, a causis finalibus atque efficientibus pendent (§. 10.).

§. 108.

Ob infinitam autem rerum varietatem, quam comprehendere supra vires nostras positum

fitum est (§. 96,), fieri nequit, ut perfectionem totius, quod existit, universi comprehendamus.

§. 109.

Quodsi ergo ex parte judicare volueris de toto, fieri sane potest, ut a veritate aberres, cum in parte subinde admittenda sit imperfectio ob perfectionem totius (§. 47. *Ont.*).

§. 110.

Imo ex eadem ratione contingit, ut nobis imponamus, si tantum de corporum atque status nostri perfectione in singulari judicare voluerimus.

§. III.

Quoniam autem omnis perfectio suis nititur regulis, unde aestimatur (§. 46. *Ontol.*); mundi quoque perfectio regulas habeat necesse est, quibus continetur. Istiusmodi regulæ sunt leges motus naturales (§. 47. 61. 70.), danturque aliæ complures, veluti naturam agere via brevissima, in natura nil fieri per saltum.

§. 112.

Cum ex regularum conflictu exceptio oriatur, unde imperfectio in partem redundat (§. 47.), in universo autem perfectio suas quoque habeat regulas (§. III.); patet ratio, unde imperfectiones in partibus universi subinde resultant, veluti cur monstra generentur, cur extraordinariæ tempestates ingruant, &c. Optica rem præsentem egregie illustrat, ubi salvis

iisdem regulis objecta diversa eodem modo in oculo repræsentantur, adeoque remota vel nimis exigua imperfecte.

§. 113.

Facile autem apparet, mundum esse perfectiorem, ubi exceptiones rariores, major rerum consentientium varietas & rationum generalium numerus major (§. 48. *Ontol.*).

§. 114.

In mundo perfecto coëxistentia & successio rerum variarum rationibus generalibus (§. 107.), adeoque eodem modo determinatur, consequenter in modo, quo res juxta se invicem collocantur, vel se invicem sequuntur, adest similitudo (§. 25. *Ontol.*). Est igitur in universo ordo (§. 42. *Ontol.*): qui cum ex perfectione resultet, regulis quoque nititur, quæ ex perfectionis regulis deducuntur.

§. 115.

Leges motus sunt regulæ perfectionis universi (§. III.), ex legibus motus autem derivantur regulæ conflictus (§. 43.); regulæ adeo conflictus sunt ex illarum numero, quibus continetur *Ordo naturæ*. Quoniam autem præter leges motus aliæ adhuc regulæ perfectionis universi dantur (§. III.); dubio caret, plures quoque præter regulas motus esse regulas ordinis naturæ. Et sane constat ex recentiori Astronomia, esse regulas motus, juxta quas

cor-

corpora mundi totalia, ipsi etiam Cometæ in spatiis cœlestibus moventur, a *Keplero* inventas, quæ veluti Leges atque Jura poli spectandæ.

§. 116.

Quoniam regularum rationes in rationes generales communes tandem resolvuntur (§. 114. 107.); ordo naturæ perfectus est (§. 44. *Ontol.*). Etsi enim regulæ constantes, juxta quas res variæ juxta se invicem collocantur, vel se invicem subsequuntur, ordinem pariant (§. 41. *Ont.*); earum tamen consensus, seu dependentia ab iisdem rationibus generalibus demum perfectionem largitur (§. 44. *Ont.*): id quod notandum est, ne ordinem cum perfectione confundamus, quæ ab illo diversa de eodem prædicatur.

§. 117.

Eventus in universo naturales per essentiam corporum atque regulas motus determinantur (§. 73.), atque adeo secundum naturæ ordinem consequuntur (§. 115.). Eventuum igitur essentialis corporum atque regulis motus conformis consecutio *Naturæ cursus* appellatur.

§. 118.

Miracula cum per essentiam corporum atque regulas motus non consequantur (§. 74.), & naturæ cursui contraria sunt (§. 117.), & naturæ ordinem turbant (§. 115.).

FINIS COSMOLOGIÆ GENERALIS.

IN-

INSTITUTIONES
PSYCHOLOGIÆ,
METAPHYSICÆ
PARS TERTIA.

INSTITUTIONES
PSYCHOLOGICAE
METAPHYSICAE
PARS PRIMA

1774



INSTITUTIONES PSYCHO- LOGIÆ.

PROLEGOMENA.

§. 1.

P*psychologia* est Scientia animæ, seu ea pars
Metaphysicæ, quæ de anima agit.

§. 2.

Dividit eam Philosophus in partes duas,
quarum alteram *empiricam*; alteram rationa-
lem vocat.

§. 3.

Psychologia empirica est Psychologiæ pars,
ubi traduntur, quæ de anima a posteriori inno-
tescunt. *non in animo sed in sensibus non in Teste faber.*

§. 4.

Psychologia rationalis est Psychologiæ pars
altera, qua rationes eorum redduntur, quæ de
anima in parte empirica annotantur.

§. 5.


Pars itaque empirica præcedit rationalem
(§. 3. 4.), atque adeo ille prior est, hæc posterior,
& ex principiis rationalis theses empiricæ in-
fer conclusionum deducuntur.

§. 6.

Cum pars empirica contineat conclusiones, pars rationalis demonstrationes (§. 5.), illa Logicæ atque Philosophiæ practicæ, præsertim Ethicæ principia suppeditat, hæc autem in illas disciplinas nullo modo influit.

§. 7.

Quodsi adeo vel maxime in rationali veritas acui non tangatur; nullum tamen hinc damnum Logicæ atque Philosophiæ practicæ, Ethicæ nimirum atque Politicæ metuentum.



PSYCHOLOGIA EMPIRICA.

SECTIO I.

CAPUT UNICUM.

DE EXISTENTIA ANIMÆ
SEU MENTIS.

§. 8.

Quilibet experitur, se sui aliarumque rerum extra se conscius esse (§. 52. Log.): id quod a nemine in dubium vocari potest, cum dubitando confirmetur. Unde enim nosti, te dubitare, nisi fueris conscius? Cum vero existat, qui sui aliarumque actu conscius existit; quin nos existamus, dubitari nequit.

§. 9.

§. 9.

Nititur adeo existentiae nostrae cognitio sequenti syllogismo:

Quodcumque ens sui ipsius aliarumque rerum extra se actu conscius est, illud existit.

Atqui Nos nostri aliarumque rerum extra nos actu conscii sumus.

Ergo nos existimus.

§. 10.

Quoniam huius syllogismi major est principium rationis evidens, ex eorum numero, quae axiomata vocantur (§. 32. Log.), minor autem experientia clara, seu iudicium intuitivum eadem nixum (§. 54. Log.), eadem evidentiā, qua existentiam nostri intuemur, etiam cognoscitur, quod per syllogismos infertur, quorum praemissae sunt propositiones evidentes, vel iudicia intuitiva experientiis clavis superstrueta, consequenter, quod demonstratur (§. 50. Log.).

*axioma n. quod
sag. in univ. d.
non alter n. d.
augm. n. d. q.
(v. Log. & univ.
in d. d. d. d. d.
d. d. d. d. d. d.
f. d. d. d. d. d.*

§. 11.

Cum veritates geometricae demonstrantur, eadem evidentiā cognoscuntur, qua existentia nostra nobis innotescit, ut adeo mirum non sit, quod assensum nemo istis denegare possit, quamprimum intelliguntur.

§. 12

Normam itaque habemus, ad quam exige-

re licet, utrum aliquid eadem constet eviden-
tia, qua existentiae nostrae cognitio claret,
nec ne.

§. 13.

*in se, unde solus
est in auctore
brunus est ipse
anima
est das libro
mens
in se ipso*
Ens illud, quod in nobis sui & aliarum re-
rum extra nos conscium, *Anima* sive *Mens*
appellatur. Unde animam existere evidens
est (§. 8.).

§. 14.

Animæ ergo existentiam ante *cognoscimus*,
quam corporis. Sed quid illa sit, suo demum
loco explicatur.



SECTIO II.

DE FACULTATE COGNOSCITIVA.

CAP. I.

DE FACULTATIS CO-
GNOSCITIVÆ PARTE IN-
FERIORI.

§. 15.

*in se, unde solus
est in auctore
brunus est ipse
anima
est das libro
mens
in se ipso*
Ex usu loquendi dicimur *cogitare*, quando
nobis consci sumus sive ejus, quod in no-
bis contingit, sive eorum, quæ nobis tanquam
extra nos exhibentur.

§. 16.

Quatenus mens objectum sibi repræsentat,
illud *percipere* dicitur: quatenus vero hujus
perceptionis sibi est conscia, stylo *Leibnitiano*
eidem

eidem *adperceptio* tribuitur. Objectorum re-
præsentationes vocantur etiam *Ideæ*.

§. 17.

Cogitatio itaque cum perceptionem, tum ad-
perceptionem involvit (§. 13. 14.).

§. 18.

Differunt perceptiones vel formaliter, vel materialiter, hoc est, tum quoad modum representandi, tum quoad objecta, quæ representant.

Die beyrichte
nieder des
Hofes nach
des Tages
eintrags
des Hofes
sind für
Pant.
des Hofes
Hofes
Darin
Hofes
Hofes
Hofes

§. 19.

Nimirum si perceptiones formaliter considerentur, vel claræ sunt, vel obscuræ, & claræ porro vel distinctæ, vel confusæ,

6. 20.

Clara dicitur *perceptio*, si rem repræsentatam ab aliis distinguimus: *obscura* autem si minus.

§. 21.

Claritas ergo ab observato discrimine in varietate: *obscuritas* a defectu discriminis in varietate observati pendet.

§. 22.

Clariora igitur nobis evadunt, in quibus plu-
ra, quam ante distinguiamus.

§. 23.

Si ea, quæ in objecto distinguimus & per
H 4 quæ

quæ ipsum ab aliis discernimus, assignare valeamus, tum *perceptio* vocatur *distincta*: in casu opposito *confusa* appellatur.

§. 24.

Distincta igitur perceptio enascitur ex claritate perceptionum partialium, ex quibus componitur.

§. 25.

Sumus itaque *in statu perceptionum distinctarum*, si perceptiones rerum una repræsentatarum partiales fuerint claræ, etsi confusæ, hoc est, si perceptio totalis fuerit distincta (§. 24.).

§. 26.

E contrario *in statu perceptionum confusarum*, si perceptiones partiales, consequenter & totales, fuerint obscuræ (§. 21.).

§. 27.

Facultatis cognoscitivæ pars inferior est, quæ objecta confuse & obscure repræsentat; *superior* autem, quæ eadem distincte repræsentat.

§. 28.

Materialiter differunt perceptiones, quatenus objecta, quæ repræsentantur, vel sunt præsentia sensibus, vel absentia.

§. 29.

Perceptiones, quarum ratio continetur in

or-

organis corporis nostri, dicuntur *Sensationes*, organa vero corporis, in quibus ratio ista continetur, vocantur *organa sensoria*. Et facultas percipiendi objecta externa mutationem organis sensorii inducentia *sentiendi facultas* seu *sensus* appellatur. gr. αἰσθητικὴ

§. 30.

Cum quinque istiusmodi organa in corpore humano distinguantur, *Oculus*, scilicet *auris*, *nasus*, *lingua* & *papillæ* ac *fibrillæ nervæ* per totum corpus dispersæ; quinque etiam numerantur sensus, *visus* nimirum, *auditus*, *olfactus*, *gustus* & *tactus*, quorum definitiones singulares adductum, generalis modo traditæ (§. 29.), facile formantur.

§. 31.

Evidens autem est, sensationes ad animam referri, non quatenus mutationes in organis sensoriiis accidunt, sed quatenus objecta percipimus, quæ istas mutationes inducunt.

§. 32.

Differunt autem sensationes gradu claritatis, ita ut una alteram obscuret, omni ad perceptionem prorsus cessante (§. 16.). Quemadmodum enim Optici dudum instar axiomatis sumere, lumen majus obfuscare minus, lumen e. gr. Solis lumen stellarum; ita similiter sonus major impedit minorem, odor major tollit minorem.

§. 33.

Nulla animæ potestas competit in sensationibus quicquam immutandi, v. gr. non ab ipsa pendet, quale lumen Solis percipere velit. Forma illarum ab arbitrio animæ minime pendet, v. gr. anima efficere nequit, ut dulcedinem percipiat, dum linguam tangit amarum.

§. 34.

Neque in potestate animæ positum est, utrum velit sentire nec ne, dum objecta externa in organa sensoria rite constituta agunt, v. gr. num velit oculis apertis videre objectum, quod radios in eisdem immittit; num velit audire sonum, qui in aures illabatur; num velit percipere odorem objecti, cujus effluvia odorifera cum aëre in nares attrahuntur.

§. 35.

Est tamen animæ aliqua potestas impediendi sensationes, quatenus organa sensoria avertere potest ab objectis, ne in ea agant, v. gr. a visibili, ne radii illabantur in oculum; aut objectis viam præcludere, ne ad organum pertingant, v. gr. aures vel nasum digitis obturare, ne sonus in illas illabatur, ne effluvia odorifera in hunc ingrediantur.

§. 36.

Objectorum, quæ sensibus percipimus, repro-

producere valemus perceptiones, illis licet absentibus. Et facultas ^{re}producendi perceptiones rerum absentium facultas *imaginandi* seu *imaginatio* appellatur.

§. 37.

Facilius autem ea imaginamur, quorum perceptiones sensuales sunt distinctæ, quam quæ confuse percipimus, dum sentimus. E. gr. Figuras & magnitudinum rationes distincte percipimus, colores vero confuse (§. 23). Sed notum est, nos facilius imaginari figuras & magnitudines, quam colores: id quod faciem Solis imaginari conantium exemplo apparet.

§. 38.

Accidit hinc, ut imaginatio non singula clare satis repræsentet, quæ ad objectum pertinent: unde enascitur harum perceptionum obscuritas quædam, qua objecta, quæ imaginamur, distinguimus ab iis, quæ sentimus. Sensatio ob majorem gradum claritatis obfuscat imaginationem.

§. 39.

Quemadmodum autem sensatio minus clara clarior apparet, clariori absente, v. gr. lumen lunæ clari^{us} videtur, absente lumine solari, ita similiter perceptiones, quas producit imaginatio, clariores apparent sensationibus cessantibus veluti in somno experimur.

§. 40.

§. 40.

Atque ea est ratio, cur his perceptionibus claritatem conciliaturi oculos claudamus, & cur vires imaginationis majores deprehendantur in tenebris & absentibus objectis, quæ præter oculum reliqua organa sensoria feriunt.

§. 41.

Certam autem ad regulam se attemperat imaginatio. Nimirum *si quæ simul percepimus, & unius perceptio denuo producat, sive sensuum sive imaginationis vi, imaginatio producit & perceptionem alterius*, seu quod perinde est, *perceptio præterita integra recurrit, cujus præsens continet partem*. Maximi hæc regula per omnem Philosophiam momenti est, quemadmodum in progressu patebit. Vocabimus eam *Legem imaginationis*.

§. 42.

Claret hinc somniorum ratio, quæ a sensatione nondum expergefacti ortum trahunt & ab imaginatione juxta legem ipsius continuantur.

§. 43.

Tendit autem imaginatio non modo ad olim percepta, sed etiam vires suas exercet circa alia, quæ sensu nondum percepit, dum vel absque ratione sufficiente olim percepta dividimus & componimus, v. gr. dum equum ala-

alatum, hominem pedibus equinis &c. imaginamur; vel dum duce principio rationis sufficientis ideam objecti effingimus, v. gr. dum ideam ædificii juxta regulas architectonicas concipimus.

§. 44.

Prior imaginandi modus dicitur *facultas fingendi* & ideæ, quæ eo producuntur *figmenta* audiunt; ubi tamen notandum est, fingentibus sapissime prodire figmentum diversum ab eo, quod intenderant, cujus ratio ex lege imaginationis haud difficulter liquet (§. 41.).

§. 45.

Posteriori imaginandi modo nititur ars inveniendi architectorum. Utuntur arte ex eodem fonte derivata, qui sermones sacros ex Postillis, quæ dicuntur, & Concordantiis exscribunt, qui ex pluribus libris collecta in unum volumen compingunt librum confarcinaturi & tyrones artis oratoriæ solutæ & ligatæ in faciendis Orationibus & Poëmatibus.

§. 46.

Habemus quoque facultatem ideas reproductas recognoscendi, quod eadem sint, quas antea jam habuimus, v. gr. nos jam videre hominem, quem jam ante vidimus, vel hominis alias visi, etsi nunc absentis, imaginem oculis nostris oberrare. Atque hæc
fa.

facultas est proprie illud, quod *Memoriam* appellamus.

§. 47.

Equidem vulgo memoriam imaginantur veluti quoddam idearum receptaculum, in quo condantur & unde rerum usu exigente denuo promantur, atque talia fingentes reproductionem idearum ad memoriam quoque referunt: enimvero hoc modo memoriam ab imaginatione non satis distinguunt (§. 36.), & usui loquendi non inhærent, cum non dicamus memoriam habere ejus, quod, ubi nobis denuo occurrit, an jam ante viderimus, nec ne, ignoramus.

§. 48.

Ratio autem, cur meminerimus, ideam objecti vel absentis vel præsentis esse eam, quam jam ante habuimus, in ea posita est, quod nunc in alio ordine quam ante contineatur. Quamobrem ^{negati} ~~positi~~, unde constet, nos perceptionem istam jam ante habuisse, v. gr. nos videre hominem jam ante visum, respondeamus, nos eundem hoc vel in illo loco vidisse. Nimirum dum videmus hominem, imaginatio producit ideam hominis & loci, ubi eum vidimus, simul (§. 41.). Non autem hic tantum spatii habetur ratio, sed etiam temporis, ob idearum in imaginatione successionem ab ipsius lege pendentem (§. cit.).

§. 49.

§. 49.

Facile autem memoriæ mandantur, quæ vel diu intuemur, vel sæpius percipimus, vel frequenter repetimus.

§. 50.

Contrariæ rationes sunt *oblivionis*, quæ memoriæ defectus est, adeoque impotentia ideam denuo oblatam recognoscendi, vel eam reproducendi. Etsi enim impotentia reproducendi perceptionem imaginationis defectus sit (§. 36.), cum eo tamen defectus recognoscendi eandem necessario cohæret, atque adeo ad oblivionem una refertur, nec nomine peculiari insignitur.

§. 51.

Fieri subinde solet, ut idea ab imaginatione reproducta sit obscura adeoque non sufficiat ad rem repræsentatam recognoscendam (§. 20.). Atque tum dicimus, nos non satis recordari, num eam jam ante habuerimus. Quodsi imaginatio ideam prorsus reproducere nequeat, tum quidem dicimus, nos rei per eam repræsentatæ prorsus non recordari, etsi alii, qui ejus memoriam habent, illud asseverent. Tum vero vi legis imaginationis (§. 41.) distinguimus cum cura, quæ in præsentis perceptione continentur, ut succurrat ex olim perceptis, quod vi ejusdem legis tandem ideam desideratam eamque satis claram

ram sistat, vel alii in memoriam nobis revocant, quæ in perceptione præterita totali præter eam una continebantur. Atque hæc mediata perceptionum præteritarum reproductio cum memoria copulata *Reminiscentia* appellatur.

§. 52.

Memoria autem & imaginatio suis gaudent gradibus, qui vel a multitudine perceptionum una reproductarum vel a facilitate easdem memoriæ mandandi (§. 36. 47. 49.) pendent.

§. 53.

Inde est, quod vires imaginationis atque memoriæ extendere liceat, accedente exercitio, cujus illustre præbet exemplum Mathematicus celeberrimus *Joannes Wallisius*, qui in tenebris nocturnis ex numero prægrandi, quem sola imaginationis & memoriæ vi præsentem retinuit, radicem quadratam 27. notarum extraxit. Huc etiam pertinet *Ars Mnemonica* memoriam artificialem parandi, cujus ratio ex imaginationis & memoriæ legibus (§. 41. 49.) derivanda.

CAP. II.

DE FACULTATIS COGNOSCITIVÆ PARTE SUPERIORI.

§. 54.

A confusa perceptione ad distinctam non per saltum progreditur mens nostra, sed per gradus. Quamobrem cum facultatis cognoscitivæ partem superiorem expositori docere teneamur (§. 27.), quænam circa cognitionem distinctam observentur, singulos istos gradus intermedios annotari convenit.

§. 55.

Deprehendimus in anima facultatem efficiendi, ut in perceptione totali partialis quædam clarior evadat ceteris, & claritate sua ceteras veluti obfuscet (§. 32.). Dum hominem intuemur, efficere possumus, ut majorem claritatem habeat perceptio oculorum, quam aliarum corporis partium; dum simul videmus objecta præsentia atque loquentis verba audimus, caloremque aëris ambientis sentimus, efficere possumus, ut verborum loquentis nobis magis conscii simus, quam vel objectorum in oculos incurrentium, vel caloris ab aëre ambiente pendentis. Atque hæc facultas *Attentio* salutatur.

§. 56.

Attentionem continuo exercitio intendi
(Thüm. Inst. Psychol.) I pos.

posse constat: cuius rei exemplum offert *Archimedes* in meditationibus suis geometricis ita ad rem attentus, ut militem in conclave irruentem non agnosceret. Impeditur autem attentio cum a sensibus, tum imprimis ab imaginatione, si sensationes multum habeant claritatis, atque perceptiones ab imaginatione reproductæ cum affectibus conjungantur.

§. 57.

Quodsi attentionem nostram successive in aliis aliisque partibus perceptionis totalis defigamus atque perceptionum partialium inter se collatarum diversitatem aut similitudinem intueamur; super re percepta *reflectimus*. *liber Institutionum*

§. 58.

Dum super re percepta reflectimus atque beneficio memoriæ (§. 46.) certi reddimur, nos perceptiones rerum ejusdem speciei imaginationis vi reproductas (§. 36.) jam ante habuisse, easque cum præsentibus comparantes earundem similitudinem intuemur; *notiones* specierum *universales* acquirimus (§. II. Log.), quæ cognitionis *universalis* prima fundamenta sunt. Nam per *notiones* proprie designamus representationes generum, specierum atque individuum.

§. 59.

Eadem vero reflexione pervenimus ad *notio-*

tiones distinctas (§. 7. *Log.*), ut adeo pateat, quoniam sit transitus a cognitione singulari ad universalem (§. 58.) & a confusa ad distinctam.

§. 60.

Facultas res distincte repræsentandi, quam superiorem facultatis cognoscitivæ partem appellavimus, *Intellectus* fert nomen; unde intellectus a sensu atque imaginatione (§. 29. 36.) formaliter, seu modo repræsentandi differt.

*minimè
intelligenti*

§. 61.

Dantur autem notionum distinctarum gradus. Major nempe gradus adest, si in partibus, quas in perceptione totali distinguimus, plures partes discernimus, quam si pauciores. Quod si notio varietatem tantum involvat, qua tanquam varia distinguuntur, partium instar considerantur. Atque hoc ipso continetur *notionum distinctarum* in alias simpliciores continuata *analysis*.

§. 62.

Hinc intellectui tribuitur ^{*distinctivè*} *profunditas*, quæ est facultas notiones distinctas in alias simpliciores continuo resolvendi, atque tanto major est, quo longius *analysin* continuare licet.

§. 63.

Differt autem *profunditas* ab ^{*distinctivè*} *Acumine*, quod est facultas multa in eodem objecto di-

stinguendi, atque adeo cum profunditate conjunctum acumen illam reddit perfectiorem.

§. 64.

Quoniam distincta cognitio ad intellectum, confusa ad sensus & imaginationem refertur (§. 60.), intellectus a sensu atque imaginatione prorsus liber, ubi notio nil confusi atque obscuri involvit: quo in casu *purus* appellatur.

§. 65.

Etsi autem intellectus noster nunquam prorsus purus deprehendatur, cum notionum analysis nunquam a nobis ad finem perducatur; intellectum tamen purum non esse mathematicorum figmentum (§. 64.) evidens est, & in Algebra occurrunt exempla ad eum prope accessientia, ubi formulas componimus ex signis, quæ, quod notio involuit, distincte repræsentant, & ab imaginibus sensui atque imaginationi propriis sejungunt.

§. 66.

Quando ea, quæ in perceptione distinguimus, tanquam a re percepta sejuncta intuemur; *abstrahere* dicimur, & eatenus menti *facultas abstrahendi* tribuitur, quæ etiam locum habet, ubi ea, quæ similitudinem individuorum vel specierum absolvunt, a ceteris, quæ rebus vel notionibus insunt, veluti sejuncta spectamus.

§. 67.

§. 67.

Quoniam vero actu separari nequeunt, quæ in ideis rerum continentur; tum res ipsas, tum quæ in iis distinguimus, verbis tanquam signis (§. 19. *Log.*) designamus, atque ita citra confusionem exhibentur, quæ ad unumquamque notionem distinctam pertinent.

§. 68.

Hinc duplex nascitur cognitionis discrimen. Aut enim ipsas rerum ideas intuemur, aut verbis tantum enunciamus, quæ in ideis continentur, vel aliis signis eadem repræsentamus. Prior cognitio dicitur *intuitiva*, posterior *symbolica*. ausgesprochen, oder durch Worte. *Jungl. Wort.*

§. 69.

Exempla aliorum signorum præter verba sunt in Arithmetica notæ numericæ, in Astronomia signa Planetarum, in Algebra signa quantitatum & operationum arithmeticarum, in arte saltatoria signa saltationum, quæ ingeniosus quidam Gallus *Feuillet* invenit, in Musica notæ musicæ &c. De signorum differentia & usu agendum est in *Arte characteristica*, quæ hætenus inter desiderata ponitur.

§. 70.

Dum, quæ in ente distinguimus, ab ipso quoque distinguimus, v. gr. ignitum a ferro ignito, sed tanquam ipsi existens aut ad idem

pertinens⁹ consideramus, *judicare* dicimur. Idem fit in casu opposito, ubi aliquid ab eo diversum tanquam eidem non inexistentis nobis repræsentamus. Quæ de re fusius egimus in Logicis (§. 24. & seqq.).

§. 71.

Quæ ad perceptiones nostras attenti cognoscimus, experiri dicimur. Unde liquet, experientiæ deberi notiones a sensibus derivatas (§. 58.) atque judicia intuitiva ex perceptione complexa formata (§. 54. *Log.*).

§. 72.

Quoniam *perceptio complexa*, vi cujus diversa a subiecto in eodem repræsentantur, est fundamentum judiciorum intuitivorum, quæ experientiæ debentur (§. 71.); opera imprimenda est, ne de subiecto aliud prædicemus, quam quod in illa perceptione continetur, nec subiecti alias determinaciones admittamus, quam quas perceptio ista involvit. Secus qui faciunt, *vitium subreptionis* committunt, & ad experientiam referunt, quæ ab eadem aliena (§. 56. *Log.*). Inde autem experiendi difficultas manat.

§. 73.

Dum vi verborum seu vocum singula discernuntur, quæ in notione complexa continentur (§. 67.); usus cognitionis symbolicæ in judicando apparet (§. 70.), utpote quæ judi-
cia

cia distincta reddit (§.23.). Atque hinc est, quod eam in judicando cognitioni intuitivæ præferentes, dum judicamus, nobismet ipsis tacite loquamur, verbis minimum mentem subeuntibus.

§. 74.

Quoniam quæ rebus inesse vel accidere experimur, raro necessario insunt, sæpius non nisi in determinato quodam statu inesse vel accidere possunt; vi experientiæ certum est, fore ut idem insit vel accidat, subjecto in eodem statu posito, seu ut generatim loquamur, in casu simili, v. gr. ut ferrum candeat, si carbonibus candentibus folle inflatis immittatur.

§. 75.

Quatenus ergo homines in actionibus suis empirici sunt, hoc est, easdem secundum experientiam moderantur, casus similes expectant, in quibus imitantur olim facta. Sunt autem plerique homines, nec illis exceptis, quorum consiliis regitur mundus, in plerisque actionibus empirici, olim facta in casu simili imitantes.

§. 76.

In hac vero imitatione latet tertia mentis operatio, perinde ac cum nominibus obvia entia distinguimus: quod ut appareat, distinctius nobis exponendum est. Nimirum dum ens obvium intuemur, confuse saltem judicamus,

mus, quod sit olim percepto & in imaginatione (§. 41. reproducto simile (§. 70.). Quamobrem cum una recordemur (§. 41. 46.), enti olim percepto convenire hoc nomen; illud eidem inferendo tribuimus. Similiter ubi prævia experientia didicimus, in quodam casu aliquid fieri posse, atque eodem recurrente, ut ante judicamus, eum isti similem esse, illud & hic fieri debere inferimus. Et eodem modo se res habet, ubi de iis sermo est, quæ entibus quibusdam insunt sive per modum actus, sive per modum potentiaæ.

§. 77.

Quodsi cognitio confusa in distinctam abeat, prior modus argumentandi redit ad Canonem: *Cui competit definitio, illi competit definitum*; ^{exstant} posterior vero ad alterum: *Quicquid competit generi vel speciei, illud etiam competit speciei sub genere, vel individuo, sub isto genere vel sub ista specie contento*. Nullæ enim inferuntur conclusiones affirmativæ, quæ non hisce regulis universalibus contineantur, cum ens in determinato quodam statu constituat veluti certam speciem subalternam. De quibus uberius egimus in Logicis (§. 34. & seqq.).

§. 78.

Judicia, quæ ex duobus aliis hac ratione eliciuntur, vocamus *discursiva* & operatio animæ, qua iudicium discursivum formatur, *ratio-*

tiocinium salutatur, cujus repræsentatio symbolica proprie *sylogismus* audit.

§. 79.

Ufu autem non contemnendo eminet syllogismus, si quidem distincte explicare voluerimus, quomodo ex præsentī aliqua sensatione non interrupta serie ceteræ perceptiones deducantur, quæ mentem successive subeunt, donec ista series nova sensatione interrumpatur. Nimirum si ex notione complexa iudicium intuitivum formatur, quæ syllogismi minorem sistit, imaginationis vi memoriam subit aliud præteritum terminum communem cum intuitivo habens (§. 41. 46.), atque terminorum diversorum combinatione nascitur iudicium discursivum (§. 77.). Quodsi huic potius, quam sensationi tum præsentī, aut iis, quæ imaginationis vi una præsentia sistuntur, attendamus (§. 55.), iudicium istud discursivum, quod in Logicis *Conclusionis* nomine venit, instar præmissæ sumitur & ubi imaginationis vi denuo memoriam subit aliud iudicium præteritum ob terminum communem, quem habet, novum ut ante formatur iudicium discursivum. Atque ita series perceptionum continuatur, donec occasione sensationis novæ alterius initium fiat, illa abrupta. Exempla quotidie obvia rem illustrent.

§. 80.

Apparet hinc primo, communem cogitandi modum non differre a demonstrationibus Geometrarum (§. 50. *Log.*), seu quod perinde est, Geometras in suis demonstrationibus & meditationibus eodem ordine ab uno judicio ad alterum progredi, quo plebs ipsa singulis momentis naturali cogitandi modo a perceptione præsentis ad subsequentem progreditur, qua obiectum absens repræsentatur, hac saltem differentia, quod Geometræ ipsosque qui imitantur in aliis disciplinis versentur circa veritates universales, plebs circa historicas, sive singulares.

§. 81.

Apparet secundo, quodlibet judicium peculiarem exprimere animæ statum, nimirum in primo ratiocinio judicium intuitivum refert statum præsentem, judicium alterum, quod succurrit, statum præteritos plerumque plures, & judicium, quod inferitur, discursivum statum sequentem, qui enascitur ex præsentis vi præteriti. Ut adeo nunc comprehendamus, quomodo in anima *ex statu præsentis per præteritum imprægnato nasci possit sequens.*

§. 82.

Apparet tertio, literis operam navantes a naturali cogitandi modo deflectere & facultatem

tem cognoscitivam corrumpere, si vel confuse percepta memoriae infigant vel demonstrata non naturali ordine evolvant, ut ne Matheseos quidem studio perficiatur intellectus.

§. 83.

Parit autem demonstratio scientiam, de qua jam diximus in Logicis (§. 62.) hic non repetenda.

§. 84.

Sunt, qui habitu pollent ex quibusdam veritatibus cognitis alias incognitas eliciendi, quem *artem inveniendi* appellamus: cujus ideam quandam exhibet *arithmetica practica*, ubi ex quibusdam numeris datis invenimus alios incognitos: sed plenior *Algebra*, quæ est ars inveniendi Mathematicorum specialis. Specimen hujus artis extra Matthesin luculentissimum dedit Philosophus in Tractatu Germanico de vera causa multiplicationis frumenti.

§. 85.

Cum ex cognitis inveniantur veritates incognitæ, primi inventores ex veritatibus plebi obviis, quas invenere, deduxerunt: unde non mirum, ex notionibus communibus in ipsa Matthesi prima fundamenta derivari.

§. 86.

Ad inveniendum non modo ratiocinandi habitu opus est (§. 84. 79. 80.): sed experiendo di-

discimus, alia quoque artificia adhiberi, e. gr. *præcipuum reductionis*, qua casus, in quo quid quæritur, reducitur ad alium similem nobis cognitum, ut in Arithmetica additio ad morem communem numerandi diversæ speciei monetæ; item *fictionis* cum ratione conditas, quarum exempla in Mathesi occurrunt, veluti cum circulus instar polygoni rectilinei, sed infinitorum laterum sumitur; in politicis integra societas, vel Respublicæ integræ spectantur instar unius hominis.

§. 87.

Ad hoc quidem opus est, ut acumine polleas ad observandum similitudinem: quam facilitatem observandi rerum similitudines *Ingenium* vocamus. Unde elucet, ad inveniendum ingenio opus esse, nisi in inveniando aliorum tantum artificia in casu simili imitari volueris (§. 75.). Elucet porro, cur Poëtis, Oratoribus, Histrionibus &c. ingenium esse debeat, quodque ingenii vires extendantur acumine, profunditate, scientia accedente (§. 62. 63. *Psych.* & §. 62. *Log.*).

§. 88.

Veritatum universalium nexum demonstrationes loquuntur (§. 50. *Log.*): quem *intuendi* ^{perficiendi} facultas *Ratio* dicitur. *Leibnitius* rationem percatenam veritatum definiens ipsas veritates universales inter se connexas pro ratione habet. Sed

Sed consultius visum Philosopho a communi loquendi usu non recedere.

§. 89.

Rationi conforme vocatur, quod cum veritatibus cognitis connectitur, seu ex iis legitima consequentia (§. 37. *Log.*) deducitur. *Contrarium rationi* habetur, quod veritatibus universalibus contradicit.

§. 90.

Rationi opponitur experientia, quæ nexum judiciorum intuitivorum ipsi debitorum cum veritatibus universalibus non patefacit (§. 71.).

§. 91.

Hinc duplex datur cognoscendi modus, quorum alter dicitur procedere *a priori* sive *per rationem*, recto intellectus usu; alter autem *a posteriori* sive *per experientiam*, recto sensuum usu, ab intellectu, sicubi opus est adjutorum.

§. 92.

Quamdiu ex solis notionibus *a priori* ratio- cinamur, *ratio pura* est, cujus exempla in Mathesi pura occurrunt: sed ubi notionibus & judiciis intuitivis inter præmissas locus concipitur, *ratio pura* non est: id quod in ceteris disciplinis plerumque obtinet, præsertim in Physicis.

§. 93.

Mittimus ea, quæ de certitudine cognitionis humanæ, de probabilitate, de opinione, de erroribus dici poterant, ne repetamus alibi (§. 61. & seqq. *Log.*) dicta.

SE-

SECTIO III.

DE FACULTATE APPETITIVA.

CAP. I.

DE FACULTATIS APPETITIVÆ PARTE INFERIORI.

§. 94.

Pars facultatis appetitiva inferior est, quæ a perceptione confusa ortum trahit. A perceptione ad appetitum non fit progressus per saltum. Quamobrem omnis progressus distincte nobis exponendus.

§. 95.

Luc. 3. Dum rem perceptam contemplati ejus perfectionem intuemur, *Voluptas* oritur, quæ adeo cum *Cartesio* Epist. Part. I. per sensum seu intuitum perfectionis definiri potest, sive illa fuerit vera, sive apparens, hoc est, nostro saltem iudicio, etsi erroneo. Ita voluptatem percipimus ex similitudine imaginis cum suo prototypo, in qua perfectio ejus consistit (§. 44. *Ontol.*), cum imago repræsenter prototypum.

§. 96.

Si perfectio tantum fuerit apparens, errore animadverso, voluptas evanescit (§. 95.), atque adeo hoc in casu voluptas mutabilis in casu opposito constans est.

§. 97.

vincit appetitum
Intenditur autem voluptas tum per gradus per-

perfectiōnis, tum per gradus certitudinis nostri de eadem iudicii. Unde est, quod artificis opus consummatum insigni voluptate perfundat artificem peritum, cum idiota nilejus percipit.

§. 98.

Atque eadem est ratio, cur [profunda rerum cognitio adeo delectet intelligentes, cum non modo cum sensu perfectiōnis rerum cognitarum, verum etiam cognoscentis ipsius conjungatur, præsertim recordantis, quænam difficultates fuerint superandæ, antequam perfectio acquiratur: unde potissimum gradus innotescit, etsi confuse perceptus (§. 23.).

§. 99.

Ex sensu imperfectiōnis, siue veræ, siue apparentis oritur *Tædium*: ita enim voluptatis oppositum appellare liceat. Posset etiam dici *Displacencia*. Unde pater, mutatis mutandis de displacencia valere, quæ de mutabilitate, constantia & gradibus voluptatis dicta sunt.

§. 100.

Differt autem tædium a nudo voluptatis defectu, qui locum habet, ubi omnis & perfectiōnis & imperfectiōnis sensus abest.

§. 101.

Differt etiam a *Dolore*, qui ex solutione continui in corpore oritur: quamvis apud Latinos subinde etiam ad solum animum referatur & voluptatis oppositum habeatur.

§. 102.

§. 102.

Quicquid nos statumque nostrum perficit, *bonum*, quod nos statumque nostrum imperfeciores reddit, *malum audit*.

§. 103.

Unde, quod voluptatem parit, sensuum iudicio *bonum* reputatur (§. 95.); quod vero tedium parit, *malum* (§. 99.). Hanc autem notionem subinde fallere, facile pater (§. 96. 99.).

§. 104.

Qui solo sensuum stant iudicio, gradus boni atque mali ex gradibus voluptatis atque tædii seu doloris æstimare solent, qui tamen ex perfectionis vel imperfectionis nostri statusque nostri æstimandi sunt.

§. 105.

Inclit. t. n. i. n. d.

Ex confusa boni repræsentatione oritur *appetitus sensitivus*; ex confusa mali repræsentatione *aversatio sensitiva*. *In p. i. n. d. a. t. t. p. s. n. u.*

§. 106.

Est adeo *appetitus sensitivus* inclinatio mentis ad objectum pro ratione boni confuse in ea percepti.

§. 107.

Aversatio vero *sensitiva* est reclinatio mentis ab objecto pro ratione mali confuse in ea percepti. Notionem inclinationis & reclinationis confusam hic supponimus, quam cum unusquisque in se intruere queat, ad præsens institutum abunde sufficit.

§. 108.

§. 108.

Differt averfatio a defectu appetitus, ubi nulla neque ad appetitum, neque ad averfationem adest ratio, cum objectum nec bonum, nec malum judicetur.

§. 109.

Ad appetitum vero pariter ac ad averfationem non modo concurrunt perceptiones præfentes, verum etiam abfentes vi imaginationis reproductæ (§.41.), & vi memoriæ agnitæ (§.46.), quamvis faltem confuse: ob quam confufionem fieri folet, ut voluptates olim accidenta-liter præfentes tanquam objecto proprias confideremus.

§. 110.

Atque ea potiffimum eft ratio, cur appetitus, vel averfatio ejusdem objecti pro diverfitate fubjectorum plurimum differat.

§. III.

Appetitus & averfatio fenfitiva vehementior *Affectus* audit, conjunctus cum extraordinaria commotione fanguinis & fluidi nervei in corpore per variatum arteriarum pulfum, coloris-que faciei atque vultus & gefuum mutationem manifefta, quoniam pulfus & faciei color non variatur, nifi variata commotione fanguinis, nec motus organorum corporum fieri potef absque fluido nerveo in mufculos motus instrumenta influenti, quemadmodum in phyficis traditur (§. 328.).

(*Thüm. Inftit. Pſychol.*)

K

§. 112.

§. 112.

Affectus adeo cum insigni gradu voluptatis vel doloris seu tædii conjungitur (§. 104. 103.), ut perperam voluptas atque ejus oppositum, pro affectuum speciebus habeatur. Species potius affectuum in diversa voluptatis atque doloris modificatione consistunt.

§. 113.

Voluptatum prædominium ^{non nigræ tædii} ~~insigne~~ ^{Græcè} *Letitia* est, & oritur adeo ex boni præsentis opinione (§. 102. 95.).

§. 114.

Tristitia e contrario est prædominium insigne tædii sive doloris. Oritur ideo ex mali præsentis opinione (§. 102. 99.).

§. 115.

Amor est dispositio ^{Græcè} ~~insigne~~ ² *mentis* ex alterius felicitate voluptatem percipiendi. Oritur ex eo, quod in altero quidpiam deprehendamus, unde voluptatem percipimus, consequenter quod sensuum judicio stantes pro bono reputamus (§. 103.). Atque hinc etiam *amare* dicimur res inanimatas, quatenus ex iis voluptatem percipimus.

§. 116.

Odium contra est dispositio animi ex alterius infelicitate voluptatem percipiendi. Oritur

tur cum in altero deprehendimus, quod nobis tedium creat, consequenter quod malum reputamus (§. 103.). Atque hinc odio prosequi dicimur res inanimatas, quatenus ex iis tedium percipimus.

§. 117.

Lætitia ex alterius infelicitate orta *Irrisionis* ^{h. Burleuse} fert nomen, ab insigni odio ortum trahens (§. 113. 116.).

§. 118.

Invidia est tedium sive dolor ob felicitatem alterius: cujus adeo mater est odium (§. 116.).

§. 119.

E contrario *Misericordia* ^{Misericordia} est tedium sive dolor ob infelicitatem alterius, cujus adeo mater amor est (§. 115.).

§. 120.

Acquiescentia ^{In acquiescentia} in se ipso est lætitia ob bonum, quod patravimus.

§. 121.

Pœnitentia e contrario est tristitia ob malum, quod patravimus.

§. 122.

Gloria ^{h. Burleuse} est lætitia orta super bono a nobis patrato, quatenus ad aliorum opinionem refertur. Stimulus est ad præclara facta, spretis difficultatibus & absque lucri cupidine subeunda.

§. 123.

E contrario *Pudor* est tristitia sive tædium ortum ex malo a nobis patrato vel patrando, quatenus ad aliorum opinionem refertur.

§. 124.

Gratitudo est amor in benefactorem ob præstita nobis beneficia.

§. 125.

Favor est amor personæ ob mores nobis acceptos.

§. 126.

Spes est voluptas ex bono obtinendo percepta, si prædominetur voluptas seu in lætitiā degeneret (§. 113.), *fiducia* nomen nanciscitur.

§. 127.

Metus est tædium ex malo imminente perceptum. *Desperatio* autem tristitia intolerabilis super malo imminente.

§. 128.

Nimia tristitia ex malo improvise percepta *Terrorem* absolvit.

§. 129.

Vacillatio animi est alternatio voluptatis atque doloris super bono, quod an obtentu possibile sit reperire non possumus. Voluptatem nempe percipimus ex contemplatione boni, dolorem ex difficultate illud obtinendi: tum & illam ex consideratione mediorum; hunc ex difficili eorum executione. Definiri quoque potest per pugnam spei atque metus (§. 126. 127.).

§. 130.

Animi fignis §. 130.

Pusillanimitas est tristitia orta ex difficultate boni obtinendi. *Trepidatio*, *in Zagſar hylori eſt* *tristitia orta ex magnitudine mali imminentes.*

§. 131.

Deſiderium eſt tedium ſubortum ex mora boni obtinendi.

§. 132.

Ira denique eſt tedium inſigne ortum ex injuria nobis vel aliis illata, conjunctum cum odio ejus, qui eam intulit. Intenditur, ſi cum eadem pudor (§. 123.), pœnitentia (§. 121.), terror (§. 128.), metus (§. 127.), deſperatio (§. cit.) pro natis circumſtantiis jungantur.

§. 133.

Ceterum ut in appetitu ſenſitivo & averſatione ſenſitiva multum quoque tribuendum eſt imaginationi (§. 109.), ita non minus eadem ad affectus plurimum confert (§. III.), ut ſæpius non appareat, undenam ſit affectus vehementia.

§. 134.

Videmus etiam affectum eſſe vehementiorem, ſi animus ob alias rationes prægnantes ad eum jamjam diſpoſitus ab alia cauſa leviori ad eundem concitetur.

§. 135.


Affectus impediunt attentionem, ne verum cernere queamus & ex præcipitantia ad actiones feramur, quarum poſtea pœnitet.

K 3

§. 136

§. 136.

Homo itaque affectibus indulgens & sensibus adeo ac imaginationi audiens (§. 105. III. 27. 29. 36.) in statu servitutis esse dicitur.



CAP. II.

DE FACULTATIS APPETITIVÆ PARTE SUPERIORI.

§. 137.

Facultatis appetitivæ pars superior est, quæ a cognitione distincta ortum trahit.

§. 138.

Hinc *appetitus rationalis* seu *voluntas* est inclinatio animæ ad objectum pro ratione boni, quod in eo distincte cognoscere nobis videmur. Studio dico, quod cognoscere nobis videmur, quia hominis iudicium subinde fallit. Appetitus autem sequitur opinionem hominis, neque semper supponit iudicii veritatem. Si quod ens nunquam errare ponatur in iudicando, tunc quod ipsi videtur, semper erit verum: quod facile patet.

§. 139.

Aversatio contra rationalis sive *Noluntas* est reclinatio mentis ab objecto pro ratione mali, quod in eo distincte cognoscere nobis videmur ut adeo differat ab omiſſa volitione, quæ est indifferentia ad volendum & nolendum, nulla ad utrumque ratione præſente.

§. 140.

§. 140.

Quoniam vero tum appetitus sensitivus, tum rationalis in bonum fertur (§. 105. 138.), & averfatio tum sensitiva, tum rationalis a malo abhorret (§. cit.); ideo anima in appetendo & averfando hanc fequitur regulam, quam a veteribus dudum animadverfam *Legem appetitus* appellamus: *Quicquid appetimus, illud appetimus sub ratione boni, & quicquid averfamur, illud averfamur sub ratione mali.*

§. 141.

Repræfentationes iſtæ boni atque mali dicuntur *Motiva*, ut jam appareat, vi Legis appetitus, animum nunquam appetere nec averfari fine motivis. Hinc itidem veteres: *incogniti nulla cupido.*

§. 142.

Quoniam vero ad appetendum & averfandum non requiritur judicii veritas (§. 138. 139.); ideo fieri poteſt, ut homo appetat malum, quia illud pro bono habet, & quod malum eſſe cognofcit, appetere poteſt, quatenus eſt medium majus malum propellendi, tum enim ipſi hoc reſpectu videtur bonum.

§. 143.

Quemadmodum vero intellectus nunquam eſt prorsus purus (§. 65.), a quo diſtincta cognitio manat (§. 60.); ita quoque cum appetitu rationali plerumque miſcetur ſenſitivus, cum ille

a distincta (§. 138.), hic a confusa boni dijudicatione (§. 105.) oriatur. Unde fieri potest, ut appetitus ex utroque mixtus fiat fortior, quam futurus erat, si rationalis solus adfuisset. Et eodem modo se res habet cum averfatione. Hæc probe tenenda sunt, ubi de motivis judicium faciendum, cur unum prævaleat alteri & cur appetitus sensitivus vincat rationalem.

§. 144.

Distinguuntur motiva in completa & in incompleta. *Completa* sunt *motiva*, si omnes rationes expendimus, ob quas objectum ad appetendum vel averfandum propositum judicatur vel bonum, vel malum: *incompleta* sunt, si aliquas tantum expendimus, ceteris subsequen-
tibus.

§. 145.

Appetitus, qui oritur ex motivis incompletis *Voluntas antecedens*: qui oritur ex completis, *Voluntas consequens* dicitur. Patet autem, cur voluntas consequens contraria esse possit antecedenti, cum, quæ superaccedunt rationes, prægnantiores esse possint ~~primis~~ ^{primis} expensis.

§. 146.

Ubi sæpius appetivimus, vel averfati fuimus aliquod objectum, id denuo oblatum appetere vel averfari solemus nulla ratione distincta expensa, cur appetamus, vel aversemur, in confusa scilicet, immo obscura, olim distincte percepto-

ceptorum repræsentatione acquiescentes. Habitus iste agendi ex determinatione præterita *Consuetudo agendi* salutatur.

§. 147.

In consuetudine igitur agendi latent motiva (§. 146.): unde distincte cognitari, quomodo appetitus vel averfatio enascatur, ad eos casus attendere tenemur, ubi aliquid prima vice appetimus, vel averfamur.

§. 148.

Et si autem anima nec appetat, nec averfetur sine motivis (§. 141.), non tamen ideo necessario agit. Si enim per motiva necessitaretur ad agendum, fieri haudquaquam posset, ut contra motiva ageret mutata voluntate, (quod tamen fieri experientia loquitur), cum necessarium non sit, quod mutari potest (§. 28. *Ontol.*).

§. 149.

Anima itaque semetipsam determinat, et si motivis suis convenienter, ita ut voluntatem non mutet, nisi aliis rationibus oblatis, quas ad hanc mutationem sufficientes judicat: quæ omnia cum principio rationis sufficientis conspirant, neque enim aliæ admittendæ sunt rationes ad actum determinandum sufficientes, nisi quas experientia loquitur (§. 14. *Ontol.*).

§. 150.

Cum anima in appetendo & averfando se-

quatur iudicium intellectus, num bonum sit objectum, an malum (§. 140.); antequam sese ad appetendum, vel averſandum determinet, cognitio objecti, circa quod verſatur, præſupponitur. Atque hinc requiritur, ut anima intelligat actionem, ad quam se se determinat.

§. 151.

Porro actiones, quas anima decernit, ipsi etiam *motus corporis* ab ipsius decreto seu voluntate pendentes, ac ideo *voluntarii* dicti, cum earum oppositum æque possibile deprehendatur, in se contingentes sunt (§. 27. *Ontol.*). Ut adeo ex pluribus possibilibus eligat, quod ipsi maxime arridet (§. 140.).

§. 152.

Quoniam vero eligere potest, quod ipsi maxime arridet, ideo ex necessitate naturæ determinata non est ad hoc vel illud agendum, ad agendum hoc vel isto modo, & ideo per naturam indifferens dicitur ad agendum, agendum hoc vel isto modo: quam *indifferentiam exercitii* appellarunt scholastici.

§. 153.

Et quia motiva eam non necessitant, ita ut etiam iis non obstantibus se se aliter determinare possit, siquidem ob rationes oblatas commodum visum fuerit (§. 148.); in ipso determinationis actu indifferentia illa exercitii adhuc subsistit.

§. 154.

§. 154.

Quatenus denique anima semetipsam determinat, neque principio determinandi externo habet opus; eatenus *Spontaneitas* ipsi tribuitur.

§. 155.

Cum tamen se se non determinet, nisi adsit ratio, cur hoc faciat (§. 149), in casu autem perfecti æquilibrii nulla ratio adsit, cur ad hanc potius contradictionis partem, quam ad alteram se se determinet; in hoc casu ad neutram se se determinare debet. Unde rejicitur *indifferentia perfecti æquilibrii*, quam nonnulli scholasticorum finxerunt. Immo nondum evictum est, casus perfecti æquilibrii in negotiis humanis occurrere.

§. 156.

Ex his tandem elucet, quid per *libertatem* animæ intelligatur, nempe facultas ex pluribus possibilibus sponte eligendi, quod ipsi maxime placet, cum ad neutrum per naturam suam determinata sit.

§. 157.

Atque ideo lubenter agimus, quod libere agimus, quia nempe libere eligimus, quod maxime arridet; coacti vero, quod displicet, vel minus placet.

SECTIO IV.

CAPUT UNICUM.

DE COMMERCIO INTER
MENTEM & CORPUS

§. 158.

Ad nosmetipsos attenti experimur, quando objecta externa in organa sensoria agunt, eo ipso momento oriri quoque in mente perceptiones, quibus eadem tanquam extra nos repræsentamus.

§. 159.

Observamus autem non nisi coëxistentiam mutationum in corpore atque in mente, nequaquam vero quod corpus physica quadam actione producat illas perceptiones in mente. Quod si enim hanc actionem experiremur, minimum confusam ejus notionem haberemus (§. 71. 23.), qualis tamen ne tunc quidem in nobis datur, quando utraque mutatio, altera in corpore, in mente altera contingit.

§. 160.

Non tamen hoc ex capite rejicitur physica corporis in animam actio, quod nullam ejus habeamus notionem: sed inde tantum inferitur, quod non possit tanquam per experientiam evicta admitti, consequenter, qui hoc faciunt, eos committere vitium subreptionis (§. 72.).

§. 161.

§. 161.

Experimur præterea, animam percipere dolores ac infirmitates & lassitudinem corporis, ita ut nec animæ bene sit, si corpori male est: immo mentem imprimis pati ab extraordinaria sanguinis ac fluidi nervei commotione; hac vero sedata, & animo pristinam restitui tranquillitatem.

§. 162.

Neque ignotum est, animam crescente corpore fieri perfectiorem, cum in infantibus prorsus non, in pueris parum se se exerat rationis usus. In ætate contra senili dejectis corporis viribus, subinde vires animi deficiunt, & morbi præsertim capiti fatales nonnunquam omnem tollunt rationis usum.

§. 163.

Experimur etiam ex altera parte, certos corporis motus in corpore ad decretum animæ liberum consequi, & mutato animæ decreto, jam conceptum exemplo fisti: quos ideo motus voluntarios supra diximus (§. 151.).

§. 164.

Quoniam tamen nullam actionis animæ ideam, ne confusam quidem, tenemus, qua motus isti producerentur, dum ad decretum animæ in corpore se se exerunt; dici sane nequit, quod illam experiamur (§. 71. 23.). Per experientiam non constat, nisi quod motus
isti

isti in corpore ad liberum animæ decretum consequantur.

§. 165.

Lubenter autem concedimus, non ideo actionem istam animæ in corpus rejiciendam esse: id tantum urgemus, quod vitio subreptionis sumatur tanquam experientia suffulta (§. 72.).

§. 166.

Tenendum vero, motum non consequi, nisi organis ac instrumentis motus in corpore rite se habentibus: etenim nervis ligatis vel rescissis, aut musculis dissectis ad imperium mentis nullus sequitur motus. Neque motus ab anima decretus aliter sequitur quam corporis fert structura mechanica.

§. 167.

Immo modum, quo motus in corpore producit, ignorat anima, ut ex Physica satis constat; multique motus voluntarii contingunt mira velocitate continuo variantes, quorum particularia decreta in mente non observamus. Exemplo est loquela, imprimis ubi orator sermonem recitat.

§. 168.

Quoniam sensationes tum quoad existentiam, tum quoad speciem pendent a mutationibus in organis sensoriiis factis, & hæc a situ
cor-

corporis in universo (§. 158.) & vicissim motus, qui dicuntur voluntarii, in corpore nostro ab animæ liberæ decreto (§. 163.); ideo corpus ad animam, & animam ad corpus pertinere atque utrumque ens unam personam constituere concludimus, animamque corpori *unitam* dicimus.

§. 169.

Et quia anima libere decernit motus corporis, huic vero corpus in exequendo resistere non potest; ideo animæ tribuitur *regimen corporis*: ut adeo facultas regendi sit facultas pro arbitrato suo motus corporis decernendi, seu cum constanter per corporis structuram plures motus sint possibiles, libere determinandi eum, qui actum consequi debet.

§. 170.

Hæc quidem de commercio inter mentem & corpus indubia experientiæ fide constant citra vitium subreptionis, nec plura de eodem tenere debet morum doctor & politicus quemadmodum suo loco in moralibus & politicis uberius constabit.

FINIS PSYCHOLOGIÆ EMPIRICÆ.

PSYCHOLOGIA RATIONALIS.

SECTIO I.

CVP. UNICUM.

DE ESSENTIA ET NATV- RA ANIMÆ.

§. 171.

Anima sui aliarumque rerum extra se conscia est (§. 8.); id quod obtinet, quoties ea, quæ simul percipiuntur, a se invicem, & se tanquam percipientem a rebus perceptis distinguit, consequenter quando perceptio totalis distincta (§. 23.), partiales claræ minimum (§. 20.), etsi confusæ (§. 23.), hoc est, quando in statu perceptionum distinctarum sumus (§. 25.), ut adeo illa ad perceptionem non amplius subsistat, quando in perceptione totali nihil distinguimus, consequenter partiales obscuræ sunt (§. 20.), atque nos in statu perceptionum confusarum existimus (§. 26.).

§. 172.

Diversitatem eorum, quæ percipiuntur, cognoscimus, dum nobis patet, si perceptiones partiales sibi invicem substituantur, perceptionem totalem mutari (§. 22. *Ontol.*). Cum igitur perceptiones partiales inter se

com-

componimus, super totali reflectimus (§. 57.) atque adeo eandem perceptionem per aliquod tempus præsentem veluti a se ipsa distingui-
mus atque hoc momento eandem adhuc esse, quæ fuerat modo præcedenti, intelligimus: quod cum beneficio memoriæ fiat (§. 46.), perspicuum est a reflexione atque memoria derivari adperceptionem (§. 16.).

§. 173.

Plures igitur actus adperceptio involvit (§. 172.). Quamobrem cum cogitationes nostræ sint perceptiones cum adperceptione conjunctæ (§. 17.), quælibet cogitatio determinato absolvitur tempore (§. 52, *Ontol.*).

§. 174.

Res materiales mutationem non subeunt nisi mediante motu (§. 30. *Cosmol.*), nec partium situs immutatus aliam, quam figuræ ac magnitudinis mutationem inducere valet (§. 61. *Ontol.*). Si ergo quidpiam in materia repræsentetur, repræsentatio subsistit, vel partibus materialibus iisdem in eodem situ manentibus, vel aliis in eundem situm continuo succedentibus. Quoniam vero, quocunque modo repræsentatio per aliquod tempus subsistat, per motum effici nequit, ut materia partes a se invicem, immo a se ipsis diversis temporis articulis distinguat illarumque diversitatem, harum vero idenditatem anim-

(*Thüm. Inst. Psychol.*) L ad-

advertat, ut materia sit eorum, quæ in ea repræsentantur, conscia concipi nequit (§. 172.). Materiæ igitur cogitandi facultas repugnat (§. 15.).

§. 175.

Anima nostra cum cogitet (§. 15.) ; materialis sive cordus esse nequit (§. 174.). Quoniam adeo inter entia composita locum nullum obtinet (§. 28. *Cosmol.*) ; in numerum simplicium referenda (§. 71. *Ontol.*), consequenter substantia est (§. 91. *Ontol.*), atque adeo agendi potentia prædita (§. 87. *Ontol.*).

§. 176.

Exceptioni nulla vis est, quod forsan Deus materiæ facultatem cogitandi superaddiderit (§. 20. *Ontol.*).

§. 177.

Quoniam substantia simplex vi quadam (§. 89. *Ontol.*), seu conatu agendi (§. 85. *Ontol.*) instruitur; anima quoque (§. 175.) vim cogitandi habet, per quam adeo actuantur, quæ per facultates ipsius vi Psychologiæ empiricæ possibilia sunt.

§. 178.

Cum in ente simplici, tanquam partibus carente (§. 71. *Ontol.*), plures a se invicem distinctæ vires concipi nequeant, unaquaque illarum ob continuum agendi conatum (§. 85. *Ont.*) peculiare subiectum requirente; vis animæ non

non nisi unica est, qua nunc sentit (§. 29.), nunc imaginatur (§. 36.), nunc meminit (§. 46.), nunc reminiscitur (§. 5.), nunc attendit (§. 55.), nunc reflectit (§. 57.), nunc notiones format (§. 58. 59.), nunc judicat (§. 70.), nunc abstrahit (§. 66.), nunc ratiocinatur (§. 78.), nunc appetit (§. 106.), nunc averfatur (§. 107.), nunc libere vult (§. 138. 156.), nunc libere non vult (§. 139. 156.) &c.

§. 179.

Dum anima sentit, corpora sibi repræsentat, quæ in organa sensoria agunt (§. 84. *Onzpl.*) convenienter mutationibus in hisce contingentibus (§. 29.). Vi igitur animæ producuntur perceptiones rerum materialium, sive corporum in organa nostra sensoria agentium convenienter mutationibus, quæ in organis sensoriiis contingunt (§. 177.). Corpora agunt in organa sensoria pro situ corporis organici in universo. Unde liquet, animam sibi repræsentare hoc universum pro situ corporis organici in universo convenienter mutationibus quæ actione corporum ambientium in organis sensoriiis efficiuntur.

§. 180.

Quoniam igitur anima non nisi unica vi gaudet (§. 178.), eadem vi repræsentativa universi, situ corporis organici in universo materialiter, constitutione organorum sensorio-

rum formaliter limitata (§. 179.), cetera quoque actuantur, quæ per reliquas ipsius facultates fieri possunt (§. 178.). Et quoniam ulterius a sensu ortum trahunt ceteræ animæ mutationes, quemadmodum ex Psychologia empirica a posteriori constat, in rationali autem a priori ostenditur; vis illa universi repræsentativa est primum quod in anima concipitur & unde ratio ceterorum, quæ eidem insunt, redditur, consequenter essentiam animæ constituit (§. 19. *Ontol.*).

§. 181.

Imo eadem naturam mentis absolvit, quia per eam actuantur, quæ per facultates fieri possunt (§. 180.); vis autem activa entis naturam absolvit (§. 39. *Cosmol.*).

§. 182.

Animæ igitur naturale est, quod per vim illam distincte explicari potest: Supernaturale, cujus in ea ratio non continetur.

§. 183.

Nostrium adeo erit distinctius explicare, quomodo ob vim repræsentativam universi situ corporis organici in universo materialiter, constitutione organorum sensoriorum formaliter limitatam (§. 179.), animæ præter facultatem sentiendi ceteræ quoque inesse possint & juxta quas regulas per facultates possibile (§. 85. *Ontol.*) vi ista actuantur.

SECTIO

SECTIO II.

DE FACULTATE COGNOSCITIVA.

CAP. I.

DE FACULTATIS COGNOSCITIVÆ PARTE INFERIORI.

§. 184.

Dum sentimus, anima repræsentat corpora in organa sensoria agentia (§. 29.) & dum imaginamur eadem anima repræsentat corpora absentia (§. 36.). Corpora sunt entia composita (§. 28. *Cosmol.*); anima vero ens simplex (§. 175.). Perceptiones igitur animæ sentientis atque imaginantis sunt repræsentationes compositi in simplici & differunt adeo *ab imaginibus materialibus*, quæ sunt repræsentationes compositi in composito; nempe *picturæ* sunt repræsentationes compositi in superficie; *sculpturæ* & aliæ imagines corporeæ repræsentationes compositi in solido.

§. 185.

Dum perceptioni adperceptio accedit, anima res perceptas cum a se invicem, tum a se ipsa distinguit (§. 171. 172.), eamque ob rationem eas extra se invicem & extra se ipsam repræsentat (§. 49. *Ontol.*). Atque ea in re perceptiones denuo differunt ab imaginibus materialibus, quoniam composita non extra se, sed intra se objecta repræsentant.

§. 186.

Cum anima non hoc universum sed alterius universi corpora repræsentaret, si perceptiones ipsius forent rebus repræsentatis dissimiles; haud difficulter colligitur perceptiones rebus perceptis similes esse debere, consequenter cum in compositis non distinguantur nisi figuræ, magnitudines, motus (§. 61, 62. *Ontol.*), perceptiones quoque non nisi figuras, magnitudines & motus repræsentant: quæ ubi distinguimus, perceptio sit distincta; ubi confundimus, confusa (§. 23.). Inde est quod, si confusa microscopiorum beneficio reddantur distincta, figuræ, magnitudines & motus appareant, quorum ante discrimen nobis nullum fuit.

§. 187.

Perceptio igitur confusa cum repræsentet, quæ rei diversa insunt; perfecta ejus cum re-percepta similitudo inde elucet (§. 23. *Ont.*).

§. 188.

Et quoniam anima repræsentat res materiales extra se eo ordine, quo organa sensoria tangunt (§. 179.); ordo autem successivorum tempus absolvit (§. 52. *Ontol.*): eodem tempore res materiales in anima repræsentantur, quo in rerum natura contingunt.

§. 189.

Est vero anima substantia finita. Etenim perceptiones ipsius continuo variant, vel ex
pe

perientia teste : tum etiam variare debent, rebus materialibus in universo, corporis que nostri situ in eodem variantibus (§. 179.) : id quod substantiæ finitæ proprium (§. 81. *Ont.*).

§. 190.

Objectis externis in organa sensoria agentibus, motus fluido nerveo impressus ad cerebrum usque propagatur. Experimur enim, anima non modo inconsulta, verum sæpissime prorsus invita, motus in variis organis corporis ex sensationibus consequi : quos adeo a motu organo sensorio impresso ortum trahere manifestum est. Per experimenta anatomica constat, musculos, quorum contractione moventur corporis humani partes, influxu fluidi nervei ad modum determinari (§. 328. *Psychol.*). Quamobrem cum muscoli per omne corpus dispersi cum organis sensoriis promiscue omnibus, oculis præsertim atque auribus non nisi mediante cerebro communiceent; motum ad cerebrum usque propagari, qui organo sensorio imprimatur, manifestum est, consequenter impressione in organum sensorium facta, determinata quædam spirituum animalium quantitas determinato quodam motu cietur. Perceptionibus igitur seu ideis immaterialibus in mente respondent *ideæ materiales* in cerebro ab *Aristotele* dudum agnitæ & ab omnibus Philosophis constanter admittæ.

§. 191.

Quoniam vis non agit nisi mutationibus in organis sensoriis convenienter (§. 179.): organis sensoriis læsis, vel quacunque ratione deficientibus, mirum non est, deficere quoque perceptionem. Variatur enim idea materialis, quæ a mutatione organi pendet, vel prorsus deficit (§. 190.): ergo etiam, quæ eidem respondet, immaterialis variari, vel prorsus deficere debet (§. 179.).

§. 192.

Ex eadem ratione liquet, si eadem mutatio in organo sensorio a diversis objectis producat, ideas materiales in cerebro, adeoque etiam immateriales in mente easdem esse: cujus rei exempla sinu largissima offert Optica.

§. 193.

Similiter cum in somno organa sensoria parum aut nihil afficiantur ab objectis externis; in mente quoque cessant ideæ immateriales claræ atque distinctæ: ut adeo *somnus* respectu animæ sit status perceptionum confusarum (§. 26.).

§. 194.

Imaginatione non producuntur nisi ideæ rerum ante perceptarum (§. 41.): quæ cum ad status universi præteritos spectent, patet vim animæ repræsentativam universi non modo

modo tendere ad statum ejus præsentem, verum etiam ad præteritos. Conatur adeo anima repræsentare hoc universum non modo quoad statum præsentem, verum etiam quoad præteritos. Quoniam tamen fieri nequit, ut propter finitudinem omnem præteritum statum repræsentat (§. 81. *Ontol.*), non nisi eam clare repræsentet, quæ quidpiam cum præsentem habet commune. Unde ratio regulæ imaginationis liquet (§. 41.).

§. 195.

Imaginationem læso cerebro turbari, experientia Medicorum dudum constat. Perceptionibus itaque ad imaginationem spectantibus suæ quoque respondent ideæ materiales in cerebro, seu ideæ materiales in cerebro producuntur, quæ ab impressione in organa sensoria objectis præsentibus oriuntur, si eadem absentia imaginamur. Cumque imaginatio a sensu oriatur (§. 41.), ideæ matericles in cerebro ad illam spectantes ab ideis materialibus sensuum excitantur.

§. 196.

Unde porro constat ratio, cur etiam memoria a cerebro pendeat: pendet enim ab imaginatione (§. 46. 47.), hæc vero a cerebro (§. 195.).

§. 197.

Cum imaginationis actus a sensu pendeat

(§. 41.) si sensationes fuerint obscuræ, adeoque totalis confusa, ut nihil in ea distinguamus, nec imaginatio reproducere potest perceptiones præteritas aliquid commune habentes. Atque ea est ratio, cur in somno imaginatio cesset. In corpore perinde res manifesta. In somno parum aut nihil organa sensoria tanguntur, ut idearum materialium productio in cerebro cesset, quæ perceptibili motu agitentur: cessat igitur & reproductio illarum, quæ hinc oriri debebant.

§. 198.

E contrario in somnio imaginatio suo fungitur munere, cum res absentes repræsentatur (§. 41.): excitantur itaque & ideæ materiales respondentes in cerebro (§. 195.). Enimvero quia nec actus imaginationis determinari in mente potest, nisi prævia sensatione (§. 41.), nec ideæ materiales in cerebro reproducuntur, nisi ante quædam impressiones in aliquod organum sensorium exciteretur (§. 195.); omnis somnii initium sensationi cuidam debetur, per regulam imaginationis postea continuandi vel non interrupta serie, vel nova sensatione interposita. Unde *somnia in simplicia atque composita* abeunt.

§. 199.

Somnia, quæ hoc modo se habent, naturalia sunt (§. 182.): si quod vero vel a sensu or-
tum

tum trahit, vel per legem imaginationis non continuatur, id pro supernaturali habendum (§. 182. 198.).

§. 200.

Ex regula imaginationis (§. 41.) liquet, cur eorum, quæ in somnio repræsentantur tanquam præsentia, non detur ratio sufficiens, cur potius sint, quam non sint: atque adeo *somnium* est status perceptionum distinctarum inordinatarum, consequenter cum vigiliæ denotent statum perceptionum distinctarum ordinatarum, status quidam intermedius inter vigilias atque somnum (§. 193.).

§. 201.

In somnio perceptiones totales sunt distinctæ (§. 200.), sed perceptionibus distinctis ad-perceptio adheret (§. 171.): unde eadem quoque in somnio locum habet.

§. 202.

In imagine seu objecti alicujus repræsentatione omnia inter se consentiunt, si nihil in ea occurrat, quod non aliquid in objecto repræsentet, nec in objecto distinguatur, quod non repræsentetur ab imagine. Quamobrem cum consensus in varietate perfectionem absolvat (§. 44. *Ontol.*); similitudo imaginis cum objecto, quod repræsentat, seu *prototypo* suo, perfectionem ejus constituit (§. 23. *Ont.*). In similitudine igitur perceptionum cum re-
bus

bus perceptis earundem perfectio consistit (§. 184.), quæ tanto major, quanto magis distinctæ sunt perceptiones; cum in confusis similitudo non appareat, etsi adsit (§. 186.).

§. 203.

Hinc conficitur, visum esse sensum omnium perfectissimum & hunc proxime sequi auditum: gustum vero & odorem esse ceteris imperfectiorem.

§. 204.

Ens igitur universi repræsentativum eo perfectius, quo plura universi objecta simul repræsentat & quo plura in singulis distinguit, ut adeo gradus perfectionum pendeant cum a numero objectorum simul perceptorum, tum a gradu distinctæ perceptionis uniuscujuslibet objecti.



CAP. II.

DE FACULTATIS COGNOSCITIVÆ PARTE SUPERIORI.

§. 205.

Cum tres sint mentis operationes, notio, judicium atque discursus (§. 58. 70. 78.), ostendendum nobis imprimis erit, quomodo per vim universi repræsentativam actus notionis, judicii atque discursus determinetur &

& quænam singulis in corpore mutationes respondeant,

§. 206.

Tenendum itaque, objecta in universo obvia partim ad eandem speciem, partim ad idem genus pertinere, atque eatenus similia inter se esse (§. 26. *Ontol.*). Fieri itaque solet, ut sensui plus simplici vice objiciantur, quæ ad eandem speciem, vel ad idem referuntur genus. Quod si ergo objectum aliquod sensu percipitur, cum similia quædam habeant communia (§. 23. *Ont.*), objecta ejusdem speciei vel generis olim percepta denuo repræsentantur (§. 41.). Anima has perceptiones inter se conferens & ad similitudinem in iis deprehensam attendens notionem universalem habet (§. 58.). Prima igitur mentis operatio non excedit vim repræsentativam universi supra definitam (§. 179.).

§. 207.

Et si in cerebro ideæ materiales respondeant cum sensationibus, tum iis perceptionibus, quæ ad imaginationem referuntur (§. 190. 195.): non tamen ideo notionum universalium formationi quidpiam in corpore respondet, quia in ad-perceptione fundatur (§. 206.), quæ in materiam non cadit (§. 174.). Atque eatenus patet, quod a cognitione universali ad animæ immaterialitatem recte concludatur.

§. 208.

§. 208.

Quoniam tamen notiones universales, hoc est, specierum atque generum, nominibus tanquam signis designantur (§. 67.), nomina autem ista voces sunt articulatae, quarum cum idea materialis in cerebro (§. 190.), tum immaterialis in mente datur (§. 184.); universales notiones in corpore repræsentantur, quatenus vocum ideæ materiales in cerebro excitantur, quibus tum objecta inscindiuntur, tum ea denotantur, quæ in ipsis distinguuntur,

§. 209.

Judicia sermoni adsueta itidem vocibus exprimimus: unde ea quoque perinde ac notiones universales (§. 208.) per ideas materiales in cerebro repræsentantur.

§. 210.

Ad judicia autem intuitiva formanda sufficit sensus, imaginatio atque memoria, quamvis in gradu excellentiori (§. 70. 79. 36. 46. 57.), consequenter vis repræsentativa universi, quoad statum præsentem atque præteritum (§. 179. 194.).

§. 211.

Judicia discursiva ratiocinio inferuntur, nempe dum judicium intuitivum ob terminum communem (§. 41.) in memoriam revocat aliud olim formatum & duo termini diver-

versi combinantur (§. 76.). Quamobrem cum judicia intuitiva vim repræsentativam universi non excedant (§. 210.), nec imaginatio cum memoria eadem superior existat (§. 194.); patet tantem, quomodo ratiociniorum actus per vim universi repræsentativam determinantur.

§. 212.

Omne ratiocinium tribus judiciis constat (§. 38. *Log.*). Singula judicia materialiter repræsentantur quoque in cerebro (§. 206.) ergo & Syllogismi seu ratiocinia materialiter in cerebro repræsentantur. Unde non mirum, quod cerebri læsiones etiam in facultatem ratiocinandi redundant.

§. 213.

Intellectus est facultas possibilea distincte repræsentandi (§. 60.). Duplex ergo fundamentum limitationis habet, alterum materiale, quod per numerum possibileum constituitur, alterum formale, quod in modo repræsentandi consistit. Major ergo est intellectus, qui ad plura possibilea extenditur, quam qui ad pauciora, & qui majorem admittit notionum distinctarum gradum (§. 62.). *Absolute maximus* sive *summus* ex, qui ad omnia possibilea extenditur & omnia in iis distinguit, quæ differentia insunt.

§. 214.

§. 214.

Quemadmodum vero intellectui tribuitur profunditas atque acumen ratione primæ mentis operationis (§. 63. 64.), ita ratione tertiæ *soliditas*: quæ est habitus distincte ratiocinandi & ratiocinia concatenandi, hoc est, judicia sua demonstrandi (§. 50. *Log.*). Tanto autem solidior censetur, quo quis in probandis præmissis ad prima principia seu notiones irresolubiles propius accedit.

§. 215.

Dum per ratiocinia nexus veritatum universalium manifestatur (§. 50. *Log.*), eundem ratiocinantes intuentur. Atque adeo cum vis repræsentativa universi quoad statum præsentem atque præteritum ratiociniis locum concedat (§. 211.); eadem quoque rationem admittere tenetur (§. 88.).

§. 216.

Quoniam sermonis usu judicia (§. 73.), consequenter etiam ex iis composita ratiocinia redduntur distincta (§. 76. 77.); sermo perficit usum rationis, atque adeo non mirum, cur inter bruta adulti, vel a nativitate muti ac surdi omni fere rationis usu destituantur, nisi in quantum subinde vocum defectum aliis symbolis ad arbitrium confectis suppleant.

§. 217.

§. 217.

Ingenium in anima locum habet ob acumen (§. 87.), quod a claritate in percipiendo pendet (§. 63. 22.). A vi igitur repræsentativa universi, modo determinatus quidam claritatis supponatur gradus, qualis in anima nostra notatur, ingenium quoque emanat. Et quatenus claritas in percipiendo majorem supponit quantitatem motus in idea materiali, quæ in cerebro existit (§. 190.); perspicitur quoque, quomodo ingenium a cerebri constitutione pendeat.

§. 218.

Cur ars inveniendi in animam cadat, jam ex iis liquet, quæ de eadem in Psychologia empirica annotavimus. Pendet enim ab habitu ratiocinandi (§. 84.) atque ab ingenio (§. 87.), veritatumque cognitione, tanquam materia ratiociniorum (§. 85.). Quomodo autem ea insint animæ, antecedentia loquuntur (§. 206. 210. 211. 217.): quomodo per mechanismum quoque materiale in cerebro exhibeantur non minus constat (§. 207. & seqq. 212. 217.). Unde opus non est, ut distinctius exponamus, quod ob vim repræsentativam universi ars inveniendi in anima locum habeat, quodque ad eam requisiti actus mentis mechanice quoque repræsententur in cerebro, ita ut hujus læsione ars inveniendi turbetur, immo prorsus deficere queat.

SECTIO III.

DE FACULTATE APPETITIVA.

CAP. I.

DE FACULTATIS APPETITIVÆ PARTE INFERIORI.

§. 219.

Quoniam in anima perceptiones continuo variant, eam continuo a perceptione una ad alteram transire liquet. Perceptiones istæ vi animæ producuntur (§. 177.). Adest igitur in qualibet perceptione conatus eam mutandi (§. 85. *Ontol.*): qui conatus animæ mutandi perceptionem *percepturitus* appellatur.

§. 220.

Quando vi imaginationis cum objecto representato jungimus ideam voluptatis (§. 109.), atque adeo illud tanquam bonum nobis exhibetur (§. 103.); conatus ille determinatur ad perceptiones objecto isti respondentes. Atque hæc tendentia ad perceptiones prævisas, seu conatus producendi perceptionem prævisam est proprie illud, quod appetitus sensitivus appellatur (§. 105.). Unde apparet, quomodo appetitus ex unica illa animæ vi, qua idea universi limitata formatur (§. 179.), enascatur.

§. 221.

§. 221.

Ut res manifestior evadat, eandem exemplo illustrare juvat. Si vinum vitro infusum contuemur atque imaginatio nobis in memoriam revocat voluptatem ex odore & sapore ante perceptam (§. 41. 46.); vis animæ determinatur ad producendas odoris & saporis perceptiones, atque in conatu easdem producendi consistit vini appetitus.

§. 222.

Contraria ratione se res habet in averfatione sensitiva. Quando nimirum vi imaginationis cum objecto repræsentato jungimus ideam tædii vel doloris (§. 109.), atque adeo illud tanquam maulum nobis repræsentamus (§. 103.); conatus animæ mutandi perceptionem determinatur in contrariam partem, hoc est, impedire conamur, ne perceptiones objecto respondentes producantur, unde tædium sive dolor pendet. Atque conatus iste impediendi perceptiones prævisas est proprie illud, quod averfatio sensitiva dicitur (§. 105.). Ut adeo denuo appareat, quomodo averfatio ex unica illa animæ vi, qua idea universi limitata producitur (§. 179.), enascatur.

§. 223.

Perceptiones rerum præsentium, quas sensationes appellamus, pendent a situ corporis

respectu objectorum externorum (§. 29.). Quamobrem ut aliæ aliis succedant, aut corporis mutandus est situs sive respectu corporum ambientium, sive respectu totius universi, aut corpora alia in viciniam nostri transferenda. Quando itaque anima a certas tendit perceptiones (§. 220.), ad eum quoque corporis situm, atque corporum eorum in viciniam nostri translationem tendit, sine quibus perceptiones istas locum in se habere non posse perspicit.

§. 224.

Interdum quoque a certo corporis situ pendet, vel a corporum quorundam absentia, ne producantur perceptiones, quas impedire conamur. Atque eo in casu non minus, quam in appetitu, tendit ad eum corporis sui situm organorumque vel corporum aliorum motum, quo sine perceptio prævisa impediri nequit.

§. 225.

Perspicitur adeo, quomodo motus cum sui corporis atque organorum ipsius, tum motus quoque aliorum corporum, qui hominum in potestate positus, determinetur.

§. 226.

Appetitus sensitivus & aversatio sensitiva vehementior affectus est (§. III.), ex confusa adeo boni vel mali multiplicis repræsentatione

ne

ne originem trahens (§ 105.). Quamobrem cum unaquaque cum repræsentatione boni enascatur aliqua tendentia ad certam quandam perceptionem (§ 220.), ex quavis autem mali repræsentatione conatus aliquis sequatur impediendi certam quandam perceptionem (§ 222.); in affectu multiplices adsunt sive tendentiæ ad certas quasdam perceptiones, sive conatus impediendi certas quasdam perceptiones: quas tamen anima ob confusionem non distinguit (§. 23.).

§. 227.

Et quia cum istis conatibus perceptiones producendi vel impediendi tendentiæ ad certos corporis organorumque ipsius motus conjunguntur (§. 223. 224.), vi commercii inter mentem & corpus, istiusmodi motus in corpore consequuntur (§. 164.). Atque hinc reddenda est ratio commotionum, quæ in corpore observantur, dum mens affectu perturbatur.

§. 228.

Fieri sane nequit, ut mens plures perceptiones diversas una producat, vel plurium productionem una actu positivo impediat: unde in ipso affectus actu perturbatur, cui confusa sanguinis & fluidorum in corpore commotio respondet.

CAP. II.

DE FACULTATIS APPETITIVÆ PARTE SUPERIORI.

§. 229.

Appetitus rationalis sive voluntas in eo differt a sensitivo, quod ille ex representatione boni distincta, quemadmodum hic ex ejus representatione confusa oriatur (§. 105. 138.). Quamobrem cum appetitus sensitivus sit conatus perceptionem prævisam producendi, ad quam determinatur per ideam boni isti sociam (§. 220.); appetitus rationalis erit conatus producendi prævisam perceptionem, ad quam determinatur per ideam boni distinctam isti sociam.

§. 230.

Similiter quoniam averfatio sensitiva est conatus impediendi perceptionem prævisam, ad quam impediendam determinatur vis animæ ob ideam mali confusam isti sociam (§. 222.); averfatio vero rationalis sive Nōluntas a sensitiva non nisi in eo differt, quod illa distincta, quemadmodum hæc confusæ representationi naturales debeat (§. 105. 139.): averfatio rationalis erit conatus impediendi perceptionem prævisam, ad quam impediendam vis animæ determinatur ob ideam mali distinctam isti sociam.

§. 231.

Quoniam notiones distinctæ in mente nostra a vi universi repræsentativa (§. 206.) una cum judiciis tam intuitivis (§. 210.), quam discursivis manant (§. 211.), ab his vero appetitus & averfatio rationalis deriventur (§. 229. 230.); appetitus atque averfatio rationalis vim universi repræsentativam non excedit, neque adeo alio principio opus est, unde actus appetituum & averfationem rationalium in singulari determinetur.

§. 232.

Quæcunque in mente nostra observantur; vel ad facultatem cognoscitivam, vel appetitivam referri, atque utriusque vel ad partem inferiorem, vel superiorem ex antecedentibus constat. Postquam igitur ostendimus; quæcunque per utriusque partem inferiorem & superiorem tanquam possibile concipiuntur; per vim repræsentativam universi actuari; actu ipso patet, ex vi illa repræsentativa rationem reddi omnium, quæ animæ insunt; perinde ac phænomenorum corporis ratio ex structura ejusdem redditur.

§. 233.

Enimvero quemadmodum in explicandis eorum, quæ corporibus accidunt, habenda quoque est ratio regularum motus; ita similiter in explicandis eorum, quæ menti acci-

dunt, habenda est ratio regularum cogitationum seu cognitionis & appetitus, quas *Logico-morales* dicimus.

§. 234.

Mirum vero non est, insuper habitis hisce regulis quosdam comprehendere non potuisse, quomodo ex unica animæ vi eaque repræsentativa universi manare queat appetitus.

§. 235.

Ceterum cum regulæ Logico-morales a regulis motuum, quas corpora in operando observant, prorsus diversæ sint, neque iisdem principiis innitantur (quod satis norunt, quibus utræque sufficienter perspectæ sunt); nova prorsus ratione elucet, animam & corpus diversissime esse naturæ (§. 39. *Cosmol.*), atque adeo substantias prorsus diversas esse, nec operationes animæ a corpore, nec corporis ab anima perfici posse.

§. 236.

In appetitu rationali bonum distincte dijudicamus (§. 138.), adeoque ex eo, num nos statumque nostrum perficiat (§. 102.), consequenter beneficio rationis (§. 88.), cum in dijudicatione judiciis discursivis locus sit. Jam cum liberis, vi cuius eligitur quod maxime arripet, quando ad neutram per naturam mens determinata (§. 157.), in solo appetitu rationali

le-

locum habeat , libertatem menti convenire, hoc est, voluntatem ejus liberam esse evidens est , propterea quod ratione prædita.



SECTIO IV.

DE COMMERCIO , QUOD INTER
MENTEM ET CORPUS INTERCEDIT.

CAP. I.

DE SYSTEMATE INFLU-
XUS PHYSICI.

§. 237.

Cum indubia experientiæ fide constet , in mente oriri perceptiones , quibus objecta in illa agentia tanquam extra nos repræsentantur , quam primum mutationes in organis sensoriis accidunt (§. 159.) & vicissim ad decretum animæ liberum consequi extemplo motus in corpore , quos vult (§. 164.) ; ab omni tempore quæstio agitata fuit inter Philosophos , quomodo id fieri possit.

§. 238.

Aristoteles cum sequacibus tribuit corpori vim agendi in animam & animæ vicissim vim agendi in corpus actione quadam physica & naturali ; quæ explicandi commercium inter mentem & corpus hypothesis *Systema influxus physici* appellari consuevit , propterea quod

vis quædam ex corpore in animam & vicissim ex anima in corpus transeat, quæ alterutri substantiarum inerat, ad *Cartesii* usque tempora solum in Philosophia recepta.

§. 239.

Cum perceptiones in mente ad præsentiam idearum materialium in cerebro oriantur (§. 190.), vi tamen animæ producantur (§. 179.); stante systemate influxus physici, spiritibus animalibus, quorum motu ideæ materiales efficiuntur (§. 190.), tribuenda est facultas determinandi animæ vim ad producendam ideam immaterialem materiali respondentem.

§. 240.

Vicissim cum motus in corpore non consequatur nisi spiritibus animalibus per nervos ex cerebro influentibus in musculum (§. 190.); stante systemate influxus physici animæ tribuenda est facultas determinandi motum spirituum animalium in cerebro, ut per nervos influant in musculum, cujus ope motus animæ desideratus producendus.

§. 241.

Concessa spiritibus animalibus facultate determinandi percipiendam animæ facultatem & vicissim animæ determinandi spirituum animalium motum, patet cur mens, sta-

statim producat perceptionem immaterialem ad præsentiam ideæ materialis in cerebro & eum motus organi statim sequatur, cum anima eundem vult, non tamen alius, quam qui per structuram corporis possibilis.

§. 242.

Quoniam istarum facultatum ideam plane habemus nullam, neque etiam concipere datur, quomodo spirituum animalium motu, hoc est, fluidi cujusdam subtilissimi in cerebro, anima substantia simplex (§. 175.) adeoque partibus carens (§. 71. *Ontol.*) in actione sua determinari possit, ut hanc præcise & non aliam producat perceptionem; & cum idem dicendum sit de facultate animæ determinandi motum spirituum animalium, ut hunc præcise & non alium ingrediantur muscolum; jam ante *Cartesii* tempora dubitari cœpit, num istiusmodi facultates, quas Systema influxus physici in gratiam explicandi commercii inter mentem & corpus sumit, sint possibiles, aliis alterutrius substantiæ existentiam negantibus, veluti *Materialistis* animæ immaterialis, *Idealistis* corporis, aliis in dubio relinquentibus, qua de causa animæ perceptiones immateriales & ideæ materiales in cerebro, idemque positiones animæ atque motus organorum corporis sibi mutuo respondeant.

§. 243.

§. 243.

Ex quo *Cartesius* de rebus naturalibus ex notionibus earum distinctis ratiocinandum esse docuit, rejectis, quibus nulla in mente respondet idea, nominibus; de facultate spirituum animalium perceptiones animæ determinandi magis dubitare cœperunt Philosophi, quamvis acumine præditi nondum ideo eandem rejecerunt (§. 160.), sed ulteriori examini cum *Cartesio* subjecerunt.

§. 244.

Legum motus naturalium, unde regulæ motus in conflictu corporum observatæ demonstrari possunt atque solent (§. 43. *Cosmol.*) hæc habetur, in conflictu corporum eandem conservari virium quantitatem (§. 70. *Cosmol.*), hoc est, summam ejus, quod colligitur ex ductu massarum in quadrata celeritatum esse ante & post conflictum eandem. Admisso influxu physico animæ in corpus & corporis in animam eadem virium quantitas conservari nequit, cum pereat aliqua in gratiam animæ, alia ab eadem in gratiam corporis producat. Cum igitur regulis conflictus corporum a legibus motus pendentibus contineatur ordo naturæ (§. 115. *Cosmol.*); influxus physicus ordini naturæ repugnat & eundem turbat.

§. 245.

§. 245.

Non videtur Deus talem constituisse naturæ ordinem, ut ab animabus continuo turbetur. Atque ea est ratio, cur potissimum *Cartesius* influxum physicum prorsus rejecerit.



CAP. II.

DE SYSTEMATE ADSISTENTIE SEU CAUSARUM OCCASIONALIUM.

§. 246.

Cum *Cartesius* influxum physicum rejiceret (§. 245.), neque eidem appareret, quomodo commercium inter mentem & corpus ex notionibus animæ & corporis explicari possit ; ad voluntatem Dei confugit sumens, Deum legem quandam sancivisse ut determinatos quosdam motus spirituum animalium in cerebro determinatæ quædam perceptiones in anima oriantur & vicissim, ut ad volitionem animæ sequantur determinati quidam motus in corpore. Vi igitur hujus legis oriri in mente perceptiones ideis materialibus in cerebro respondentes & motus in corpore ad desiderium animæ decernentis. Hæc hypothesis commercium in mentem & corpus explicandi hodie *systematis adsistentiæ* item *systematis causarum occasionalium* fert nomen.

§. 247.

§. 247.

Cum perceptiones in mente ad præsentiam idearum materialium in cerebro (§. 190.) vi eidem propria producantur (§. 179.); stante systemate causarum occasionalium vis animæ per concursum Dei determinatur ad eam perceptionem producendam, quæ ideæ materiali in cerebro respondet, Deo secundum potentiam ordinatam, non absolutam agendæ (§. 246.).

§. 248.

Similiter cum motus in corpore non consequantur, nisi spiritibus animalibus per nervos ex cerebro in musculum influentibus (§. 190.); stante systemate adfistentiæ Spirituum animalium in motu jam constitutorum directio per concursum Dei determinatur, ut iidem per nervos influant in musculos motuum ab anima volitorum productrices, Deo secundum potentiam ordinatam, non absolutam agente (§. 246.).

§. 249.

Quoniam motus spirituum animalium in cerebro, quo idea materialis continetur (§. 190.) in gratiam perceptionum non perit (§. 247.), ut in systemate influxus physici, ubi insumitur in actionem, qua vis animæ ad percipiendum determinatur (§. 239.); nec novus motus producitur, dum spirituum animalium in
motu

motu jam constitutorum directio in gratiam animæ Numinis concursu mutatur (§. 248.); in systemate causarum occasionalium illibata relinquitur lex naturæ de eadem virium quantitate conservanda, cum vires non mutantur, ubi celeritas in eadem massa invariata manet (§. 70. *Psychol.* 244.) neque per commercium inter mentem & corpus ut in systemate influxus physici (§. 244.) ex violata hac lege ordo naturæ turbatur.

§. 250.

Postquam *Hugenius*, regulis motus veris, quas ignorabat *Cartesius*, detectis reperit in conflictu corporum non minus summam conservari directionem, quam virium quantitatem eandem; *Leibnitius* ob violationem hujus legis in systemate causarum occasionalium, in quo directio a Deo immediate mutatur (§. 248.), *systema Cartesianum* rejecit, sicuti geminam ob rationem *Cartesius* *systema influxus physici* improbavit.

§. 251.

Urget præterea *Leibnitius Augustini* sententiam secutus, quod in naturalibus miracula quærenda non sint, in systemate causarum occasionalium perpetua fieri miracula (§. 74. *Cosmol.*), propterea quod Deus immediate animam ad percipiendum & motum corporis in gratiam animæ determinat (§. 274. 248.),
nec

nec actiones creaturarum ab actionibus Dei satis distingui.



CAP. III.

DE SYSTEMATE HARMONICÆ PRÆSTABILITÆ.

§. 252.

Quemodmodum in corpore naturale dicitur, quod per ejus essentiam & naturam explicari potest (§. 73. *Cosmol.*), supernaturale vero sive miraculum, quod per eandem explicari nequit (§. 74. *Cosmol.*), immediata Dei virtute productum (§. 76. *Cosmol.*): ita similiter *in anima naturale* dicitur, quod per ejus essentiam & naturam explicari potest; *supernaturale* vero sive *miraculum*, quod per eandem explicari nequit.

§. 253.

Leibnitius igitur commercium inter mentem & corpus intelligibili modo & naturaliter explicaturus intulit, quæ in anima accidunt, ex essentia & natura animæ secundum regulas logico-morales (§. 233. 252.); corporis vero motus quoscunque, etiam qui mentis imperio subsunt, ex structura corporis organici secundum regulas motus consequi, utraque substantia quod suum est agente, sed operationibus utriusque inter se con-

consentientibus, artificio Numinis prorsus admirando nec ulla arte humana imitanda harmonia præstabilita. Hæc hypothesis commercium inter mentem & corpus explicandi *systema harmoniæ præstabilitæ* appellari solet.

§. 254.

Anima igitur in systemate harmoniæ præstabilitæ semetipsam determinat ad perceptiones producendas, quæ ideis materialibus in cerebro respondent, quibus objecta externa in organa sensoria agentia repræsentantur (§. 190.), nec opus habet causa externa, neque infinita sive prima, ut in systemata causarum occasionalium (§. 247.), neque finita sive secunda, ut in systemate influxus phyci (§. 239.). Sunt autem determinationes regulares, cum per essentiam & naturam mentis, situ corporis organici in universo materialiter, constitutione organorum sensoriorum formaliter limitatam (§. 180. 181.) fiant mutationibus ab objectis in organa sensoria agentibus convenienter.

§. 255.

Datis autem perceptionibus, quibus objecta externa in organa nostra sensoria agentia extra nos repræsentantur, cetera eodem modo consequuntur in anima in quocunque Systemate, nec ulla differentia in Systemate Harmonico.
(Thüm. Instit. Psychol.) N mo-

moniaë præstabilitæ notatur, quippe quod a ceteris non nisi in eo differt, quod anima ad perceptiones objectorum in organa sensoria agentium non determinetur a causa externa, ut in systemate influxus physici & in systemate causarum occasionalium (§. 239. 247.), sed semper ipsam determinet (§. 254.).

§. 256.

Eodem igitur pervenit modo ad libera sua decreta in systemate harmoniaë præstabilitæ, quo in systemate influxus physici.

§. 257.

Omnis adeo difficultas huc redit, num & quomodo fieri possit, ut corpus decreta animæ libera ad imperium ipsius exequatur, si anima destituatur facultate determinandi directionem spirituum animalium, ut influant in musculos motuum decretorum productores, quemadmodum in systemate influxus physici contingere debet, nec ut in systemate adistentiæ per concursum divinum eadem determinetur.

§. 258.

Quoniam sensationes ansam suppeditant animæ ad decreta sua formanda & ab his per varias perceptiones, judicia & ratiocinia tandem ad eadem perveniatur (§. 138. 102. 77.), perceptionibus autem animæ in cerebro suæ respondeant ideæ materiales (§. 190. 195.),

im-

immo ibidem etiam notiones universales, judicia & ratiocinia materialiter repræsententur (§. 208. 209. 212.), quæ repræsentationes materiales in cerebro in universum omnes motu spirituum animalium vel fluidi nervei subtilissimi efficiuntur, spiritus animales ad influendum in musculum determinantur ab iis, quorum motu repræsentationes istæ accidunt.

§. 259.

Omnis adeo quæstio huc redit, num Deus ordinem rerum ita constituere potuerit, ut vi structuræ cerebri atque nervorum objecta externa in organa sensoria agentia, a quibus anima sumit ansam ad libera sua decreta, determinare possint spiritus animales juxta motuum leges naturales ad influendum in musculos, quorum actione producitur motus ab anima imperatus.

§. 260.

Quia systemata influxus physici & assistentiæ ordini naturæ adversantur (§. 244. 250.), atque systema harmoniæ præstabilitæ solum eidem conforme, cum ad commercium inter mentem & corpus explicandum non utatur, nisi iis quæ essentiæ & naturæ mentis atque corporis conveniunt (§. 254. 255. 258.), ordinem rerum dicto modo potuisse constitui tanto confidentius sumitur, quod is (§. 71.

115. *Cosmol.*) ab absoluta necessitate perinde ac animæ decreta liber, tum etiam quod Deus hæc ab æterno prævidens, juxta ea quæ in Theologia naturali (§. 22.) consequuntur, animæ corpus in operationibus suis harmonicum jungere potuerit.

§. 261.

Qui igitur systematis harmoniæ præstabilitæ impossibilitatem evincere sumit, is impossibilitatem corporis animæ libere volentis in operationibus suis harmonici demonstrare tenetur: id quod agnovit *Bælius* in Dictionario critico sub voce *Rorarius* f. m. 2482. edit. noviss. eandem asserens, sed non demonstrans.

§. 262.

Pater adeo libertatem animæ per systema harmoniæ præstabilitæ non oppugnari, quemadmodum arguantur, qui systematis rationem non satis perpendunt.

§. 363.

Ceterum cum systema harmoniæ præstabilitæ tantum explicet commercium naturale, quod inter mentem & corpus intercedit; non extendendum illud est ad operationes gratiæ, ubi Deus supernaturali modo in animam & corpus agit, prouti ex sacris paginis explicant Theologi. Illæ enim operationes nec per systema influxus physici explicari possunt. Ea solummodo intercedit differentia, quod in sy-
ste-

systemate influxus physici operationes gratiæ tantum se exerant in animam; in systemate vero harmoniæ præstabilitæ una in corpus, quod nihil absurdi habet.

§. 264.

Quoniam vero per systemata influxus physici, adstantiæ & harmoniæ præstabilitæ explicare intendimus, *quomodo* commercium inter mentem & corpus, quod indubia experientiæ fide constat, subsistere possit; Theologo autem, Politico, Medico atque morum Doctori abunde sufficiunt, quæ de eodem experiendo discimus; dilucide apparet has hypotheses nullum habere in Theologiam, Politicam, Medicinam atque Ethicam influxum atque adeo discussioni Metaphysicorum relinquendum esse, num aliquando veritatem liquidam in aprium producere possint, quæ salvis superioribus Facultatibus & disciplinis philosophicis tuto ingnorantur. Atque hæc est ratio, cur non modo has hypotheses a Psychologia empirica, quæ in facultatibus superioribus & disciplinis philosophicis ceteris certissimum usum spondent, verum etiam a Psychologia rationali ab hisce hypothesis libera, sejunctas dederimus. Cum enim nullum systema rigorosa nitatur demonstratione, nobis erit perinde, siue aliquis, prout hoc vel istud systema probabilius visum fuerit, *Influxistarum*, siue *Occasionalistarum*, siue denique *Har-*

monistarum partibus accedere, five nullas tueri velit. Sufficit nobis philosophum omnem, quacunque tandem hypothefi ad explicandum commercium inter corpus & mentem utatur, concedere, animam & corpus ita agere, ac fi in fe mutuo influerent, ut fi vel maxime influxus phyficus fit absurdus, falva tamen veritate morali atque politica, immo revelata, tanquam possibilis fumatur.



SECTIO V.

DE IMMORTALITATE ANIMÆ ET ANIMABUS BRUTORUM SPIRITU- QUE IN GENERE.

CAP. I.

DE IMMORTALITATE ANIMÆ.

§. 265.

Anima est ens simplex (§. 175.). Naturaliter igitur interire nequit (§. 77. *Ontol.*), confequenter fua natura eft incorruptibilis.

§. 266.

Similiter cum fit ens simplex (§. 175.), naturaliter oriri nequit (§. 73. 74. *Ontol.*), ergo aut neceffario exiftit, aut a Deo in instanti produeta eft, cum antea ejus nihil effer (§. 75. *Ont.*). Enimvero neceffario non exiftit, cum per efferentiam & naturam fuam fibi repræfentet hoc univerfum (§. 180. 181.), quod in numerum entium contingentium referendum (§. 23. 72.

Cosmol.

Cosmol.), Deumque, ut infra demonstrabitur, autorem agnoscit. A Deo igitur ex nihilo in instanti producta, hoc est, creata est (§. 65. *Theol. nat.*).

§. 267.

Propterea quod anima incorruptibilis (§. 265.), cum corpore interire nequit. Dum enim corpus interit, corrumpitur, hoc est, materia, ex qua constat, dissolvitur in partes. Causæ igitur naturales, quæ corpus destruunt, animam destruere nequeunt.

§. 268.

Animam annihilari, exceptio nulla est. Cum enim causæ corpus destruentes materiam ex qua constat non annihilent, immo annihilare nequeant, cum contingant motu, motu autem materia non nisi locum mutet, ipsa vero non mutetur (§. 62. *Ontol.*); nulla adest ratio, cur anima annihilari debeat.

§. 269.

Ens, quod memoriam sui habet, hoc est, recordatur, se antea in hoc istove statu fuisse, dicitur *Persona*. Quamobrem cum homo sui memoriam habeat, vel experientia teste, in personarum numerum referendus.

§. 270.

Immortale tum demum proprie dicitur ens, quod, cum indestructibile sit, statum quoque personalitatis servat. Sane istiusmodi immortalitatem supponit religio christiana, ob pœ-

nas atque præmia post hanc vitam inferendas atque conferenda, id quod fufius ostendimus in peculiari differtatione: de Demonftratione immortalitatis animæ ex intima ejus effentia ac natura deducta.

§. 271.

Ut igitur anima fit immortalis, non fufficit eam effe indeffruftibilem, verum etiam ftatum hujus vitæ recordetur necelfe eft (§. 69.): quod, cum revelatio difertis verbis afferat, quid ratio aflequatur, ulterius difpiciendum.

§. 272.

In phyficis oftenditur, generationem non effe nifi transformationem corpusculi præexiffentis organici ejusve vivi, quod recentiores *animalculum fpermaticum* nuncupant. Nullum ergo remanet dubium, quin Deus animam creans (§. 266.), eandem cum corpusculo ftatim producat. Cum perceptiones animæ in ifto ftatu fequantur mutationes in organis fenforiis animalculi fpermatici (§. 179.), parum claritatis habere poffunt, ut confufæ quin fint omnes, dubio careat, analogia cum brutis animantibus id ulterius comprobante. Enimvero in transformatione animalculi in animal, qualis in formatione in utero contingit, ad majorem claritatis evehuntur gradum perceptiones,
ut

ut fiant distinctæ. Quamobrem cum anima ulterioris perfectionis sit capax, si ab analogia, hoc est, ab una insigni mutatione ad alteram argumentari licet, quin perceptiones majorem claritatis gradum acquirant dubitari nequit. Quoniam itaque hac in vita est in statu perceptionum distinctarum, multo magis post vitam hujus corporis in simili statu erit.

§. 273.

Major gradus claritatis perceptionum in animabus hominum promiscue omnibus non contrariatur religioni christianæ: etenim ut in beatis voluptatem, ita in damnatis dolorem intendit: id quod eidem consentaneum esse constat.

§. 274.

In statu perceptionum distinctarum anima sui conscia est (§. 171.) & vi status præsentis recordatur præteritorum (§. 41. 46.). Ergo eadem a morte corporis sui quoque conscia subsistit statuumque præteritorum recordatur (§. 272.), præsertim cum status post mortem rationem sui habeat in statu præsentis vitæ (§. 82. *Ontol.*) revelatione consentiente. Est adeo immortalis (§. 271.).

CAP. II.

DE SPIRITU IN GENERE
ET UNIONE SPIRITUS NOSTRI
CUM CORPORE.

§. 275.

Per *Spiritum* intelligimus substantiam intellectu & voluntate libera præditam.

§. 276.

Elementa rerum materialium equidem substantiæ simplices sunt (§. 86. *Cosmol.*), adeoque entia immaterialia, cum materia in numero entium extensorum (§. 33. *Cosmol.*), consequenter compositorum (§. 57. *Ontol.*) habeatur: quoniam tamen ipso *Leibnitio* iudice, qui earundem specificam rationem a Philosopho in dubio relictam determinare aggressus est, non nisi facultate obscure percipiendi gaudent (§. 101. *Cosmol.*), adeoque intellectu (§. 60.), consequenter voluntate libera (§. 138. 157.) carent, inter spiritus referri nequeunt (§. 275.).

§. 277.

Enimvero anima hominis intellectu (§. 60.) & voluntate (§. 138.) eaque libera (§. 157.) prædita est: in numerum spirituum itaque referenda (§. 275.).

§. 278.

Cum anima corpori unita dicatur, quate-

tenus sensationes tum quoad actum, tum quoad speciem a mutationibus in organis sensoriis factis & hæc a situ corporis in universo, & vicissim motus voluntarii in corpore ab animæ liberæ decreto pendent (§. 168.): anima vero nostra spiritus sit (§. 277.), spiritum corpori uniri patet, si ratio specificationis perceptionum ultima in corpore & vicissim ratio specificationis motuum in organis corporis in spiritu inveniatur.

§. 279.

In systemate harmoniæ præstabilitæ vis animæ ad perceptiones suas non determinatur a principio extrinseco (§. 254.), quemadmodum in systemate influxus physici (§. 239.) & in systemate adfistentiæ (§. 247.). Anima igitur in illo systemate non est indifferens ad unionem cum quolibet corpore, ut in ceteris systematibus; sed non nisi cum eo corpore uniri potest, cum quo unitur, principio rationis sufficientis convenienter (§. 8. *Ontolog.*).

§. 280.

Quoniam adeo in systemate harmoniæ præstabilitæ ratio unionis animæ cum corpore in ipsa corporis atque animæ essentia & natura continetur (§. 279.), illud vero in homine naturale seu physicum dicitur, quod per ejus essentiam & naturam explicari potest (§. 252.);

in

in systemate harmoniæ præstabilitæ unio animæ cum corpore maxime naturalis seu physica est.

§. 281.

Hæc ex unione naturali sequitur, nullam prorsus culpam circa actiones malas in systemate harmoniæ præstabilitæ in Deum redundare; sed hæc paucis exponi non possunt.

§. 282.

Spiritus perfectissimus, qui intellectu perfectissimo & voluntate perfectissima gaudet (§. 275.).

§. 283.

Perfectissimus intellectus est, qui omnia possible distincte simul repræsentat (§. 213.); spiritus ergo perfectissimus omnia possible simul distincte sibi repræsentat.

§. 284.

Perfectissima est voluntas, quæ non appetit nisi optimum (§. 140.). Spiritus ergo perfectissimus non nisi optimum appetit (§. 282.).

§. 285.

Cum ratio sit facultas intuendi nexum veritatum universalium (§. 88.); hæc vero a ratiociniis, intellectus operatione (§. 77.), pendeat: ens intellectu præditum rationis particeps. Spiritus itaque omnia rationis particeps (§. 275.).

§. 286.

§. 286.

Sapientia est habitus actionibus fines convenientes præscribendi & media ad eos ducentia eligendi, finesque particulares ita sibi invicem subordinandi, ut propiores sint media remotiorum.

§. 287.

Illa finium & mediorum electio illorumque mutua subordinatio absque judiciis discursivis fieri nequit (§. 78.). *Sapientia* igitur non cadit nisi in ens intellectu ac ratione præditum (§. 275. 285.), consequenter spiritus sapientiæ capax.

§. 288.

Si quod ens omnes fines particulares ita sibi invicem subordinare noverit, ut remotiorum media fiant propiores; erit illud *sapientia perfectissima* præditum (§. 286.).

§. 289.

Sapiens cum media eligat propter finem (§. 286.); a superfluis, hoc est, iis, sine quibus finis intentus obtineri potest, abstinere. Unde nil facit frustra, tenditque ad scopum via brevissima.

§. 290.

Stultitia opponitur sapientiæ atque adeo arguit electionem finium particularium sibi mutuo adversantium & mediorum vel fini prorsus contrariorum, vel per ambages ad eundem ducentium.

CAP. III.

DE ANIMABVS BRU-
TORUM.

§. 291.

BRuta organis sensoriiis, nervis pariter atque cerebro instruuntur, quemadmodum homo. Perinde igitur in ipsorum cerebro ideæ materiales oriuntur ab impressione in organa sensoria atque in homine. Quamobrem cum anima humana unita sit corpori, propterea, quod sibi repræsentat hoc universum convenienter mutationibus in organis sensoriiis factis (§. 278.); non sine ratione colligitur cum brutorum quoque corporibus unitas esse animas objecta in organa sensoria ipsorum agentia sibi repræsentantes convenienter mutationibus in organis sensoriiis factis. Tot enim diversi modi repræsentandi possibiles sunt, quot diversæ mutationes organorum sensoriorum. Argumentamur ab analogia, cui argumentandi modo maximum robur inesse deprehenditur.

§. 292.

Ut nobis eorum, quæ percipimus, conscii simus, pendet a claritate perceptionum partialium (§. 171.). Cum organa sensoria brutorum ob convenientiam cum nostris loquantur, perceptiones eorum partiales claritate gaudere (§. 291.), quoniam similes mutationes in iis contingunt ac in nostris: quin bruta quo-

quoque eorum, quæ percipiunt, sibi met conscia sint apparet, quamvis pro diversitate organorum ac hinc pendente diversitate claritatis in percipiendo diversa bruta magis minusve sibi eorum, quæ percipiunt, conscia sint.

§. 293.

Bruta destituuntur vocibus articulatis; quibus tanquam signis ideæ rerum ipsis obversantium indigitantur, certo indicio, ipsa cognitione universalium carere (§. 67.), nec distincte judicare (§. 73.), multo minus ratiocinari (§. 77.).

§. 294.

Cognitione universalium & facultate ratiocinandi destituta nexum veritatum universalium intueri nequeunt, adeoque rationis expertia (§. 88.) merito irrationalia dicuntur.

§. 295.

Experientia autem docemur, in brutis si non omnibus, saltem aliquibus iisque perfectioribus una perceptionum conjunctarum producta prodire & alteram, v. gr. canis ad conspectum baculi elevati, quo alias percussus fuit a domino suo, situ corporis demisso submissionem testatur plagas evitaturus. Quoniam hæc imaginationi atque memoriæ conformiter fiunt (§. 41. 46.); imaginatio atque memoria brutis omnino tribuenda: in iis autem ratio continetur regularum, juxta quas brutis conciliatur ab hominibus habitus certas operationes edendi, quas sine prævia institutione minime edunt.

§. 296.

§. 296.

Dum bruta ad conspectum circumstantiarum casus præsentis beneficio imaginationis atque memoriæ recordantur ejus, quod antea in simili casu accidit, idem eventurum expectant, v.gr. dum canis ad conspectum baculi elevati recordatur plagarum alias acceptarum, eas denuo expectat (§. 295.). Hæc casuum similium expectatio cum imitetur confuse ratiocinium (§. 76.), phrasi veterum non incongrue *analogum rationis* appellatur: quod cum vicem rationis in brutis subeat, eadem, etsi rationis expertia (§. 294.), analogum rationis habent.

§. 297.

Ad appetitum sensitivum atque aversionem sensitivam, ex confusa boni malique representatione orientem (§. 105.) sufficit sensus (§. 104.), imaginatio atque memoria (§. 296.). Quamobrem cum bruta sensu (§. 291.), imaginatione atque memoria (§. 295.) gaudeant, appetitus quoque sensitivus atque aversio sensitiva in ipsa cadit.

§. 298.

Enimvero cum rationis expertia sint (§. 220.), voluntas vero libera absque ratione locum habere nequeat (§. 236.); bruta voluntate libera destituuntur.

FINIS PSYCHOLOGIÆ RATIONALIS.

IN-

INSTITUTIONES
THEOLOGICÆ
NATURALIS,
METAPHYSICÆ
PARS QUARTA.

(Ibūm. Instit. Theol. Nat.)

O IN

INSTITUTIONES
THEOLOGICAE
NATURAE
METAPHYSICAE
PARS QUARTA



INSTITUTIONES THEO- LOGIÆ NATURALIS.

CAP. I.

DE EXISTENTIA DEI ET ATTRIBUTIS CUM EADEM CONNEXIS.

§. 1.

Nos existere omni caret dubio (§. 8. *Psych.*). Quoniam itaque ratio sufficiens detur necesse est, cur potius simus quam non simus (§. 8. *Ontol.*); aut ratio illa in nobis contineatur, aut in ente alio a nobis diverso. Quodsi ens alterum denuo habeat rationem existentiae suæ in alio, non pervenietur ad rationem sufficientem existentiae nostræ, nisi tandem subsistas in aliquo ente, quod rationem suæ existentiae in se ipso habet. Aut igitur nosmet ipsi sumus ens istiusmodi, aut datur aliud ens a nobis diversum, quod existentiae suæ rationem in se ipso habet atque *ens a se* dicitur.

§. 2.

Cum *ens a se* existentiae suæ rationem in se habeat (§. 1.), nullius virtute ad existendum indiget, sed propria existit, adeoque inde-

pendenter ab alio ente. Dicimus enim ens quoddam *independens* ab alio, quatenus ejus, quod ipsi tribuitur, ratio extra ipsum in alio non continetur: quemadmodum e contrario *dependens*, quatenus ejus, quod ipsi inexistit, ratio in alio continetur.

§. 3.

Quod a se existit ens, existere potest, etiam si aliud non existat (§. 2.), consequenter in omnibus, quæ ipsi conveniunt, ab alio prorsus *independens* est (§. cit.).

§. 4.

Quod rationem existentiae in se habet, vi essentiae suae existit (§. 19. *Ontol.*), consequenter immutabiliter (§. 20. *Ontol.*) adeoque necessario (§. 28. *Ontol.*). Patet adeo ens a se necessario existere (§. 1.), consequenter ab æterno (§. 29. *Ontol.*), ut adeo *primum* sit atque *ultimum*, cum ipso neque prius, neque posterius concipi possit.

§. 5.

Cum ens a se necessario existat (§. 4.), ut unquam desinat, fieri nequit (§. 28. *Ontol.*), consequenter corpus esse non potest (§. 65. *Ontol.* & §. 28. *Cosmol.*), sed ens simplex est (§. 71. *Ontol.*).

§. 6.

Mundus est ens compositum (§. 12. *Cosmol.*), idemque contingens (§. 23. *Cosmol.*), immo
&

& natura rerum ab absoluta necessitate libera (§. 72. *Cosmol.*); Ens igitur a se, quod simplex est (§. 5.), nec mundus, nec natura rerum esse potest.

§. 7.

Quoniam mundus ab eo, qui existit, diversus, diversa quoque ab elementis hujus mundi elementa postulat (§. 94. *Cosmol.*), mundus vero in numerum contingentium refertur (§. 23. *Cosmol.*); elementa quoque in numero contingentium sunt. Quamobrem cum ens a se sit necessarium (§. 4.); nec elementa rerum materialium ens a se esse possunt.

§. 8.


Vis animæ nostræ situ corporis in universo materialiter, constitutione organorum sensoriorum formaliter limitatur (§. 179. *Psychol.*). Cum igitur limitationis fundamentum sit contingens (§. 23. *Cosmol.*), ipsa quoque in numerum contingentium referenda, consequenter ens a se esse nequit (§. 4.). Idem adhuc alia patescit ratione. Ob modo dicta anima est dependens a mundo (§. 2.). Ens a se est independens ab omni alio ente (§. cit.): Anima igitur ens a se esse nequit. Nimirum sicuti alius mundus alia postulat elementa (§. 7.); ita quoque alias animas,

§. 9.

Datur itaque ens a se (§. 1.), quod est diversum a mundo corporeo (§. 6.), ab elementis rerum materialium, quibus is constituitur (§. 7.), atque ab animabus nostris (§. 8.), hoc est, ab omnibus entibus finitis, quæ existere novimus, & in quo adeo rationem sufficientem existentiae suæ habere debent (§. 8. *Ontol.*), qua per essentiam & naturam suam destituuntur tanquam contingentia (§. 28. *Ontol.*).

§. 10.

Quoniam illud ens, quod in se continet rationem sufficientem actus contingentium, mundi scilicet, elementorum atque animarum, vocatur *Deus*: Deum existere per demonstrata liquet (§. 9.), qui adeo propria virtute existit (§. 2.), ab alio ente prorsus independens (§. 3.), ens necessarium, idemque primus atque ultimus (§. 4.), simplex (§. 5.), hincque sua natura incorruptibilis (§. 77. *Ontolog.*).



CAP. II.

DE ATTRIBUTIS DIVINIS
IN GENERE.

§. II.

Cum in Deo contineatur ratio sufficiens actus universi (§. 10.); ea ipsi tribuenda sunt

at-

attributa, per quæ intelligitur, cur mundus actum fuerit consecutus (§. 9. *Ontol.*).

§. 12.

Patet autem mundum non nisi unicum existere. Ponamus enim existere plures: aut plures illi mundi erunt inter se similes, aut dissimiles. Si sint similes, nulla erit ratio, cur unus hunc, alter istum occupet locum (§. 9. 23. *Ontol.*), id quod principio rationis sufficientis repugnat (§. 8. *Ontol.*). Idem adhuc valet, si ponantur dissimiles. Cum enim in unoquoque mundo mutationes eodem modo consequantur, quocunque ordine inter se collocentur; nulla ex ipsis peti potest ratio, cur hoc potius, quam alio ordine collocentur (§. 23. *Ont.*). Secus se res habet in iis, quæ inter se connexa unum totum constituunt, ubi situs determinatur ex rationibus intrinsecis.

§. 13.

Unus itaque cum existat mundus (§. 12.), etsi plures sint possibiles (§. 23. *Cosmol.*), in Deo ratio sufficiens contineatur necesse est, cur hic potius mundus existat, quam alius (§. 10.), consequenter ea ipsi tribuenda sunt attributa, per quæ intelligitur, cur hic potius mundus existat, quam alius (§. 9. *Ontol.*).

substantiam

CAP. III.

DE INTELLECTU DIVINO
ET ATTRIBUTIS CUM EO-
DEM CONNEXIS.

§. 14.

Quoniam nihil est sine ratione sufficiente, cur potius sit quam non sit (§. 8. *Ontol.*), nec Deus sine ratione huic potius universo actum impertitus est, quam alteri. Quod enim eidem actum impertitus fuerit, exinde elucet, quia non necessario existit (§. 6.). Enimvero mundi, qui possibiles sunt, perfectione inter se differunt (§. 113. *Cosmol.*). Ob perfectionis itaque diversitatem hunc potius, quam alium rerum ordinem ad actum perduxit. Quod si enim ad notiones universi atque perfectionis ejusdem attendas (§. 5. II. 107. *Cosm.*), facile perspicitur, rationem aliam locum habere non posse.

§. 15.

Ubi unum alteri præfertur ob rationem ei, quod eligitur, intrinsecam, ibi libera voluntas (§. 138. 156. *Ppsychol.*), consequenter intellectus (§. 137. 60. *Ppsychol.*) locum habet. Deus itaque intellectu atque libera voluntate præditus (§. 14.), consequenter spiritus est (§. 275. *Ppsychol.*).

§. 16.

§. 16.

Vi igitur intellectus mundos possibiles omnes sibi repræsentat distincte (§. 60. *Psych.*), cumque perfectio universi in eo consistat, quod rationes particulares rerum cum simultanearum tum successivarum ad idem spectantium tandem in rationes generales communes resolvantur (§. 107. *Cosmol.*), Deus perfectiones omnium mundorum possibilium dijudicaturus maxima minima quoad spatium & tempus in unoquoque simul sibi distincte repræsentet necesse est, consequenter cum omnes mundi possibiles comprehendant omnia possible in certa systemata redacta (§. 5. *Cosmol.*), omnia possible cognoscit, ideoque *omniscius* dicitur.

§. 17.

Est adeo intellectus divinus distincta & simultanea repræsentatio omnium possible, consequenter idem infinitus (§. 81. *Ontolog.*) atque absolute summus.

§. 18.

Dum Deus omnia distincte simul cognoscit, facultate cognoscitiva inferiori (§. 27. *Psychol.*), hoc est, sensu & imaginatione (§. 29. 36. *Psych.*) caret, omniaque intuitive cognoscit (§. 68. *Psych.*).

§. 19.

Quoniam Deus sensu & imaginatione caret (§. 18.), intellectu puro gaudet (§. 64. *Psychol.*).

§. 20.

In quovis mundo singula quoad spatium & tempus inter se connexa sunt (§. 10. *Cosmol.*) & actus contingentis naturaliter per seriem causarum, quæ a se invicem dependent ut effectus a sua causa (§. 16. *Cosmol.*) atque per seriem simultanearum inter se connexarum determinatur (§. 17. *Cosmol.*). In qualibet ergo quantumlibet minima parte distincte cognita integrum deprehenditur universum. Unde *immensitas* intellectus divini elucet, si ad nostrum referatur (§. 54. *Ontol.*).

§. 21.

Intellectus divinus ad omnia possible extenditur omniaque in singulis distinguit, quæ differentia insunt (§. 16.), adeoque absolute maximus sive summus est (§. 213. *Psychol.*).

§. 22.

Quoniam Deus in unoquoque statu, quem tanquam præsentem considerat, simul intuetur futurum (§. 20.), quæ olim futura sunt, tanquam præsentia intuetur: id quod *præscientia* salutatur.

§. 23.

Cum præscientia rebus nullam mutationem intrinsecam inducat (§. 20. 22.); nec contingentia rerum, nec libertati humanæ officit. Pertinere enim actiones hominum liberas ad objectum præscientiæ divinæ inde elucet, quod

quod homo anſam arripiat ad decernendum ab iis, quæ in univerſo ſunt, & in decernendo ad certam regulam ſeſe attemperet (§. 140. *Pſych.*). Unde ſimul perſpicitur, quomodo ea norit Deus, quæ ſub conditione nunquam implenda forent.

§. 24.

Propterea quod Deus omnia diſtinctiſſime ſibi repræſentat (§. 16.), quæcunque ullo modo a ſe invicem differunt, perfectiſſime diſtinguit (§. 23. *Pſychol.*). Atque ideo non modo eorum omnium, ſed & ſui ipſius ſibi conſcius eſt (§. 171. *Pſychol.*), conſequenter ſe ipſum cognoscit.

§. 25.

Intellectus divinus omnia poſſibilia concipit & in ſystemata redigit (§. 16.). Eſt igitur fons tum poſſibilitatis intrinſecæ (§. 11. *Ontol.*), tum extrinſecæ (§. 22. *Cosmol.*), hoc eſt, novit Deus, & quænam fieri, & a quibus cauſis ad actum deduci poſſint (§. *cit.*), cumque poſſibilitate rerum intrinſeca eſſentia abſolvatur (§. 19. *Ontol.*), intellectus divinus eſt fons eſſentiarum.

§. 26.

Quodſi ergo quæſiveris, cur entia finita hanc habeant eſſentiam, ratio quidem ultima erit, quod intellectus divinus eadem ita concipiat: unde quoad eſſentiam ab intellectu divino pendet (§. 2.).

§. 27.

§. 27.

Quoniam possibilitas cum intrinseca, tum extrinseca ab intellectu divino pendet (§. 25.); quoties de ea in Philosophia sermo fuerit, non potest tanquam ejus ratio allegari voluntas divina, sed intrinseca demonstratur, quod sit a contradictione liberum, quod tanquam possibile defenditur; extrinseca vero, quod ab his vel istis causis actus intrinsece possibiles determinari possit (§. 11. *Ontol.* & §. 22. *Cosmol.*). Hæc ideo monemus, ne in Philosophia, præsertim naturali, sumantur, quæ demonstrari nequeunt & rationis loco allegetur Numinis voluntas; qualia entia *qualitatum occultarum* nomine vulgo veniunt.

§. 28.

Cum omnium possibilium fons sit intellectus divinus, tam quoad possibilitatem intrinsecam, quam extrinsecam (§. 25.); Deus solus inventor omnium dicendus: homines proprie loquendo nihil inveniunt, sed divina inventa meditando assequuntur, nisi factus imaginationis excludant (§. 44. *Psychol.*).

§. 29.

Similiter cum intellectus divinus omnia intrinsece possibilia omni possibili modo combinet (§. 25.); unde veritas (§. 43. *Ontol.*) & perfectio (§. 44. *Ontol.*) resultat: idem omnis verita-

ritatis & perfectionis fons est. Patet adeo, omnem veritatem esse a Deo.

§. 30.

Quia omnis veritatis autor Deus est (§. 29.), quin omnium quoque veritatum nexum intime perspiciat dubitari nequit (§. 24.). Summa igitur ratione præditus est (§. 88. *Psychol.*).

§. 31.

Deus dum mundum produxit, ad diversitatem perfectionis pluribus obviæ attendit (§. 14.). Sed cum nil sit sine ratione sufficiente (§. 8. *Ont.*), ratio quoque detur necesse est, cur ob hunc perfectionis gradum, qui universo actuali inest, hoc potius universum produxerit, quam aliud. Enimvero id, cuius gratia causa efficiens operatur, finis est (§. 97. *Ont.*). Evidens adeo, dari finem aliquem, ob quem Deus universum hoc produxit. Immo ulterius liquet, perfectionem universi esse medium obtinendi illum finem (§. 99. *Ontol.*).

§. 32.

Perfectio universi in eo consistit, quod rationes particulares, cur unum alteri succedat vel alteri coëxistat, tandem in rationes generales communes resolvantur (§. 107. *Cosmol.*). Quamobrem cum Deus ob perfectionem huic universo inexistentem ipsum ceteris prætulerit, quod esset ea medium ob-

tinendi finem, quem per hujus universi productionem intendit (§. 31.); patet omnino, Deum non modo ideo hunc produxisse mundum, quod unum ita esset propter alterum, consequenter rationes istas particulares, cur unum alteri succedat, vel alteri coëxistat, esse fines a Deo intentos (§. 97. *Ontol.*), sed Deum quoque hosce fines ita sibi mutuo subordinasse, ut tandem sint medium obtinendi finis ultimi, propter quem mundum produxit.

§. 33.

Si quod ens omnes fines particulares ita sibi invicem subordinare noverit, ut remotiorum media fiant propiores, summa sapientia praeditum est (§. 288. *Psychol.*). Deum igitur sapientissimum esse certissimum est (§. 32.).

§. 34.

In productione universi Deus tanquam finem intendit, ut unum esset propter alterum (§. 32.). Usus igitur, quem res sibi mutuo praestant (§. 8. *Cosmol.*), sunt fines a Deo intenti.

§. 35.

Quoniam id, quo ens unum alteri prodest, ex ipsius essentia & natura consequitur (§. 41. *Cosmol.*); quæ ex essentia & natura rerum materialium consequuntur, pro finibus a Deo in-

intentis habentur (§. 34.), atque adeo ipsi rerum essentia & natura est medium, quo Deus finem consequitur (§. 99. *Ontol.*).

§. 36.

Nec obscure hinc ulterius colligitur, ipsum rerum artificialium usum ab artifice inventore non intentum respectu Dei pro fine haberi.

§. 37.

Cum perfectio universi, quæ ex essentia & natura rerum resultat sit medium illius finis, quem Deus tanquam ultimum & principalem (§. 101. 102. *Ontol.*) intendit (§. 31.) ; finis hic non in universo, sed extra ipsum in Deo quærendus tanquam in ente a mundo diverso (§. 9.). Enimvero, quoniam Deus ab alio ente prorsus independens est (§. 10.), ex productione universi nihil in ipsum redundare valet, quod antea non habebat. Quamobrem nihil remanet, quam ut creaturæ rationali manifestetur per universi perfectionem ipsa Autoris perfectio. Dubio itaque caret, Deum hanc perfectionis suæ manifestationem intendisse. Atque idem est, quod vulgo dicitur, Deum produxisse mundum ad manifestandam gloriam suam.

§. 38.

Fecit Deus mundum omniaque, quæ in ipso sunt, ut exinde ipsius perfectionem agnoscamus

mus (§. 37.). Res igitur in universo perfectiones divinas repræsentant, ita ut ex iis, quæ in ipsisprehendimus, ad perfectiones divinas argumentari liceat: id quod experientiæ consentaneum. Atque ideo creaturæ non incongrue *specula perfectionum divinarum* dicuntur.

§. 39.

Sapientis est eligere media fini convenientia (§. 286. *Ppsych.*). Deus est sapientissimus (§. 32.): ipsius igitur est, eligere media fini convenientissima, hoc est, ea, quibus finis ab ipso intentus omnium optime obtinetur. Eum igitur elegit mundum, cujus perfectione omnium optime sua perfectio manifestatur (§. 37.). Quoniam itaque mundus perfectissimus aut, si mavis, optimus omnium possibilium magis patefacit Numinis perfectionem, quam imperfectior; perfectissimum omnino seu optimum mundum elegisse dicendus est. *Optimus* nimirum dicitur *mundus*, qui fini, ob quem factus est, convenientissimus, consequenter in quo plurimum perfectionis.


§. 40.

Sapientis est, nil facere frustra & ad scopum via brevissima tendere (§. 289. *Ppsychol.*). Deus igitur ens sapientissimum (§. 32.), nil frustra facit & brevissima ad scopum via tendit.

§. 41.

§. 41.

Quoniam leges motus non absolute necessariæ sunt (§. 71. *Cosmol.*), Deus easdem constituit fini suo conveuienter (§. 31.). Cum adeo sapientiam summi Numinis summam testari debeant (§. 22. 37.); Natura quoque, quæ ad leges istas operatur (§. 42. 43. *Cosm.*) nil facit frustra, viaque ad scopum brevissima tendit.



CAP. IV.

DE VOLUNTATE DIVINA ET ATTRIBUTIS CUM EA CONNEXIS.

§. 42.

DEUS hunc mundum elegit, propterea quod optimus (§. 39.). Fertur adeo voluntas ipsius in optimum (§. 15.), consequenter omnium perfectissima, cum vi regulæ appetitus (§. 140. *Psyche.*) perfectio voluntatis æstimari nequeat, nisi ex motivis (§. 141. *Psyche.*).

§. 43.

Neque vero verendum est, in Deo tolli libertatem, si optimum mundum imperfectioribus prætulisse statuatur. Optimum enim ideo elegit, quod eum fini suo ceteris convenientioremprehenderit (§. 39.). Quis vero dixerit, violari libertatem, propterea quod media præferamus, quæ scopo nostro

(*Thüm. Instit. Theol. Nat.*) P ma.

magis satisfaciunt ceteris, quæ minus apta intelligimus?

§. 44.

Produxit Deus mundum, ut gloriam suam manifestaret creaturæ rationali (§. 37.). Enimvero quæ propter finem fiunt, sub hypothese finis consequenti, adeoque hypothetica tantum necessitate fiunt (§. 30. *Ontol.*), quæ uti contingentiae actionis (§. 31. *Ontol.*), ita nec libertati officit.

§. 45.

Possibilitas determinandi actum possibilis dicitur *potentia activa*. Quoniam igitur Deus actum universi per intellectum ipsius possibilis determinavit (§. 14. 25.); potentia activa gaudet, quæ vulgo simpliciter *potentia* appellari consuevit.

§. 46.

Quoniam Deus mundum perfectissimum ad actum deducere potuit (§. 39.), nulla obstat ratio, cur ejus potentia non suffecisset ceteris mundis minus perfectis producendis. Sed omnes mundi simul omniaabilia comprehendunt (§. 5. *Cosmol.*): Dei igitur potentia ad omniaabilia extenditur, atque ideo Deus dicitur *omnipotens* & potentia ejus *Omnipotentia* salutatur. Impossibilia vero ab omnipotentia divina excluduntur (§. 6. II. *Ontol.*).

§. 47

§. 47.

Cum major potentia omnem conceptum eludat, quam quæ ad actuanda omnia possibile sufficit, potentia Dei maxima est.

§. 48.

Deus omnes mundos posibles producere valet (§. 46.), non tamen nisi unicum producit (§. 12.). Hujus igitur productio non absolute necessitatis est (§. 27. *Ontol.*).

§. 49.

Dum itaque hunc mundum producit, potentiam habet producendi alium quemcunque (§. 47.), adeoque absolute non repugnat, ut hunc mundum non producat. Gaudet itaque Deus indifferentia exercitii (§. 152. *Psycholog.*).

§. 50.

In voluntate Numinis habetur ratio, cur hic potius mundus quam alius actum fuerit consecutus (§. 42.). Actus igitur rerum a voluntate divina pender (§. 2.), seu, quod perinde est, voluntas divina est fons actualitatis.

§. 51.

Potentia Dei ad actuanda omnia possibile sufficit (§. 46.): voluntas vero divina non fertur in impossibilia, sed in possibile optimum (§. 42.). Potest adeo Deus facere quæcunque vult.

§. 52.

Deus elegit mundum perfectissimum (§. 39.). Quamobrem fieri nequit, ut quæ eidem contrariantur velit (§. 6. *Ont.*). Quoniam tamen totius universi perfectionem minime comprehendimus (§. 108. *Cosmol.*), ex parte autem judicaturi facile a veritate aberrare queamus (§. 109. *Cosmol.*) ; difficulter hac ratione innotescit, quænam Deus velit.

§. 53.

Quoniam Deus ob propriam perfectionem non vult (§. 39.), quæ universi perfectioni contrariantur; denuo fieri nequit, ut velit, quæ perfectionibus suis repugnant. Hac igitur ratione a priori innotescit subinde, utrum Deus aliquid velit, nec ne.

§. 54.

Cum voluntas divina sit fons actualitatis (§. 50.), si ad ea attendimus, quæ in universo actuantur, a posteriori cognoscere licet, quæ Deus velit. E. gr. si pravæ hominum actiones sequatur fortuna adversa, voluntati Numinis conforme intelligitur, ut homines dent pravitatis suæ pœnas. Atque hæc est ratio cur alibi (§. 71. *Logic.*) inculcaverim, ex historia cum ecclesiastica, tum civili providentiæ divinæ regulas colligi posse.

§. 55.

§. 55.

Denique voluntas divina innotescit per revelationem immediatam, cujus hæc notentur criteria, ne supposititiam pro vera amplectamur. Nimirum 1. cum Deus vi sapientiæ suæ nil faciat frustra (§. 40.); revelatio divina talia contineat necesse est, quæ homo scitu sibi necessaria recto rationis usu assequi nequit.

§. 56.


Nec 2. quod Deus revelavit, perfectionibus ipsius contrariari potest (§. 53.). Quamobrem contradictoriis in ea locus non est, quia talis revelatio omniscientiæ ipsius repugnat (§. 16.).

§. 57.

Cum 3. etiam veritates naturales a Deo Autore sint (§. 29.), ob præcedentem rationem veritas revelata contradicere nequit naturali, nisi quatenus contingentis contrarium per miraculum efficitur (§. 74. 75. *Cosmol.*).

§. 58.

Denique 4. nec revelatio præcipere potest, quæ legi naturali ac naturæ animæ repugnant (§. 56.).



CAP. V.

DE OPERIBUS DIVINIS.

§. 59.

Voluntas Numinis de universo ad actum perducento *Decretum* appellatur.

§. 60.

Cum Deus libere elegerit hoc universum ei-
que actum impertitus (§. 14. 15.), dubio caret,
quod ejus actum decreverit (§. 59.).

§. 61.

Per universum intelligimus integram rerum
seriem, sive simul existant, sive se invicem se-
quantur (§. 5. *Cosmol.*), ita ut nec ea excluda-
mus, quæ Deus per miraculum aut alio (si quis
datur) extraordinario modo producit, natura-
liter non secutura, ob rationes mox clarius ex-
ponendas. Decretum igitur Dei ad omnia
extenditur, quatenus in actum eorum influat
necesse est: id quod jam dilucidius inquire-
mus, quantum per principia rationis nobis co-
gnita licet. Uberius enim ex revelato lumine
talìa hauriuntur.

§. 62.

Omnis igitur rerum series cum instar entis
unius spectari debeat (§. 11. *Cosmol.*), Deus au-
tem qui possibilia in systemata redegit (§. 16.) vi
sapientiæ suæ illam ens unum fecerit (§. 34.
Theol. Natur. & §. 11. *Cosmol.*); decretum
quoque Dei in se unicum est, etsi nostro conci-
piendi modo in plura partiri idem liceat.

§. 63.

Futuritio itaque rerum a decreto divino pen-
det (§. 61. 2.), hoc est, a decreto divino habent
entia finita, ut certo existant.

§. 64.

§. 64.

Est enim decretum divinum immutabile ; cum ratio nulla adsit, cur mutati debeat. Vi omniscientiæ suæ intime perspicit omnia (§. 16.), ut ejus de perfectione universi judicium semper idem maneat, consequenter nec ejus voluntas (§. 42.), adeoque non decretum mutari possit (§. 59.).

§. 65.

Deus decretum suum executurus mundo, qui in ipsius intellectu idealiter latebat (§. 16.) existentiam impertitus est, ipsis etiam elementis (§. 7.). Mundum adeo a potentia ad actum traduxit, cum nihil ejus extra intellectum divinum appareret : quæ ex non apparentibus productio vulgo *productio ex nihilo* atque uno nomine *creatio* salutatur.

§. 66.

Existencia necessaria propriæ virtuti debita est attributum entis a se (§. 4. *Theol. nat.* & §. 21. *Ont.*). Sed attributa sunt incommunicabilia (§. 20. 21. *Ontol.*), adeoque fieri nequit, ut mundus & quæ in ipso sunt propria virtute existant (§. 6.), consequenter Deus actum creaturæ ita determinare non potuit, ut eundem propria virtute continuaret (§. 46.).

§. 67.

Necesse igitur est, ut Deus continuet actionem, qua mundo & iis quæ in ipso sunt, existens.

stentiam largitur, quæque *Conservatio* dicitur. Unde simul intelligitur, cum *Conservatio* continuata creatio dicatur (§. 65.).

§. 68.

In omni ente finito distinguitur substantiale seu id quod perdurat a limitationibus ejusdem. Limitationes arguunt defectum ulterioris entitatis, nec indigent conservatione. Si enim substantiali limitato actum largitur Deus, limitationes una ad sunt.

§. 69.

Quod ergo a substantiali profluit, Deo Auctoritribuendum: quod vero ex limitationibus resultat, creaturæ proprium est, cum limitationes essentiis rerum adhæreant, quatenus idealiter in intellectu divino continentur (§. 26.), adeoque non vi decreti inferantur (§. 27. 59.).

§. 70.

Mala ex limitationibus resultant, v. gr. ob finitudinem intellectus homo errat, ut malum pro bono amplectatur (§. 142. *Psychol.*). Sunt adeo creaturæ propria, nec Deus ullo modo causa mali dici potest (§. 69.).

§. 71.

Nimirum Deus conservat creaturam & vim ipsius activam (§. 67.), regulasque præferibit, ad quas operatur, vi nempe corporum leges motus (§. 43. *Cosmol.*), vi animarum

rum leges logico-morales (§. 77. 140. *Psych.*). Sed ob limitationes essentiae fieri potest, ut creatura juxta illas regulas operans a veri tramite deflectat, cujus rei exemplum modo dedimus (§. 70.).

§. 72.

Quoniam tamen Deus creaturam creat atque conservat (§. 65. 67.), quæ ob limitationes originales essentiae juxta leges naturæ latas aberrat (§. 71.); quod malum permittat patet.

§. 73.

Deus mundum hunc elegit, propterea quod optimus, hoc est, fini, ob quem eundem fecit, convenientissimus (§. 39.). Experientia autem loquitur, dari in hoc mundo etiam mala tam physica, quam moralia. Unde perspicuum est, in optimo etiam mundo, qui scilicet in ceteris fini a Deo intento convenientior, quam alius, malis physicis atque moralibus locum esse: ut adeo Deus mala permittat, quatenus in idea mundi, ceteroquin optimi includuntur. Permittuntur mala hac ratione, ne bonum una impediatur.

§. 74.

Quodsi dicas, eccur Deus non per miraculum impediat mala; haut difficilis est responsio. Cum enim mala ex limitationibus essentialium resultent (§. 70.); si Deus creaturas producit, permittere utique debet, quæ ab

ipsis fiunt. Nimirum fieri nequit, ut Deus aliquid velit & idem simul non velit (§. 6. *Onzol.*), consequenter ut velit creaturam limitatæ virtutis existere, nec tamen ut eidem convenienter agat.

§. 75.

Quoniam tamen mundum hunc elegit, quatenus ceteris perfectior (§. 39.), non intuitu mali, quod approbare nequit (§. 42.); quod suum est agit, atque malum, quod creaturæ culpa in mundum irrepit, ad bonos fines dirigit vi sapientiæ summæ (§. 33.): cujus rei luculenta exempla experientia suppeditat.

§. 76.

Qui sumunt, quod probare nesciunt, fieri potuisse universum, ex quo omne malum exulasset, hoc universum futurum fuisse perfectius eo, quod existit, vel universum idem adhuc perfiturum fuisse, etiam si Deus alios homines, nempe natura sua sub iis circumstantiis illabiles, sub quibus humanum genus peccavit, produxisset; difficultates circa permissionem mali absque ratione faceffunt.

§. 77.

Ceterum quando (§. 70.) asserimus, malum ex limitationibus originariis creaturarum resultare, de ejus possibilitate nos loqui manifestum est: veritas historica, qua hæc possibilitas ad actum deducta, rationi ignota ex revelatione petenda est.

§. 78.

§. 78.

Nulla autem difficultas premit originem mali possibilem, si rem curatius expendas. Cur enim Deus, omnis mali expers? nonne ideo, quia omniscius (§. 16.) & sapientissimus (§. 33.) in dijudiciando bono non aberrat? Ergo e contrario cur homo appetit mala? nonne, quod bona appareant (§. 140. *Psychol.*). Cur mala apparent bona? nonne propterea, quod ex notionibus confusis sensuum & imaginationis iudicat (§. 103. *Psychol.*). Quis vero nescit cognitionem confusam finitudini seu limitationibus facultatis cognoscitivæ originariis deberi (§. 23. *Psychol.*), cum ideo in Deum, cujus intellectus infinitus (§. 17.) limitationes respuit, non cadat (§. 18.).

§. 79.

Quoniam Deus per causas finales, quibus efficientes in universo connectuntur (§. 32.) sapientiam suam manifestat (§. 33.) fini ultimo convenienter (§. 37.); quæ per causas secundas, hoc est, efficientis finitas consequi possunt, per miraculum non efficit, etsi possibile in omni casu (§. 75. *Cosmol.*), cum in eo casu non nisi potentiam Dei loqueretur, effectu naturali de omniscientia, sapientia, omnipotentia testante (§. 16. 332. 45.).

§. 80.

Enimvero si quod ex causarum secundarum


rum nexu seu ordine resultare nequeat, quod intendit Deus; ut miraculo utatur ad finem consequendum, sapientiæ est (§. 39.): atque hoc in casu perinde ac effectus naturales de omniscientia, sapientia, omnipotentia Numinis nua testantur (§. cit.).

§. 81.

An vero ad istiusmodi effectus producidos, quales ordinarie a causis secundis producuntur, Deus tanquam causa prima in solum usum naturæ miraculis utatur, an vero eadem soli gratiæ usui destinavit, ex altiori lumine, revelatione nempe divina decidendum relinquimus.

§. 82.

Ceterum quæ de operibus divinis dicta sunt, ex revelato lumine plenius illustrantur.



CAP. VI.

DE ATTRIBUTIS DIVINIS, QUÆ PER ANTECEDENTIA DEMONSTRATUR.

§. 83.

Cum Deus mundum perfectissimum creaverit (§. 39.) & malaque permittit (§. 72.), ad bonos fines dirigat (§. 75.); unicuique creaturæ tantum perfectionis tribuit atque boni, quantum ipsi tribui potest. Quamobrem cum

bonitas dicat pronitatem ad alterius perfectio-
nem promovendam, notioni boni (§. 102.
Psychol.) conformiter: Deus est summe bonus
erga creaturas.

§. 84.

Quibus scrupuli circa bonitatem divinam
suboriuntur, illi non attendunt, quid ferat fini-
tudo rerum, se suaque extra nexum cum re-
bus aliis considerant, mala a Deo exterminan-
da esse vel per miraculum somniant, nec ea-
dem creaturæ culpa unice oriri perpendunt,
immo pro malis subinde habent, quæ talia non
sunt.

§. 85.

Deus & seipsum (§. 24.) & omnia possible
cognoscit (§. 16.), voluntas vero in cognitum
fertur (§. 141. *Psychol.*); intellectus itaque &
voluntas in Deo insunt non per modum po-
tentiae (§. 85. *Ont.*), sed per modum actus, ita ut
omnia actu cognoscat, quæ cognoscere potest,
actu velit, quæ libere velle potest. Deus est
ens infinitum seu illimitatum (§. 81. *Ontol.*).

§. 86.

Ob infinitudinem idem est immutabilis. Po-
namus enim aliquid in Deo mutari, erit itaque
in eo, quod ante non inerat. Ergo quædam in
Deo sunt per modum potentiae: id quod infi-
nitudo repugnat (§. 8. *Ontol.*).

§. 87.

Quoniam Deus immutabilis (§. 86.), nullo in
ipso

ipso datur successio, consequenter Deus non existit in tempore (§. 52. *Ont.*), nec in ipso præteritum, præsens & futurum distinguuntur, sed omnia semper præsentia sunt.

§. 88.

Anima habet intellectum (§. 60. *Ppsychol.*) & voluntatem liberam (§. 138. 156. *Ppsychol.*). Deus quoque habet intellectum & voluntatem liberam (§. 15.), caret autem sensu & imaginatione (§. 18.) quibus homo præterea præditus (§. 29. 36. *Ppsychol.*). Intercedit itaque aliqua similitudo inter partem animæ superiorem atque Deum (§. 23. *Ontol.*). Enimvero cum intellectus hominis sit valde limitatus, Dei autem infinitus (§. 17.), ea intercedit differentia, quæ inter finitum & infinitum locum habet. Idem alia adhuc ratione evincitur. Homo habet vim repræsentativam universi valde limitatam (§. 179. *Ppsychol.*): Deus vero vim omnium universorum possibilium repræsentativam prorsus illimitatam (§. 16.).

§. 89.

Patet hinc modus, quomodo ad notiones perfectionum divinarum perveniamus. Cum mens sibi suarum perfectionum sit conscia, eo ipso earundem notiones habet. Quod si ergo limitationes separentur, ut finitum degeneret in infinitum seu illimitatum, perfectiones prodeunt divinæ. Quamobrem cum ex unica vi animæ universi repræsentativa animæ perfectiones

nes a priori deduxerimus in Psychologia rationali; qui ad hanc attendit haud difficulter perspiciet, quod ex adæquata representatione omnium univerforum possibilium in Deo, supposita unius actualitate, attributa divina deduci queant. Immo nec alia ratione nos eadem in antecedentibus deduximus.

§. 90.

Deus caret cognitione confusa (§. 18.), adeoque & appetitu sensitivo & averfatione sensitiva (§. 105. *Psychol.*), consequenter affectibus (§. III. *Psychol.*).

§. 91.

Cum per antecedentia constet, in unico ente a se contineri rationem sufficientem contingentiae hujus universi; unicum quoque dari Deum liquet, Dii vero plures præter rationem finguntur.

§. 92.

Paganismus, qui plures Deos imperfectionibus præditos admittit, inde ortum traxit, quod mundus non fuit agnitus tanquam ens unum, ob non perspectum rerum omnium nexum per causas efficientes atque finales (§. II. *Cosmol.*).

§. 93.

Ex bonitate secundum leges sapientiae attemperata enascitur *Justitia*. Ita e. gr. magistratus per bonitatem fertur in salutem omnium civium; sed ne id fiat cum detrimento universitatis, vi sapientiae in eos severe animadvertit, qui

qui suo officio defunt. Atque ita se probat justum, quatenus bonitatem ad sapientiæ leges attemperat. Deus equidem summe bonus est (§. 83.); sed idem sapientissimus (§. 33.). Cum igitur non velit, quæ perfectionibus suis repugnant (§. 53.); quin bonitatem suam secundum leges sapientiæ attemperet, consequenter justus sit dubitandum non est. Immo cum & bonitatis & sapientiæ summum possideat gradum, *iustissimus* est.

§. 94.

Ex perfectionis intuitu oritur voluptas (§. 95. *Psych.*). Deus se ipsum cognoscens (§. 24.) summam sui ipsius perfectionem (§. 17. 24.) intuetur, una cum omni perfectione possibili, quæ in entia finita cadit (§. 16.). Summa igitur voluptate gaudet (§. 97. *Psychol.*).

§. 95.

Quoniam Deus immutabilis (§. 86.), summa perfectione constanter fruitur. Et quia independens (§. 2.), a nullo alio ente in illius fruitione turbari potest. Atque hæc non impedita summæ perfectionis possessio *Beatitudinem Dei* constituit: quam esse absolute summam & creaturæ, utpote per essentiam limitatæ, incommunicabilem evidens est.

FINIS THEOLOGICÆ NATURALIS.

IN-

INSTITUTIONES
PHILOSOPHIÆ
EXPERIMEN-
TALIS.

INSTITUTIONS
PHILOSOPHIC
EXPERIMENT
TALIS



INSTITUTIONES PHILO- SOPHIÆ EXPERIMEN- TALIS.

PROLEGOMENA.

§. 1.

Philosophia experimentalis est scientia eorum,
quæ per experimenta innotescunt.

§. 2.

Usum habet cum in cognitione naturæ, tum
artis, sive ad veritates stabiliendas, sive ad sta-
bilitas examinandas.

§. 3.

In ea igitur describenda sunt experimenta,
eorumque rationibus investigatis condenda
theoremata in usum physice atque artis.

§. 4.

Nobis animo sedet ea potissimum descri-
bere, quo hodie in academiis curiosorum oculi-
lis subjiciuntur, atque scientiæ naturalis ge-
nuina fundamenta inde elicere.

SECTIO I.

DE EXPERIMENTIS HYDRO-
STATICIS.

CAP. I.

DE ÆQUILIBRIO FLUI-
DORUM.

§. 5.

AD æquilibrium fluidorum examinandum utimur siphonibus vitreis crura parallela
 Fig. 1. AB & CD, vel divergentia AB & CD vel
 Fig. 2. quomodocunque inflexa EB & FD, ejus-
 Fig. 3. dem vel in æqualium diametrorum ha-
 Fig. 4. bentibus, atque libella, quæ constat ex tu-
 bulo vitreo AB spiritu vini colorato repleto,
 Fig. 5. ut non nisi bullula C aëri cedat, atque
 utrinque hermetice sigillato.

§. 6.

Applicata libella ad tabulam verticalem,
 Fig. 5. donec bullula C in medio quieta persi-
 stat, ducatur juxta ejus longitudinem linea,
 quæ erit horizontalis. Quodsi jam siphonem
 quemcunque aqua colorata, vel alio quocun-
 que liquore vel hydrargyro repleas, & erus
 alterum ad lineam horizontalem ita applices,
 ut superficies suprema liquidi eandem tangat,
 eadem linea constanter tanget superficiem e-
 jusdem liquidi in crure altero. Quodsi per
 Fig. 2. basin siphonis ducas lineam HR hori-
 zonti parallelam, vel eandem ad lineam ho-
 rizon-

horizontalē ope libellæ determinatam applices; erunt perpendiculara AB & DR a superficiebus liquidi in utroque crure demissa inter se æqualia.

§. 7.

In tubis igitur communicantibus fluida homogenea ad eandem altitudinem ascendunt, non attenta capacitatis diversitate, eademque in æquilibrio sunt quam primum utrinque superficies fuerint in eadem linea horizontali. Dicitur autem *linea horizontalis*, cujus singula puncta a centro Telluris æqualiter distant. Unde singula fluidi puncta in suprema superficie a centro Telluris æqualiter distant.

§. 8.

Aqua tingitur colore rubro, si ligni Brasiliæ spiritus vini flavo si radicis curcumæ frustulis affunditur.

§. 9.

Quodsi siphoni infundatur hydrargyrum sive mercurius donec in libella HI consistat & in crure altero AB affundatur aqua colorata Fig. 1. vel limpida usque ad E ascendens; Mercurius ex H deprimetur in B atque in CD ascendet usque in L. Quodsi siphon ad lineam horizontalem examinetur (§. 6.), erit altitudo EB ad altitudinem CL fere ut 14. ad 1, quæ scilicet est ratio reciproca gravitatis Mercurii ad gravitatem aquæ.

§. 10.

Evidens igitur est, fluida diversæ gravitatis specificæ esse in æquilibrio, si altitudines fuerint reciproce ut gravitates. Constat etiam, gravitates fluidorum specificas hoc experimento determinari posse. Immo constat, fluidum specificæ levius, qualis est aqua, premere specificæ gravius, qualis Mercurius omnium fluidorum gravissimus.



CAP. II.

DE PRESSIONE FLUIDORUM.

§. II.

Vitro cylindrico longiori, sed exiguæ diametri, infundatur Mercurii quædam portio ad libellam DE subsistens: Intrudatur tubulus vitreus HI & mox affundatur aqua usque ad summitatem vitri. Mercurius in tubo ultra libellam DE usque ad O seu ad libellam FG ascendet. Unde perspicitur, fluidum specificæ levius premere atque movere specificæ gravius. Idem fit, si loco mercurii substituatur aqua & loco aquæ spiritus vini, locum inter utrumque fluidum occupante oleo terebinthinæ, vel alio quocunque spiritu vini graviore, ut commixtio impediatur. Oleum lente affunditur, antequam spiritus vini additur.

§. 12.

Si tubus vitreus AB intrudatur in a Fig. 7. quam coloratam usque in C & digitato ad orificium B applicato extrahatur, ne aqua per A destillet, mox eodem ad A applicato invertatur & aquæ in vase KI contentæ immergatur altero sui extremo B; aqua in AC herebit, si portio immersa DB fuerit ipsi AC æqualis; defluet per B, si OB minor quam AC; cum impetu profiliet per A, si FB major quam AC. Quodsi in AC fuerit Mercurius, pars immersa DB in casu primo esse debet ad AC ut 14 ad 1., in secundo OB in ratione minore, in tertio FB in majore.

§. 13.

Liquidum in AC sustentari vel per A expelli a fluido in vase KI contento manifestum est. Unde liquet 1. fluida eadem vi premere sursum, quo premunt deorsum (§. 7.); 2. aquam vel liquidum quodcunque aliud in vase nisi suum continuare per aerem in parte tubi vacua BC contentum, consequenter quodcunque gravius per quodcunque specificè levius; 3. cum corpus non moveat alterum, nisi ipsummet in motu constituatur, fluidæ partes motu continuo agitari, etsi idem in sensus non incurrat; 4. & cum motui locali vis motrix cohæreat, ex inventis *Leibnitii* quadrato celeritatis proportionalis, corpora fluida præter extensionem vi motrice gaudere;

re; 5. quæ ceteris etiam corporibus gravibus inesse ideo colligitur, quia vis liquidorum in præsentī experimento ab actione gravitatis pendet; 6. quoniam fluidi quædam portio per B in tubum intrat, aëre in CB contento non imminuto, hunc ad minus volumen redigi, consequenter comprimi,

§. 14.

Idem experimentum succedit, si loco tubi Fig. 8. AB sumatur recurvus LMN. Unde conficitur, fluida premere eadem vi ad latus, qua premunt sursum atque deorsum (§. 13.), consequenter æquali vi quaquaversum.

§. 15.

Unde non mirum, si vas ex lamina ferrea stanno obducta confectum aqua repleatur & Fig. 9. orificium AE vesica obducatur, hac cautione adhibita, ne aër intra eam & aquæ superficiem remaneat, ut sola aquæ actio locum habeat, pondus vesicæ impositum ab aqua tubo CD infusa attolli, quod ad pondus aquæ eam habet rationem, quæ inter orificium vasis AE & tubi D intercedit. Pressio nimirum aquæ AB æquivaleret in præsentī casu pressioni in tubo CD (§. 7.).

CAP. III.

DE GRAVITATIONE CORPORUM IN FLUIDO ET MOTU HINC PENDENTE.

§. 16.

Cubus lapideus unius circiter digiti ad bilancem ope crinis equini (eandem cum aqua circiter gravitatem specificam habentis) vel ubi minutias non curamus, filo seri appensus & in aëre cum pondere ad æquilibrium reductus immittatur in aquam, spiritum vini vel aliud quodcunque liquidum: quo facto patescet, eum pro diversa gravitate fluidi partem sui ponderis amittere, majorem e. gr. in aqua tanquam specificè graviori fluido, quam in spiritu vini fluido specificè leviori,

§. 17.

Quodsi ex lamina ferrea stanno obducta paretur vasculum, cujus cavitatem cubus lapideus exacte repleat, atque aqua impleatur, vel alio fluido, in quo ponderatio facta; pondus aquæ vel fluidi ad bilancem tantum deprehendetur, quantum fuit a cubo in eodem amissum, ut adeo grave amittat ponderis sui partem gravitati fluidi sub eodem volumine æqualem, consequenter mirum non sit, quod gravia in aëre vel eodem fluido æquiponderantia non idem æquilibrium servant in diver-

sis fluidis, v. gr. si alterum aquæ, alterum spiritui vini immittitur; sed quod fluido leviori v. gr. spiritui vini committitur, præponderet.

§. 18.

Reducatur vas aqua plenum ad æquilibrium cum pondere ope bilancis & cubus lapideus filo suspensus eidem immittatur; pondus aquæ tantum incrementi capit, quantum est decrementum ponderis cubi, ut adeo pondus non admittatur, sed fluido resistenti accrescat.

§. 19.

Atque hinc porro manifestum est, fluidum resistere solido pro ratione voluminis, ut mirum non sit, cubum plumbeum vel alium quemcunque fluido specificè graviolem in locum lapidei surrogatum idem pondus amittere, si volumen idem seu moles eadem.

§. 20.

Quoniam gravitates fluidorum specificæ sunt inter se ut pondera ab eodem solido in iis amissa (§. 17.); hoc est fundamento construi solent varia *Aræometra* seu instrumenta gravitates specificas fluidorum examinandi. Immo perspicuum est, cubum ipsum cum bilance accurata vicem aræometri subire.

§. 21.

Ope aræometrorum deprehenditur gravitas fluidorum æstate minor, quam hieme: unde colligitur, quod calore expandantur, fri-

frigore condescuntur, etsi discrimen sit exiguum, sensibile tamen est.

§. 22.

Cum præterea pateat, pondus amissum in fluido esse ad pondus integrum cubi, ut gravitatem fluidi ad gravitatem corporis sub eodem volumine (§. 17.); gravitates quoque specificæ solidorum ponderatione in aqua facta inveniri possunt. Sane *Oughtredus* in *Archimede* promoto opusc. Math. p. 61. hac ratione reperit, si gravitas auri fuerit ut 100, gravitatem argenti vivi seu Mercurii fore ut $71\frac{2}{7}$, plumbi ut $60\frac{1}{8}$, argenti ut $54\frac{2}{7}$, cupri $47\frac{1}{9}$, ferri ut $42\frac{2}{9}$, argenti ut $38\frac{1}{8}$, aquæ ut $5\frac{5}{9}$. Unde liquet aurum esse omnium metallorum gravissimum, ad ipsum vero gravitate proxime accedere Mercurium metallis ceteris in universum omnibus specificè graviolem, consequenter ratio in promptu est, cur solum aurum in argento vivo subsidat, cetera metalla supernatent.

§. 23.

Quodsi a massis solidorum abradantur partes, donec in fluido eodem idem pondus amittant, volumina eorum æqualia sunt (§. 19.). Unde hac quoque ratione gravitates solidorum specificæ explorantur (§. 17.), cum gravitates specificæ sint ut pondera corporum sub eodem volumine.

§. 24.

§. 24.

Quoniam corpus grauius minorem ponderis partem amittit, quam specificè levius (§. 19.); illud maiori vi in eodem fluido descendit, quam alterum: unde experientia loquitur, globos ejusdem molis, sed diversæ gravitatis specificæ, veluti lapideum & ex cera rubra confectum, qua ad sigilla publica imprimenda utuntur, diversa celeritate descendere, graviolem scilicet celerius, leviolem tardius: quæ vero ejusdem sunt gravitatis specificæ intra aquam ubivis subsistere, v. gr. globum ex cera confectum & pauculo ferro vel alio graviore corpore addito ad eandem cum aqua gravitatem specificam reductum,

§. 25.

Corpus specificè levius fluido imponatur, v. gr. cubus ligneus, & portionem ejus mergi observabis, & pondus integrum accrescere fluido, etiamsi filo suspensum vel manu teneatur, vel ad bilancem alligetur. Mergitur autem Fig. 10. profundius in fluidis levioribus, quam gravioribus, & pro diversa quoque sui gravitate specificâ. His experimentis commodè adhibetur *Arcometrum* vulgare, quod ex duobus globis vitreis A & B atque tubulo CD absolvitur. Si enim minor argenti vivi portio infunditur, corpus specificè levius; si major, corpus specificè gravius repræsentat.

Si

Si aræometro constanti uti velis, tantundem infunditur Mercurii, donec in fluido inter examinanda gravissimo usque in D mergatur, tubuloque hermetice sigillato ingeruntur ponduscula annularia, annulo vitreo prope globum B tubum CD ambienti incumbentia, ubi in fluido leviori usque ad F mergendum.

§. 26.

Quodsi corpus specificè levius vi externa profundius mergatur, quam proprio pondere mergitur, etiam vis illa fluidi ponderi accidit: unde si frustum ligni intrudas in aquam ad bilancem cum pondere æquilibratam, æquilibrium tollitur, accessione autem ponderis restitutum denuo cessat, ubi lignum juxta aquam in lance deponas vel aquæ liberum permittas. Maxime augetur aquæ pondus, si vesicam sub eadem deprimas, vel pondus eidem alliges, donec tota mergatur. Si enim justo minus fuerit, vesica ex parte submersa pondus libere intra fluidum suspensum tenet.

§. 27.

Hinc ratio redditur, cur corpora specificè graviora propter cavitatem inclusam fluido innatent, v. gr. globus cavus vitreus vel ferreus, si fluidum cavitati replendæ sufficiens superet pondus globi: perinde enim est, sive vesica inflata alligetur, sive cavitas intus effi-

efficiatur. Patet etiam ratio, cur corpora specificè leviora gravioribus sociata in fluido hæc attollant, v. gr. vesicæ inflatæ corpus submersum, si eidem alligentur sub aquis.

§. 28.

Corpora specificè leviora ascendere in gravioribus communi experientia constat. Sane globus ligneus ad fundum vasis detrusus sponte veluti sua in aqua ascendit. Sed experimento discimus, fluida etiam specificè leviora ascendere per specificè graviora. Nimirum si fluido graviori repleatur vasculum vitreum Fig. II. exiguo orificio instructum AD & orificium C immitatur fluido specificè leviori; hoc per gravius ad fundum vasis A ascendet, illud vero per levius descendet. Fluidum ascendens & descendens repræsentat filamenta valde tenuia, qualia in telis araneorum conspiciuntur. Idem accidit, si tubulus vitreus in parte superiori hermetice sigillatus vasis loco adhibeatur.

§. 29.

Hac ratione constitit, spiritium vini per aquam, aquam per Mercurium vivum, aquam dulcem per salsam, tepidam per frigidam, vinum per eandem aquam &c. ascendere.


§. 30.

Etsi aer, utpote per omnia fluida bullurarum sub forma ascendens, sit iisdem levior (§. 28.);
non

non tamen per foramen angustum inverso vitro intrat liquido destellante: id quod indicio est, aerem non tam facile divini, ac fluida reliqua. Et quoniam filamenta ista non sunt, nisi series guttularum continua; his experimentis divisio fluidorum in exiguas particulas vaporibus aut fumi moleculis haud majores evincitur. Subtilitatis diversitas pro fluidorum diversitate sese prodit, si tubuli capillares diversæ capacitatis adhibeantur, alia enim in angustioribus, alia in capacioribus ascendunt. Tubuli capillares utrinque sunt aperti, quoniam in iis suspensa manent, etsi alterum extremum hermetice non sigilletur.

§. 31.

Quoniam aqua tepida specificè levior frigida (§. 29.), aquæ minimas moleculas calore expandi liquet. Eodem argumento constat, salia in minutissimas moleculas resolvi.



SECTIO II.

DE EXPERIMENTIS ÆROMETRICIS.

CAP. I.

DE ANTLIA PNEVMATICA.

§. 32.

Experimentis ærometricis maxime intervit *antlia pneumatica*, cujus beneficio aer

ex vasis evacuatur, vel in iisdem comprimitur.

§. 33.

Inveniteam *Otto de Guericke*, Consul Magdeburgensis, Consiliarius & Legatus Brandenburgicus ad Comitia Imperii. Hic Ratisbonæ An. 1654. Cæsare, Electoribus nonnullis atque Legatis Statuum Imperii præsentibus experimenta dedit prorsus in expectata, descripta primum An. 1657. a *Caspere Schotto*, Jesuita Herbipolensi, in appendice ad artem mechanicam Hydraulicò-pnevmaticam, postmodum An. 1672. ab ipso inventore sub titulo Experimentorum Magdeburgicorum de vacuo spatio. Inventum *Guerickianum* incitavit *Robertum Boyleum* in Anglia (id quod in præfatione ad experimenta de vi aëris elastica proficitur An. 1659. idiomate Anglico primum evulgata), ut opera *Roberti Hooekii*, viri in scientia naturali & arte mechanica versatissimi usus idem imitaretur.

§. 34.

Constat Antlia pnevmatica ex tubo orichalceo AB intus perpolito & embolo DE ex orbibus coriaceis pinguedine suilla oleoque oli-
Fig. 12. varum imbutis vi orbium orichalceorum mediante cochlea compacto, qui axi dentato ferreo DC affixus ope axeos in peritrochio ON educitur & intruditur, prout
usus

usus postulat. Embolus cavitatem tubi exacte adimplet, ne aër inter superficies contiguas irrepere queat. Epistomium IG in medio perforatum, ut aër per ipsum ex tubulo FR in cavitatem tubi AB irruere possit. Sed idem foraminè perforatum ex altera parte, quod oblique in cavitatem juxta longitudinem protensam definit, ut aër ex tubo AB embolo DE intruso per epistomium expelli, vel etiam exterius per tubulum FR in vas evacuatum denuo admitti possit. Ut vasa commodè ad antliam aptari queant, sive campaniformia orbi orichalceo LQ imponantur, alio coriaceo madofacto interposito, sive sphaerica ope cochlearum firmentur. Tubulus FR sustentatur furcinula RS cochleæ fœminæ a maris viribus firmata. Si singulæ partes oculis spectandæ subjiciantur, structura rectius intelligitur.

§. 35.

Si clauso epistomio & ejus opetubulo FR embolus DE extrahatur, & ne regrediatur, vi detineatur, nec aliquo temporis spatio elapso quidpiam aëris intra tubi partem Fig. 12 vacuam deprehendatur, embulo rursus intruso; id quidem indicio, nec inter tubi atque emboli superficies contiguas, nec per epistomium aërem in antliam posse irrepere. Quod si vas orbi LQ impositum evacuetur & tu-

(*Tbūm. Instit. Phil. exper.*) R mo.

bulo FR respectu tubi AB aperto embolus eductus detineatur, nec quicquam in antliæ ac vasis cavitatem aeris irrepit: cetera quoque sese rite habere intelliguntur. Plura examina supeditant experimenta deinceps describenda.



CAP. II.

DE PROPRIETATIBUS AERIS,

§. 36.

Si vesica agnina flaccida, pauculo aere non nisi intra rugas relicto, collo arctissime ob-
Fig. 13. stricto, sub campana vitrea AB ex unco G suspendatur & ope Antliæ pneumaticæ aer ambiens educatur; vesica successive inflatur, ut nihil rugarum tandem remaneat. Prima emboli agitatione facta plurimum aeris educitur, succedentibus agitationibus continuo minus. Cum manifestum sit, vesicam ab aere intus contento expandi; aere nisi gaudeat necesse est, sese per majus spatium dilatandi, qui *vis ejus elastica* dici solet.

§. 37.

Quoniam aer sub campana eadem vi elastica instruitur, inde jam patet modus, quo vasa ope antliæ evacuantur. Nimirum embolo DE extracto & epistomio HI aperto,
aer

aer sub campana vi elastica expanditur, ut capacitatem vasis & antliæ una adimpleat, atque ita massa ejus & densitas sub campana minuitur. Quodsi ergo verso epistomio & embulo intruso aer ex antliæ tubo AB ejicitur; portio ejus ex vasẽ evacuatur. Eodem modo continuatis embeli agitationibus aer sub campana continuo minuitur, donec residuus amplius expandi nescit. Si capacitas vasis & antliæ fuerit æqualis, densitates aeris in vase decrescunt successive ut $\frac{1}{2} \cdot \frac{1}{4} \cdot \frac{1}{8} \cdot \frac{1}{16} \cdot \frac{1}{32} \cdot \frac{1}{64}$ &c

§. 38.

Dilationem aeris clarius percepturus vitro angustioris colli alliget vesicam nihil aeris continentem: quæ etsi bubula fuerit, a pauculo aere sub campana evacuata inflabitur, ut turgere videatur.

§. 39.

Aeri autem debere hunc effectum patet, quia citius inflatur & subinde magis, si plus aeris in eodem contineatur, quam si parum intus fuerit. Immo quod prorsus non inflatur, si collum non satis arcte constringatur.

§. 40.

Si globus cupreus majoris diametri, v. gr. unius pedis, ope cochleæ ad antliam firmetur & ab aere evacuatus deinceps in bilan-

ce cum pondere ad æquilibrium reducatur; Fig. 14. aperto epistomio globi B aër externus irruens pondus ejus auget. Aërem itaque gravem esse nemo negabit.

§. 41.

Ex hoc experimento deduxit Philosophus noster pondus unius pedis cubici aëris fere 585. granorum, seu unciae unius, drachmæ unius & 45. granorum & rationem gravitatis aëris ad gravitatem aquæ fere ut 846. ad 1. *Boyllius* eandem rationem assignat ut 938. ad 1, *de Volder* ut 970. ad 1, *Homburgius* ut 800. ad 1.

§. 42.

Aër ob gravitatem instar ceterorum fluidorum gravium leges æquilibrii fluidorum ruetur (§. 7. 10.). Unde si tubus AB, cujus alterum extremum A hermetice sigillatum, alterum B apertum, longitudinis 3 circiter pe- Fig. 15. dum mercurio repleatur atque orificium B hydrargyro in vasculo CD contento immergatur; mercurius in tubo AB descendet usque in E & ad altitudinem 28. circiter digitorum Parisiensium subsistet. Quodsi cum *Pascalio* atque *Sturmio* tubus prægrandis 33. circiter pedum sumatur & in locum mercurii aqua substituatur; columna aquea 31. pedum Rhenanorum aëris æquilibrari deprehenditur. Atque adeo perspicuum est, aërem vi gra-

gravitatis tantundem premere ac aqua ad altitudinem 31. pedum Rhenanorum consistens. Tubus mercurio repletus vulgo *Tubus Torricellianus* dicitur, quia *Torricellius* experimentum hoc invenit.

§. 43.

Quodsi quis dubitet, num aër vi gravitatis Mercurium in tubo *Toricelliano* sustentet, is eum sub campana ABC collo longiori Fig. 16. CD instructa collocet & ope antliæ pneumaticæ aërem educat: videbit enim Mercurium pro ratione aëris evacuati subsidere & pro ratione denuo admissi rursus ascendere. Unde antliæ examen offert experimentum, si Mercurius postquam tubum prorsus reliquit, non ascendat, aëre per epistomium non admissso.

§. 44.

Quoniam ad singulas emboli agitationes aer sub vase campaniformi continuo rarior redditur (§. 37.), rarior autem minori columnæ Mercurii æquilibratur, quam densior (§. 42.); elaterem aeris cum densitate decrescere liquet.

§. 45.

Et si globus cupreus A aere plenus fuerit, ope tamen antliæ pneumaticæ plus aeris Fig. 14. intrudi potest: quod dum accidit, aer primitivus ad minus spatium reducitur atque den-

sior redditur. Cum densitate crescit resistentia, qua ulteriori compressioni resistitur : id quod, comprimentes satis superque animadvertunt.

§. 46.

Aer compressus globum reddit graviozem. Quodsi enim in balance cum pondere ad æquilibrium reducatur & aperto epistomio aeri exitus permittatur, cum compressus dilatetur & ad eandem cum externo densitatem redeat; globus fit levior & pondus ex parte altera præponderat. Unde denuo gravitas aeris comprobatur.

§. 47.

Si tubo recurvo ABCD, cujus alterum crus CD in D hermetice figillatum, infundatur Mer-
Fig. 17. curius communicationem crurum BC replens, ut aer in minori CD intercipiatur, videbis aerem in crure CD ad minus spatium redigi adeoque comprimi pro quantitate mercurii cruri longiori BA infusi. Hoc experimento docuere in Anglia *Boylius*, in Gallia *Mariottus* & *Amontoni* aerem comprimi in ratione ponderum & vim elasticam esse densitati proportionalem : quæ de aere homogeneo intelligendo esse experimenti circumstantiæ loquuntur & sequentia de aeris alterationibus confirmabunt.

§. 48.


Sive vesica vervecina vel suilla, madida & paululo aere distenta, collo firmiter obstricto, ne aeri incluso exitus pateat, carbonibus candentibus admoveatur & subinde rotetur, ne ab igne damnum sentiat, aer intus contentus successive dilatabitur & vesicam flaccidam distendet. Quamprimum ex vicinia ignis removeatur, flaccida iterum evadit, aere ad pristinum statum redeunte. Quod si diu satis illæsa in calore a carbonibus exhalante detineatur, adeo dura redditur, ut comprimi non possit, immo tandem cum fragore dissilit. Aerem igitur calore rarefieri, frigore condensari quis dubitet? Immo calore vim elasticam intendi patet, ea enim compressioni resistitur, vesica dura redditur, ac tandem disrumpitur.

§. 49.

Quam subitæ sint aeris alterationes, quas a calore & frigore patitur, hoc innotescit experimento. Sumatur globus vitreus AB tubo BC cohærens & orificio tubi C aquæ immer- Fig. 18. so applicetur manus ad globum: hujus contactu statim expanditur aer & bullularum sub forma ex orificio tubi C egreditur. Remota manu aqua in tubum CB ascendit pro quantitate aeris expulsi. Eadem denuo ad globum admota aqua descendens aeris expansionem loquitur.

§. 50.

Quodsi ex globo cupreo super carbonibus candentibus per exiguum foramen expellatur aër atque hoc probe obturetur, ne externo pateat ingressus; ad bilancem examinatus levior deprehenditur, novo argumento aërem esse gravem.



CAP. III.

DE VARIIS AERIS EFFECTIBUS.

§. 51.

Cum perinde sit, siue corpori alicui columna aquæ ad altitudinem 31. pedum protensa, siue columna aeris usque ad extremitatem atmosphæræ excurrens incumbat (§. 42.), a gravitate aeris idem sequi debet effectus, qui ab incumbencia ponderis gravitati columnæ aqueæ 31. pedes altæ æqualis proficiscitur.

§. 52.

Quoniam elater aeris compressionis ulterio-
ris capax (§. 45.), gravitati atmosphæræ incumb-
entis æqualis est, vis autem elastica adversus
corpora resistentia nititur (§. 39.); ab eadem
omnes sequuntur effectus, qui a gravitate at-
mosphæræ proveniunt: immo majores ab ela-
tere pendent, si in compressione & calore suf-
ficienter intendatur (§. 45. 48.).

§. 53.

Ex his principiis ratio redditur effectuum
stu-

stupendorum aëris, quos experimenta produnt, nosque impræsentiarum describemus.

§. 54.

Si globi vitrei A epistomio B instructi & ab aëre per antliam pneumaticam evacuati (§. 3.) orificium C aquæ immittatur, aperto epistomio aqua in cavitatem globi ascendit & spatium ab aëre derelictum replet: quo experimento innotescit, quantum aëris ex vase educi Fig. 19. possit. Si evacuatio cum cura instituitur, in globo diametri semipedalis vix avelanæ spatium aër occupat residuus. Ratio experimenti patet. Cum aër æquilibretur columnæ aquæ 31. pedum (§. 42.), a qua diameter globi quam longissime abest, in fluidum autem æquilibrio tantum altitudinis habeatur ratio (§. 7.); tantundem aquæ in tubum intruditur, quantum spatium vacuum capere potest.

§. 55.

Eadem est ratio sequentis experimenti. Si vasculo vitreo aqua pleno DE immittatur orificium tubi vitrei C, cui globus A cohæret & ope Antliæ subducatur aër externus Fig. 18. aquæ incumbens; aër in globo contentus bulularum sub forma egreditur (§. 37.). Atque adeo experimentum oculari demonstratione confirmat, ad priores emboli agitationes plus aëris educi, quam ad posteriores. Quodsi aër externus rursus admittatur, quam-

primum nihil ejus amplius ex globo egredi cer-
nitur; aqua per tubum BC ascendit & cavi-
tatem globi A replet.

§. 56.

Hoc ab experimento quoad rem non differt
Fig. 15. 16. alterum, quo tubus in A hermetice
figillatus & altero extremo B mercurio in va-
sculo CD contento immissus sub campana
ABCD collocatur & aer ex tubo AB ut ante
(§. 55.) ex globo evacuatur. Nam admissio aere
externo Mercurius in tubum vacuum ascendit.
Unde modus perspicitur fluida per exigua fo-
ramina in vasa immittendi.

§. 57.

Quoniam aer vi caloris etiam expellitur (§.
50.), elucet porro ratio, cur aqua veluti sponte
sua per foramen exiguum in cavitatem glo-
bi irrepit, ex quo vi caloris carbonum canden-
tium aer expulsus. Immo si ex globo vitreo
Fig. 18. AB ad flammam candelæ admoto expel-
latur aer, aqua vel liquor alius per tubum CB
in ejus cavitatem ascendit, sed cum periculo,
ne diffiliat, quoniam liquor frigidus vitro ca-
lido aspersus ipsum diffringit.

§. 58.

Si vitrum cylindricum CD aqua repleatur,
non nisi pauculo aere in CE relicto & tubus
utrin-

utrinque apertus AB ita firmetur intra ipsum, ut aeri per orificium exitus pateat nullus, ex quo aer ambiens ope antliæ remotus campana ACBD superimposita; aer in CE sese expandens aquam per tubum AB ejiciet. Quodsi autem aquæ Mercurius substituatur & plus aeris in spatio CE relinquatur, ille ob gravita- Fig. 20.
tem suam (§. 22.) ad aliquam tantum altitudinem elevatus ab aere rarefacto suspendetur, cujus inde elasticitas æstimari potest (§. 47.), etiam eo in casu, ubi aqua ex vase ejicitur. Idem effectus contingit, si vitrum aquæ calidæ immitratur, ut (§. 48.) aeris elater in CE calore intensior evadat.

§. 59.

Si quis quantitatem vis elasticæ aeris & ejus dilationem oculis quasi spectandam & manibus palpandam objicere velit, is repleat vas cylindricum ABDC aqua & ope cochleæ in H firmet vasculum I, cujus cavitas ad cavitatem cylindri est ut 28 ad 1. vel in ratione Fig. 21.
majore. Ad latus vero infixus sit tubulus vitreus GE in E cum vase majori communicans. Quodsi sub campana collocetur instrumentum & ope antliæ illa evacuetur, pauculum aeris in vasculo I contentum aquam per tubulum vitreum EG ejiciet, tandemque integrum vasis cylindrici AD cavitatem replebit. Vis aeris adeo expansi æstimabitur ex lege pressionis fluidorum (§. 15.).

§. 60.

Quodsi vasculum cum Tubo *Torricelliano* sub aqua mergatur, Mercurius pro quantitate aquæ in vasculo stagnandis incumbens in illo elevatur: unde colligitur, aerem cum aqua vires suas ad eundem effectum conjungere.

§. 61.

Potest vero etiam aër atque Mercurius conjunctis viribus cum atmosphæra æquilibrium tueri. Etenim si portio aëris in tubum immititur, portio Mercurii defluet, donec aëris super eo expansi & gravitas Mercurii simul æquiponderent atmosphærae prementi. Eodem modo se res habet, si Mercurio substituaturs aqua. Quoniam vero aër primitivus eundem cum externo elaterem habet; super Mercurio atque aqua constitutus minorem habeat necesse est (§. 13.).

§. 62.

Ex vitro inverso, si exigui orificii est, vel si alteri cuicunque orbis chartaceus applicetur, quantacunque ejus diameter existat, aqua non effluit, quia aëris gravitas eandem ad 31. pedum altitudinem sustentat (§. 42.). Quodsi aliqua aëris portio super aqua constituatur, portiuncula quædam aquæ effluit (§. 30.).

§. 63.

§. 63.

Qui quantitatem pressionis aëris sive gravitate (§. 42.), sive vi elastica eidem proportionali factam (§. 43.) cogitat, huic mirum non erit, campanam vitream orbi orichalceo ad antliam aptato, aëre evacuato ita apprimi, ut non nisi magno pondere separari possit; latera vesicæ, educto aëre ita cohærere ut divelli nequeant, orbis vitreos cylindro cavo ex lamina ferrea stanno obducta confecto affixos sebi vel ceræ beneficio aëre evacuato diffringi; hæmisphæria cuprea vel orichalcea in eodem statu adeo firmiter cohærere, ut non nisi vi maxima separentur, si majoris præsertim fuerint diametri, qualis etiam cohæsiō in cylindris marmoreis locum habet, si bases sebo illitæ sibi mutuo adfricentur, donec omnis aër intermedius excludatur; vesicam super cylindro cavo expansam & exsiccata cum fragore disrumpi, orbem vitreum vitro agglutinatum ab aëre interno diffringi, si aër externus ope antliæ removeatur; vasa vitrea ab aëre compresso dissilire non sine adstantium damno, nisi caveatur, ne frustra huc illucque disjiciantur.

§. 64.

Quoniam perinde est, sive aër ope antliæ pneumaticæ evacuetur, sive vi caloris expella-

latur; ratio ex hæcenus dictis apparet, cur accenso spiritu vini sub campana vitrea, eadem corio orichalceo orbi imposito adpressa firmiter cohæreat; cur vitrum simili in casu mortario adeo firmiter connectatur, in ipsum una cum eodem attollere liceat, interposito interfundum mortarii & vitrum annulo ex pulve farinacea vel corio madido, a quo tamen metuendum est vitro damnum, si nimis caleat; cur vi caloris orbis vitreus super carbonibus candentibus immo etiam cupreus diffringatur, infusa spiritus vini vel aceti aliqua portione in casu priore, ne vitrum ante liquefiat, quam disjiciatur &c.

§. 65.

Si ex lagena vitrea prismatica educatur aer, in mille frustra disjicitur ab aere extus premente (§. 51.). Vasa vero sphaerica & campaniformia, itemque cylindrica vim aeris eludunt, quia virtute figuræ fortius resistunt.

§. 66.

Mariottus æquilibrium aeris cum fluidis specificè gravioribus singulari illustrat experimento. ABCD a lagena vitrea foramine exitu in I instructa. Tubulus FG utrinque apertus ita firmatur, ut aeri aditum præcludat, libere tamen extrahi ac deprimi possit, prout usus postulaverit. Quod si lagena aqua vel alio fluido adimpleatur orificio tubi G infra

fra foramen I depresso, per hoc nihil aquæ effluit, aqua intra tubum ad libellam foraminis HI ascendente. Ast si tubi orificium G ultra foramen I evehatur, aqua ex lagena effluit, quæ foramine superior. Nimirum priori in casu aqua circa tubum in lagena infra foramen I constituta cum ea, quæ ingreditur tubi portionem GH, æquilibratur (§. 7.), utraque a pondere atmosphærico æquali pressa, illa nempe per foramen I, hæc per tubi aperti orificium F: aqua vero reliqua in IB a pondere atmosphærico sursum perinde, ac deorsum premente (§. 13.), sustentatur (§. 42.). Posteriori autem in casu pondus atmosphæricæ per tubum FG conjunctis viribus cum aqua supra foramen I constituta intus, solum autem pondus atmosphæricum adversus idem foramen extus agit: vis igitur major prævalet atque aqua, quasi nulla esset resistentia ab aere in I, vi gravitatis propriæ effluit. Hinc & in priori casu remota per antliam pneumaticam resistentia aeris ad foramen I, aqua perinde effluit, ac si tubi orificium G ultra libellam foraminis HI elevaretur.

§. 67.

Non injucundo spectaculo aeris compressi effectus exhibent virunculi vitrei cavi exiguo foraminulo vel in *a* vel in pede *b* instructi, quos *Diaboli Cartesianos* nonnulli vo-

vocant, ejusdem fere cum aqua gravitatis specificæ, ita ut tantum non toti mergantur. Aquæ igitur in vitro cylindrico longiori *AB DC*, cujus orificium *E* vesica munitum, nullo prorsus aëre inter ipsam ac aquam in vase stagnantem intercepto, commissi descendunt, Fig. 23. vesica in *A* digito pressa, ascendunt digito remoto, ubi vis subsistunt immoti vesica parumper pressa. Dum enim vesica deprimitur, pressio per aquam usque ad aërem in virunculo continuatur (§. 13.): quo compresso aqua per foraminulum *a* vel *b* ingressa reddit eum specificè graviolem, vel si minor compressio, gravitatem ejus ad eandem cum aqua reducit. Hinc in casu priori mergitur, in posteriori intra aquam subsistit (§. 24.). Remoto digito cessat causa compressionis, adeoque aër intra virunculum ad pristinum volumen restitutus aquam expellit: quo factò aqua specificè levior ascendit (§. 28.). Si quis rationes, quas adduximus oculis spectandas subjicere velit, is utatur virunculo *LM* Fig. 24. cavitatis loco globulo vitreo *LN* osculum tubuli apertum habenti instructo.

SECTIO III.

DE EXPERIMENTIS ET OBSERVATIONIBUS METEOROLOGICIS.

CAP. I.

DE BAROMETRO.

§. 68.

Otto de Guericke antliæ pneumaticæ inventor (§. 33.), primus observavit, altitudinem in tubo *Torricelliano*, consequenter gravitatem aeris (§. 42.) continuo variari, atque hanc variationem cum mutatione tempestatum connecti reperiit, teste epistola, quam An. 1661. ad *Casparum Schottum* e Societate Jesu datam legimus in *Technica Schotti* curiosa Lib. 1. cap. 22. pag. 52. Confer Inventoris Experimenta nova de spatio vacuo Lib III. cap. 20. f. 100.

§. 69.

Atque hæc est ratio, cur *tubus Torricellianus* ad æstimandam aeris gravitatem adhibitus *Barometri* atque *Baroscopii* nomen sortitus fuerit, instrumentum hodie notissimum.

§. 70.

In Gallia variatio altitudinis Mercurii non excedere observata fuit 24. lineas juxta mensuram regionem Parisinam. Derhamus in Anglia scalam totius variationis observavit 2 $\frac{12}{100}$. digiti (*Thüm. Instit. Phil. exper.*) S gi-

gitorum pedis Londinensis. Scilicet in Gallia maximam altitudinem reperit *Amontonius* 28. digit. 4. lin. minimam 26. digit. 4. lin.

§. 71.

Hinc scala, quæ Tubo Torricelliano in Barometrum abeunti jungitur DE duos digitos Fig. 25. pedis Parisini haud multum excedit, computatione facta a Mercurio stagnante in vasculo B ejus capacitatis, ut ex tubo per integram scalam DE delapsus ipsius in vasculo altitudinem notabiliter non augeat, ne mutatio ob gravitatem aeris facta justa minor videatur (§. 70.).

§. 72.

Scala ampliatur, si tubi pars superior BC reclinetur, ut per declive ascendat & descendat Mercurius: quoniam scala declivis BC & erecta BD, portiones item BF & BE æquipollent. Celeberrimus *Joannes Bernoulli* scalam ordinariam constituit in vasculo AB, Fig. 27. quæ in cruere horizontali CD in quo Mercurius ad æquilibrium cum aere & stagnante in vasculo AB atque tubo BC Mercurio nil confert, reddit aliam quantumlibet amplam.

§. 73.


Christianus Hugenius scalam variationis amplifiaturus in Barometrum compositum ABCE Fig. 28. FG incidit, in A hermetice sigillatum,

tum, in G apertum. Distantia vasorum BC & FE tanta est, quanta longitudo barometri simplicis. Vascula dimidia & tubus CDE replentur Mercurio, reliquum vasculi FE & portio FP tubi FG aqua sextæ parti aquæ regię permixta ad impediendam hieme congelationem, additur pauculum olei amygdalarum aquæ supernatans, ut evaporatio impediatur. Mercurius enim ex N in I delapsus in vasculo ex H in K affürgit & aquam ex P in O adscensum urget. Hinc in barometro composito ex ascensu aquæ in tubo FG levitas, ex ejus autem descensu gravitas æstimatur.

§. 74.

Variationes gravitatis aëris per ascensum & descensum mercurii in berometro indicatæ (§. 68.) cum tempestatis mutationibus ita connectuntur. Si Mercurius ultra scalæ dimidium ascendit, aër redditur serenus: si infra hunc descendit terminum, nubilus ac pluvius evadit. Quodsi subito per notabili decidat intervallum, ventus exoritur impetuosior, quo major mercurii lapsus. Augetur procella, Mercurio ipsa furente descensum continuante: successive minuitur, eodem denuo ascendente. Quomodo hæc cum Meteorologia consentiant, quod aer pluvius sit levis, serenus gravis, subitum gravitatis decremen-

tum ventum excitet; in Physica explicatum dabimus. Dissimulandum vero non est, connectionem mutationum tempestatis cum variatione Mercurii in Barometro nondum omnes naturam esse determinaciones, observationum accuratiorum beneficio a Meteorologiæ gnaris impofterum detegendas.



CAP. II.

DE THERMOMETRO.

§. 75.

Cum aer globo vitreo contentus calore subito rarefiat, frigore autem condensetur, atque rarefactionis & condensationis actum & quantitatem descensus fluidi & ascensus in tubo, cui cohæret, prodat (§. 49.); *Cornelius Drebbelius* Batavus, inventionibus opticis & mechanicis clarus, hoc instrumento usus est ad variationes caloris & frigoris in aere indicandas & æstimandas, tubi orificio liquori in vasculo stagnanti immerso ac scala ad latus ejusdem tubi adnexa, ut inde quantitas ascensus & descensus æstimari possit. Vasculum Fig. 9. BE in E apertum etiam tubo CD connectitur, in quo liquor stagnat.

§. 76.

Equidem diffiteri nequit, mutationes caloris & frigoris exiguas subito & sensibili modo hoc ab instrumento indicarit: sed dolendum,

dum, quod non satis fideliter indicet. Etenim si aer gravior redditur, liquor perinde ascendit, ac si refrigeratur, descendit contra, si levior evadit, perinde ac si calidior fit (§. 61. 62.).

§. 77.

Atque hæc est ratio, cur de alio Thermometro construendo cogitarunt *Florentini* academici, quod inde *Thermometrum Florentinum* appellari suevit, constans ex globo vitreo A Fig. 30. spiritu vini colorato pleno & tubo BDC hermetice in C sigillato. Spiritus enim vini calore expansus ascendens caloris, frigore condensatus descendens frigoris quantitatem eloquitur.

§. 78.

Spiritus vini colore tingitur rubro, si frustulis radicis anchusæ, flavo, si frustilis radicis curcumæ, cæruleo, si floribus veneris affundatur & in casu posteriori spiritu salis *Ammoniaci* flores præcipitentur.

§. 79.

Cum spiritus salis *Ammoniaci* vim expansivam Spiritus vini imminuat, celeb. *Wolfius* ejus admixtione ad consensum reducere tentavit Thermometra, ut in eodem aere æqualiter ascenderet & descenderet spiritus vini: id quod vulgo fieri non solet. Quoniam vero

difficilis hac ratione obtinebatur consensus, ad artificium mechanicum confugit, vasis capacitatem imminuendo in thermometro celeriori, donec ad concordiam rediret cum tardiori. Atque ideo his thermometris assignat vascula cylindrica vel figuræ alterius facile mutabilis ab artifice, qui vitrum tractare noverit. Duo istiusmodi thermometra An. 1714. a *Daniele Gabriele Farenheitio* obtinuit, quorum fidem per integrum decennium expertus. Quoniam eadem liquore cæruleo repleta vascula cylindrica habent; ideo non dubitat *Farenheitium* iisdem artificiis ad scopum tendere. Sunt autem tubili & vascula cylindrica admodum gracilia. Vid. Act. Erud. An. 1714. p. 380.


§. 80.

Thermometra Florentina hieme non semper fideliter referunt quantitatem frigoris. Quod si enim frigore invalescente spiritus vini ad viciniam globi descendit; eodem descescente segnius ascendit, ita ut ad minorem altitudinem subsistat nivibus & glacie in aquam solutis, quam consisteret, ubi frigus sæviebat. Rationem hanc reddit Philosophus in dissertatione de hieme An. 1709. quam vide in *Meletematis nostris* p. 266. & seqq. §. 3, quod ex spiritu vini condensato aër egrediaturs ascensuro resistens, donec iterum cum eodem uniatur: id quod singulari experimento & obser-

servatione simili postea confirmavit. Nimirum cum globum Thermometri nivi sale conspersæ immisisset, ut spiritus condensatus ne integram quidem globi cavitatem adimpleret, restituto instrumento aeri calido, spiritus ascendens portionem aeris interciperet, quæ una cum eo per aliquot dies ascende-
bat ac descendebat, donec tandem liquor coiret aere evanescente. Idem deinceps sponte sua accidit, cum spiritus vini ob vehementiam frigoris in globi cavitatem contraheretur.

§. 81.

Plerumque liquor in Thermometro decedit cum sole oriente: quia scilicet in aere rarefacto (§. 49.) vapores frigidi delapsi aerem inferiorem frigidum reddunt.



CAP. III.

DE MANOMETRO.

§. 82.

Si aer redditur levior (§. 68.), inferior a superiori minus comprimitur, consequenter rarior evadit (§. 47.): Si contra tota atmosphæra fit gravior (§. 68.), inferior a superiori magis compressus in densiorem abit (§. 47.). Enimvero aer pondere quoque incumbentis invariato vi caloris rarior, vi fri-

goris densior efficitur (§. 49.). Densitatem igitur & raritatem barometrum, quod gravitatis tantum variationes eloquitur (§. 69.), indicare nescit. Quamobrem instrumentum aliud eum in finem excogitatum est, quod *Manometri* titulo exornatur.

§. 83.

Primus *Manometri* inventor est laudatus jam nobis (§. 33. 68.) *Otto de Guericke*, etsi non attendens ad actionem caloris & frigoris in densitate aeris varianda idem instrumentum una pro barometro habuerit, *Manometri* appellatione non usus. Globum scilicet majoris diametri ope *Antliæ pneumaticæ* evacuatum & contra aeris externi accessum probe munitum ad bilancem exactissimam appendit, qui in aere rariore, tanquam specificè leviori, gravior factus; in densiori contra, tanquam specificè graviori, levior evasit (§. 16.). *Manometrum Guericckianum*, non correcto inventoris errore sub *Baroscopii statici* titulo postea in Anglia proposuit *Robertus Boyle*.


§. 84.

Philosophus noster *Manometrum* construxit ex tubo ampliori AB in A hermetice sigillato & tubo gracili DBE, horizontaliter extenso & ejusdem ubique diametri, cujus ad vas proportio liquido infuso, v. gr. Mercurio innotescit. Pauculo aeris expulso per rare fa-

tionem (§. 55.), portiuncula Mercurii F per osculum E immittitur. Quodsi enim aer quacun- que de causa densior redditur, portiuncula Mercurii versus vas AB movetur; si rarior evadit, ab eodem versus osculum E recedit. Cum in tubo horizontali non gravitet, ad æquilibrium aeris inclusi in vase AB cum externo per osculum E communicante nil confert.

§. 85.

Manometra hætenus in observationibus meteorologicis neglecta fuere, etsi maximæ forent utilitatis ejuscemodi observationes, quemadmodum inferius ex physicis patebit.



CAP. IV.

DE ÆOLIPILA.

§. 86.

Æolipila est globus cupreus AB, intus cavus, cui tubulus AE exiguo orificio E instructus afferruminatur. Diameter orificii vix acus diametrum adæquat. Fig. 32.

§. 87.

Quodsi globus carbonibus candentibus imponatur & aere vi caloris expulso (§. 50.) orificium E aquæ immergatur; aqua in cavitatem globi ascendit (§. 57.). Hoc facto, si iterum carbonibus candentibus restituitur; vapores

impetuose per orificium erumpentes instar venti agitant objecta levi haud procul ab orificio posita. In vicinia orificii servant; in aliqua ab eodem distantia dilati frigent. Carbonem candentem admodum instar follis inflant; sed in vitri orificium exiguum ingressi in guttas confluunt. Quodsi loco aquæ spiritus vini camphoratus adhibeatur, vapores admota candela accenduntur & in flammam impetuosam abeunt; collecti autem in vitro itidem in guttas confluunt, saporem ac odorem spiritus vini camphorati retinentes.

§. 88.

Nimirum aqua & spiritus vini calore ignis resolvuntur in vapores atque aëris una in cavitate globi contenti elasticitas intenditur, ut per majus spatium se se dilatare nitatur (§. 48.). Quoniam vero per exiguum orificium E non statim expelli potest; tanto majore celeritate erumpit, quo minus orificium. Unde videre licet, cur tantæ exiguitatis orificium fiat.


§. 89.

Cum vapores aquei & spiritus vini camphorati in aquam & spiritum vini denuo confluant, & posterioris inflammabilitatem retineant, qua spiritus vini & camphora gaudet; hoc experimento perperam ab Aristotelicis elementorum transelementatio, hoc est, aquæ
in

in aërem & aëris in aquam mutatio probatur.

§. 90.

Qui ad rationem attendit, cur vapores cum aëre rarefacto tanto impetu prorumpant (§. 88.); haud difficulter percipiet, perperam cum a veteribus, tum a recentioribus ventorum genesis experimento Æolipilæ illustrari, quasi ventus non gignatur, nisi aëre vaporibus imprægnato.



CAP. V.

DE VENTO.

§. 91.

Qua vero de causa ventus oriatur, antliæ pneumaticæ experimentis optime docetur. Si enim aër vel intra cylindrum antliæ pneumaticæ, vel intra globum cupreum (§. 45.) comprimatur; aperto utrobique epistomio aër inclusus cum impetu prorumpit & plumulam vel aliam rem leviculam ex filo suspensam instar venti agitat: quod idem contingit, si sub campana vitrea AB ex unco G plu- Fig. 13. mula suspendatur, & aëre ope antliæ sub eadem rarefacto per epistomium magis minusve apertum aëri externo accessus denuo concedatur.

§. 92.

§. 92.

Quoniam imminuta aeris raritate elater decrescit (§. 44.); illa aucta idem crescit (§. 47.); ob sublatum æquilibrium in voluminibus aeris elasticis oriri ventum perspicuum est (§. 91.). Num vero causa venti in eo posita sit, quod apud nos aer levior reddatur, an in eo, quod alibi terrarum evadat gravior; barometrum dignoscit. Etenim si ventus irruit, Mercurio subito delapso, priori; sin sub initium nullam adhuc mutationem passus, posteriori causæ locus est (§. 74.).

§. 93.

Sæviente autem jam jam procella cum incumbentia aeris imminuatur, omni in casu delabitur Mercurius: quod experientiæ consentaneum singulari confirmavit experimento Fig 33. *Hauksbejus* in *Experim. Physico Mechan.* p. 115. & seq. Vasculum nempe barometri immittitur capsulæ quadratæ FG tubis DE & HI utrinque instructæ, per quorum alterum DE aer compressus ex globo AB irruens cum impetu fertur super Mercurium in vasculo stagnantem, per alterum HI vero egreditur.

§. 94.

Eadem de causa ventus ope folliis excitatur. Dum enim folliis latera didicuntur, valvula F Fig 34. adaperata aer externus irruit: dum vero eadem comprimuntur, hic quoque compressus per tubum AB cum impetu proruit (§. 92.).

§. 95.

§. 95.

Ventus superior ex motu nubium, inferior ex situ flabellorum in tectorum turriumque fastigiis constitutorum innotescit. Observare autem licet ex diverso nubium motu, quod ventus superior sæpissime ex diversis spiret plagis & ab inferiori differat. Ventus inferior ab objecto duro reflexus mutat directionem in plagam contrariam: cujus rei ratio habenda est in dignoscendis plagis, unde ventus spirat.



CAP. VI.

DE VAPORIBUS ET PLUVIA.

§. 96.

Si spiritus vini in vasculo ex lamina ferrea stanno obducta parato incendatur & campanæ vitreæ annulo orichalceo instructæ atque super orbe Antliæ (§. 34.) elevatæ supponatur, ut flamma in ipsius cavitatem ascendat; mox vero campana ad orbem antliæ deprimitur, ut eidem adhæreat (§. 64.); aere ope antliæ pneumaticæ rarefacto (§. 37.), omnem campanæ cavitatem subito nebula replet, quæ in gyros acta descendit & aerem in parte superiori seremat. Enimvero quamprimum aer externus immittitur, ut sub campana inclusus ad pristinam redeat densitatem, nebula prorsus disparet. Quodsi aer sub campana denuo rarior

rior redditur, nebula ut ante redit, iterumque disparet, externo rursus admissio. Experimentum enim iterare licet, quoties libet.

§. 97.

Dum aer redditur rarior, specificè levior evadit; dum densior, specificè gravior existit (§. 46.): Unde colligitur, vapores spiritus vini ab aere sustineri, si fuerit densior; in nebulas abire & delabi, si rarior evadat. Habent adeo vapores cum aere densiore eandem gravitatem specificam; sed majorem rariori (§. 24.).

§. 98.

Patet vero alterius (§. 96.), materias, quæ comburuntur vel alio modo absumi videntur, non in nihilum converti, sed per aerem dispergi. Nec aerem serenum a vaporibus & exhalationibus esse purum, eosque ut in aere rariori conspicuo a reddi, sic in densiori in conspicuos fieri.

§. 99.

Esse autem vapores vesiculas atque adeo ob cavitatem inclusam aeri innatare (§. 27.), in camera obscura observare licet, si vapores ex aqua tepida per radium Solis immissum ascendentem microscopio contempleris.

§. 100.

Aquam ob frigus quoque invalescens evaporari experientia docet. *Boylus* in Notis de atmosphæris corporum constituentium p. m. 4. ob-

observavit, ova ipsamque glaciem sapiente frigore brumali in aere fieri leviora. Calor nimirum ob frigus aeris invalescens in auram abiens aquæ moleculas in vesiculas expensas secum abripit.

§. 101.

Quantitas aquæ pluvialis ab An. 1677. per quindecim annos observata est *Townlejo* recensente *Lowthorpio* in Epitome Transactionum Anglicanarum vol. 2. p. 43. & seqq. in Galia ab An. 1699. usque ad præsentem a *Philippo de la Hire* & post ejus mortem a filio atque *Maraldo*. In Germania ab An. 1715. usque ad An. 1720. ab *Algæwero*, cujus extat specimen *Hytometriæ curiosæ*. Scilicet vase amplo excipitur pluvia sub dio & nix, sed ita ut per fundi declivis foramen in angustius defluat, ne aliqua ejus portio in vapores abeat. Elapso mense determinatur calculo altitudo aquæ in vase majori, cum vasa similis figuræ habeant altitudines cæcis reciprocè proportionales. Immo ipsam aquam in vase minori collectam majori infundere licet, ut altitudo ad oculum pateat; sed eam calculi beneficio determinare præstat.

§. 102.

Haud abs re fore judicamus, observationes Parisinas sequente tabula comprehensas exhibere, in quibus numerus prior digitos Parisini pedis, posterior vero lineas denotat.

Anni.

<i>Anni. Digit. Lin.</i>		
1699	18.	$8\frac{1}{4}$
1700	20.	0
1701	21.	$4\frac{1}{4}$
1702	16.	$\frac{2}{3}$
1703	17.	$4\frac{1}{4}$
1704	19.	$10\frac{1}{2}$
1705	13.	$10\frac{3}{4}$
1706	15.	$3\frac{5}{8}$
1707	17.	$11\frac{1}{2}$
1708	18.	0
1709	18.	9
1710	15.	$8\frac{3}{4}$
1711	25.	2
1712	21.	$2\frac{1}{4}$
1713	20.	$7\frac{1}{2}$
1714	14.	$9\frac{1}{8}$
1715	17.	$6\frac{1}{2}$
1716	14.	$4\frac{1}{4}$
1717	17.	$8\frac{1}{2}$
1718	13.	$1\frac{3}{4}$
1719	9.	$4\frac{1}{3}$
1720	17.	2
1721	12.	$7\frac{1}{3}$

CAP. VII.

DE HYGROMETRIS.

§. 103.

Per *Hygrometrum* seu *Hygroskopium* intelligimus instrumentum, quod humiditatem & siccitatem aeris indicat.

§. 104.

Construuntur adeo ex istiusmodi materiis, quæ attracta humiditate aeris sensibilem subeunt mutationem.

§. 105.

Quamobrem cum funis cannabinus atque chorda ex intestinis ovium confecta humiditate aeris abbrevietur, in aere autem sicco iterum elongetur, *hygrometrum* simplicissimum construitur ex fune cannabino vel chorda AB, altero sui extremo unco A alligatis & super cochleam B euntibus, appenso pondere CG, quod indice L vel O suo descensu siccitatem, Fig 36. ascensu vero humiditatem in scala recti- n. 1. linea HI vel circulari MN eloquitur. n. 2.

§. 106.

Quodsi mutationes sensibiliores evadere debent, funis vel chorda circa plures cochleas circumvolvitur, ut longior exiguum intra spatium coarctetur.

§. 107.

Ornatus gratia structura horum hygromet-
(*Thüm. Instit. Phil. exper.*)

T 110


-trorum variis modis variatur: quod hic fusius exponere superfluum foret.

§. 108.

Constituuntur hygrometra, spongia in solutione salis ammoniaci vel salis Tartari macerata & ex libræ altero brachio suspensa, pondere æquilibrium ex opposito tuente. Quodsi enim spongia humorem ex aëre imbibit, gravi-
Fig. 36. or redditur & lingula D versus M inclinatur: si vero in sicco humorum exspirat, redit ad æquilibrium, vel ultra idem versus N reclinatur.

§. 109.

Quoniam successu temporis vis attractiva humoris in omnibus materiis imminuitur; hygrometra successiva evadunt deteriora, donec profus inutilia reddantur.



SECTIO IV. DE EXPERIMENTIS CIRCA QUALITATES SENSILES.

CAP. I.

DE CALORE.

§. 110.

Si Thermometrum aliquod Florentinum (§. 77.) sub campana vitrea suspendatur & aëre ope antliæ pneumaticæ summa accuratione exhausto carbones candentes vitro
ad.

admoveantur; liquorem mox ascendere, carbonibus autem remotis rursus descendere videbis. Immo si Thermometrum in vacuo relinquatur, spiritus vini perinde ascendet atque descendet ac in alio extra vacuum collocato, calore diurno variato.

§. III.

Calorem adeo per vacuum moveri apparet, consequenter dari materiam fluidam aëre subtiliorem, cujus motu calor constat: quam *calorificam* appellabimus. Posset stylo scholasticorum *ignis elementaris* vocari.

§. III 2.

Ad calefacienda objecta in vacuo utimur commode vitro cylindrico AB margine altiori orichalceo DEFB instructo, quod munitur operculo IH mediantibus cochleis per foramina 1. 2. 3. 4. ponticuli orichalcei BCS Fig. 37. ope cochlearum in T & S ad marginem vitri firmati trajectis, interposito annulo coriaceo madido firmiter appresso. Alterum extremum N tubi OP infigitur operculo in M; alterum vero Q campanæ vitreæ, ut vitrum ABD ope antiæ evacuari possit. Ita nimirum vitro cylindrico ABD carbones candentes supponere licet. Ponticulus in L excissus, ut tubum OP admittat.

§. III 3.

Cum adeo calor sit materia quædam subti-

lis, motu celeri agitata, mirum videri nequit, quod in poros corporum penetrans non modo fluida, v. gr. aerem (§. 75.), spiritum vini (§. 77.), immo aquam ipsumque Mercurium; verum etiam solida, v. gr. metalla rarefaciat. Observavit nimirum *Picardus*, filum ferreum crassius, cujus longitudo hieme erat pedis minus, ad calorem ignis duodecima digiti parte auctum fuisse. Et *Philippus de la Hire* autor est, simile filum longitudinis sex pedum in frigore hiemali duabus tertiis unius lineæ (quæ est digiti pars duodecima) fuisse auctum, cum calori solis æstivo exponeretur, referente *Newtono* in Princ. Phil. Nat. Math. Lib. 3. prop. 20. p. 386. edit. sec.

§. 114.

Experimentis de calore commode adhibetur Thermometrum Mercuriale, aereum AB CDE, cujus globus AB aere, globi ejusdem aliqua pars & tubi portio BCDE Mercurio Fig. 38. repletur. Quod si globum AB sub aqua demersum detineas, donec ebulliverit; calorem aquæ ebullientis determinatum habere gradum, ultra quem intendi nequit, manifestum est: cum Mercurius omni ebullitionis tempore in G immotus hæreat, ad quem sub initium ejusdem conspicitur. Possunt aquæ fluida alia substitui: ubi patebit, summum caloris gradum non esse in omnibus fluidis u-

num

num eundemque, e. gr. spiritus vini citius ebullit, quam aqua.

§. 115.

Quoniam experientia constat, eidem calori solari exposita corpora non eundem caloris gradum acquirere; dubium non est, quin etiam unumquodque corpus solidum determinatum caloris gradum acquirat: id quod vel eodem modo in materiis contritis v. gr. terris diversæ speciei, arena, &c. vel liquefactis v. gr. plumbo, cera &c. ut ante experiri licet (§. 114), vel aliis adhuc modis determinari potest.

§. 116.

Materiis frigidis inter se commixtis calorem, immo subinde flammam excitari, chymicis experimentis docetur, v. gr. oleum vitrioli admixta aqua vel spiritu vini incalescit: immo ipsa glacies oleo vitrioli affuso calorem gignit. Intensissimus oritur calor, si oleo terebinthinæ affundatur, præsertim veteri, quod quodammodo inspissatum. In casu enim posteriori accidit aliquando, ut vitro dissiliente tanto impetu impingerent frusta in lagenas vitreas, ut hæ ipsæ diffringerentur, fumo ascendente ex vitro adhuc integro & guttulis olei ad insignem distantiam latissime sparsis. Si oleum vitrioli aquæ commisceatur & frustula chalybis vel ferri, quæ *Martis*

limatura nomine veniunt, injiciantur, vitro subinde agitato; solutio Martis cum caloris generatione contingit. Metalla dum in aqua forti solvuntur, tantus gignitur calor, ut solutio fumis copiosissimis ascendentibus ebulliat. Imprimis quoque notandum est, panem & carnem oleo vitrioli affuso insigniter incalescere.

§. 117.

Corpora solida affricu incalescere notissimum est: sed inter rariora experimenta referatur, quod, si ferrum singulari quodam artificio cudatur, mallei ictibus ad angulum acutum factis, quemadmodum fieri solet, ubi chalybis atque filicis quoque collisione ignem excitamus, ipsum tandem prorsus excandescat.

§. 118.

In his casibus omnibus non alia ratione produci posse calorem, quam quod materia calorigica seu ignis elementaris in corporibus latens (§. 110.) ad motum concitetur, attentibus haud obscurum esse arbitramur. Unde his experimentis perspicuum evadit, in unoquoque corpore dari quandam ignis elementaris quantitatem per massam ejus diffusam.

§. 119.

Quodsi materiae chymicae ad manus non sint, calx viva adhibeatur, qua in architectura
uti-

utimur. Etenim si eidem affundatur sufficiens aquæ quantitas, vitrum adeo incalescit, ut manibus idem apprehendere non possis. Si calcem aquæ frigida tantum modo intingas & aëri madefactam exponas; incalescit atque rimas agit, donec tandem in pulverem inutilem collabascit.



CAP. II.

DE FRIGORE.

§. 120.

Si Thermometrum in frigidam immittatur aquam & calida affundatur, liquor ascendit, calorem cum frigida extemplo communicari indicans. Si vice versa thermometrum in aquam calidam immittatur & frigida affundatur; liquor descendens loquitur calorem ut ante eum frigida communicari sicque calidam fieri frigidiorum. Idem in utroque casu contingit, si aquæ frigida lapis calidus, vel calida lapis frigidus injiciatur. Unde perspicitur, defectum caloris constituere frigus: id quod & communes loquuntur experientia.

§. 121.

Salibus in aqua solutis, eam frigidiorum fieri thermometri fide denuo constat. Et sal quidam Ammoniacum atque nitrum fortius frigefaciunt sale culinari. Cum enim salia

sint aqua frigidiora, calor per aquam solam dispersus cum salibus solutis communicatur : unde eadem est frigoris ratio ; quæ in commixtione aquæ frigidaë & calide aut lapide in aquam immisso locum habet (§. 120.).

§. 122.

Ex glacie vel nive & salibus paratur *materia frigorifica* in vulgus nota. Nimirum si nivi aut glaciei abrafæ sal sive commune, sive ammoniacum sive nitrum admisceatur, mixtura phialæ aquæ plenæ circumposita, aqua in phiala contenta in glaciem coagulabitur & glacies in mixtura liquefit. Calor nimirum ex aqua in glaciem penetrat : unde illa resolvitur, hæc in glaciem abit. Apparet una fluiditatem aquæ calori intersperso deberi, glaciem ob defectum caloris generari. Sublata fluiditatis causa, tollitur fluiditas ipsa.

§. 123.

Quodsi vasculum cylindricum aqua plenum in materia frigorifica colloques; aqua prope fundum in glaciem abit, superiori fluida, donec successive tota in eandem convertatur. Dum aqua congelat multæ bullulæ continuo ascendunt & ejus volumen augetur. Etsi autem vitrum diffringatur, si more communi congelatio in suprema incipit superficie, nullum tamen fractionis pe-
ri-

riculum adest, si ab imo incipit. Patet itaque glaciem minus expandi, si aeri pateat exitus, consequenter vim aquæ in glaciem abeuntis esse ab aere se se intra poros ejus dilatante.

§. 124.


Quanta sit efficacia aquæ in glaciem abeuntis non modo communes experientiæ loquuntur, quæ vasa vel cuprea atque tubos metallicos eadem diffringi testantur, verum etiam *Hugenius* An. 1667. & post eum *Buotus* Parisiis An. 1670. tandemque *Israel Conradi*, Medicus Dantiscanus An. 1677. repetito experimento docuerunt, sclopetum aqua repletum & probe obturatum intenso frigore hyemali magno cum fragore diffringi.

§. 125.

Corpora congelata veluti poma, caro, ova, si aquæ committantur frigida crusta glaciali obducuntur, & regelatione minime corrumpuntur, quemadmodum fieri solet, si ad calorem fornacis regelantur. Nimirum ex aqua corpore congelato calidiori calor successive in ipsum penetrat, unde humor congelatus resolvitur & aquae contrario corpus ambiens in glaciem convertitur (§. 122.). Illa resolutio cum fiat successive & calore blando, corpus pristino statui restituitur: violentum naturæ inimicum.

§. 126.

Aquam ob aëris contigui frigus in vapores resolvi, communi constat experientia, quæ flumina & rivos quasi fumantes sistit. Sed *Peraltius* jam An. 1670. factò accurate experimento docuit, massam octo librarum quarta fere sui parte octodecim dierum spatio in vaporem abiisse: quæ evaporatio vix inferior æstiva. Nimirum aëri frigido communicatur calor aquæ, qui egressurus cum se se vinctis aqueis prorsus liberare nequeat, guttulas quasdam expansas in vaporem convertit.



CAP. III.

DE IGNE.

§. 127.

Radios solares calefacere, communis loquitur experientia. Per specula caustica vel lentes causticas collecti, ut per integrum speculum vel lentem dispersi in spatium minus redigantur, calefaciunt magis; immo tandem instar ignis in flammam conjiciunt combustibilia, liquabilia liquefaciunt, fluida in vapores convertunt facta ebullitione, aliosque ignis edunt effectus. Cum igitur materia calorifica per corpora dispersa ad motum concitetur vel ad motum concitata in eorum

rum poros se se insinuet, ut corpus calefiat (§. 110.); primo liquet, radiis solaribus illam ad motum concitari. Quoniam vero corpora inflammantur, radiis solaribus ope speculorum causticorum & lentium causticarum condensatis; ignem oriri porro patet, quando major materiæ calorificæ quantitas in motum concitatur, ut adeo ignis sit calor concentratus.

§. 128.

Hæc ulterius confirmantur sequenti experimento. In foco speculi concavi, cujus concavittis Diameter est 6. circiter pedum, collocentur carbones candentes, ut per principia catoptrica calor reflectatur secundum lineas parallelas. Calor ita reflexus ad distantiam 20. vel 24. pedum excipiat speculo minori concavo, cujus concavittis diameter est circiter 3. pedum: quo factò experieris, eundem altera vice reflexum in foco suo accendere fomittem vel filum sulphure obductum. Concentratione igitur calor in ignem degenerat & eodem cum ipso effectus præstat.

§. 129.

Quoniam specula & lentes causticæ, quemadmodum in Catoptricis & Dioptricis demonstratur, & ipsa experimenta attente considerata suggerunt, radios per reflexionem & re-
fra-

fractionem ob figuram concavam & convexam uniunt, mirum non est, radios solares per vitrum aqua plenum figuraque rotunda præditum transmissos eundem exhibere effectum, quem post refractionem in lente sphaerica vitrea edunt.

§. 130.

Vitrorum causticorum vires intenduntur, si radii solis lente majori AB excepti ad aliquam ab eadem distantia minori DC excipiuntur, ubi nempe ejus superficies omnes capit. Cum enim hac ratione *vitrum collectivum* accipiat lumen per refractionem in lente majori AB factam jam condensatum; illud in foco suo multo confertius colligit, quam si lumen solis ordinarium fuit exceptum. Quoniam vero perinde est, siue lumen ordinarium condensetur per refractionem, siue reflexionem, loco lentis objectivæ siue majoris novo quodam artificio possumus etiam uti speculo majore caustico. Similiter cum perinde sit siue lumen condensatum reddatur confertius per refractionem siue per reflexionem, lente objectiva servata in locum collectivæ substitui potest speculum causticum.

§. 131.

Generosus Dn. de Tschirnhausen speculis & lentibus causticis majoribus experimenta instituit.

stituit. Illa descripsit in Actis Eruditorum An. 1687. p. 52. 53. hæc in Actis Erudit. An. 1697. p. 414. & seq. Nimirum eorum virtute lignum durum, immo aqua humectatum, momento flammam concepit; aqua in vase parvo effervuit, metalla liquefacta sunt, lateres, pumex, porcellana Hollandica, asbestus in vitrum conuersi; sulphur, colophonis, pix & id genus alia sub aqua colliquata, lignum rarius sub eadem in carbonem conuersum, cineres vegetabilium, lignorum aliarumque materialium in vitrum transmutati, gemmæ suis privatæ coloribus &c. &c.

§. 132.

Quemadmodum vero vulgariter constat, ignis conservationem inniti libero aeris affluxu; ita idem experimenta antliæ pneumaticæ ope instituta confirmant. Etenim sub campana vitrea carbones candentes extinguuntur citius, si aer ope antliæ subducatur, quam si idem in ejus cavitare relinquitur. Quod si candela accensa sub campana majore collocetur, subducto aere, flamma a sebo versus apicem serpit & apice contracto pyramidalem figuram in sphaericam mutat, certo indicio, quod acri debeatur, ne justo citius sebum relinquat, & cur pyramidalem figuram flamma inducat. Cum flores

res sulphuris accensi sub vitro diutius conservent flammam, quam candela, ut eandem cum densitate aëris minui constet, iis in experimento commode utimur præsentî.

§. 133.

Hinc vero capimus rationem, cur in vacuo collisione filicis & chalybis nullæ eliciantur scintillulæ, quemadmodum in aëre. Constat enim microscopium fide, scintillulas istas esse vel particulas ferri candentis, vel particulas filicis liquatione vitrificatas: vitrum enim liquefactum candet. In vacuo autem corpora candere nequeunt (§. 132.). Experimento inservit idem artificium, quo ignis excitatur in explodendis sclopetis: quod probat, pulverem pyrium in vacuo non perinde ac in aëre accendi scintillis excussis. Ut idem succedat, nec cum periculo adstantium per damnum pulvis pyrius accensus, aër quantalibet diligentia evacuandus. Motus autem in vacuo pro-
Fig. 40. ducitur ope stili mobilis CG manubrio DE instructi.

§. 134.

Similiter patet, pulverem pyrium in vacuo collocatum eadem cautione, quam modo memoravimus, ope speculorum vel lentium causticarum non posse accendi, sed tantum liquari. Atque ad imitationem huius experimenti possunt institui alia ad di-

versitatem effectuum ignis in vacuo & in aëre determinandam. Locus hic est instrumento, quod superius ad instituenda experimenta circa corpora calefacta in vacuo commendavimus (§. 112.). Aut fiat ex vitro crassiori peculiaris campana ACB annulo orichalceo EF instructa, quo commode ad orbem orichalceum HI aptari possit, orificio K epistomio obsignato, postquam ope antliæ campana sufficienter evacuata, ne antlia opus sit eo in loco, ubi experimentum capimus. Fig. 41.

§. 135.

Quoniam commixtione duorum corporum actu frigidorum calor excitari potest (§. 116.), ignis autem non est nisi calor concentratus (§. 127.), mirum haud est, ex commixtione spiritus nitri fumantis & olei caryophyllorum oriri flammam.

§. 136.

Similiter cum corpora per affricum incalescant (§. 117.), ligna per affricum flammam concipere, quis mirabitur? id quod in tornando experiri possumus.

§. 137.

Quodsi in colli angusti vitro 12. unicæ aquæ misceantur cum 3. uncis spiritus vel olei vitrioli & limatura Martis frustulatim injecta solvatur; vapor ascendens admota can-

eandelæ cereæ flamma accenditur & deorsum per aquam cum aliquo fragore fertur. Si orificium vitri digito obturetur, vapores interea collecti denuo accenduntur. Contigit aliquando, ut vapor accensus vitrum ingenti cum fragore disjiceret. Unde consultius est, orificium vitri aliquantisper apertum candelæ accensæ obvertere, ut vapor celeriter egressus in libero aere accendatur, nec flamma in vitrum irrepit. Cum vapor iste sit elasticus, intra vitrum collectus digitum premit, quo orificium obturatur ac subinde vitri ventrem perforat. Hac ratione experimentum sæpius iterare licet.

§. 138.

Si pondere æquales massæ limaturæ Martis & florum sulphuris vel sulphuris contriti commisceantur & aqua subigantur; massa soli vel calori leni exposita trium circiter horarum intervallo elapso vaporem emittit calidum, immo si major fuerit quantitas v. gr. 30. vel 40. librarum, vapor ille sponte accenditur. Hæc massa si ollæ immittatur & tempore æstivo ad profunditatem unius pedis in terram defodiatur; post 8. & 9. horas terra intumescit & per rimas, quas egit, vapor erumpit tandemque flammam concipit.

§. 139.

Phosphori phænomena in Actis Eruditor. An. 1682. & 1684. pag. 282. & 457. prolixè recensentur.

cescentur. Phosphorus in solida nimirum forma facile urit; at cum liquore permisto manus & faciem lavare possumus iisque coruscantem splendorem conciliare sine ullo ustionis periculo. Frigidus perquam tenax est & instar Lunæ corneæ scissilis. In amplo vitro asservatus sine aqua, continuo ad aliquot dies lucem spargit, cum parva aut nulla vel lucis vel ponderis diminutione. Quædam ejus portiones adeo inflammabiles sunt, ut igne sponte concepto adurant mensam mappamque, cui impositæ sunt. Phosphorus vitro cylindrico profundiori & tertia parte aqua repleto commissus calida solum tempestate radios luminis emittit, qui vero nec accendunt vel maxime combustibilia corpora, adeoque ignem innoxium mentiuntur. Notatu autem dignum est experimentum *Slavianum*: Accepit grana 10. aut 20. phosphori solidi, ac drachmam aquæ affudit, ut liquefierent. Hanc miscuit duabus unciiis olei vitrioli, factaque agitatione primum productus est calor, deinde ignei quidam globuli emissi ascenderunt, qui stellarum instar ad latera vitri adhærentes flagnarunt &c. Paratur communiter ex urina: Sed *Homborgius* ex fæcibus alvi & alumine; *Lemery junior* ex farina, seminibus variis, melle, saccharo, foliis, ligno, & radicibus diversarum plantarum, variis animalium (*Thüm. Instit. Phil. exper.*) U par-

partibus phosphori quandam speciem componere docuit. Videantur Commentarii Acad. Regiæ Scient. An. 1711. p. 307. & An. 1715. p. 30. edit. Batav. Hoc ex fonte promanavit quædam pulveris pyrii species, quæ in libero aëre sponte accenditur, cujusque adeo granulum unum pulveri pyrio communi commissum eundem accendit. Vocatur in nonnullis *Phosphorus*.



SECTIO IV. DE EXPERIMENTIS OPTICIS.

CAP. I.

DE LUMINE.

§. 140.

Experimentis de lumine optime instituentis egregie inservit *Camera obscura*, hoc est, conclave undiquaque accessui luminis impervium & non nisi exiguo foraminulo pisi magnitudinem vix adæquante instructum, per quod unice lumini solari pateat transitus. Equidem foramen potest fieri amplius ad diversos usus: sed aptantur orbes ex charta compaginata confecti foraminulis diversæ magnitudinis distincti, prout usus tulerit.

§. 141.

Quodsi radio solis per foraminulum in
Ca

Cameram obscuram immisso attendas; videbis eum juxta lineam rectam protendi, quæ ex centro Solis per foraminis centrum ducitur: ut adeo appareat, lumen per idem medium veluti hic per aërem, in linea recta propagari. Constat itaque lumen in medio ejusdem densitatis nec resistente secundum lineam rectam progredi. Lumen a latere stantibus videtur, quatenus cum pulvisculi in aëre volitantes, tum ipse aëris molecule idem reflectunt: etenim pulvisculi oculo in tenebris collocato optime distinguuntur & tramiti illustri continuo innatare videntur.

§. 142.

Non nisi lumen solare huic experimento sufficit, cum lunare & quod a candelis accensis emanat non sufficienter pulvisculos & moleculas aëris illuminare possit: unde intelligitur, ob intensitatem luminis videri, quæ ob magnitudinem visum effugiunt.

§. 143.

Animadvertes præterea, foraminulo, per quod immittitur lumen Solis, successive imminuto, radium continuo graciliorem evadere, donec tandem filum tenuissimum adæquans lineam rectam elegantissime repræsentet. Unde colligitur, radium luminis crassorem posse dividi in plures graciliores, nec

inepte in demonstrationibus optidorum per lineas rectas exhiberi.

§. 144.

Si ratio Solis AB opponantur Speculum HI oblique, in alteram partem is reflectitur ea quidem lege, ut angulus reflectionis CBI sit angulo incidentiæ ABH æqualis. Motu Speculo, radii incidens atque reflexus nunc a se invicem Fig. 42. discedunt in B (a) & B (c), nunc ad se invicem accedant in Ba & Bc. Radius reflexus BC tramite illustri progreditur, donec in aliud corpus opacum LM indicat. Quod si hoc fuerit speculari, ab eodem denuo reflectitur in D, ita ut angulus reflexionis DCM sit angulo incidentiæ BCL æqualis. Si Speculo plano convexum vel concavum Sphæricum substituas; reflexio eodem modo fiet: sed a cylindrico arcus luminosus reflectitur, ob imminutam tamen intensitatem non conspicuum erit lumen, nisi corpore opaco terminatum. Unde confirmatur, pulvisculos in aere videri, ob luminis, quod reflectunt intensitatem, etsi alias eorum magnitudo oculorum aciem eludat. Si radius incidat perpendicularis, in se ipsum reflexus illustris tramitis claritatem auget.

§. 145.

Si vitro conico AIB aqua pleno radius Solis EF excipiat, in F frangitur pergens
ex

ex F in L & ingressus ex L in N refrangitur nempe in egressu frangitur ad perpendicularum HI, in egressu a perpendicularo OL. Moto vitro, radius refractus LN jucundo spe- Fig. 43. ctaculo itidem movetur, prout vitri elevatio vel depressio postulat. Nec minus jucundum est spectaculum, contueri ipsam radii incidentis fractionem, dum vitrum ALB primum ad-movetur. Eandem refractionem monstrare licet ope prismatis vitrei trigoni, ubi optime distinguitur via luminis in ipso vitro, & ubi radius egressus usque ad laquear conclavis perinde ac in reflexione tramite illustri extenditur. Si radius perpendicularis incidat in medium densius irrefractus transit.

§. 146.

Quemadmodum igitur hinc constat, lumen per idem medium progredi directe, ex medio autem rariori in densius ad perpendicularum, ex densiori in rarius a perpendicularo refringi (§. 145.), aeris autem densitas teste manometro continuo per diem variatur (§. 82.); ita *Hugenius* in Tractatu de Lumine c. 4. pag. 42. 43. non ineleganti experimento comprobavit, densitatis variationem tantam esse, quæ refractioni luminis per aerem propagati sensibiles mutationes inducat. Telescopium scilicet, cujus axem repræsentet recta AB, mane in turrim dimidio circiter

milliari distantem direxit, ut in D prospectus concederetur. Tubo immoto circa meridiem Fig 44. vidit partem altiore E, in ipsa meridie partem C, post meridiem denuo partem E & circa vesperam rursus D, manifesto indicio, lumen matudino & vespertino tempore magis refringi, ita ut usque ad meridiem decrescat, a meridie vero usque ad vesperam denuo crescat.

§. 147.

Cum adeo quantitas refractionis pendeat a densitate medii refringentis; mirum videri non debet, quod in diversis mediis diversa sit refractionis quantitas: quam accuratius examinare nostri instituti non est, etsi Philosophus huic instituto necessario suggerat.

§. 148.

Si radio luminis tenui in Cameram obscuram immisso filum metallicum gracile illuminetur, vel crinis, atque notabili intervallo excipiatum umbra, ea quidem multo latior deprehenditur, quam fert diameter fili vel crinis: unde apparet, lumen in contactu corporis e via sua aliquantisper dimoveri: quæ mutatio a *Grimaldo* primum observata a *Newtono*, vero Optic. Lib. 3. Part. I. p. m. 317. & seqq. uberius confirmata *Luminis inflexio* salutatur. Accuratissimus experimentator *Newtonus* lamellam plumbeam acu tenui per-

tudit, ut foraminulum vix $\frac{1}{4}$ unius digiti existeret.

§. 149.

Non deberi hoc phænomenon luminis in ære refractioni, quemadmodum quidam sunt suspicati; inde demonstravit *Newtonus*, quod experimentum eodem modo succedat, si crinis in aqua inter duas lamellas vitreas contenta detineatur, ubi ob majorem densitatem major esse debebat refraction (§. 147.): id quod tamen observationi non respondet.

§. 150.

Elegans vero est experimentum, quo vir acutissimus luminis inflexionem confirmat. Per foramen, cujus diameter est quartæ circiter unius digiti partis, immittatur in cameram obscuram, & ad distantiam duorum vel trium pedum constituatur tabula nigro colore illita & foramine quadrato instructa, ut lumini pateat transitus. A tergo aptetur cultri acies, ut partem luminis intercipiat, residuum vero, quod transit, aciem stringat. Quodsi jam lumen transmissum ad duorum vel trium pedum intervallum excipiat, ad utrumque latus, ubi nihil luminis directi pertingit, videbis lumen quoddam debile instar caudarum cometicarum alteri directo associari. Si chartam, qua lumen excipitur, excindas, ut directum transeat & debile so-

lum conspectui obvium relinquatur, multo clarius & distinctius idem contueri datur.

§. 151.

Corporum affrictu in tenebris lumen excitari notissimum est: Sed cum *Johannes Bernoulli* atque *Cassinus* junior in Hist. Acad. Reg. Scient. An. 1707. p. m. 2. & 3. eam in rem penitus inquirerent, didicerunt, alteram materialium, quarum affrictu producitur lumen, debere esse pellucidam, ut in ipso affrictu exortum lumen facilius observetur; earundem superficiem debere esse politam, ut se se arctius contingant; utramque denique debere esse puram, alteramque tenuem, ut hæc citius incalcescat. Quoniam per affrictum excitatur calor, materia autem calorifica ad motum concitata luminis causa existit; lumen affrictu generari intelligitur, quatenus ignis elementaris seu materia calorifica ad motum concitata ex corpore incalcescente excutitur. Ceterum huic instituto ob duritiem convenire omnium optime adamantem planis superficieculis instructam (*Tafelsteine* Nostrates appellant), *Bernoullius* reperit atque hoc ipso docuit, perperam pro phænomeno singulari lumen adamantis affrictu genitum venditari a *Roberto Boyle* in Tractatu de adamante in tenebris lucente.

§. 152.


Affrictu etiam Mercurii & tubi barometrici lumen intra tubum oriri, jam An. 1675. observavit *Picardus*: sed recentius *Johannes Bernoulli* commonstravit, quomodo, quod antea casu habebatur arte haud fallaci obtineri queat. Phosphorus hic mercurialis ansam dedit *Hauksbejo* artificii Anglo, ut variis modis spectacula jucunda ope hujus phosphori exhiberet: inter quæ eminet pluvia ignea, quam sistere hoc commodiori artificio docuit *Leupoldus* Mechanicus Lipsiensis excellentissimus. Vitro cylindrio FBCD fundo conoidi- Fig. 45. co EGF instructo agglutinatur vasculum orichalceum AFDE cujus basis LEM conica, exiguo foraminulo in vertice E pertusa. Per orificium G infunditur Mercurius rorans per orificium E in subjectam basin conoidicam G. Aere ope antliæ pneumaticæ evacuato sub campana vitrea artificio supra insinuato (§. 133.) deprimatur obturaculum chalybeum H, ne aëri in G pateat aditus. In M est foramen majus, per quod Mercurius ex vase vitreo inverso in vasculum defluit. Quodsi enim in tenebris per osculum E roret Mercurius, in basin G impingens in globulus dissilit guttulas veluti lucentes referentes. Mercurius arrodit metallum, hinc glutine quodam vasculi superficies obducitur.

§. 153.

Docuit quoque *Hauksbejus*, affrictu externo vitri evacuati lumen excitare per vacuum vitri cavitatem fulgurans. Quemadmodum vero omnium horum phaenomenorum eadem est causa quam modo (§. 151.) commemoravimus nixi veritate axiomatis, posita causa ponitur effectus & vicissim; ita sine omni instrumentorum apparatu facillime instituimus hoc experimentum, si tubulo vitreo AB (quæ est quædam portio tubi barometrici) in B hermetice sigillato & in C utrinque compresso, Fig. 46. ut in portiunculam AC veluti vasculum per exiguum foramen pateat aditus, infundatur Mercurius cavitatem vasculi AC replens; expulso vero ex cavitate tubi aëre idem quoque in B hermetice sigilletur. Quod si enim in tenebris tubulum inclinatum agites, ut Mercurius celeriter descendat; lumen ejus superficiei superiori adhærere ipsamque sequi conspicias. Sed idem eveniet, ubi digitis secundum longitudinem tubi promotis eundem frices. Digits celeriter ab immo in altum promotis, flamma quasi iisdem apprehensa in longum extendi & instar corporis elastici extensi subito recurrere videtur. Ceterum cum affrictu vitri non excitetur lumen nisi in vacuo, claret inde aërem excitationi luminis resistere.

§. 154.

Rationem si quæſiveris, cur resistat; nobis quidem hæc esse videtur, quod aër materiæ calorificæ resistat, eam intra poros molecularum suarum recipiens. Docuit enim dudum *Welfius*, si vitrum in experimento *Hauksbejana* (§. 153.) celeri rotatione incalescat, ex affrictu manus aliarumque materiarum lumen quoque per cavitatem illius diffundi, etsi aër non fuerit exhaustus, quemadmodum vehementi affrictu, quo calor intensior excitatur, in ipso etiam aëre lumen gignitur.



CAP. II.

DE COLORIBUS.

§. 155.

Si vitrum coni truncati figuram referens & aqua plenum ad fenestram collocetur, caſa sæpius accidit, ut lumen Solis transmissum per refractionem in colores abeat, quales in iride observantur. Quodſi vitrum nunc attolatur, nunc deprimatur, donec convenientem obtineat ſitum, in quacunque Solis altitudine refractione colores largitur. Multo illuſtiores autem evadunt colores, lumine per priſma vitreum trigonum trajecto, præſertim ſi perſpicuitate ſe ſe commendet vitrum & experimentum in

camera obscura capiatur. Situm prismatis tentando definire licet.

§. 156.

In quacunque autem distantia a prisma lumine transmissum excipias, eisdem constanter colores illud exprimere deprehendes. Et in camera obscura pulvisculi in aere volitantes eo colore conspicui sunt, quo præditum est lumen ipsos illuminans : apparent nempe in lumine rubro rubri, in cæruleo cærulei, &c. Lumine unius coloris per crenam transmissio, objecta rubra in rubro, cærulea in cæruleo &c. colorem intendunt.

§. 157.

Lumen hoc coloratum a speculis reflectitur a lentibus refringitur, ut adeo evidens sit, etsi in colores abierit, ipsum tamen adhuc luminis proprietatibus gaudere. A vertice speculi conici in iridem reflectuntur & per lentem causticam refracti in foco in lumen candidum redeunt, post focum rursus in colores mutantur ordine inverso conspicuos. Constat adeo, coloratam lumen a natura luminis non descivisse & lumina colorata commixta in candidum, candidum vero facta separatione in colores abire.

§. 158.

Neque enim ad luminis in calores transmutationem sufficere, ut idem per amplum spatium

tinum diffundatur, refraëtio in lente concava facta eloquitur, vi cujus lumen debilitatur tantum, haud quaquam vero in colores convertitur, certo argumento, ex luminis cum umbra commixtione non prodire colores.

§. 159.

Cæterum colores prismaticos esse immutabiles primus docuit *Newtonus*. Etsi enim *Mariottus* in Tentamine de Natura Colorum pag. 128. Edit. Paris. contrarium expertus fuerit; illud tamen ideo factum esse regres-
sit *Newtonus* cum *Desaguliers* An. 1716. coram societate Regia Londinensi præsentibus Academicis quibusdam Parisinis experimenta iteraret, quod *Mariottus* radios heterogeneos non satis a se invicem separasset. Ut itaque succedat experimentum, methodo *Newtoniana* capiendum quæ *Optic. Prop. 4. Lib. 1. Part. I.* describitur. Lumen scilicet Solis per foramen exiguum F in Fig. 47. cameram obscuram intromissum ad distantiam 10. vel 12. pedum a foramine lente utrinque convexa MN excipitur, ut facta refractione Solis imaginem in I exhibeat quam nitidissime, charta alba exceptum. Quamprimum imago Solis in I accurata circuli peripheria terminatur, prisma vitreum trigonum ABC pone lentem constituitur, donec colores iridis in t p appareant. Charta candida
spe-

spec̃trum solare excipiat̃ur, illa quidem huc illucque mota, donec singuli colores singulos circellos *ag, bh, ci, dk, el* accuratissime referant, ejusdem cum foramine *F* diametri. Foramine coarctato, circelli quoque coarctantur & colorata lumina magis a se invicem discedunt. Figura vitri sit perfecte sphaerica & angulus prismatis *C* 70. circiter graduum, ut major sit refractione. Vitrum prismatis spiris atque arenulis careat: alias utendum est prismate cavo ex planis specularibus confecto, quod aqua pluviali limpida & saccharo Saturni impraegnata repleatur. Quodsi lumen hac ratione separaretur, fieri haudquaquam potest, ut nova refractione alio in prismate facta in alium colorem mutetur.

§. 160.

Cum circellus ruber *ag* constanter supremum teneat locum, ceteri *bh, ci, dk, el* eodem ordine sequantur; radios rubificos ceteris minus refringi apparet, ut adeo constet, lumen solare ex radiis heterogeniis componi, gradu refrangibilitatis a se invicem differentibus: id quod experimentis aliis insuper confirmavit *Newtonus*.

§. 161.

Quodsi prisma vitreum trigonum *EDF*, cujus angulis *F* est rectus, ceteri *D & E* semi-

re-

recti sunt, ita lumini objiciatur, ut a basi G reflectatur; tum quidem experieris, colorem cæruleum omnem in H reflecti, dum ceteri adhuc refracti in KI comparent: verso autem Fig. 48. prisma, ceteros quoque colores successive reflecti, donec tandem ruber GK ultimo loco reflectatur. Unde intelligitur, radios quoque reflexibilitatis gradu differre.

§. 162.

Colores non inesse subjecto, tinctura ligni nephritici manifesto ostendit, quæ oculo inter ipsam & fenestram seu lumen, quo illuminatur collocato cærulea apparet, constitua vero inter oculum & lumen robrum exhibet colorem, si intensa fuerit; ad flavum accedentem, si minus intensa; in situ priori opaca; in posteriori pellucida existit. Quodsi ad fenestram collocetur apertam, ut lumen Solis affundatur, color ruber extemplo in cæruleum abit & pelluciditas evanescit, si lumen solis medianre speculo in partem a Sole averfam reflectatur, manifesto indicio, quod aliud lumen reflectat aliud refringat.

§. 163.

Oleo vel spiritu vitrioli aut aquaforti guttatim instillatis, color cæruleus evanescit, totaque tinctura redditur pellucida. Quoniam
vero

vero non alia accidit mutatio, quam quod particulæ ex frustulis ligni nephritici aqua effusa extractæ ulterius dividantur ob liquorum instillatorum corrosivitatē, ut aliam molem, aliam figuram, aliam intra poros aquæ situm nanciscantur; dispositionem ad lumen refringendum & reflectendum a mole, figure & situ particularum seu textura liquidi pendere palam est. Quodsi oleum Tartari per deliquium affundatur, ut soluta per-coagulationem iterum coeant, cœruleus redit color, qui ut priorem claritate si non superet, minimum adæquet, peculiari artificio opus est, quod in Actis Eruditor. An. 1709. p. 321. docuit Philosophus.

§. 164.

Plura prostant experimenta, quibus idem comprobatur. E. gr. Mercurius sublimatus in aqua limpida solutus nec colorem, nec perspicuitatem ejus quicquam mutat. Si oleum Tartari per deliquium instilletur, solutio redditur opaca & colorem aurantium adispiscitur. Affuso acido, spiritu nempe vel oleo vitrioli, aut aqua forti, color evanescit, limpiditas aquæ redit, nullo sedimento relicto. Eodem experimentum modo succedit, si salia quæcunque in aqua solvantur, nisi quod solutio colorem lacteum ab oleo Tartari per deliquium instillato nanciscatur. Unde manifestum est, pelluciditatem fluidi non tolli ob quantitatem

tatem materiæ peregrinæ intra poros contentæ, sed ob ejus crassitudinem. Similiter tinctura ligni Brasiliensis rubra in flavam degenerat, instillato acido; sed rubra ab oleo Tartari per deliquium restituitur. Si ex foliis aridis rosarum extrahatur tinctura, ab affuso acido rubra evadit, ab oleo Tartari per deliquium viridis. Et in genere constat, colores, qui ortum suum acido debent, ab acido non immutari; qui vero eundem ad alcali quoddam referunt, ab acido immutari & contra. Quodsi ex arte tinctoria pateat, quomodo coloribus imbuantur panni & lintheamina; a quibus materiis maculas contrahant & quomodo maculæ tollantur, judicare datur.

§. 165.

Solutio gallarum solutioni vitrioli mixta exemplo in atramentum convertitur, etsi solutio utraque sit perspicua & nigredine destituta. Enimvero oleo vitrioli affuso aut alio acido, mixtura in aquam limpidam abit, nullo sedimento relicto: redit autem opacitas cum nigredine, instillato oleo Tartari per deliquium. Gallis substitui possunt folia rosarum, Theæ &c. pari successu. Ceterum hoc experimentum naturales dedit atramento sympathetico, ad quod conficiendum his solutionibus utimur. Litteræ enim solutione gallarum exaratae non videntur; sed solutione vitrioli conspicuæ redduntur.

(Thüm. Inst. Psychol.)

X

§. 166.

§. 166.

Attramentum sympatheticum aliud paratur, si in aceto vini destillato argirites solvatur. Litteræ enim hac solutione in charta exarata minime conspicuæ sunt. Quodsi jam frustula calcis vivæ & auripigmenti aquæ limpidae injiciantur, ut 24. circiter horarum intervallo solvantur: solo hujus solutionis fectore per multa chartæ folia, immo subinde per asseris poros penetrante litteræ invisibiles nigrae redduntur & in conspectum prodeunt.

§. 167.

Mutato lumine mutari colorem optime docetur, si stupæ multo sale conspersæ affundatur spiritus vini cum paucula aqua, isque accendatur. Ipsa facies humana horrenda specie imperitis in hoc lumine illudit.

§. 168.

Quomodo ex commixtione radiorum diversicolorum prodeat color compositus a simplicibus, qui miscentur, prorsus diversus, vitris coloratis planis & politis ostenditur, quæ sibi mutuo superimposita objecta diversis coloribus tincta sistunt.

CAP. III.

DE VITRIS OPTICIS.

§. 169.

Si lens utrinque convexa, vel plano convexa vel sphaera vitrea integra prope candelam accensam constituitur, aliquo post ipsum intervallo in charta objecta imago flammæ situ inverso nitidissime delineatur, omnium ipsius agitationum una particeps. Eodem modo orbis vitrei fenestrarum post lentes convexas in charta alba nitidissime delineantur. Quodsi lentem istiusmodi in foramine cameræ obscuræ constituas, objectorum quorumvis extra eam collocatorum imagines, sed situ inverso, quam accuratissime delineantur in linteo albo expanso, ita ut non modo figuras, verum etiam colores atque motus omnes quam accuratissime discernere liceat.

§. 170.

Ut effectus hujus stupendi ratio intelligatur, duorum experimentorum injicienda est mentio, quorum alterum probat, radios lucis a puncto quocunque reflexos ejus speciem deferre ad oculos; alterum vero docet radios ab eodem puncto in lentem incidentes post ipsam denuo in eodem uniri.

§. 171.

Nimirum si luci non nisi per exiguum foramen, quod pisi magnitudinem haud quaquam excedit, in cameram obscuram pateat accessus,

imagines objectorum situ inverso in aliqua ab eo distantia fiunt: ampliato foramine, imagines confunduntur, donec tandem nimia apertura prorsus evanescant. Quamdiu foramen *F* exiguum existit, radii a puncto *B* illapsi non nisi ad punctum *b*, a puncto *A* illapsi ad punctum *a* & a puncto *C* illapsi ad punctum *c* deferuntur: ampliato autem foramine radii ab aliis punctis illapsi ad idem punctum *b* vel *a*, vel *c* pertingunt, sicque confusi a pariete reflectuntur. Patet adeo imaginem *acb* objecti *ACB* extra cameram obscuram *HG* constituti tamdiu apparere; quamdiu radii a diversis objecti punctis radiantes in pariete non confunduntur. Unde porro liquet, singulos deferre speciem puncti radiantis, quamdiu non confunduntur, ex eorum autem confusione oriri lumen, quod a novo objecto reflexum ejusdem speciem assumit: id quod per heterogeneitatem radiorum *Newtonianam* optime concipitur (§. 157. 160.). Dicitur autem radius deferre ad oculum speciem puncti radiantis, quatenus efficit, ut idem videamus.

§. 172.

Si jam porro lentem convexam charta obducas, foraminibus hinc inde excisis, eamque candelæ accensæ objicias, imago flammæ post eandem perinde delineabitur, ac si tecta non fuisset, nisi quod minore gaudeat cla-

claritate. Apparet adeo, lentes lumen per ejus superficiem dispersum in loco imaginis unire.

§. 173.

Quoniam itaque quodlibet objecti punctum per integram superficiem lentis radiat, hæc vero radios ab eodem puncto egressos vi refractionis in idem cogit (§. 172.), radii uniti speciem objecti deferunt (§. 71.).

§. 174.

Cum imagines in camera obscura simplici, quæ nudo foramine gaudet, in majori distantia minus distincta evadant, immo tandem evanescant; illud non radiorum confusione, sed luminis debilitationi tribuendum, ut adeo hinc constet, ad distinctam visionem non modo requiri, ut radii a punctis radiantibus circa confusionem ad oculum deferantur, verum etiam, ut claritate sufficiente gaudeant, seu ut lumen sit satis intensum.

§. 175.

E re autem esse existimamus, ut experimenti commemorati circumstantias nonnullas a notemus. Tenendum itaque lente existente eadem, imaginem esse majorem atque majore intervallo a lente distare, si lens fuerit objecto propior; minorem vero fieri & ad eandem propius accedere, si ipsa ab objecto

longius recedat. Porro notandum est, manente eadem distantia lentis ab objecto, imaginem esse majorem & longiori intervallo ab illa removeri, si ea fuerit majoris sphaerae segmentum, quam si minoris existat. Denique nec hoc negligendum, manente eadem sphaericitate, imaginem esse majorem & majori distare intervallo, si lens sit plano convexa, quam si fuerit utrinque convexa, quamvis in posteriori magis distincta atque clarior appareat. Minima est imago atque minimo intervallo distat, si lentis loca sphaera integra utamur.

§. 176.

Si lens concava luminosa corpori objiciatur, radii post refractionem per majus spatium diffunduntur in charta objecta, nulla eorundem separatione facta, ut adeo hoc in casu imago delineetur nulla, usu eorum in debilitando lumine se se exerente. Si lentes plano-concavae non habuerint exactam planitiem, sed ad convexitatem etsi non visibilem accedant; imago post refractionem delineatur: unde hoc pacto examinare licet, num lentes plano-concavae sint perfectae.

§. 177.

Lenti substitutus humor crystallinus ex oculo animalis exemptus eadem prodit, quae de lentibus convexis (§. 169.) commemoravimus:

mus: id quod mirum non est, cum imaginis delineatio pendeat a refractione, refractionis autem ratio a figura & pelluciditate, quæ humori crySTALLINO cum lente communis.

§. 178.

Remotis itaque in parte oculi postica tunicis sclerotica & choroide, retinaque illæsa, vel hujus loco pellicula ex ovorum gallinaceorum testis substituta, imagines objectorum perinde ac in camera obscura apparent, si ejus foramini pupillam oculi applies, vel extra illam candelam accensam ante pupillam constituas.

§. 179.

Objecta per lentem convexam visa majora apparent; magis autem amplificuntur, quo majoris sphaeræ segmentum illa fuerit. Quoniam vero visio distincta non modo a magnitudine, verum etiam a claritate visibilis pendet (§. 174.), nimia autem amplificatio perinde ac in camera obscura simplici claritati officit (§. cit.); vitra minoris sphaericitatis in contemplandis minimis Naturæ non semper præstare iis, quæ paulo majorem sphaericitatem habent, ipso usu didicit Philosophus.

§. 180.

Et si autem vitra convexa singularia communiter non usurpentur, nisi in contemplandis

dis objectis exiguis oculo vicinis; idem tamen a pluribus retro annis observavit, objecta etiam remota, nudo oculo ob nimiam distantiam vix conspicua per lentes majores, quæ sunt majorum sphaerarum segmenta, oculo utroque aperto in ipsa meridie distincte videri.

§. 181.

E contrario objecta per lentem concavam visa minora apparent: magis autem imminuta cernuntur, si lens minoris, quam si majoris fuerit sphaeræ segmentum. Jucundum imprimis est spectaculum, si unum idemque objectum respicias tum oculo nudo, cum per lentem concavam: videbis enim geminatum, sed sub diversa magnitudine, v. gr. puerum juxta virum huic prorsus similem vel vitulum juxta taurum aut vaccam.

§. 182.

Si objecta procul a lente distent convexa, imago multo minor est ipso subjecto (§. 175.). Enimvero facile hinc colligitur, quod, si imago sumatur loco objecti, hoc in imaginem contra degenerare debeat. Atque huic fidem facit *Laterna magica*, ubi imagines vitro delineatæ isto loco constituuntur & per radios a speculo caustico reflexos fortiter illuminantur. Etenim in majori a lente distantia imagines prægrandes in pariete deline-

lineantur: Structura ubivis in elementis opti-
cis describitur: sufficit fundamentum effectus
singularis indicasse, ad captum quidem eorum,
qui Matheſeos sunt imperiti.

§. 183.

Monuit Philosophus, laternam magicam
facile converti posse in microscopium. Nem-
pe AB est vitrum utrinque convexum, quo
mediante objectum vitro plano CD ag- Fig. 50.
glutinatum illuminatur. EF, EF sunt len-
tes utrinque convexæ, quales in laterna ma-
gica usurpantur. GH est vitrum nondum per-
politum, in quo imago objecti aucta exhibe-
tur. Possunt etiam fluida in tubulis capilla-
ribus in CD collocari.


§. 184.

Meniscorum, hoc est, vitrorum convexo-
concavorum varia sunt genera. Si diameter
convexitatis fuerit æqualis diametro concavi-
tatis, meniscus æquivaleret vitro plano; si illa
fuerit hac major, concavo; si denique hac mi-
nor, convexo.

§. 185.

Tubi optici, quorum vitrum objectivum
convexum, oculare concavum, sistunt obje-
cta aucta & tanquam propinqua situ erecto
spectanda. Tubus astronomicus duobus vi-
tris convexis constans eadem aucta in vici-
nia spectanda exhibet, sed situ inverso.

bus denique terrestris ex tribus vel quatuor vitris compositus objecta situ erecto & aucta tanquam propinqua oculo subicit.



CAP. IV.

DE SPECULIS.

§. 186.

Speculorum planorum phænomena quotidiana sunt: ast si duo instar libri compaginentur, ut sub diversis angulis aperiri possint, per iteratas reflexiones objectum intra angulum constitutum multiplicatur. Jueundum est spectaculum, si pars alicujus munimenti in angulo posita intra speculum in integrum degenerat.

§. 187.

In speculis convexis imagines sunt objecto multo minores, etsi admodum distinctæ ob claritatem: ut adeo ope horum speculorum confirmetur, ad distinctam visionem multum conferre claritatem. Imago minuta, sed clara. Minuunt autem specula, quorum minor est diameter, magis objecta, quam quæ majoris diametri fuerint.

§. 188.

Eadem specula imagines incurvare solent
&

& remotorum imagines in iisdem minores, quam objectorum vicinorum. Unde aspectu jucundum est, si speculum convexum ante ventrem ponas, quod hoc in situ ventrem exhibet prominentem, caput reclinatum, & illum adhuc in ratione majori.

§. 189.

Specula cylindrica convexa imagines objectorum deformant: etenim juxta latitudinem easdem coarctant, juxta longitudinem minus. Unde si facies objicitur ita, ut ejus longitudo longitudini seu altitudini speculi respondeat, latitudo vero illius latitudini hujus; facies apparet longa, sed gracilis. Contra si eidem secundum latitudinem objiciatur, brevis apparet, sed admodum lata. Quæ in plano horizontali collocantur, cui speculum infistit, ita ut in centrum baseos speculi tendant, ea in eodem perpendiculariter exacta cernuntur. Quæ vero in plano horizontali tanquam peripheriæ describuntur, ex eodem centro baseos speculi instar lineæ rectæ plano parallelæ in eodem exhibentur. Ex his atque aliis principiis, quæ dato speculo cylindrico facile observantur, etiam ab imperitis Matheseos intelligitur ratio, cur imagines deformatæ in speculo cylindrico sub vera forma appareant.

§. 190.


§. 190.

Similiter specula conica imagines objectorum deformant, sed diversa ratione. Nimirum circa verticem objectorum imagines magis contrahunt, quam circa basin, adeoque inæqualiter, cum contractio in cylindricis ubivis sit eadem. Quamobrem si facies objiciatur speculo conico secundum longitudinem ipsius, eadem a mento usque ad frontem continuo gracilescit. Enimvero si axis speculi respondeat altitudini faciei, tum altera faciei pars a naso versus aurem continuo fit longior, altera vero brevior. Experimentis hiscæ detegi possunt principia, ex quibus intelligitur ratio restitutionis imaginum deformatarum in speculo conico factæ. Enimvero cum nobis potissimum curæ sint; quæ in explicandis rerum naturalium causis locum habere possunt; talibus recensendis non immorabimur.

§. 191.

Specula concava singularibus prorsus phænomenis nobilitantur, fidem vix repertura, nisi coram exhiberi possent. Constat ex superioribus (§. 127.) specula concava esse caustica, hoc est, radios solares colligere in exiguo quodam spatio, quarto circiter concavitate diametri parte ab eodem distante, qui focus ipsius appellatur. Quodsi in eodem col-

collocetur objectum, prorsus non videtur in speculo. Et si facies nostra in foco constituitur, nec nos contuemur in speculo concavo. Si vero objectum ultra focum promoveatur versus speculum, intra speculum apparet magnitudine auctum & situ erecto. Unde etiam ipsimet faciem nostram insigniter auctam contueri possumus, capite intra focum & speculum posito. Usus ergo speculorum concavorum in contemplandis faciei minutiis sese exerit, ubi microscopiorum nullus est usus, qui alias huic instituto servantur. Quod si objectum a foco versus centrum removeatur, sed ita ut intra focum & centrum subsistat, imago videtur extra speculum situ inverso in libero aere.



CAP. V.

DE OBSERVATIONIBUS
MICROSCOPICIS.

§. 192.

Objectum per microscopia contemplaturus variorum microscopiorum apparatu instructus sit, quoniam quæ valde augment magnitudinem illius, tanto minorem partem uno obtutu comprehendendam sistunt. Unde primo omnium loco objectum subjiciendum est microscopio, quod integrum spectandum exhibet, deinde adhibenda

da sunt microscopia, quæ magis amplificant, etsi partem tantummodo submittere liceat. Quamobrem objectum in suas partes ea cautione dividendum, ne quicquam lædatur. Quodsi enim integrum objectum delineatum fuerit, prout per microscopium primum apparet, deinceps autem delineentur partes singulæ & partium quoque partes, magis auctæ conjungentur duce imagine prima, qua objectum integrum exhibetur. Opera autem danda est, ut nexus partium per microscopia plurimum amplificantia illustretur: quem in finem excindendæ sunt portiunculæ, ubi duæ partes connectuntur, ut illa microscopia subijci possit.

§. 193.

Agedum ! commemoremus observationes aliquot microscopicas, quas Philosophus recenset usus in observando microscopiis potissimum simplicibus arte *Muschenbrockii*, *Leutmanni* atque *Teuberi* politis. Granula exilia arenæ subtilis apparuere mole, figura & qualitatibus valde differentia. Quædam magnitudine bis, ter, quater immo sexies excedebant reliqua: singula erant prædita figura irregulari, sed peculiari. Pleraque instar aluminis pellucida erant, & in lumine solari colores iridis mentiebantur, manifesto indicio lumen in iis refringi (§. 155.), consequen-

quenter ea ex materia pellucida constare. Quando a microscopia ita applicabantur, ut inter lumen & microscopium constituerentur, lumen per ea transiens internam diversitatem manifesto prodidit, etsi distincte ea notari non possent, quibus differebant. Exiguo illi spatio, quod arenæ pulvisculus occupabat, diverso intervallo dissita comparebant. Plura istiusmodi arenæ pulvisculos si quis contempletur, specimen quoddam videt, quo principium indiscernibilium (§. 93. *Cosmol. gen.*) confirmatur. Exploditur his & similibus observationibus *materia similis*, cujus partes quantumlibet exiguæ sunt integræ massæ similes. Ceterum notatu dignum est, arenulas in nimia amplificatione molis pellucidatem amittere visas esse, magisque confusas apparuisse, quam per microscopia objectum minus augmenta. Unde discimus, in amplificandis objectis habendum esse modum, si distincte satis eadem videre volueris.

§. 194.

In minutissimo filamento serici, quod vix capilli magnitudinem adæquabat, 95. filamenta minora numerabantur, quæ instar tubulorum cavorum comparebant. Imprimis memoratu dignum est, cum sericum viridis existeret coloris, partes filamentorum colo-

ratas virides particulas in cavitate continere visas esse. Non vana ergo suspicio est, sericum constare ex filamentis cavis, dumque colore tingitur, liquidum coloratum per poros filamentorum in eorum cavitatem se se insinuare, factaque evaporatione particulas solidas intrus relinquere. Filamenta lanæ & lini atque cannabis per microscopia filamentis serici similia apparent, quæ nempe insigniter aucta non amplius divisa conspiciuntur: quamobrem ob analogiam inferre licet, lanam quoque & ex lino atque cannabe confecta eodem modo colorem induere.

§. 195.

Filamenta in tela araneæ, etsi valde exilia, ut nudo oculo vix dignoscantur, ex pluribus tamen contexta sunt. Sane sex alicubi distinguebantur, ubi filamentum extremum in plura casu fuerat divisum. Colligitur hinc, araneam filamentorum multiplicatione conficere filum, quod ruptu difficilius. Non injucundum erat spectaculum, quod hinc inde unum filamentum colligabat cetera, haud obscure indicio, araneam secundum filamentum nentem nunc supra primum recta progredi, nunc mutato cursu infra descendere, nunc rursus ascendere & ita porro.

§. 196.

Scintillulæ ignis ex chalybis atque filicis collisione elicita si charta excipiantur, earum loco hic chalybis particulas, alibi globulos vitreos deprehendes. Sunt igitur particulæ chalybis candentes, quæ in collisione abraduntur, vel particulæ filicis liquefactæ, quæ diffiliunt. Silicem enim in vitrum transmutari posse, dum liquatur, lentes & specula caustica Tschirnhusiana probant: vitrum vero liquatum candere haud ignotum.

§. 197.

Dudum quoque jam ab aliis observatum est, utricam a parte averfa obsitam esse multis aculeis, quibus instar acicularum pungit, dum urere dicitur.

§. 198.

Granula papaveris etsi nudo oculo convexam superficiem habere videantur, multis tamen cavitatibus gaudet pellicula, qua involvitur: ut adeo constet, seminis massa arefacta, pelliculam hinc inde eminentem duplicari.

§. 199.

Similiter in grano secalis cavitates hinc inde depressæ conspiciuntur, quæ ipsius massæ inæqualem exiccationem loquuntur; et si etiam cutis, qua tegitur, hinc inde inæqualitates sibi proprias ostendet. Præterea

(*Thüm. Instit. Phil. exper.*)

Y

su-

superficies alibuantum hirsuta apparet, sed ob sensuum fallaciam multa cum circumspeditione detegenda. Curis cuticula vestitur admodum tenui: substantia farinacea globulos, aut si mavis, vesiculas magno numero congestas sistit, in lumine solari iridis coloribus emicantes. Cum particulae farinae non aliam sui speciem exhibeant, quam massa farinacea grani, haud obscurae intelligitur, dum in mola conteruntur, particulas farinae non formari, sed aëtu jam praesentes tantum a se invicem separari. Per cuticulam secundum longitudinem tubuli excurrunt, qui in altero extremo, ubi plantula delitescit, colliguntur. Multo facilius conspiciuntur, si granam in aqua intumuit, antequam cutis separetur. Cutis in multas lamellas divisibilis & utriculis veluti obsita, tubulisque multo minoribus instruitur, quam cuticula, ramulos plurimos undiquaque spargentibus. Maculae flavae, quae in grano notabantur, in cuticula existebant, & quidem in utriculis, qui inter fistulas interjiciebantur. Unde colligitur, eas corrupto nutrimento ortum debere. Qui tubulos in cuticula feminis cogitat & vascula sanguinea in pellicula sub putamine ovi incubati aliquando vidit; feminis cum ovo similitudinem inde colliget.

§. 200.

Cutis cerasi candicat & utriculis undiquaque

que sparsis obsita, quæ rubedine tinctæ ruborem cuti conciliant. Quodsi rubedo saliva extrahatur, ipsi etiam utriculi eundem cum cute colorem habent. Ex pedunculo utrinque fibræ per cerasi substantiam procedunt, succum nutricium advehentes, quæ fructu valde maturo prope pedunculum arefiunt, ut is facile avellatur. Fibræ illæ, etsi modo oculo instar filamentotum simplicium appareant, plurimum tamen vasculorum minorum congeriem exhibent & in apice coeunt, ubi stilus in flore insidet. Ex eodem pedunculo fibræ quædam in putamen nuclei intrant & instar funiculi umbilicalis per canalem ad alterum latum situm protensæ semini inseruntur paulo infra radiculam plantæ, loco insertionis rubente, sicuti succus cerasi. Rubedo illa tantum inerat cuticulæ nuclei & ejus quidem utriculis, in quos adeo defertur succus cerasi per funiculum umbilicalem. Pulpa innumeris utriculis scætet perinde ac cutis.

§. 201.

In foliis fibrillæ, quæ pediculum constituent, in fasciculos diversos per folia distribuntur ramulorum instar, spatiis intermediis utriculos continentibus, hoc est, versiculas, quæ materia quadam viridi replentur. Medulla pediculi simul per ramulos distribuitur & fibrillæ triplici serie eam ambiunt, quarum

rum mediæ nihil fere viriditatis habent, viridibus utrinque extremis. Virides arteriarum instar succum nutritium advehunt, albæ revehunt succum a particulis nutritivis vacuum. Fibræ pediculi ortum ex ramo vel in plantis ex caule ducunt. Sed hæc in peculiari dissertatione *de arboribus ex folio educatis & Anatomia foliorum* in Actis Erudit. An. 1723. uberius deduximus.

§. 202.

Cuticula corticis multas fistulas continet quamvis valde exiguas; reliqua cutis fistulas pauciores, sed utriculos copiosiores, quibus imprimis corticis substantia abundat.

§. 203.

Fibræ ligneæ, quæ nudo oculo distinguuntur, sunt fasciculi plurimum minorum stupendæ prorsus excillatis. Frustulo ligni abscisso instar chartæ tenui & saliva madefacto, saliva per fistulas motu admodum celeri moveri visa. Si ex vite orbiculus tenuis refecetur, admodum distinctæ trachææ in orbem dispositæ cernuntur: sed in ceteris lignis non adeo facile, nec eodem semper microscopio deteguntur.

§. 204.

Medulla est venularum minorum congeries, quæ nivis albedinem æmulantur, nisi nimis amplificentur: in nimia amplificatione ad colorem vari pellucidi accedunt.

§. 205.

§. 205.

Fibræ carneæ animalium sunt fasciculi exilium fibrillarum & a *Leeuwenhoeckio* notatum est, fibrillas maximorum animalium veluti balænae, bovis &c. & minimorum veluti muris, imo insectorum veluti pulicis inter se esse æquales.

§. 206.

Portiuncula pulmonis sub microscopio veluti in spumam abit, ex innumeris vesiculis constans.

§. 207.

In semine animali, si guttula exigua a tubulo capillari attracta microscopio eximio subjiciatur, animalcula magno numero exhibentur a *Leeuwenhoeckio* primum detecta, ab *Hart-sæker*o, *Hugenio* aliisque perinde visa nobisque a Philosopho plus simplici vice commonstrata, ut perperam a nonnullis in dubium vocentur.

§. 208.

Facilius observatur circulatio sanguinis prope caudam, præsertim pisciculorum squamis destitutorum. Omnium distinctissime eandem observavit *Leeuwenhoeckius*. Neque enim solum ex globulis rubris sero innatantibus optime discernere potuit, motum sanguinis in arteriis fieri a corde, in venis vero ad cor; verum etiam, (quod ca-

put rei est), exilissimos tubulos ex arteriis in venas derivatos ita incurvari, ut in aliqua parte sanguis a corde, in altera versus cor moveatur, directione in curvedine sensim sensimque immutata. Liquido igitur ex ipsius observationibus constat modus, quo sanguis ex arteriis in venas descendit, & eür venæ per totum corpus juxta arterias serpant.

§. 209.

Momenta tantum observationum recensere libuit, quibus utemur in explicandis Naturæ phænomenis, omissa microscopiorum descriptione, quibus Philosophus easdem cepit & objectorum ad microscopia adplicatione, ubi non minus casui, quam circumspeditioni est locus: quæ idem inculcamus, ne in dubium vocet aut neget, qui in observandis iis, quæ modo dedimus, forsan operam ludis.



SECTIO V.

DE VARIIS EXPERIMENTIS PHYSICIS MISCELLANEIS.

CAP. I.

DE EXPERIMENTIS MAGNETICIS.

§. 210.

Inter magnetis phænomena prorsus singularia primo loco occurrit *Vis*, quæ voca-

ca-

catur, *attractiva*: quam observaturus acum ex filo libere suspendat, admoto enim polo magnetis, ut aliquo intervallo a cuspide acus distet, ea veluti sponte accurrit & magneti vel ferro, quo armatur, adhæret manusque eandem retrahens aliquam resistantiam sentit. Clavis ferrea vel ferrum majoris ponderis, pro magnitudine vis attracticis in diversis magnetibus diversæ ad polos armaturæ si applicetur, firmiter ab hoc lapide retinetur, pondere non sufficiente ad ipsius ab eo separationem.

§. 211.

Dudum quoque notatum est, magnetem ferro armatum fortius trahere non armato. Sane *Mersennus* possedit magnetem, qui armatus 10. ferri libras attrahebat, cum non armatus non nisi semiunciam traheret.

§. 212.

Vis autem attractiva tantum deprehenditur in duobus punctis oppositis, quibus *polorum* imposuere nomen ob vim directivam, de qua mox plura dicemus. Unde poli magnetis designantur, si eum scobi ferreæ committas, quæ barbæ instar alicujus utrique polo statim adhæret.

§. 213.

Dicitur autem polus alter *septentrionalis* sive *borealis*; alter vero *australis* sive *meridionalis*.

nalis. Etenim si magnetem ex filo libere suspendas, sponte sua in hunc se se disponit situm, ut polus septentrionalis septentrionem, australis austrum respiciat, etsi non semper nec ubi-vis locorum exacte. Et propterea quidem magneti *vis directiva* tribuitur.

§. 214.

Notatu vero dignum est, quod duorum magnetum poli diversi nominis se se mutuo attrahant, poli autem cognomines non item. Nimirum polus septentrionalis unius trahit australem alterius, sed non vicissim duo septentrionales vel australes se mutuo attrahunt. Unde poli diversi nominis dicuntur *amici*; poli cognomines autem *inimici*.

§. 215.

Ut polorum amicitia & inimicitia rectius pateat, polo septentrionali magnetis applicetur acus, quæ ab eo attracta libere suspendetur, ita ut vi gravitatis ipsius longitudo sit ad terram seu planum horizontale perpendicularis. Quodsi jam magnetis alterius polus australis admoveatur, acus inclinabitur cuspidem versus eundem directo; e contrario si alterius polus septentrionalis accedat acus reclinabitur cuspidem ab eodem averso, ac magnete moto ipsi quasi fugit.

§. 216.

§. 216.

Cum aliqua adesse debeat causa, quæ acum e situ verticali dimovet, haud obscure hinc colligitur, in casu priori fluidum quoddam ad polum amicum ab altero magnete accurrere acumque secum rapere, in posteriori vero e polo inimico fluidum quoddam egredi acumque in ejus oppositum rapere, quod fluidum *materiam magneticam* salutabimus, quamque in utroque polo diversam esse apparet.

§. 217.

Materiam magneticam circa magnetem moveri hoc experimento docetur. Si acus in medio magnetis ita collocetur, ut ejus axem, hoc est, rectam ab uno polo ad alterum ductam faciat, mox ea convertitur, donec situm obtineat axi ejus parallelum, eodem prorsus modo, quo lignum in flumine ita convertitur, ut longitudo ipsius longitudini fluminis respondeat. Materia igitur magnetica instar atmospheræ magnetem ambit & ab uno polo usque ad alterum movetur.

§. 218.

Idem adhuc alio experimento confirmatur. Si magnes ACB ad horizontem HR inclinetur & acus LM cuspide L ad alteru-
trum polum B applicetur, ita ut obtineat si-

tum axi parallelum; in eodem situ eadem detinetur, nec in verticalem LN juxta gravitatis directionem LS deſcendit, etſi foramen acus M polum alterum A minime attingat.

§. 219.

Mirum quoque dictu, quod magnes ferro vim attractivam atque directivam extemplo communicet, ſolo contactu immo etiam in vicinia poſitus. Acus, quæ magneti adhæſit, etſi ab ejus contactu ſtatim removeatur, alias acus attrahit. Culter ſolo affrictu in polo alterutro magnetis vim attractivam acquirit, ita ut acus ſcobemque ferream ad ſe rapiat. Immo ſi cultri acies tantisper e regione magnetis detineatur, ſcobem ferream attrahit. Atque hæc cauſa fuit, cur acus magneticæ fabrefactæ, quæ ſuper ſtylo acuminato æquilibratæ alterum ſui extremum verſus Auſtrum dirigunt & ex hoc ſitu dimotæ ad eundem conſtanter redeunt.

§. 220.

Notandum vero, quod ea pars acus magneticæ dirigatur verſus polum borealem, quæ adhæſit polo magnetis ſeptentrionali & contra. Quamobrem ſi acus magneticæ pars borealis applicetur ad polum borealem magnetis, extemplo vis directiva ipſius mutatur parte boreali in auſtralem converſa & contra.

§. 221.

§. 221.

Immo in excitatione magnetica acus ductu contrario vis acquisita aufertur. E. gr. Si quis ita trahat acum, ut ab austro in boream moveatur, vis hoc ductu acquisita iterum destruitur, si moveatur retro a borea in austrum. Requiritur autem, ut uterque ductus eodem modo fiat, ex fortiori enim affrictu contrario vis contraria acquiritur: id quod etiam iterato ductu contrario accidit.

§. 222.

Viget etiam amicitia & inimicitia inter acum magneticam atque magnetem. Polus enim magnetis borealis trahit acus magneticæ polum australem & contra illius australis hujus borealem. Quamobrem si magnes polo boreali versus pyxidem directo circa eandem in orbem moveatur, acus intra eam perinde in orbem movetur, & si polus magnetis australis obvertatur boreali, acus hæc statim convertitur, parte meridionali versus boream & septentrionali versus austrum directa.

§. 223.

Acus magnetica in experimentis magneticis plurimum habet usum. Ejus ope optime docetur, virtutem magneticam varias per materias diffundi. Nam si inter acum & magnetem, quo illa trahitur, interponas asserem ligne-

lignum, vel (quod perinde est) magneticam acum supra mensa colloces, magnetem vero sub eadem hoc illucve moveas, attractiones acus eodem prorsus modo fiunt, quo in contiguitate pyxidis magneticæ & magnetis accidunt, seu nullo interpositus corpore. Admiratione vero dignum est, quod acus sequatur motum magnetis sub mensa, etiamsi inter pyxidem & mensam 24. immo plures orbes stannei interponantur. Et quoniam vis magnetica per corpora interjecta extemplo diffunditur, cum calor successive penetret; materiam magneticam a materia calorifica seu igne elementari diversam esse patet. Præterea hæc quoque differentia inter vim magneticam & calorem notatur, quod hic successive augeatur & minuat, illa vero constans sit incrementi atque decrementi impatiens. Reperies quoque per chartam, vitrum, aquam, &c. magnetem eodem modo operari.

§. 224.

Immo cum attractiones magneticæ etiam in spatio ab aëre evacuato fiant, pyxide nimirum sub recipiente evacuato constituta, magnete extra idem collocato; haud obscure pater, aërem ad attractiones magneticas nihil conferre, quemadmodum vulgo opinantur. Suspendi etiam potest acus vulgaris ex filo sub campana vitrea, ea quidem distantia a
pe.

perimetro, ut vis magnetica ad eam pertinere possit: aër enim beneficio antliæ pneumaticæ educto ad magnetis polum ad extremam campanæ superficiem admotum accurrit acus & apicem versus internam superficiem applicans non relabitur, nisi magnete extus remoto.

§. 225.

Habet nimirum virtus magnetica suam *activitatis sphaeram* ultra quam non egreditur: id quod ope pyxidis magneticæ facillime ostenditur. Collocata enim eadem super tabula, facile experieris, magnetem acum magneticam non ad quamlibet distantiam trahere, sed in determinata quadam tantum.


§. 226.

Quodsi acus magnetica super linea meridiana constituatur, ejus a Septentrione *declinatio* alibi in ortum, alibi in occasum se se prodit, qua nec in eodem loco constanter eadem, sed successive variat. Parisiis ab anno 1686. usque ad 1699. hoc est, intervallo 13. annorum, crevit 3. gradibus 40. minutis versus occidentem, ab anno vero 1699. usque ad annum 1722. sequentes variationes notatæ.

Anni.	Menses.	Declinatio.
1699.	23. Octobr.	8.gr. 10. min.
1700.	20. Novembr.	8. 12.
1702.	22. Septembr.	8. 48.
1703.	18. Decembr.	9. 6.
1704.	30. Octobr.	9. 20.
1705.	31. Decembr.	9. 35.
1706.	31. Decembr.	9. 48.
1707.	28. Decembr.	10. 10.
1708.	27. Decembr.	10. 15.
1709.	24. Decembr.	10. 30.
1710.	30. Decembr.	10. 50.
1711.	30. Decembr.	10. 50.
1712.	30. Decembr.	11. 15.
1713.	29. Decembr.	11. 12.
1714.	30. Decembr.	11. 30.
1715.	30. Decembr.	11. 10.
1716.	30. Decembr.	12. 20.
1717.	29. Decembr.	12. 40.
1718.	30. Decembr.	11. 30.
1719.	26. Decembr.	12. 30.
1720.	1. Septembr.	13. 0.
1721.	16. Octobr.	13. 0.
1722.	4. Januar.	13. 0.

§. 227.

Notata etiam est acus magneticæ infra horizontem *inclinatio*. Nimirum si acus in æquilibrio fuerit, antequam magnetice exciteretur, acquisita virtute magnetica, tollitur æquilibrium & pars alterutra inclinatur infra lineam horizontalem. Hæc inclinatio in omnibus locis non est eadem, nec constans, perinde ac *declinatio*: alicubi locorum a nautis acus absque inclinatione observata. Imprimis notatu dignum est, inclinationem variare in quovis circulo verticali, in meridiano vero sit omnium minima.



CAP. II.

DE SONO.

§. 228.

Campanula H malleo G in vacuo percussa nullum sonum perceptibilem edit. Quod si aer denuo admittatur, pro quantitate aeris admissi sonus invalescit. Movetur autem malleus G ope brachii EL ad verticillum CD Fig. 52. firmati, postquam aer ex vase AB fuerit exhaustus. Intelligitur hinc, sonum propagari per aerem.

§. 229.

Idem ulterius confirmatur, quod sonus in aere compresso fiat major.

§. 230.

§. 230.

Comprimatur aër in vase cylindrico metallico *ABDC*, quod ope cochleæ *R* ad antliam pneumaticam firmatur. Fundus *BD* vitro concavo-convexo munitur, convexitate intus versa, ne aëris elatere per compressionem in *Fig. 53.* tenso frangatur. Fundus in *AC* est orichalceus vitro simili, sed minori in *ba* instructus, quem eximere licet, ut objecta in vase collocari possint. Firmatur idem ope cochlearum & laminarum *QV*, quantum sufficit, interposito annulo cereo vel coriaceo madido, ne aer egredi queat.

§. 231.

Quoniam sonus per aerem propagatur (§. 228.), mirum videri nequit, campana intra aquam percussa, sonum obtundi.

§. 232.

Quantum intervallum sonus unius minuti secundi spatio conficiat, plurimi inquisiverunt: quoad mensuram pedis Anglicani reduxit *Derhamus* in *Transact. Philosoph. Num. 313. pag. 3.*

Nomina Observa- torum.	Spatium a Sono confe- ctum intervallo unius secundi.
Newton	olim 968, recentius 1142.
Roberts	1300
Boyle	1200
Walcker	1338
Mersennus	1474
Flamsteed	1142
& Halley	
Florentini	1148
Galli	1172

§. 233.

Idem *Derhamus* explosis tormentis didicit, sonum motu æquabili ferri & sonum ex percussione mallei ac explosione sclopeti ortum ad distantiam unius milliaris Anglici una percipi observavit. Unde intelligitur soni magnitudinem non pendere a celeritatis diversitate, sed a quantitate aeris simul moti.

§. 234.

Vesica inflata, obstricto collo, ne aer egredi possit super carbonibus candentibus detenta aliquamdiu, ut aeris intus conclusi elatere disrumpatur (§. 48.); fragorem edit ingentem. Idem contigit, si globulus vitreus AB Fig. 54. in B hermetice sigillatus flammæ candelæ im-

(*Thüm. Instit. Phil. exper.*)

Z mit-

mittatur vel prunis imponatur, aliqua cavita-
tis parte aceto vel spiritu vini repleta. Si glo-
bis utamur majoribus satisque crassi, fragor
tanto major percipitur. Quoniam enim globi
& globuli vitrei vi elastica aeris intus rarefacti
disjiciuntur (§. 48.); aer erumpens motum
imprimit moleculis circumjectis, qualis sono
producendo servit.

§. 235.

Atque eadem est ratio, cur alia corpora,
quæ incensa in flammam expansivam abeunt &
corpuscula per aerem celerrime vibrant, in-
gentem fragorem excitant, velut aurum ful-
minans & pulvis fulminans, quæ utraque mas-
sa accenditur, si ejus quædam portio cochleari
ferreo immissa carbonibus candentibus vel et-
iam flammæ candelæ accensæ superimponi-
tur. Paratur enim pulvis fulminans ex tribus
partibus nitri, duabus salis Tartari & una sul-
phuris in mortario contritis, donec massæ
sufficienter invicem fuerint permixtæ. Quod
enim pulvis fulminans vi expansiva gaudeat,
inde constat, quod vas figulinum disjiciat, si
aliqua ejus portio immittatur, & vas probe
occlusum carbonibus candentibus imponatur.
Eundem vero pulverem projicere corpora
motui obstantia, inde patet, quod nummus
argenteus major massæ in cochleari imposi-
tus

tus, dum liquata accenditur, magno impetu versus laqueat projicitur, ita ut oblique impositus sæpius eidem infigatur. Nec desunt denique corpuscula, quæ a flamma expansiva vibrantur per aerem. Etenim flamma expansiva a nitro & sulphure ortum trahit; salis vero Tartari particulæ in corpuscula subtilissima resoluta vi ejus vibrantur.

§. 236.

Si tubas metallicus prælongus v. gr. ex lamina ferrea stanno obducta paratus & quindecim pedum longitudinis, diametri unius digiti unius ori, alterius auri admoveatur; alter distincte percipiet vocem illius valde submissam, non secus ac si alta voce verba proferret. Non alia ratione fieri potest, ut sonus intendatur, quam reflexione a parietibus tubi, qua efficitur, ut plures aeris moleculæ ad eundem motum concitentur, quo quædam ore loquentis cientur, cum soni intensitas a multitudine molecularum aeris eodem modo concitatarum pendeat.

§. 237.

Atque hæc observatio ansam dedit tubis *Phonoreoponicis*, qui ductu continuo auctæ magnitudinis constant. E. gr. pars prima DF est minus ampla. Etenim in D vix digiti unius, F peripheria trium circiter digi-

torum, ast ab hoc termino successive crescit, ita ut in F perimeter sit fere $5\frac{1}{2}$ digitorum, in G integri pedis, in H $1\frac{1}{2}$ ped. major, in B denique $2\frac{1}{2}$ ped. circiter, longitudine Fig. 55. DF existente ultra $8\frac{1}{2}$ digir. FG $\frac{1}{2}$ ped. GH ejusdem propemodum quantitatis & denique HB $9\frac{1}{2}$ digit. Orificium EAC commoditati oris servit. Figura utcunque per rationes a posteriori petitas determinatur, sed ad geometricam exactitudinem nondum accedit. Nimirum orificio cavetur, ne vox loquentis extra tubum diffundatur, utque sit valida, tubus in D angustus est, quo multum aeris agitetur. Cum vero per reflexionem plures molecule ad motum sonorum concitentur & plures reflexæ denuo plures ad eundem concitare possint; ideo amplitudo tubi continuo augetur. Ubi vero exitus patet, in B amplissimus est tubus, ut mox latius diffundatur.

§. 238.

Reflexioni cum sit obnoxius sonus, fieri solet, ut si os loquentis constituatur in foco uno E fornicis elliptici BHA, auris in foco altero D excipiens radios phonicos reflexos omnes Fig. 56. CD, GD, HD, &c. distincte percipiat vocem loquentis, etsi intra focos constituti nihil ejus percipiant. Geometris enim notum est, ellipsin ita reflectere radios sive luminis,
sive

sive phonicos, ut ex foco uno E incidentes in altero D concurrant.



CAP. III.

DE CORPORUM PORIS.

§. 239.

Sil vitro cylindrico longiori, sed minus amplo infundatur aliqua portiuncula aquæ, spiritus vini, vel cerevisiæ &c. & ope antliæ pneumaticæ aër ambiens subducatur (§. 34.), ad primam statim emboli agitationem plurimæ bullulæ ascendunt, quæ successive augentur, iteratis emboli agitationibus, ut adeo clarum sit, multum aëris intra aquam, spiritum vini, cerevisiam &c. latere, consequenter dari interstitiola, a materia ex qua fluida ista constant, vacua, aëreque repleta, qualia *poros* appellare solemus. Ut mutationes fiant subitæ, campana exiguæ capacitatis superimponi debet vitro cylindrico: hac enim ratione aëris ambientis densitas subito decrescit (§. 37.).

§. 240.

Et si autem bullulæ multo plures immo majores ex uno fluido egrediantur, quam ex altero, e. gr. longe plures ex spiritu vini, quam ex aqua, ita ut spiritus vini ebullire videatur atque ultra orificium vitri ascendat; haud qua-

quam tamen inde concludere licet cum nonnullis, dari plus aeris in spiritu vini, quam in aqua. Quod enim ex uno fluido plures majoresque prodeant bullulae quam ex altero, ejus rei ratio etiam in eo posita, quod ex uno fluido facilius egrediantur, quam ex altero. Unde si aqua fiat calida, ut cum elater aeris inclusi augeatur (§. 48.), num ipsius aquae densitas minuatur (§. 31.), perinde ac spiritus vini ebullit.

§. 241.

Eodem prorsus modo sanguis & urina adhuc calens magis, quam spiritus vini ebulliunt, etsi calore exhalato ne minima quidem bullula in vacuo emergat, nisi calor amissus antea restituatur. Lac frigidum similiter nullam in vacuo bullulam ostendit; sed parumper validum ita ebullit, ut totum ultra vitri orificium emergat.

§. 242.

Oculis jucundo spectaculo est ovi vitellus, qui pauculo calore instructus in vacuo totus in spumam resolvitur aere admissio statim disparem.

§. 243.

Eodem experimento discimus, in ligno, foliis, fructibus arborum, corio, pice &c. dari poros aere repletos, in quos evacuato aere a pondere incumbentis aqua intruditur.

§. 244.

§. 244.

Ac imprimis notatu dignum est, quod aqua in prorsus ingressa corpora subsidant, quæ antea eidem innataverant, manifesto indicio, materiam ex qua corpora ista constant, esse aqua specificæ graviorem (§. 24.), ista vero ob cavitates inclusas fieri eadem specificè leviora (§. 27.).

§. 245.

Si ex ligno abietino, quod poros magis parulos habet paretur campana atque loco vitreæ imponatur orbi ad antliam pneumaticam aptato (§. 34.); educto aere leviter adhæret: sed admota aure susurrus percipitur, sensim sensimque languescens, quo finito, campana orbi antliæ non amplius adhæret. Sonum istum esse ab aere per poros ligni in campanæ cavitationem irruentis ex principiis superioribus haud difficulter deducitur (§. 40.). Intelligitur hinc aerem per poros ligni moveri.

§. 246.

Fluit etiam aqua per eosdem poros: id quod experiri licet, si ex ligno tiliaceo paretur campana BCA, latiori margine instructa, ut mediante sebo ad vas vitreum FEK fimi - Fig. 57. li margine orichalceo EF præditum firmari possit. Quod si enim campanam ligneam aqua repleas & vas vitreum mediante cochlea H

ad antliam aptes pneumaticam; educto aere, aqua per poros campanæ lignæ perinde ac per cr. brum fluit. Tubus IK impedit, ne aqua antliam intret, per orificium superius I non nisi aeri aditum in eam concedens.

§. 247.

Magis autem miraberis ipsum quoque hydrargyrum per poros ligni transire. Etenim si vasculum cylindricum CBA fiat ei que tubus vitreus immittatur trium circiter pedum Fig. 58. cochlea E in D instructus, qui per aperturam in basi vasculi cochlea lignea munitam hydrargyro repletur, aperto foraminulo in D, cochlea E remota, ut aeris externi pressio in hydrargyro non intercipiatur, jucundo spectaculo Mercurius per poros ligni in GF salit, quod idem evenit in vacuo, orificio tubi in D, clauso, cum ibidem non amplius aer ambiens ad poros ligni resistat.

§. 248.

Quod si annulum GF, unde hydrargyrum salit, microscopio contempleris, non minori jucunditate se se spectanda præbent foraminula rotunda ordine disposita & totidem tubulorum oscula referentia, existentiam trachearum, hoc est, tubulorum aere repletorum in ligno loquentia.

§. 249.

§. 249.

Eadem tracheæ se se produnt, si furculi tenuis frustulum ita in aqua constituas, ut alterum extremum emineat, alterum a fundo vitri, in quo aqua continetur, aliquo adhuc intervallo absit. Etenim si ope antliæ pneumaticæ aerem ambientem externum removeas; aerem ex interiori basi ordine egredi observabis, ac ex totidem tubulis, quorum orificia in aquam hiant. Ne bullulæ ex aqua emergentes visum turbent, eam ante ab aere purgari consultum est.

§. 250.

Aquam etiam penetrare poros vesicæ patebit, si vasculi cylindrici utrinque aperti basis alterutra obducatur vesica & ope antliæ pneumaticæ aer intus contentus subducatur. Etenim aer externus vesicam premens cavitationem hæmisphæricam efficiet, cui infusa aqua per poros vesicæ veluti per cribrum fluat. Licebit vesica orificium vasis supra (§. 246.) descripti obducere, ut idem experiaris. Debet autem eadem esse madida, ut vas arcte contingat, ne aer inter contactum irrepere possit, ac basi multo latior, ne in cavitationem expansa ligaturæ se se subducatur.

§. 251.

Si vesicam siphoni anatomico superinducas vase AB ac tubo GE aqua repletis, vi- Fig. 59.

debis ejus substantiam intumescere, ita ut tunicarum in varias lamellas separatio facilius evadat & earum per fibrillarum ramificationes connexio in oculos incurrat & aquam per poros tum demum penetrare, si exterior vesicæ superficies aquam lambat.

§. 252.

Eandem pororum constitutionem deprehendes, si cutem vel pellem animalis, tunicas ventriculi atque intestinorum &c. ope siphonis anatomici examinaveris, & notabis quoque cætera, quæ de tunicis vesicæ commemoravimus (§. 251.).

§. 253.

Cæterum ut appareat, corporibus omnibus suos esse poros, etsi aquæ & aeri non semper pervios; folium tenue auri inter oculum & fenestram vel vespere inter candelam accensam constitutatur: videbis enim lumini patere ad oculum transitum, ita ut non minus orbes fenestrarum, sed & nubes cæli distincte cernantur, & candelæ flamma etsi coloribus tincta optime conspiciatur. Colores cum non nisi refractione gignantur (§. 155.) dubio caret, aurum quoque refringere lumen. Quoniam aurum omnium materialium terrestrium densissimum (§. 22.) poros habet: quin materiæ cæteræ omnes minus dense poris instructæ sit, haud obscuræ colligitur.

CAP. IV.

DE EXPERIMENTIS CIRCA
VIVENTIA POTISSIMUM IN
VACUO.

§. 254.

Animalia in vacuo tandem expirare, hodie notissimum est. Sed nobis circumstantiæ quædam singulares annotandæ veniunt. Nimirum aves ad primam emboli agitationem aere sub campana subito rarefacto quasi novitate rei attonitæ caput vertebant, oculisque apertis, caput atque oculos immota tenebant. Quod si repetitis emboli agitationibus aer ulterius rarefieret, secutis convulsionibus, tandem expirabant. Si convulsionibus exorsis admitteretur aer externus, ad se redibant. Accidit aliquando ut gallina tertia vice a convulsionibus liberata aliquo temporis spatio pristino statui restituere-
tur cum cæteris salva atque incolumis degeret.

§. 255.

Cui volupe fuerit, palpitationes cordis perspicere ac pendentes inde effectus; is exemplo Philosophi columbæ pennas sub collo & circa ingluviem evellat. Tum etiam videre licebit, quod aere externo rursus admissio cutis granulis in ingluvie reconditis adeo firmiter cohæreat & ipsa granula adeo valide comprimantur, ut in faxeam substantiam degenerasse videatur ingluvies cum
suis

fuis granulis, insigni aëris prementis extus effectu.

§. 556.

Eadem notabis circa animalia quadrupedia, veluti cuniculos, feles & catellos. Jucundum vero spectaculum præbent aures cuniculorum, in quibus vasa sanguinea valde tumescere conspiciuntur: id quod in omnibus vasis per totum corpus fieri debere manifestum est (§. 255.).

§. 257.

Ranæ in vacuo diutissime vivunt, nec non cancri, etsi illarum corpus valde intumescat, ita ut in aqua non submergantur, nisi aëre externo rursus admissio. Magis intumescit ranarum corpus, si in istiusmodi vase continetur, ubi in vacuo calefieri potest prunis extus admotis (§. 112.).

§. 258.

Pisces sub aqua demersi similiter expanduntur atque ex fundo in altum sublatis eidem innatant, ventre versus superiora verso. Difficilius vero enecantur. Utendum est vase, quod supra descripsimus (§. 112.).

§. 259.

Quodsi animalium in vacuo expirantium thoracem aperias, pulmones valde compressos & sinistram cordis auriculam sanguine ple-

plenissimam conspicias, ut adeo motus cordis ob nimium sanguinis affluxum & motus peristalticus venarum atque arteriarum ob nimiam a sanguine rarefacto (§. 256.) expansionem cesser.

§. 260.

Quod si corio madido vasculum cum prunis imponas, ut sub campana vitrea, qua in experimentis aerometricis utimur, aër vapore foetido & calido repleatur; aves eidem commissas mox convulsionibus corripi & expirare animadvertes: quo ipso docuit Philosophus, prunarum halitus in aëre vaporoso esse lethales occasione tragici cujusdam casus, qui acciderat spirituum thesauros absconditos revelaturorum incantatoribus in aëre frigido sed valde vaporoso juxta prunas mortem occumbentibus.

§. 261.

Si quis mutationes, quæ pulmonibus in vacuo accidunt, curatius perlustrare voluerit, is arteria aspera valde constricta, ne aër egredi possit, pulmones vacuo committat, qui mirifice expansi statim subsidentes ad pristinam molem redeunt aëre rursus admissio. Idem accidit in frustulo pulmonis, si bronchum seu arteriæ asperæ ramulam, per quem inflatur, valde constringas.

§. 262.

§. 262.

Arteria aspera vel ejus ramo non constricto; pulmo vel ejus portio in vacuo equidem intumescit, etsi ad minorem quam antea molem; sed admissio aere valde derumescit, manifesto indicio, pulmonem, quem ex meris vesiculis contextum esse per microscopia apparet, aere esse plenum in statu suo naturali. Ejus adeo intumescencia non est diversa ab intumescencia vesicæ in vacuo (§. 36.).

§. 263.

Willisius pulmones intra follem abscondit, arteria aspera per ipsius tubum prominente. Lateribus folliis diductis pulmones expandebantur aere externo per tracheam irruente: iisdem compressis, pulmo ad pristinam rediit expansionem aere per tracheam expirato. Latus folliis unum orbe vitreo muniebatur, ut pulmonum mutationes in oculos incurrerent.



SECTIO VI. DE EXPERIMENTIS MECHANICIS ET HYDRAULICIS.

CAP. I.

DE EXPERIMENTIS STATICIS.

§. 264.

Solidorum æquilibrium optime ope stateræ oculariter demonstratur, cum ea manifeste

sto loquatur, pondera æquilibrium tueri, si fuerint in ratione reciproca distantiarum, uno nimirum eodemque pondere in diversis distantis ponderibus diversis æquiponderante.

§. 265.

Eidem instituto vero præclare inservire judicat Philosophus experimentum *Jungnickelii* in clave machinarum, quod in Elementis mechanicæ (§. 109.) his verbis describit. Ex ligno parentur parallelepipeda plura inter se æqualia, & quorum latitudo sit dupla profunditatis, longitudo vero sextupla latitudinis: quamvis necesse non sit, ut hæ rationes accurate observentur. Parentur præterea alia quædam: unum sit longitudinis duplæ, alterum triplæ, tertium quadruplæ & ita porro. Fig. 60. Quodsi parallelepipedum longitudinis duplæ AB colloques super latere prismatis trigoni, ita ut latus prismatis ipsum dividat in partes æquales AC & BC: partes AC & CB æquiponderabunt (æquivalent nimirum ponderibus æqualibus in centrīs gravitatis D & E appensis). Collocetur porro parallelepipedum triplæ longitudinis ea lege super prisma, ut ejus latus ipsum dividat in partes FH & HG, quæ sunt in ratione subdupla: pars GH æquiponderabit. Quodsi vero tria parallelepipeda simplicis longitudinis ipsi FH superim-

po-

posueris, quatuor parallelepipeda duobus GK & KH in unum GH conjunctis æquiponderabunt. Est enim ipsius GH centrum gravitatis in K & ipsius HF in I per experimentum primum. Distantiæ igitur centrorum gravitatis IH & HK sunt ut pondera GH & HF. Nimirum perinde est ac si in I appenderetur pondus duplum ponderis in K appensi, vel si in I appenderetur pondus quatuor parallelepipedis æquale, in L & M centris gravitatis proportionum HK & KG pondus æquale erit. Eodem modo deprehenduntur parallelepipeda sibi mutuo superimposita in PN æquiponderare uni PO, quod sit ipsius PN triplum. Perinde scilicet ac si pondus in centro gravitatis Q ipsius PN appensum sit triplum ponderis R in centro gravitatis ipsius PO appensi, vel si ex centris gravitatis portionum æqualium, T, R, S, suspenderentur pondera uni parallelepipedo æqualia, in Q vero pondus æquale parallelepipedis novem.

CAP. II.

DE EXPERIMENTIS CIRCA
REGULAS MOTUS.

§. 266.

Motus corporum ex percussione regulas *Hugenii*, *Mariotti*, aliorumque exemplo pendulorum experimento optime ad examen revocare licet, observatis potissimum iis, quæ *Newtonus* in Princip. Philos. Nat. Mathem. p. 19. edit. sec. monet, si quidem acribiam omnimodam secteris. Si motus corporum elasticorum examinare volueris, pendula instruantur globis eburneis, si elasticitate sensibili carentium, ex argilla molli confectis. Omnis autem horum experimentorum cardo in eo versatur, ut pondera celeritate movere possis, quæ habent rationem datam ad celeritatem alterius ponderis. Quamobrem cum ex demonstrationibus Mathematicorum constet ponderum per arcus CB & DB descendentium celeritates esse ut sinus versus EB & FB arcuum CB & DB, ponamus globum D descendere per arcum DB 10. gra- Fig. 61. duum, erit BF sinus versus ejusdem arcus, qui vi tabularum sinuum cosinu $AF = 9848077$ ex radio AB 10000000 subductu reperitur 151923. Quodsi is per 4 multiplicetur, prodibit sinus versus BE arcus BC, per quem (*Thüm. Inst. phil. exper.* A a de-

demittendus est globus C, ut moveatur celeritate quadrupla ejus, quam acquisiverat descensu per arcum DB. Subducto hoc sinu verso 607692 a radio BA, relinquitur cosinus AE 392308 arcus CB, cui in tabulis respondent 87° , $45'$.

§. 267.

His experimentis comprobantur regulæ pro corporibus elasticitate sensibili destitutis sequentes.

1. Si duo corpora pondere equalia equalibus celeritatibus lata sibi mutuo occurrant, post ictum ambo quiescunt.
2. Si corpus in aliud itidem non elasticum directe incurrat, nec per consilictum motus extinguatur, post ictum ambo eadem celeritate moventur secundum eandem directionem.
3. Si corpus in aliud itidem elateris expers & quiescens directe incurrat, celeritas post ictum est ad celeritatem ante ictum, ut pondus ipsius ad ponderum summam.
4. Si corpus in aliud itidem non elasticum tardius motum secundum eandem directionem impingat; erit celeritas post ictum equalis impetuum suummae per ponderum summam divise.
5. Si duo corpora non elastica pondere equalia diversis celeritatibus lata, sibi mutuo directe occurr-


- currant, post conflictum feruntur celeritatum semidifferentia, quæ movebantur ante ictum.*
6. *Si duo corpora non elastica iis celeritatibus sibi mutuo directe occurrant, quæ sunt reciproce ut pondera eorundem: ambo post ictum quiescunt.*
7. *Si duo corpora non elastica eadem celeritate sibi mutuo directe occurrunt; erit celeritas post impactum ad celeritatem ante eundem, ut ponderum differentia ad summam eorundem.*
8. *Si duo corpora itidem non elastica quacunque celeritate sibi mutuo directe occurrunt; erit celeritas post ictum equalis differentie impetuum per summam ponderum divisa.*

§. 268.

Regulæ pro corporibus elastilis examini respondent sequentes:

1. *Si corpus in obicem, qui cedere nescit, directe impingat, fitque vel utrumque vel alterutrum elasticum, eadem celeritate reflectitur per eandem rectam, qua advenerat.*
2. *Si corpus in aliud quiescens directe incurrat post ictum quiescet, & alterum movebitur ea celeritate, qua ante ictum ferebatur incurrens.*
3. *Si duo corpora elastica pondere equalia celeritate equali sibi mutuo directe occurrant, utrumque resiliet ea celeritate & secundum eam directionem, qua advenerat.*

4. *Si duo corpora elastica pondere equalia celeritate inæquali sibi mutuo directe occurrant: post ictum celeritatibus permutatis feruntur.*
5. *Si corpus elasticum in aliud æquale segnius motum incurrat, post ictum ambo permutatis celeritatibus ferentur, secundum eandem nempe pristinam directionem.*
6. *Si corpus elasticum directe impingat in aliud quiescens, erit celeritas post conflictum ad celeritatem ante eundem, ut differentia ponderum ad summam eorundem, quam vero communicat cum altero, ea ad eandem est, ut duplum pondus ipsius ad ponderum summam.*
7. *Si duo corpora elastica sibi mutuo directe occurrunt cum celeritatibus, quæ ipsorum ponderibus reciproce proportionales sunt, post conflictum eadem celeritate a se invicem resiliunt, qua adveniant.*



CAP. III.

DE MOTV FLUIDORUM A
GRAVITATE PENDENTE.

§. 269.

Notissimum est, fontes artificiales, ex quibus aqua salit, construi, si aqua in sublimine elevata per tubos deorsum labitur. La-
psu

psu enim acquirit vim ad tantam propemodum altitudinem ascendendi, unde delapsa fuerat. Quod enim non ad eandem præcise altitudinem ascendat, experientia constat, quæcunque tandem illius rei fuerit causa.

§. 270.

Non soli aeris resistentiæ id posse tribui vel inde manifestum est, quod ejusdem fonticuli saltus in vacuo vix diversus notatur a saltu in aere. Sufficit, nec in vacuo aquam ad eam ascendere altitudinem, unde delabitur.

§. 271.

Si tubus inclinetur, ut directio aquæ salientis fiat ad horizontem obliqua, eam ad majorem altitudinem ascendere videbis, quam ubi fuerit perpendicularis. Guttæ nimirum sequentes retardantur ab anterioribus, in quas incurunt. Etenim jam a *Toricellio* observatum, quod, si lumen tubi digito obturetur, eodem repente remoto, guttæ primæ altius perveniant; quam fit deinceps, postquam aqua deorsum fluere cæpit. Immo oculos demulcet spectaculum, in saltu perpendiculari, quod aqua descendens subinde ad aliquam altitudinem deprimat ascensuram, mox vero ascendens vires quasi colligat & ascensum ad terminum anteriorem continuet.

§. 272.

Affrictum quoque in lumine tubi minuere ascensum notum est: cum multo minor evadat; si quidem istud non fuerit levæ, sed scabrities aliqua adsit.

§. 273.

Immo si lumen si nimis amplum pro altitudi-
ue descensus, ascensus quoque minuitur.

§. 274.

Lumen hoc minus esse debere, si fluidum fuerit gravius, docet Mercurius, qui per exigua foraminula salit, per quæ aqua vix guttatim effluit:

§. 275.

Aqua in vacuo saliens, non dispergitur in extremitate jactus in globulos, nec in tot ramulos, quemadmodum in aere. Unde resistentiam aeris esse hujus phaenomeni causam manifestum est.

§. 276.

Ut appareat, aquam salientem sequi directionem luminis ejusque figuram assumere, orificii tubi figuram & directionem variis modis variari convenit: quemadmodum docetur a Philosopho in Elementis hydraulicis (§. 109. & seqq.).

§. 277.

§. 277.

Ut denique elucescat altitudinem jactus tantum pendere ab altitudine descensus, construat fonticulis tubis variis instructus, quorum TS & NO sint perpendiculares, sed Fig. 63. amplitudine differant; AB & CD sint inclinati, sed figura diversi: videbis enim ex omnibus ad eandem lineam horizontalem LM ascendere aquam.

§. 278.

Aquæ descendentis conatum esse majorem vi gravitatis, manifeste loquitur orbis ligneus, qui foramini in fundo vasis ABCD applicatus non ascendit, quamdiu aqua per ipsum Fig. 64. effluit; ascendit autem statim more consueto ob gravitatem specificam minorem, quam primum aquæ per foramen impeditur effluxus.

§. 279.

Aquam vi gravitatis comprimere corpora, si ex contactu excludatur, perinde ac aerem (§. 63.), hoc experimento evincitur. Si orbis orichalceus GF intra vasculi BA ambitum ita contineatur, ut aquæ per contactum non concedatur transitus, & vasculum mergatur sub Fig. 65. aqua, donec aquæ pressio excedat gravitatem orbis GF, filumque EH per tubum CD transiens & orbi in H alligatum libere permit-

mittatur; orbis GF ex vasculo minime delabatur. Quamprimum vero idem attollas, ut pressio aquæ minor evadat gravitate orbis GF; is statim a vasculo avulsus descendit.



CAP. IV.

MOTU FLUIDORUM A VI
AERIS PENDENTE.

§. 280.

Vi gravitatis aeris movetur aqua per siphones. Quod si enim orificio A aquæ immerso aerem ad C sugendo intra siphonem ABC rarefacias, perinde ac si ope antliæ rarefieri solet (§. 37.) aer externus aquam premens majori vi, quam internus resistit, eam per AB ascendere cogit, gravitatis vi propria per crus BC mox descensuram. Aer per lumen A urget aquam vi gravitatis aquæ ad altitudinem 31. pedum consistentis (§. 42.), eique ab aqua in BA resistitur in ratione altitudinis BD, quæ sit unius pedis. Erit itaque vis aquæ ab aere in crure BC ut 30. pedum. Sit altitudo BE duorum pedum; erit vis aquæ in C ut 32 pedum (§. 6.). Sed aeris resistantia in C est ut 31 pedum (§. 42.). Ergo vis aquæ major, quam
aeris

aeris resistentis. Fluit adeo aqua per siphonem, quamdiu altitudo cruris BC excedit altitudinem cruris BA, moveturque celerius; si differentia DE altitudinum EB & DB major.

§. 281.

Cum per siphones exiguae altitudinis & amplitudinis etiam in vacuo fluat aqua; dubium videri poterat, num motus aquae in siphone gravitati aeris sit adscribendus. Enimvero dubium removit Philosophus, usus siphonibus majoribus & hydrargyro loco aquae.

§. 282.

Aeris elater intenditur compressione (§. 47.). Quamobrem si in vase cylindrico æneo AB DC aer super aqua partem superiorem replens ope antliae pneumaticae comprimatur; aperto epistomio IG aqua per tubum BH Fig. 67. salit, altitudine saltus continuo imminuta, quia aeris elasticitas continuo minuitur, dum per majus spatium in vase aqua absente dilatatur. Loco huius vasis fieri solet globus, in quo aer solo oris flatu comprimitur: quem *pilam Hero-*
nis vocant.

§. 283.

Aer quoque comprimitur in fonte *Heronis* ADPO in vasa NOPM vi gravitatis aquæ in Fig. 68. tubo GSH contentæ & sic aquam ex vase ADCB nisu per tubum ML continuato per tubulum LI ad ascensum cogit.

§. 284.

Aeris elasticitas intenditur vi caloris (§. 48.): Underarefactus in vase IB per candelas accen- Fig. 68. fas, dum se per tubum KL expandit, aquam in vase per tubum EF salientem reddit.

FINIS PHILOSOPHIÆ EXPERI-
MENTALIS.

IN-

INSTITUTIONES
PHILOSOPHIÆ
NATURALIS,
SEU
P H Y S I C Æ.

IN-

INSTITUTIONS
PHILOSOPHY
NATURAL
AND
PHYSICAL



INSTITUTIONES PHILOSOPHIÆ NATURALIS

PROLEGOMENA.

§. 1.

P*hilosophia naturalis* seu *Physica* est scientia rerum naturalium, hoc est eorum, quæ per essentiam & naturam corporum fieri possunt.

§. 2.

Reddenda igitur in physicis est ratio ex structura organicorum & textura ac mixtione inorganicorum atque regulis motus, juxta quas vires modificantur (§. 73. *Cosmol.*).

§. 3.

Nimirum per structuram organica, per texturam & mixtionem inorganica ad varias mutationes disposita sunt. Ut hæc potius, quam altera ad actum deducatur, opus est causa externa, quæ cum mediante motu agat, regulis motus convenienter agit.

§. 4.

Ut in *Physica* vero progrediamur tramite, abstinendum est ab hypothesibus fictitiis atque

que precariis, & principiorum loco utendum est observationibus ac experimentis nec admittendum, nisi quod ex istis concluditur.

§. 5.

Quodsi vero observationes & experimenta non sufficiunt nisi ad conjectandum, hypotheses admittuntur, quatenus observationibus & experimentis ulterioribus ansam suppeditare possunt, quibus ad veritatem liquidam pertingimus.

§. 6.

Ideo quoque Philosophiam experimentalem præmisimus, ut principia hinc petere liceret.



PARS I.

DE CORPORIBUS EORUMQUE
AFFECTIONIBUS IN GENERE.

CAP. I.

DE PROPRIETATIBUS
CORPORUM GENERALIBUS.

§. 7.

Corpus ob materiam ex qua constat, extensum est (§. 33. *Cosmol.*), atque adeo divisibile (§. 63. *Ontol.*). Dividitur autem materia in par-

particulas incomprehensibiliter exiguas. Confirmatur istiusmodi divisio observationibus microscopiis animalculorum præsertim microscopiorum, hoc est, oculo nudo non conspicuorum. Sane *Franciscus Tertius de Lanis* in Magisterio naturæ & artis Tom. I. fol. 2. autor est, *Eustachium Divinum* per microscopium, quod corpus auget in ratione 294207 ad 1, vidisse animalculum, quod vix minutissimæ arenæ granulum adæquabat, ut adeo spatium, quod minutissimæ arenæ granulum replet, capere possit fere ter mille animalcula, quorum corpus ex plurimis organis componitur. Plura huc spectantia in scriptis *Leenwenhækianis* occurrunt.

§. 8.

Subtilitas materiæ a natura divisæ clarissime hinc quoque elucet, quod per excellentissima microscopia in corporibus mixtis veluti metallis, non distinguamus, nisi particulas mixti, nequaquam vero principia, ex quibus componuntur.

§. 9.

Particulæ miscibilium unitæ componunt corpusculum mixti. Istiusmodi corpuscula combinata corpus mixtum constituunt.

§. 10.

Corpora mixta inter se differunt vi observationis communis. Corpuscula igitur, quibus

ag.

aggregatis & combinatis constant (§. 9.), inter se differre debent (§. 29. *Cosmol.*). Atque adeo interstitia in corporibus dantur vacua ab ea materia, ex qua constant, in extenso enim continuo nulla datur partium differentia, cum in eo tantum partes possibiles concipiantur non vero actuales. Immo horum interstitiorum existentiam a posteriori jam confirmavimus (§. 253. *Phil. exper.*).

§. II.

Minima interstitia, quæ inter particulas corpusculorum mixti & ipsa hæc corpuscula intercedunt, esse prorsus vacua, ex diversa corporum gravitate specifica intulit *Lucretius* lib. I. de natura rerum p. m. 57, in hypothesis plenam eandem esse debere gravitatem plumbi & lanæ ratus, si utriusque eadem fuerit moles. Facile autem apparet, quod supponat omnem materiam esse gravem: cujus contrarium infra patebit.

§. 12.

Quod si illa interstitiola ponantur ab omni prorsus materia vacua, nulla datur ratio, cur hac potius figura præditæ sint particulae, quam alia, ut adeo *vacuum disseminatum*, hoc est, minimis corpusculorum poris interspersum, per principium rationis sufficientis excludatur (§. 8. *Ontol.*).

§. 13.

Ut autem in pleno oriatur figurarum diversitas

fitas, materia diversis motibus agitata concipi debet: in pleno enim quiescente nulla datur figurarum diversitas, cum in eo non habeant locum nisi partes possibiles.

§. 14.

Unde jam patescit differentia inter corpus physicum & corpus mathematicum. Corpus mathematicum est extensum continuum, quod non habet partes nisi possibiles; physicum vero est extensum poris interruptum, quod partes habet actuales.

§. 15.

Distinguenda vero est in corpore physico *materia coherens*, quæ una cum eodem movetur & impetum facit a *materia interlabente*, quæ cum corpore non movetur & in conflictu perinde se habet, ac si non adesset. Etenim ob plenitudinem (§. 12.) sub æquali volumine eadem materiæ quantitas absolute considerata continetur: sed duo corpora mole æqualia & eadem celeritate lata non eundem impetum faciunt, si diversæ fuerint gravitatis specificæ. Non itaque omnis materia una cum corpore movetur & impetum facit. Unde perspicuum est, non omnem esse coherentem, sed aliquam esse interlabentem.

§. 16.

Quoniam materia interlabens non una cum
(*Thüm. Instit. Phil. nat.*) B b cor-

corpore movetur (§. 15.), per poros ejuslibere moveri debet, instar aquæ per cribrum aut rete intra eam motum transfluentis.

§. 17.

Exiguitas pororum istorum, quos nec per optima telescopia detegere licet (§. 293. *Phil. exper.*), subtilitatem materiæ interlabentis loquitur.

§. 18.

Materia cohærens est vel *constans*, ex qua corpus constat, vel *variabilis* quæ in poris majoribus stagnat, veluti aër, aqua &c.

§. 19.

Unde apparet, mutationem accidere essentialem, si materia constans mutatur, veluti si mixtum resolvitur in sua principia: accidentalem vero, si variabilis vel interlabens mutuatur.

§. 20.

Quicquid igitur corpori competit, hujus ratio vel a materia cohærente constante, vel a variabili, vel denique ab interlabente petenda.

§. 21.

Materia interlabens cum in sensus non incurrat (§. 15.), non nisi ratione investigatur, quatenus ad phænomena explicanda sumi debet.

§. 22.

Differentia corporum ex diversa partium
(§. 29.

(§. 29. *Cosmol.*) & quidem materiæ cohærentis constantis (§. 18.) atque inde ortorum corpusculorum combinatione enascitur, arte pariter & natura suffragante: ut adeo mirum videri nequeat, sola figurarum, molis ac situs mutatione corpus in aliud diversæ speciei abire, cujus rei plura exempla in medium profert *Robertus Boyle* in Tractatu de origine formarum.

§. 23.

Has mutationes qui perpendit, dari in rerum natura intelliget materiæ quandam quantitatem, quæ instar vertummi alicujus in varias formas continuo mutatur. Ita plantæ & gramina degenerant in carnem & ossa animantium: caro pecudum in carnem & ossa hominum. Materia cohærens corporis humani transpirans denuo in auram abit & cum rore ac pluvia in terram præcipitatur, ut iterum in plantis nutriendis absumatur. Experimentum instituit An. 1677. *Dodardus* Medicus Gallus, cujus corpus sub initium jejunii quadragesimalis erat 116. librarum uncia unius; sed modico pane cum aqua pastum, sub finem ejus non nisi 107. librarum & unciarum 12, ita ut intervallo 46. dierum fere decimam quartam materiæ cohærentis partem amisisset, 9. dierum spatio denuo recuperatam, cum corpus largius pasceret.

§. 24.

Quodsi mixtiones nulla habetur ratio, in corpusculis, ex quibus corpora constant, non distinguitur nisi figura, moles ac situs, ut adeo omnis mutatio ad partium quarundam ablationem, vel novarum accessionem, vel jam præsentium additionem redeat. In primo casu corpus evadit minus, in altero majus: in utroque mutatur plerumque ejus figura, quæ eadem non manet, nisi partes circum circa vel eodem modo auferuntur, vel apponuntur. In partium transpositione aut simile succedit simili, aut dissimile. In priori casu figura non mutatur: mutatur autem in posteriori.

§. 25.

Quodsi mixtionis una habetur ratio, principia quædam mixti vel secedunt, vel alia superaccedunt, materia in casu utroque speciem variante. Manet autem eadem materiæ species, si principiis secedentibus similia succedunt & eadem quidem proportionem.


§. 26.

Hactenus laborarunt Physici de numero materialium simplicium determinando, ex quibus cum ipsæ non ex aliis misceantur, omnes, quæ prostant, ceteræ per mixtionem prodeunt: sed, ut videtur, incassum. Immo cum non modo minima corpuscula, quæ per ex-
qui-

quisitissima microscopia discernuntur, sint mixta, verum etiam complures in rerum natura dentur materiae visum nostrum effugientes, veluti aer, materia luminis, materia calorifica seu ignis elementaris, materia gravifica, materia magnetica &c. testibus experimentis (§. III. 141. 216. *Phil. exper.*); probabile non est, quod vel sensu, vel ratione numerus materialium simplicium, quas *elementares* vocant, unquam sit definiendus.

§. 27.

Quamdiu vero materiae elementares latent, ut omnium in physicis reddatur ratio mechanica, a partium figura, mole ac situ petita, fieri non potest, sed subinde acquiescendum in causis physicis, quarum ratio mechanica latet.



CAP. II.

DE DIFFERENTIA CORPORUM A MATERIA COHÆRENTE CONSTANTE PROPECTA.

§. 28.

Cum differentiam corporum, quæ a materia coherente proficiscitur, scrutamur, vel ad mixtionem materialium simpliciorum, vel ad combinationem resultantium ex eadem corpusculorum attendimus. Materiae miscendæ minutissime debent esse divisæ, an-

tequam miscentur: unde particulæ differunt figuris atque mole hisque convenientem situm in mixtione nascuntur. Ceterum in resolutione mixti non opus est, ut usque ad partes elementares progrediaris (§. 26.): sufficit resolvere corpuscula, ex quibus corpus constat, in suas massas simpliciores, ex quibus illa miscentur. Immo subinde ne mixtionis quidem habenda est ratio: sed sufficit in corpusculis ut acquiescamus. In organis sæpissime nec ac corpuscula usque progredi opus est, sed, in partium majorum figuris, mole, & situ subsistere possumus. Nimirum eo usque progredimur in corporum analysi, donec perveniatur ad rationem ejus, quod quæritur.

§. 29.

Si partes combinantur, aut superficies omnes in contactu congruunt, aut non congruunt. Quodsi plana omnia contingentia ita congruerent, ut extensum nasceretur continuum & partes actuales degenerarent in possibiles, corpus foret *absolute durum* carens interstitiis ab ea materia vacuis, ex qua constat. In casu opposito relinquuntur interstitiola vacua a materia corporis constante. Distinguenda autem sunt interstitiola in corpusculis, in quibus materia interlabens locum habet ab interstitiis in corporibus, quæ materia variabili, replentur.

§. 30.

§. 30.

Corpus igitur differt densitate ab alio, si numero interstitiolorum præsertim majorum, vincit alterum, & rarum appellatur, si interstitia in sensus occurrunt.

§. 31.

Aurum omnium materialium terrestrium densissimum (§. 22. *Phil. exper.*): nec tamen interstitiis sive poris destitutum (§. 253. *Phil. exper.*). Nulla igitur materia absolute densa in earum numero habetur, quæ in globo nostro terraqueo sub sensum cadunt. Nullam vero prorsus materiam absolute densam in universo locum habere posse, ex communicatione motus liquet, quæ in absolute densis impossibilis (§. 57. & 71. *Cosmol.*).

§. 32.

Si materia coherens corporis apparet densa, sed interstitiis seu poris admodum patulis distincta, veluti in spongia vel pumice, *corpus* dicitur *porosum*. Fieri adeo potest, ut per microscopia porosum appareat, quod nudis oculis densum videri. Exemplo est cortex ligni.

§. 33.

Quod si molecule corporis ad arctiorem contactum promoveantur, veluti si comprimatur, ut ad minorem molem redeat; ex raro fit densum. Idem contingit, si interstitiola

materia cohærente repleantur. Atque sic porro intelligitur, quando corpus densum evadat raram.

§. 34.

Si particulæ corporis difficulter cedunt tactui, ut difficilis earum ab invicem sit separatio; corpus *durum* dicitur. Et si autem molecularum majorum cohæsiō perinde ac partium majorum a figura pendeat, nec exiguum quoque momentum in plani contactus magnitudine positum sit, experientia suffragante; ut tamen sufficiens habeatur cohæsiōnis ratio, tandem in nisu conspirante, hoc est, æqualia sed secundum directiones contrarias facto subsistendum: cujus rei exemplum marmorum politorum cohæsiō in corporibus majoribus præbet (§. 63. *Exper.*).

§. 35.

Pendet autem potissimum diversitas firmitatis corporum duorum a figura & plano contactus atque inde multiplex enascitur corporum durorum differentia, ita ut e. gr. corpora alia sint fissibilia, alia friabilia, alia fragilia &c.


§. 36.

Si moleculæ corporis in sensum incurrentes fuerint valde exiguæ, corpus vocatur *tenuē*; si majores fuerint, *crassum*. Unde fieri potest, ut per microscopia crassa appareant, quæ nudis oculis tenuia videntur (§. 193. *Phil. exper.*).

§. 37.

§. 37.

Si in superficie corporis molculæ quædam eminent ultra intermedias, *corpus asperum est*; si molecularum superficies in corporis superficie sitarum continuæ appareant, *corpus læve est*. Asperum igitur fit læve eminentiis vel abrais, vel intra cavitates intermedias depressis, vel cavitatibus intermediis alia materia oppletis & contra.



CAP. III.

DE DIFFERENTIA CORPORUM A MATERIA COHÆRENTE VARIABILI ET INTERLABENTE PROPECTA.

§. 38.

Cum materia cohærens variabilis & interlabens in poris constantis & interlabens in poris variabilis contineatur (§. 16. 18.); mutationes vel ab augmento, vel a decremento, vel a permutatione proficisci debent, quæ a materia variabili & interlabende pendent.

§. 39.

Si quantitas materiæ variabilis & interlabentis augetur; corpus intumescit; si vero decrescit, detumescit.

§. 40.

Quod si ea fuerit quantitas, ut materiæ con-

stantis particulæ a mutuo contactu divellantur; corpus est *fluidum*. Ita fluiditas plumbi lique facti perinde ac aquæ a colore pendet. Neque hic habenda est ratio figuræ; secus enim aqua non abiret in glaciem, solo calore expulso (§. 122. *Phil. exper.*).

§. 41.

Cum adeo corpuscula fluidorum actu a se invicem disjungantur, licet ipsi oculo armato continuum quoddam mentiantur, ob suam exilitatem & materiæ interlabentis vel variabilis subtilitatem; mirum videri non debet, quod fluida solidis in iisdem motis facile cedant, & pars una ab altera facile separetur, v. gr. gutta aquæ a massa reliqua sola vi gravitatis, immo quod illa figuram vasis ambientis cujuscunque assumat.

§. 42.

Quoniam materia interlabens & variabilis poros corporum replet, eorumque figuram assumit (§. 16. 18.); partes utriusque actu a se invicem separatæ sunt, adeoque utraque materia fluida (§. 41.).

§. 43.

Corpora evadunt mollia, antequam in fluida abeunt, vel cera teste. Immo ferrum candens a duritie ad molitiem accedit, ut vi percutienti facilius cedat, & ob molitiem vitrum flexile & tractile evadit, antequam li-
qua-

quatur. Unde colligitur *corpus* esse *molle*, si fluidum interlabens vel variabile non prorsus a contactu separet corpuscula materiæ cohærentis constantis, etsi inter planum contactus se se insinuet.

§. 44.

Quodsi ergo materia interlabens corpori semper eadem quantitate insit, nec fieri possit, ut augeatur ulterius; corpus in statu mollitiei persistit, nec in fluidum degenerat.

§. 45.

Cedunt autem mollia facile tactui, quia partes jam ex parte a se invicem separatæ non nisi leviter cohærent.

§. 46.

Corpora mollia redduntur dura, si materia interlabens, vel variabilis ex plano contactus corpusculorum quomodocunque excludatur, v. gr. frigefaciendo, si fuerit calor; evaporando, si aqua (§. 43.), comprimendo, si interlabens ubique præsens (§. 44.).

§. 47.

Quoniam vero determinata quantitas materiæ variabilis requiritur ad determinatum mollitiei gradum corpori conciliandum; corpus molle admixta majore quantitate materiæ constantis durum evadit. Ita massa farinacea durior evadit farina admixta.

§. 48.

§. 48.

Cum calor consistat in motu peculiaris cujusdam fluidi subtilis ex uno corpore in aliud transeuntis (§. III. *Exper.*); corpus calidum judicatur, quod manu nostra calidus calorem contingenti impertitur: contra frigidum, quod minus calidum a contingente calorem recepit, ut adeo sensuum judicio in dijudicando calore & frigore utendum non sit, & corpus, quod uni apparet frigidum, alteri calidum videatur.

§. 49.

Ex eadem ratione liquet, calorem corporis pendere a materia interlabente: quæ si intra, poros corporis quiescit, nullus in eodem calor sentitur; si vero quocunque modo ad motum concitetur, corpus redditur calidum, etsi calorem aliunde non recipiat (§. II6. & seqq. *Exper.*).

§. 50.

Quoniam frigus in sola caloris privatione consistit (§. 120. *Exper.*); corpus calidum evadit frigidum, vel si materia calorifica seu ignis elementaris in alia corpora contigua transgreditur, vel si intra poros corporis ad quietem redigitur (§. III. *Exper.*). Illud contingit, si pori corporis fuerint patuli; hoc vero, si particulae calorificæ in corpuscula materiæ constantia impingant, nec exitus iisdem pateat & dum

dum particulæ materiæ cohærentis exhalante caloris portione quadam ad arctiorem contactum redeunt, dum nimirum calore rarefacta (§. 113. *Exper.*), frigore denuo condensantur.

§. 51.

Tamdiu igitur corpus frigesit quamdiu ex poris ejus materia calorifica in motu constituta secedit. Quamobrem cum in unoquoque corpore ejus quædam quantitas per massam ipsius diffundatur (§. 118. *Exper.*); mirum sane non est, quod & glacies, & nix majorem frigoris gradum in aëre frigidiore nanciscantur, observationibus thermoscopis testibus.

§. 52.

Pendet etiam gravitas a materia interlabente. Gravium enim motus constanter acceleratur & versus centrum Telluris dirigitur, vi observationis. Supponit igitur causam externam (§. 46. *Cosmol.*). Qui aliter sentiunt & gravitatem a causa naturali independentem imaginantur rationem potentem Numinis voluntatem unice allegantes, eam in numerum qualitatum occultarum referunt, hoc est, entium sua natura inexplicabilium, differentiam inter veritatem & somnium non capientes (§. 10. *Ontol.*)

§. 53.

§. 53.

Datur igitur in rerum natura *materia gravi-
fica* seu gravitatis effectrix; quæ cum continuo
impetum faciat in materiam, quam gravem ef-
ficat, seu cui motum versus centrum Telluris
continuo imprimit, teste gravium descendentium
motu continuo accelerato.

§. 54.

Hæc materia circum Telluris centrum cir-
cumfunditur & per integram atmosphæram ex-
tenditur, cum non modo omnis materia terre-
stris, verum etiam ipse aer gravis sit (§. 40. *Ex-
per.*); a quo adeo diversa est, ut hinc etiam in
spatio ab aere vacuo corpora gravitent.

§. 55.

Quoniam vero gravitas non superficiei, sed
massæ corporis proportionalis, utpote eadem,
quamdiu materiæ quantitas non mutatur, quo-
modocunque tandem mutetur figura, conse-
quenter superficiei magnitudo; materia gravi-
fica in exilia corpuscula impetum facere tene-
tur, consequenter minimos corporum poros
permeat, ita ut ipsum aurum respectu materiæ
gravificæ instar alicujus retis concipiendum.
Non refragari convenit rationi, etsi imagina-
tionis vires superet, quod demonstratur.

§. 56.

Materia gravifica instar alicujus Oceani concipienda, in quo omnes globi nostri terraquei materia cum atmosphæra gravitat. Motu autem perniciosissimo cieri debet, quia insigni celeritate gravia versus centrum Telluris propelluntur, & quidem in linea in se redeunte, quia spatium quod replet, non egreditur: quomodo motu rectilineo corpora gravia effici possint. Si enim motus materiæ gravificæ foret rectilineus, aut ea a centro Telluris recederet, aut ad idem tenderet. In priori casu corporibus motum imprimeret a centro versus peripheriam, ut concipi nequeat, quomodo per eandem lineam, juxta quam materia gravifica in ipsa impingit, ad centrum tendere possint. In casu posteriori materia gravifica grave una secum versus centrum raperet, adeoque ubi tandem ad ipsum pertingeret, ab altera parte vel ultra centrum versus peripheriam tenderet, vel vi æquali ad quietem redigeretur: quod utrumque gravitati adversum, quæ immutata per omne ævum subsistit.

§. 57.

Hugenius in discursu de causa gravitatis p. 132. motum materiæ gravificæ experimento illustrat. Vitrum cylindricum, cujus diameter 8 vel 10, altitudo 4 vel 5 circiter digitorum aqua

qua adimplevit, frustulis ceræ Hispanicæ injectis & operculo optime munitum atque orbi plano affixum ope machinæ celeriter in orbem egit. Cum fundus esset planus, frustula ceræ versus peripheriam recedebant. Postquam igitur aqua motum circularem fuerat nacta, subito motum cohibuit vitri: quo facto, aqua circulationes suas continuans frustula ceræ Hispanicæ versus centrum fundi propellabat, ibidem in Hæmisphærium cavum congregata, frustula ceræ Hispanicæ materiam gravem ad motum æque celerem ineptam, aqua vero materiam gravificam motu celeri agitatam repræsentat.

§. 58.

Quodsi materia gravifica eam, quam gravem efficit, versus centrum Telluris propellere debet vi experimenti Hugeniani (§. 57.), in circulis moveatur necesse est, quæ per centrum Telluris transeunt, hoc est, ut cum Mathematicis loquamur, in circulis sphæræ maximis: qui motus quomodo in eadem conservari possit, nunc non disquiremus. Sufficit causas proximas agnosci, etsi lateant remotiores.

§. 59.

Denique & elasticitas materiæ cuidam interlabenti tanquam causæ tribuenda. Etenim corpus tum demum exserit vim elasticam,

cam, quando comprimitur, adeoque materia quædam ex poris ipsius minimis excluditur. Quoniam vero cessante vi comprimente in situm pristinum restituuntur partes compressa, materia poris exclusa denuo eosdem subire debet. Qualis autem sit textura corporis, ut materia ista interlabens ex poris compressione excludatur, & cessante compressione sua quasi sponte in eos rursus se se insinuet; nunc quidem inquirere superfedemus.



PARS II.

DE MUNDO UNIVERSO.

CAP. I.

DE CORPORIBUS MUNDI TOTALIBUS IN GENERE.

§. 60.

Qui mundum contemplaturi in sensuum judicio adquiescunt, corpora totalia, ex quibus mundus componitur in terram, Solem, Lunam & Stellas dividunt.

§. 61.

Stellarum aliæ eandem constanter a se invicem distantiam servant; aliæ ab occasu versus ortum ad alias aliasque progrediuntur. Illæ dicuntur *fixæ*; hæ vero *Planetae*.

(Thüm. Inst. Phil. nat.)

Cc

§. 62.

§. 62.

Planetæ nudo oculo conspiciuntur quinque, Saturnus, Jupiter, Mars, Venus & Mercurius. Saturnus 30, Jupiter 12, Mars 2. annorum intervallo ad idem cæli punctum redit: Venus & Mercurius una cum Sole annuo spatio periodum suam absolvunt.

§. 63.

Per telescopia circa Jovem conspiciuntur Satellites quatuor, diverso ab eodem intervallo distantes & diversis periodis circa eum in orbem redeunt, circa finem An. 1709. primum a *Simone Mario*, Marchionum Brandenburgensium in Franconia Mathematico, mox sub initium anni 1710. a *Galileo* quoque visi & in Nuncio fidereo Astronomis annunciati.

§. 64.

Per telescopia meliora circa Saturnum quinque satellites istiusmodi deteguntur, quorum unum *Hugenius* An. 1655. primus vidit, ceteri a *Cassino* & hoc demum seculo in Anglia quoque per telescopium 125. pedum Hugonii manu elaboratum a *Jacobo Pound* aliisque visi, cum veritas observationum *Cassinianarum* fere in dubium vocaretur.

§. 65.

Numerus fixarum ingens est. *Ptolomæus* in Catalogo fixarum 1026, *Hevelius* 1888, *Johannes*

Johannes Flamstædus 2604. in ordinem redegit. Per telescopia longe plures apparent. Sane *Galileus* in nebulosa Orionis 21. in Cancro 36. in plejadibus 40. in cingulo Orionis 80. & in aliquatantum Orionis parte 500. numeravit. Immo *Hevelius* in Prodomo Astronomiæ c. 8. f. 119. jam monuit, fieri non posse, ut stellæ telescopicæ in ordinem redigantur, cum continuo plures appareant, quo excellentius fuerit telescopium.

§. 66.

Fixarum magnitudo non eadem apparet; ut jam veteres, ceu ex *Almagesto Ptolomæi* Lib. 7. c. 5. fol. 164. & seqq. constat, in sex classes easdem ratione magnitudinis distinxerint. Enimvero dudum observavit *Hugenius* in *Cosmotheo* Lib. 2. p. m, 114. per optima telescopia ipsas fixas primi honoris, veluti *Sirium*, puncta individua apparere. Cumque *Hevelius* magnitudinem apparentem suo tempore multo diversam deprehenderit ab ea, quam veteres assignarunt, in Prodomo Astronomiæ c. 8. f. 120. suspicatur, eam successu temporis immutari.


§. 67.

Majoris momenti observatio est, quod stellæ quædam fixæ olim continuo conspicuæ nostro ævo prorsus disparuerint, cujus rei exempla afferunt *Hevelius* in Prodomo Astronomiæ

c. 8. f. 122. *Montanarius* in Transactionibus Anglicanis Num. 73. p. 2202. & *Cassinus* ibidem p. 2201. Nec minus notatu dignum est, novas quasdam in cœlo apparere, quæ antea non adfuerant.

§. 68.

Dantur etiam fixæ, quæ apparitionis & disparitiones vicissitudines constantes subeunt. Huc pertinet stella in collo cygni, cujus periodum *Godofredus Kirchius* in Miscellaneis Berolinensibus p. 208. & seqq. determinavit 404½ dierum, itemque stella *Mira* in eodem collo cygni, cujus Historiolam *Hevelius* Mercurius in Sole viso subjunxit f. 146. & seqq. Notari meretur, stellas hæc, cum oculo nudo nondum vel non amplius videntur, posse tamen circa initium apparitionis & paulo post finem disparitionis per telescopia videri.



CAP. II.

DE SOLE.

§. 69.

Solem lucere atque calefacere, communis experientia loquitur; quod vero luminis solaris condensati ejusdem sit, qui ignis effectus, specula & lentes causticæ apertissime demonstrant (§. 127. *Exper.*). Quoniam vis luminis solaris cum distantia a Sole continuo de-
cre-

crescit ob divergentiam radiorum; dubio caret, dari aliquam a Sole distantiam, ubi luminis idem est effectus, qui ope speculorum & lentium causticarum detegitur. Patet itaque Solis substantiam igneam esse.

§. 70.

Ab eo autem tempore, quo telescopia ad cæli contemplationem adhibuerunt, maculæ in Sole sæpius observatæ, primo omnium loco detectæ a *Johanne Fabricio*, *Davidis* filio, initio Anni 1611. mox mense Majo etiam visæ *Christophoro Scheinero* & anno sequente *Galileo*. Quoniam cum Sole occidunt & oriuntur, etsi locum in disco Solis mutant; jam *Fabricius* in Narratione de Maculis in Sole observatis & de apparente earum cum Sole conversione inde intulit, eas Soli admodum esse vicinas, nisi ipsi disco inhæreant. Hoc vero ulterius confirmatur, quod *Kirchius* Lipsiæ & *Cassinus* Parisiis eandem maculam An. 1684. a die 26. April. & die 7. Jul. non obstante locorum distantia in eadem disci solaris parte observarint: immo quod An. 1701. mense Novembri eadem maculæ observatæ *Pekini* in China a R. P. *Jartoux* & *Montepessulano* in Gallia a *Cassino* juniore. Quoniam maculæ istæ partes sunt nigricantes, figuræ irregularis, molis admodum diversæ earumque cum figura tum moles valde mutabilis,

quoniam præterea duratio admodum diversa & plures in medio disci subito oriuntur, plures ibidem subito occidunt, nunc una macula dissolvitur in plures, nunc plures coeunt in unam, adeoque eadem de maculis solaribus, quæ de nubibus in atmosphæra nostra annotantur: his omnibus penitatis, jure merito infertur, maculas solares ex! exhalationibus solaribus instar nubium concreescere iterumque dissolvi, consequenter Solem non esse ignem purum eundemque mutationibus esse obnoxium.

§. 71.

Quoniam vero maculæ continuo in disco Solis progrediuntur & in limbo disparentes 15. circiter dierum intervallo post ipsum latent, mox in limbo opposito redeunt, jam primus observator *Fabricius* motum vertiginis Solis ab occasu versus ortum intervallo 27. circiter dierum absolvendum inde collegit. Et quoniam biduo fere ulterius latent, quam in disco Solis conspiciantur, aliquo intervallo a Sole distare intelliguntur: unde porro atmosphære solaris existentia patet, Solisque figura globosa.

§. 72.

Sol lucet atque calefacit (§. 69.). Explicandum igitur quomodo lucem diffundat & quomodo calefaciat, cum in Physica reddenda sit ratio eorum, quæ fiunt (§. 2.).

§. 73.

§. 73.

Lumen incomprehensibile prorsus celeritate propagatur. Nam etsi Luna 56. semidiametris terrestribus, hoc est, 48160. miliaribus germanicis magnis a terra distet; in eclipsibus tamen Lunæ totalibus sine mora lumen ipsius in instanti redditur, postquam in umbram Telluris tota fuerat immerisa, ut adeo in conficiendo spatio 48000. miliarium germanicorum tempus insensibile consumat: uade *Cartesius* instantaneam luminis propagationem intulit. *Ræmerus*, referente & probante *Hugenio* in Tractatu de Lumine cap. i. p. 7. & seqq. ex eclipsibus Jovis collegit, lumen per diametrum orbis annui seu duplam distantiam Solis a Terra, quæ juxta *Cassinum* atque *Flamstadium* 22000. semidiametrorum terrestrium seu 37840000. miliarium germanicorum, intervallo 22. secundorum, adeoque unico minuto secundo, quod vix unico arteriæ pulsui sufficit, per spatium 2866. miliarium germanicorum moveri: ut taceam *Newtonum* Opticæ lib. 2. P. 3. prop. II. p. m. 77. spatium 22. minutorum ad 7. vel 8. tantum, minuta contrahere, quo ipso motus luminis triplo celerior redditur, ita ut intervallo unius secundi minimum per spatium 84000. miliarium germanicorum propagetur. Enimvero cum *Cassinus* in Commentariis Acad. Reg. Scient. An. 1717. p. 330. osten-

derit, distantiam fixarum a terra esse plusquam 43700. vicibus majorem diametro orbis annui; immo apud Astronomos in confesso sit, hanc respectu distantiae fixarum evanescere & puncti instar habendam esse; celeritatem luminis multo majorem esse debere claret, quam *Ræmerus* docuit, ut stellæ orientalis lux ad oculum nostrum pertingere possit.

§. 74.

Propagatio luminis immensæ fere celeritatis clarissime loquitur lumen non esse substantialem quendam effluxum ex corpore lucido; sed per medium fluidum propagari debere, quod per totum universum quaquaversum diffunditur, motu a lucido impresso.

§. 75.

Motus celerrime propagatur sine diminutione per seriem globorum elasticorum æqualium in directum sitorum & se mutuo contingentium. Quodsi enim omnibus quiescentibus in primum occurat globus æqualis celeritate quacunque, is post impactum quiescit & omnibus intermediis quiescentibus extemplo resilit ultimus incurrentis celeritate.

§. 76.

Materia igitur, quæ vehiculo luminis infer-

servit & ætheris nomine insignitur, cum Cartesio bene concipitur globulosa, sunt autem globuli isti statuendi æquales & elastici.

§. 77.

Experientia non minus confirmat, unicum globum elasticum facto a pluribus una impetu, diversis motibus per diversas series una propagandis inservire: quo ipso patet, admissis æthere ex globulis æqualibus & elasticis constante (§. 76.), concipi posse, quomodo per exiguum foramen plurima lumina diversa citra confusionem se mutuo intersecare queant.

§. 78.

Elasticitas pendet a materia subtili, quæ poros corporis elastici subit. Globuli igitur ætherei poris instruuntur & fluido ipsis multo subtiliori innatant.

§. 79.

Sol itaque cum sit igneus (§. 69.), lumen producit atque diffundit, quatenus globulis æthereis contiguis motum admodum celerem imprimunt particulæ ignis celerrime agitatae.

§. 80.

Lumen Solis ex radiis heterogeneis gradu refrangibilitatis a se invicem differentibus componitur (§. 160. *Exper.*), ita ut nascatur ex confusione luminum simplicium, quæ il-

lorum colorum sensum causantur, qui ex refractione in prisma trigono gignuntur (§. 155. & seqq. *Exper.*). Quoniam itaque lumen consistit in motu ætheri impresso (§. 79.); differentia luminis vel a materiæ quantitate, vel a celeritatis diversitate pendet. Unicus globulus æthereus diversis luminibus propagandis una inservit (§. 77). Pendet igitur a diversitate celeritatis: id quod hac observatione confirmatur. Solem occasui proximum contuitus si mox oculos firmiter claudas, imago Solis aliquoties sed diversis coloribus tincta recurrit, antequam prorsus evanescat. Sed motus fibrillis nerveis aut fluido in ipsis contento impressus successive lentior evadit, antequam prorsus expirat. Quare cum ad motum celeriores vis major, ad tardiores vis minor requiratur, vim luminis diversam requiri patet ad sensum diversorum colorum excitandum. Æther igitur vires ut diversas acquirat, diversa celeritate agitari debet, ob diminutam enim materiæ quantitatem tantum debilitatur lumen (§. 158. *Exper.*).

§. 81.

Corpora lumine collustrata apparent colorata, quia non omnes radios reflectunt, sed saltem aliquos v. gr. rubra non nisi radios rubificos. Vi observationum microscopica-
rum

rum non ægre admittitur, corpuscula, ex quibus corpora componuntur, esse pellucida atque cava. Quamobrem luminis compositi radius incidens in corpusculum in ingressu refringitur & ob diversam radiorum simplicium refrangibilitatem (§. 160. *Exper.*) simplices a se invicem separati ad diversas partes superficiei interioris posticæ deferuntur. Ob diversum adeo partium illarum, tum ipsum etiam corpusculi situm, radii alii in interiora corporis reflectuntur, alii vero extus propagantur colorem ejus efficientes.

§. 82.

Cum lumen sit motus per fluidum quoddam subtilissimum propagatus (§. 79.), qui ipsos corpusculorum poros subit; corpora radiis solaribus exposita calefiunt, quatenus radii in interiora corporum reflexi ignem elementarem intus latentem ad motum celerrimum cient (§. 118. *Exper.*): id quod fieri posse mirum non est, cum æther ab igne habeat motum impressum (§. 79.).

§. 83.

Hinc quoque mirum non est, corpora obscura Soli exposita magis calefieri, quam alba & colore illustri prædita, quoniam illa plurimum luminis in corporis interiora, hæc vero extus reflectunt.

CAP. III.

DE LUNA ET PLANETIS.

§. 84.

Luna in eclipsibus solaribus inter oculum & solem posita instar disci nigri apparet. Est igitur corpus opacum & densum, pelluciditate destitutum, cum pellucida inter oculum & luminosum constituta clareant, testibus orbibus fenestrarum vitreis.

§. 85.

Habet autem lumen a Sole testibus phasibus, cum ea tantum pars plendeat, quæ Soli opponitur & in eclipsibus lunaribus lumen desit, ob terram inter Solem & Lunam diametraliter interpositam.

§. 86.

Omnes partes eodem lumine Solis collustratæ non eundem splendorem concipiunt, ut ideo facies lunæ appareat maculosa. Lumen igitur diversimode reflectunt, consequenter heterogeneæ sunt.

§. 87.

Si lunæ crescentis vel decrescientis faciem per telescopium contemplemur, partes quasdam a limite illuminationis in disci parte obscura distinctas illuminatas conspiciamus, manifesto indicio, eas esse ceteris altiores, hoc est, ultra super-

perficiem Lunæ eminere, consequenter montes. Est enim mons pars corporis totalis ingens ultra reliquam ejus superficiem eminens. Observationes accuratissimas vide apud *Hevelius* in *Selenographia*.

§. 88.

Notatu vero dignum est, dum Lunam per telescopium contemplamur, quod linea illuminationis sit arcus circularis in maculis, sed extra easdem veluti ferratus aut, si mavis, irregulari quadam ratione hinc inde interruptus: ut adeo appareat, partes maculosas, quæ parcius lumen reflectunt (§. 86.), habere superficiem æquabilem, consequenter ea specie apparere, qua maria nostra e Luna se spectanda præberent. Equidem *Hugenius* in *Cosmotheoro* Lib. 2. p. m. 98. neget esse maria, quod per telescopia excellentiora quandam in iis cavitatem umbrosam sibi videre visus fuerit; enimvero observatio ista ab aliis nondum confirmata.

§. 89.

In eclipsibus Solis totalibus memorante *Keplero* in libello de nova stella Serpentarii c. 23. p. 115. annulus lucidus circa Lunam apparet, limbo Lunæ concentricus & caloris quasi argentei: quod plurimorum observationibus An. 1706. & *Halley* aliorumque An. 1715. confirmatum, testibus *Actis Eruditorum* An. 1706, p. 335. *Comment. Academ. Reg. Scient.* An. 1706. p. 119.

p. 119. 148. Transactionibus Anglicanis Num. 343. p. 249. Cum adeo circa Lunam sit fluidum eidem circumfufum, cujus raritas cum distantia a centro crefcit & quod lumen Solis foriter ad nos reflectit, atmofphæra corpus hoc mundi totale perinde ac Tellurem noſtram cingi evidens eſt: cujus alterabilitatem obſervationes *Hevelii* probant, qui eadem cœli ſerenitate per eundem tubum in eadem altitudine & elongatione a terra Lunæ maculas nunc diſtinctius nunc confuſius apparere didicit, Comet. Lib. 7. f. 363. ceteraque confirmant, quæ lumen Solis in limbo paulo ante eclipſeos initium & in limite obſcurationis fluctuans exhibent apud *Scheinerum* in Roſa Urſina Lib. 4. part. 2. c. 26. fol. 740. & *Hevelium* Comet. Lib. 7. f. 365. a Domino de *Tſchirnhaufen* in eclipſi anni 1706. repetitæ. Immo huc pertinet, quod *Hallejus* & *de Louville* A. 1715. (quod in Comment. Acad. Reg. Scient. An. 1715. p. m. 126. legitur), fulgurationem in diſco lunæ Solem obtegente obſervaverint.

§. 90.

Cum Mercurius atque Venus, quando in Sole apparent, teſte *Hevelio* in Tractatu de Mercurio in Sole viſo, inſtar maculæ obſcuræ appareant, & maximo apparationis tempore inſtar lunæ crefcentes ac decreſcentes phaſes
per

per telescopia ſpectandas adhibeant, Jupiter autem & Saturnus Satellites ſuas umbra obſcurent, immo Jupiter umbram ſuorum Satellitum terminet: de eorum opacitate nullum ſuperest dubium; ſed eos perinde ac Lunam a Sole mutuari lumen conſtat.

§. 91.

Cum *Philippus de la Hire* An. 1700. majores in Venere montes quam in Luna obſervarit; ex analogia concluditur, ceteros quoque planetas eſſe montibus inſtructos.

§. 92.

Maculæ inſtantes in Marte, Jove atque Venere obſervatæ ſæpiſſime, immo in ipsis Satellitibus ſingulari artificio, quod deſcribitur in *Comment. Acad. Reg. Scient. An. 1707. p. m. 375. & ſeqq.* a *Maraldo* & jam ante a *Caffino* & *Ræmero*, referente *Hamelio* in *Historia Reg. Acad. Scient. Lib. 2. ſect. 6. c. 1. p. m. 183.* deprehenſæ, atmophæræ alterabilitatem & aquarum exiſtentiam, unde vapores illam alterantes exſurgunt, loquuntur. Singulares autem ſunt *Maraldi* obſervationes in *Comment. Acad. Reg. Scient. An. 1720*, quarum cum obſervationibus macularum conſtantium anterioribus collatione evincitur, magnas mutationes in ſuperficie hujus planetæ non modo circa æquinoctialem, verum etiam circa polos accidiffe, quales etiam in Jove factas ob.

observarunt. Astronomi Parisini & olim in Tellure factus fossilia figurata in crusta ejus passim obvia testantur.

§. 93.

Saturnum ambit annulus, quam primus indubitatis observationibus stabilivit *Hugenius* in Systemate Saturnio, *Cassinus* senior atque junior itemque *Maraldus* uberioribus confirmarunt, testibus *Hamelio* in Historia Acad. Reg. Scient. & Commentariis Academiae ejusdem An. 1715. p. m. 13. f. 4. & An. 1716. p. m. 223.

§. 94.

Quoniam adeo extra controversiam possum est, omnes Planetas cum eorum satellitibus esse corpora telluri simillima; non vana est *Hugenii* in Cosmotheo aliorumque conjectura ab analogia petita, quod singula ista corpora suos habeant incolas.



CAP. IV.

DE STELLIS FIXIS ET COMETIS.

§. 95.

Cum Saturnus Planetarum remotissimus An. 1679. die 17. Jan. fixam \odot apud *Baye- rum* in Cornu Tauri australi texerit, observante *Kirchio* in Miscellan. Berolinenf. Part. 3. Num.

Num. 9. p. 205. & seqq. dubio caret, quod stellæ fixæ ipso Saturno remotiores sint a terra: accedit, quod per Telescopia exquisitissima, quæ mirifice augent planetas, instar punctorum individuorum appareant.

§. 96.

Quoniam lumen quoque fixarum per tubos non alteratur, qui planetas pallentes exhibent; illud multo vivacius esse lumine planetarum satis evidens est, consequenter idem a Sole minime mutantur (§. 90. 85.). Fulgent adeo proprio instar Solis (§. 69.), nec incongrue Soles appellantur, cum Sol sit corpus mundi totale lucidum, sensu generali accepta voce.

§. 97.

Hinc conficitur totalem disparitionem fixarum & novarum constantem apparitionem (§. 67.) esse maximi momenti, cum magnas supponat in istis corporibus mutationes vel in distantia a terra, vel in corporis natura, veluti dum ex opacis evadunt lucida, aut ex lucidis opaca vel in utroque: nam physicam corporum adeo vastorum dissolutionem in particulas renes per auram cœlestem dispergendas non facile quispiam admiserit, præsertim cum Jupiter & Mars magnas corporum mundi totalium mutationes confirment (§. 92.).

§. 98.

Quid sint stellæ novæ, inter quas eminent *Thonis* ævo in *Cassiopea* ab An. 1572. ad An. 1574. visa & ab eodem Progymnasmi. Astron. instituta Tom. I. c. 3. descripta, vix ulla probabili conjectura assequi licet.

§. 99.

Cometæ, qui instar Planetarum motu proprio gaudent, esse extra atmosphæram nostram, motus eorum communis circa Tellurem confirmat ad easdem leges adstrictus, quas omnis stellarum exercitus sequitur. Immo Cometa anni 1652. quem die 26. Dec. hora 9. vespertina *Hevelius* Dantisci, *Bullialdus* Parisiis, alii alibi in diversis locis cum duabus fixis in pede Persei in directum situm observarunt, docet, ipsum caruisse parallaxi, qualem Luna in eclipsibus Solis prodit, consequenter longiori intervallo, quam Luna abest, a Terra fuisse remotum.

§. 100.

Hevelio Cometogr. Lib. 8. f. 576. & *Weigelio* in Continuat. Speculi cælestis c. II. §. 5. p. 96. Cometæ per tubos pallidam faciem exhibuerunt instar nubeculæ a Sole illustratæ. Immo *Flamstedius* Hist. cælest. Lib. I. part. 3. f. 108. telescopio 16. pedum Cometam An. 1677. vidit Saturno pallidiorem, & Cometæ caput An. 1633. per telescopium 7. pedum minus distincte

Ne ipsi apparuit, quam per telescopium trium & per telescopia 16. & 26. pedum multo adhuc confusius, quam per 7. pedum. Lumen debile per tubos magis adhuc debilitatum affinitatem cum lumine planetarum, diversitatem a lumine fixarum prodit (§. 96.), ut adeo corpora hæc lumine proprio destituta a Sole illuminari concludatur. Non adeo mirum, quod Cometa An. 1450. referente *Georgio Phranza* Hist. lib. 5. c. 21. lunam plenam umbra sua obscurarit. Haud tamen diffitemur, scrupulum quendam movere Cometam nuperrimum anni 1723. qui observante *Kirchio* juniore habuit nucleum in capite instar fixæ scintillantem, etsi idem anni 1718. Cometam instar nubeculæ a Sole illuminatæ observarit.

§. 101.

Quoniam motus Cometarum proprius iisdem legibus tenetur, quæ planetis præscribuntur, ita ut Cometa magnus An. 1680. & 1681. docente primum *Dærfelio* nostrate, mox multo luculentius *Newtono* in Princip. Phil. Nat. Mathem. lib. 2. p. 480. & seqq. perinde ac Planetæ leges motus circa Solem a *Keplero* in aprium productas a *Cassino* motu satellitum Jovis & Saturni confirmatas & a *Newtono* a priori demonstratas, secutus fuerit, id quod & a ceteris factum fuisse *Hallejus* in Synopsi

cometica comprobatum dedit, nimia videri poterat nostro ævo audacia, si quis eos e numero corporum mundo coævorum eximere & cum *Keplero* in relatione Germanica de cometa An. 1607. suffragantibus *Hevelio* Cometogr. Lib. 7. fol. 352. & seqq. atque *Sturmio* in Exercitationibus Philosophiæ eclecticæ, pro nubibus cœlestibus venditare voluerit, quæ ex fortuito exhalationum e planetis prodeuntium concursu gignantur.

§. 102.

Quod vero non sæpius redeant cometæ iidem, motui valde eccentrico circa Solem tribuendum, ut non nisi longo annorum intervallo ad nostra confinia deferantur: quod cum diurno tempore accidit, reditus retardari videtur.

§. 103.

Cauda cometarum ex congerie exhalationum instar tenuis alicujus nubis constat, quoniam per eam transparent stellæ observante *Hevelio* Cometogr. Lib. 8. f. 516. Exhalationes istæ cum ex capite ascendere debeant, ingens circa ipsum atmosphæra detur necesse est, ut adeo mirum non sit, eas per radios in atmosphæra refractos in plaga a Sole averfa ab eodem illuminari.

§. 104.

§. 104.

Quia cometarum debile lumen (§. 100.), fieri non potest, ut sensu perceptibilem in Tellure effectum sortiantur. Multo minus noxium producere possunt, cum sit ipsum lumen Solis debilitatum (§. 100.).

§. 105.

Quod vero nec mali nec fausti quidpiam ter-
ricolis portendere queant, ex motu eorum
communi circa tellurem colligitur. Hoc ipso
enim naturam signi amittunt, quia fata homi-
num non sunt universalia, sed unicuique loco,
quem incolunt, particularia.



CAP. V.

DE SYSTEMATE MUNDI.

§. 106.

Keplerus in Paralipom. ad Vitellionem p. 305.
autor est, An. 1563. Saturnum occultatum
fuisse a Jove, An. 1591. die 9. Jan. Jovem a
Marte An. 1590. die 3. Octob. Martem a Ve-
nere, An. 1599. die 8. Jan. a Mercurio fuisse
tectum. Illo igitur minimum tempore Sa-
turnus remotiori intervallo a Tellure diffitit,
quam Jupiter, Jupiter remotiori quam Mars,
& Mars remotiori quam Venus atque Mer-
curius. Immo cum proprius motus Saturni
sit 30, Jovis 12, Martis 2 annorum & Venus

atque Mercurius una cum Sole periodum absolvant; Saturnum semper magis a Terra distare, quam Jovem, hunc quam Martem & ipsum denique quam Venerem atque Mercurium colligitur. Luna Solem eclipsans & omnes Planetas subinde occultans Telluri proxima est.

§. 107.

Ex phasibus Veneris atque Mercurii ab *Hevelio* in *Selenogr. Proleg. f. 68. & seqq.* descriptis evidentissime patet, utrumque Planetam circa Solem moveri. Venus enim vespertina in ortu heliaco plena facie fulget, manifesto indicio, quod longiori intervallo a Terra absit, quam Sol. In digressionem a Sole lumen ipsius decrevit & a maxima digressionem ad Solem revertentis lumen continuat sua decremmenta, ita ut in occasu heliaco falcata appareat manifesto indicio, quod tunc Sole propior sit Telluri. Mox in ortu heliaco matutino falcata redit & in digressionem maximam lumen continuo decrevit, donec plena facie fulgeat, qua in occasu heliaco matutino gaudet, certissimo sane argumento, quod tunc longiori intervallo quam Sol a Tellure moveatur. Hinc manifestum est, eum circa Solem moveri, ita tamen, ut ambitu suo Tellurem minime comprehendat, quoniam Soli nunquam opponitur, Tellure inter utrumque fidus constituta. Eadem pari modo de Mercurio patent. Quoniam vero

Vo

Venus longius a Sole digreditur Mercurio, Veneris orbita orbitam Mercurii comprehendit.

§. 108.

In novilunio Luna medio ponitur loco inter Solem & Tellurem, cum lumine careat pars nobis obversa & subinde Solem occultet : in plenilunio contra Terra ponitur medio loco inter Lunam & Solem. Luna igitur circa terram movetur, Sole excluso ex orbita ipsius.

§. 109.

Mars, Jupiter & Saturnus media nocte per Meridianum superiorem transire observantur, Sole in inferiori constituto, ut adeo tunc temporis Terra inter ipsos & Solem constituatur. Hoc tamen non obstante alio tempore Soli sunt adeo vicini, ut cum ipso in Meridianum deferantur, cumque plena facie fulgeant, eodem a Terra remotiores sint, consequenter Sol inter ipsos atque Terram constituitur. Moventur igitur circa Solem & Terram simul. Quoniam tamen terra inter ipsos & Solem constituta, seu in oppositione cum Sole eidem multo propiores sunt, ita ut Mars eidem octuplo propior octuplo major appareat, eorundem motus circa Solem potius, quam Tellurem ordinantur, perindie ac Venus & Mercurius circa Solem moventur (§. 107.).

§. II.

Ex motu etiam macularum innotuit astronomis, Venerem, Martem & Jovem certo horarum intervallo circa axem proprium motu vertiginis rotari: ut idem de Saturno & Mercurio inferri analogia suadeat. Enimvero cum omnes isti planetae sint corpora telluri simillima atque ad idem genus cum iisdem referantur (§. 94.); nulla apparet ratio, quæ impediatur, quo minus & vi argumentis ab analogia desumpti inferatur, Tellurem quoque motu vertiginis intervallo 24. horarum ab occasu versus ortum circumvolvi, ut cælum cum omni suo exercitu contraria ratione ab ortu in occasum circumvolvi videatur, consequenter eandem motu quoque annuo in orbita quadam instar Planetarum ceterorum (§. 107. 109.) circa Solem revolvitur, ut nobis Solem motu annuo cæli ambitum circumire videatur.

§. III.

Motus vertiginis Telluris manifesta indicia prodit imminuta prope æquatorem gravitas. Constat enim pendulum, quod Parisiis intervallo unius scrupuli secundi circuitum absolvit, prope æquatorem tardius moveri, consequenter globi gravitatem imminui eadem manente fide longitudine. Jam admissio motu vertiginis Telluris materia ad eam pertinens

nens conatum centrifugum concipit tanto majorem, quo peripheria circuli major, consequenter majorem sub æquatore & prope eundem, quam in locis ab eodem remotioribus. Cum itaque conatus centrifugus, quo a centro telluris recedere conatur materia terrestris, sit gravitati contrarius, qua ad idem propellitur, quin eundem imminuere debeat, & magis quidem sub æquatore & prope eundem, quam alibi satis patet.

§. II2.

Motus annui Telluris circa Solem non minus manifesta indicia prodit singularis in motu planetarum, irregularitas diversa ratione in Marte, ove atque Saturno & in Venere atque Mercurio inde exoriens, ita ut ipse *Ricciolus* acerrimus in gratiam aulae Romanæ systematis terræ quiescentis defensor tabulas astronomicas cum cœlo consentientes conditurus ad salvandam istam inæqualitatem nolens volens systema terræ motæ, quod *Copernicanum* vulgo appellatur, amplecti coactus fuerit: id quod ingenue fatetur *Astron. Reform. Lib. 10. c. 1. f. 353. 354.*

§. II3.

Hiscæ igitur præmissis concipere licet systema nostrum planetarium. Si enim sumamus Solem in S quiescentem & circa eum Fig. 1. describantur circuli sex, intimus orbitam

D d 5

Mer-

Mercurii, secundus ab eo orbitam Veneris, tertius Telluris, quartus Martis, quintus Jovis & sextus denique Saturni orbitam designabit. Quodsi ulterius circa terram T describatur circellus, nullam aliam orbitam interfecans; orbitam Lunæ habebis. Et eodem modo prodeunt orbitæ Satellitum Jovis & Saturni, si circa istum quatuor, circa hunc quinque circelli eodem modo delineentur.

§. 114. 1

Quoniam multo plures stellæ per telescopia quam nudo oculo apparent (§. 65.), nec omnes stellæ ejusdem magnitudinis videntur (§. 66.); probabile est, non omnes stellas fixas eandem a terra distantiam habere. Enimvero postquam *Cassinus* observavit, esse quasdam fixas, quæ certo tempore geminatae, immo triplicatae & quadruplicatae apparent, admissio motu telluris circa Solem (§. 112.), adeoque diverso positu ad fixas, pro diverso anni tempore, evidens est, stellam viciniorem occultare remotiores, consequenter alias esse aliis viciniore, alias vero remotiores.


§. 115.

Quodsi ergo ulterius cogitemus, esse fixas totidem Soles (§. 96.); qui quantum valeat in natura argumentum ab analogia petatum multis speciminibus didicit, haud ægre ad-

admittet, dari quoque circa unam quamlibet fixam systema quoddam planetarium; etsi nostro non prorsus simile. Ut enim *Keplerus* in *Epitome Astron. Copern. Lib. 1. p. 36.* scrupulum moveat, quod sic paucissimæ videri debent fixæ, constat tamen, ipsum non attendisse in determinanda distantia, ad quam videri possit corpus lucidum, non solius molis, sed potissimum intensitatis luminis habendam esse rationem, cum ob hanc videri possit, ubi ob molem visum fugit.

§. 116.

Vastissima igitur est mundi compages, ita ut ejus terminos ne ratione quidem, nedum sensu aut imaginatione assequi liceat.



PARS III.

DE CORPORIBUS TELLURIS PARTIALIBUS.

CAP. I.

DE TELLURE IN GENERE.

§. 117.

Tellurem esse rotundam Geographi demonstrant. Quod vero figura ejus a sphaerica recedat *Newtonus* in *Princ. Phil. Nat. Math. Lib. 3. prop. 10.* & *Hugenius* in discursu-

curſu de cauſa gravitatis p. 113. & ſeqq. evincunt. Enimvero cum diameter minor tranſiens per polos ſit ad majorem æquatoris juxta hunc ut 577. ad 578, juxta iſtum ut 229. 230. conſequenter poſita cum Geographis ſemidiametro telluris 860 milliarium germanicorum, differentia ad ſummam $1\frac{1}{2}$ milliarium germanicorum; Telluris figuram a ſphæra non multum recedere liquet.

§. 118.

Figuræ ſphæricæ cauſa eſt gravitas, vi cujus omnis materia verſus centrum terræ nititur, adeoque cum pars telluris ſit fluida, una altior altera eſſe nequeat. Quoniam tamen vis gravitatis minor ſub æquatore, quam verſus polos ob motum vertiginis Telluris (§. III.); ibidem materia terreſtris altior conſiſtere debet, quam verſus polos, ut adeo motui vertiginis tribuendum ſit, quod figura Telluris potius ſphæroidica, quam ſphærica. Equidem hæc demonſtratio ſupponit materiam telluris fluidam; enimvero quamvis præter aquas ex terra continente conſtet, ſi tamen inundationes arcendæ, terra continens non diverſam ab aqua figuram induat opus eſt.

§. 119.

Ne vero motu vertiginis Telluris partes ſejunctæ diſſipentur, quemadmodum quondam

dāmetuebant *Tychonici*, inde est, quod gravitas plurimum excedat conatum centrifugum ex motu vertiginis ortum.

§. 120.

Eandem esse rotunditatis causam in ceteris mundi corporibus totalibus dubio caret: cumque & eadem motu vertiginis gaudeant (§. 71. 110.); ipsorum quoque figura a sphaerica tantisper recedens concipitur, etsi ex tanto, quo absunt, intervallo, non appareat.



CAP. II.

DE AERE.

§. 121.

Aerem esse elasticum atque gravem experimentorum fide constat (§. 36. 40. *Exper.*). Cum adeo vi gravitatis nullibi majori intervallo a terræ centro removeri, nec ob elasticitatem locus alteri aere pleno contiguus ab eodem vacuus concipi queat (§. 36. *Exper.*) aer terræ universæ circumfunditur & superficie eidem concentrica terminatur.

§. 122.

Atque eadem est ratio, cur in foveas irruat, & poros corporum repleat.

§. 123.

Aer superior vi gravitatis premit inferiorem,
cui

cui incumbit, eumque comprimit, donec vis ejus elastica sit gravitati incumbentis æqualis (§. 52. *Exper.*). Cum adeo minor quantitas incumbat in loco sublimiori, quam in profundiori, ibi quoque aër minus comprimitur, adeoque rarior est, ut adeo raritas atmosphæ-
ræ continuo crescat; densitas autem decreascat.

§. 124.

Quoniam in aere rarefacto aves & quadrupeda subito expirant (§. 254. & seq. *Exper.*), nec viventia in regione aeris nimis sublimi subsistere posse evidens est.

§. 125.

Radii solares cum atmosphæram feriunt, Sole sub horizonte constituto, in ea refringuntur (§. 146. *Exper.*), ut in eam atmosphæ-
ræ partem deferantur, quæ loco nostro imminet, im-
mo ab ea reflexi (§. 141. *Exper.*) in nostros inci-
dant oculos. Atque ea est ratio crepusculorum
tam matutinorum, quam vespertinorum & cur
æstivo anni tempore per integram noctem lu-
ce crepusculari fruamur.

§. 126.

Quodsi nocte luce crepusculari caremus, cælum coloris nigri apparet. Quoniam Sol in-
fra Tellurem constitutus Lunam (§. 85.) ceteros-
que planetas (§. 90.) illuminat; lumen per to-
tum systema planetarium quaquaversum dif-
fundit. Æther itaque lumen non reflectens
ab

ab aëre Telluri circumfuso, qui lumen solis appellens reflectit (§. 141. *Exper.*), diversus. Patec inde simul, quod atmosphæra nostra non extendatur usque ad Lunam. *Weigelius* in sphærica Euclidea Lib. 2. c. 4. observ. 16. p. 342. demonstrat, aërem crepusculinum vix ad 4. millia-ria germanica attolli.

§. 127.

Materia celestis cum sit tenuior aëre, eoque admodum raro in sublimi (§. 123.), solida esse nequit: ut adeo corruant orbes crySTALLINI veterum.

§. 128.

Radii solares, antequam ab objecto quodam reflectantur, speciem Solis ad oculum deferunt. Quoniam itaque refracti ad oculum pertingere possunt, Sole adhuc sub horizonte constituto; non mirum, quod astronomi observarint, Solem in horizonte jam apparere, antequam oriatur, refractione in aëre nostro adhuc sufficiente, ut objectum videatur in loco altiori (§. 146. *Exper.*). Et eadem est ratio, cur observationum astronomicarum fide stellæ fixæ videantur, ubi non sunt, loco nempe altiori.

§. 129.

Refractioni quoque in aëre vaporoso debetur figura Solis orientis vel occidentis elliptica, cum lumen secundum diametrum verticalem

refringatur, haudquaquam vero secundum horizontalem. Aërem vaporosum detegit telescopium, per quod si Solem contemplemur, limbum ob vaporum agitationem fluctuantem deprehendimus. Refractione autem figuram rotundam in ovalem transmutari posse experimento docetur, quo circulus chartaceus vasis interiori superficiei verticali agglutinatus aqua infusa ellipticus apparet. Cum sol ac luna in horizonte major appareat, quam in situ altiori; fieri potest, ut luna gibbosa videatur in ortu vel occasu plena.

§. 130.

Lumen per refractionem in colores mutari potest (§. 155. *Exper.*). Unde accidit, ut lumine solari sub ortum vel occasum in vaporibus roridis refracto cælum rubeat, nubibus lumen rubrum non nisi ad terram reflectentibus (§. 81.). Omnes vero radii quando a vaporibus roridis nubium aërem obscurantium paulo ante ortum Solis reflectuntur; cælum ardere videtur. In tenebris enim perinde ac luna & planetæ lucent nubes mox in pluviam resolvendæ. Liquet eum esse debere solis sub horizonte situm, ut radii refracti superficiem nubium nobis obversam illustrent.

CAP. III.

DE VENTO.

§. 131.

Motus aëris, quem nubium motus & vela atque aplustra navium produnt, *ventus* appellatur: quem ex inæqualitate vis elasticæ in voluminibus contiguis oriri pater, quoniam in aëre Telluri circum fuso (§. 121.) nullus concipitur motus, si eadem obivis locorum supponatur elasticitas (§. 92. *Exper.*).

§. 132.

Quamobrem cum calore Solis aër rarefiat, frigore condensetur (§. 48. *Exper.*), si calore atque frigore atmosphæra alteratur diversimode in diversis regionibus, ventus inde oriri potest.

§. 133.

Similiter vapores cælo sereno aërem opplentes, sed cum ejus moleculis quasi coalescentes, ut diversum ab aëre motum non nanciscantur, pondus ejus augment; in nubes autem collecti & diversum ab aëre motum nacti pondus immittunt. Quoniam hac ratione æquilibrium atmosphærae in diversis locis tolli potest; quomodo vapores in ventorum genesin influere possint, satis evidens est.

(*Thüm. Inst. Phil. nat.*)

Ec §. 134.

§. 134.

Lumen solis a nubibus crassis reflexum aërem superiorem rarefacit, sicque elasticitatem alterando in venti genesin influit.

§. 135.

Ventorum apud nos causæ observationibus barometricis, manometricis, hygrometricis & thermometricis deteguntur (§. 69. 75. 82. 103. *Exper.*).

§. 136.

Procella, ventus impetuosior, differentie elasticitatis majori debetur (§. 92. *Exper.*).

§. 137.

Impetus venti, cum quantitati materiæ adscribi nequeat, celeritati, qua movetur aer, tribuendus.

§. 138.

Sunt autem venti vel calidi, vel frigidi, iidemque vel humidi vel sicci.

§. 139.

Calidus est, qui spirat ex terris versus austrum sitis, ubi sol magis calefacit, quam nostris in oris, vel experientia teste. Ex eadem ratione æstate calidus, qui per terram continentem spirat, cum terra magis calefiat, quam aqua, præsertim si solis actio non fuerit impedita, terraque sic fabulosa plurimum caloris concipiens. Contra hieme calidus, qui per

per maria spirat in glaciem non abeuntia, cum aqua minus frigida quam terra nivibus & glacie obducta.

§. 140.

Frigidus est ventus, qui spirat ex terris versus polum sitis, ubi Sol. minus calefacit, quam nostris in oris, vel experientia teste. Ex eadem ratione constat, quod hieme frigidus, qui per terram continentem spirat, utpote glacie concretam atque nivibus tectam, præsertim si ex causis accidentalibus, de quibus deinceps, frigus intendatur. Æstate contra frigidus est, qui per maria advenit, cum aqua minus calefiat, quam terra. Sensus præjudicio hic quoque subinde aliquid dandum (§. 48.).

§. 141.

Ex mari cum plures eleventur vapores, quam ex terra continente, ventus per maria spirans humidus, qui vero per terram continentem defertur, siccus est.

§. 142.

Humidus quoque est, qui per mare in glaciem concretum ad nos defertur, cum glacies quoque ac nix intenso frigore vapores emittant (§. 100. *Exper.*).

§. 143.

Venti adeo qualitates pendent a statu regionum, ex quibus ad nos deferuntur.

CAP. IV.

DE TEMPESTATIBUS FIXIS
ATQUE VAGIS.

§. 144.

Mutationes atmosfæræ sensu perceptibiles *tempestatum* nomine veniunt; quæ vel *statæ*, si stato tempore redeunt, vel *vagæ*, si non constantem periodum custodiunt.

§. 145.

Tempestates statæ dividuntur in Veræ, Æstatem, Autumnum atque Hiemem & ingressu Solis in quatuor puncta cardinalia Eclipticæ, principium Arietis, Cancræ, Libræ atque Capricorni definiuntur in nostris zonis. Æstas nimirum incipit cum maxima, hiems cum minima Solis a vertice distantia, ver autem cum media inter minimam & maximam, autumnus cum media inter maximam & minimam.

§. 146.

Solem non constanter easdem in calefaciendo exercere vires non modo sensus iudicio, verum etiam experimento constat, quo aer in globo vitreo Solis radiis exposito expulsus per orificium tubi aquæ immerso egreditur, aqua in ejus locum succedente, ubi Sole recedente condensatur in globo aer (§. 75. *Exper.*). Experimur autem Solem minus calefacere, quando radii in atmosphæram obliquius incidunt, magis

gis vero, ubi fuerint perpendiculares, propterea quod radii perpendiculares in idem planum incidentes sunt densiores obliquis, fortius his planum percutiunt & minor earundem quantitas ab atmosphæra reflectitur. Unde sol meridianus oculum confundit; horizonti vicinus minime, & sub eodem meridiano calor ab eo productus cum latitudine locorum decrescit.

§. 147.

Et quoniam corpus calidum calorem, quem concepit, non statim expirat; longitudo diei ad augendum eum conducit, sicut e contrario brevisitas diei decremento favet. Accedit, quod cum longitudine diei concurret noctis brevisitas & cum illius brevisitate hujus longitudo, ut in priori casu Sol ad calefaciendum redeat, ubi corpora calorem diei hesterni nondum exhalaverunt, in posteriori autem tum demum redux fiat, ubi caloris diei præcedentis parum aut nihil superfuerit.

§. 148.

Vires adeo Solis in calefaciendo, intenduntur & minuuntur ob ejus in ecliptica motum, qui cum oblique secet æquatorem, diversas diverso tempore a vertice distantias habet in meridiano eodem in Terræ loco: quæ in Astronomia & Geographia distinctius explicantur.

§. 149.

Patet itaque tempestatum statarum ratio. Nimirum veris initio Sol in æquatore constituitur & inde usque ad principium æstatis continuo ascendens vertici in meridiano propior fit, diei longitudine crescente, noctis autem longitudine decresciente. Calor adeo in Tellure augetur, Solis viribus calefaciendi continuo crescentibus (§. 146.) & per spatium longius applicatis, nec diu feriantibus. Eodem modo claret, quod ab æstatis initio usque ad principium autumnii calor decrescere, immo a principio autumnii usque ad principium hiemis frigus crescere, nec non ab hiemis initio usque ad veris principium frigus decrescere debeat.

§. 150.

Maximum autem frigus circa finem Januarii & initium Februarii ordinarie demum ingruit, quia ante medium Decembris, observante *Mariotto* in Tentamine de calore & frigore p. 40. & seqq. ^{terra} non prorsus privatur, calore per æstatem concepto; Soli e contrario mense Januario non majores sunt in calefaciendo vires, quam Decembri (§. 148.).

§. 151.

Et simili de causa æstus maximus circa finem Julii demum ingruit, ipsis diebus canicularibus, quia Sol ante medium Junii, observante eodem *Ma-*

Mariotto, thermometro in cellis diversæ profunditatis collocato, superiorem terræ crustam calore vix perreptat. Solis autem mense Julio eadem sunt in calefaciendo vires (§. 149.).

§. 152.

Enimvero quod omni vere, omni æstate, omni autumno, omni hieme non eadem sit in eodem loco tempestas, id quidem inde est, quod Solis actio diversimode vel impediatur, vel adjuvetur.

§. 153.

Actionem Solis impediunt vapores per aërem dispersi, cum cælo per dies complures fereno minor deprehendatur luminis solaris a speculo caustico reflexi vel a lente caustica refracti efficacia; maxime autem nubes, quæ maximam radiorum solarium partem a terra subjecta avertunt. Quis autem ignorat, pauciores radios minus calefacere copiosioribus. Immo cum vapores ex aëre superiori delapsi inferiorem frigidum reddant (§. 81. *Phil. Exper.*), non mirum, quod pluvia ex vaporibus ibi congestis orta perinde tellurem calore suo privet. Ventorum denique agitatione refrigerari aërem adeo manifestum est, ut probatione non indigeat, cum ars variis modis vento seu aëris motu ad corpora frigefacienda utatur: etenim ventus aërem calidum abigit, ut non modo actione Solis continuata calidior fieri ne-

queat, verum etiam ex terra exhalantis major copia ob frigidiorē continuo appellentem absumatur (§. 50.), idemque præterea ipsa motu calorem dispellit.


§. 154.

Interdum quoque actio Solis juvatur a vento aerem calidiorē ex aliis locis ad nos deferente: maxime autem ejus absentia Soli in calefaciendo amica, cum æstus intolerabilis percipiatur tempore æstivo, aëre prorsus tranquillo, cujus exemplum prorsus memorabile *Derhamus* in Theologia physica Lib. 1. c. 2. p. 17. edit. sec. in medium adducit. Rationes iis oppositæ sunt, ob quas a vento, impetuosiori præsertim, Solis in calefaciendo actionem imminui constat (§. 153.). Quoniam vero hieme pluvia terra & aëre inferiori calidior, in illam lapsa eidem calorem impertitur (§. 50.): unde si lapides, quibus plateæ sternuntur, fuerint frigidiore, glaciali lamella obducuntur & nix in tectis ædium liquatur (§. 122. 125. *Exper.*).

§. 155.

Quodsi ergo harum causarum Solem in calefaciendo vel adjuvantium (§. 153.) vel impediendum (§. 152.), ventorumque ex diversis plagis spirantium habeatur ratio; haud difficulter in casu singulari tempestatum vagarum, vel maxime extraordinariarum dabitur ratio, quemadmodum dudum in dissertatione de
hie-

hieme extraordinaria An. 1709. luculento exemplo ostendit Philosophus, a nobis adeo in Meteorum nostris ab interitu vindicata.



CAP. V.

DE METEORIS AQUEIS, NEBULA, NUBIBUS, RORE, PRUINA, PLUVIA ET GRANDINE.

§. 156.

Quæ in atmosphæra nostra genita in conspectum veniunt, *Meteororum* nomine a Phycis designantur. Et aquea quidem sunt, quæ a vaporibus ortum ducunt.

§. 157.

Vapores sunt vesiculæ, aut si mavis, bullulæ ob cavitatem inclusam aëri innatantes (§. 99. *Exper.*), atque adeo per aërem inferiorem densiorem ascendunt, donec ad eundem deferuntur, qui eandem cum ipsis gravitatem specificam habet (§. 117. *Phys.* & 27. *Exper.*). Calorem non esse ascensus causam patet, quod eodem subito priventur in transitu per aërem (§. 87. *Exper.*), tum quod nec impetum a calore sortiantur, nec cum eo una abripiantur, quoniam calor quaquaversum dissipatur, minime tantum ascendit.

§. 158.

Calore scilicet aër intra poros aquæ subtilissimos contentus expanditur (§. 49. *Exper.*), sicque vesiculas format, quarum diameter si fuerit guttulæ decupla, eadem aëre specificè leviores sunt (§. 41. *Exper.*), ut in eodem ascendere possint (§. 27. *Exper.*). Qua ratione simul patet, quomodo corpora madida madore suo a sole priventur. Aqua dum in glaciem abit, calore suo privatur (§. 122. *Exper.*), unde fluiditas ipsius pendet (§. 40.). Ex porulis itaque minoribus in majores delatus aëris moleculas ibidem contentas rarefacit, ut vapores eo, quo diximus modo, formentur. Atque hæc est evaporationis frigore promotæ (§. 126. *Exper.*) ratio.

§. 159.

Vapores calore privati cum ob gravitatem specificam minorem quam quæ est aëris ambientis ascendant (§. 157.), eandem adhuc cavitatem retinere debent (§. 27. *Exper.*). In aëre igitur frigidiori non sunt visibiles, quod, imminuta cavitare, pellicula crassior fiat; sed quod aëre, cui innatant, condensato (§. 48. *Exper.*), fiant sibi mutuo proximiores, quodque per aërem densum non tanta facilitate dispergantur, quam per rariorem.

§. 160.

Differunt vapores pelliculæ aqueæ crassitie:
quæ

quæ si minor fuerit, vapor tenuis; si major, crassius. Causæ igitur cavitatem vesiculæ augentes, vaporem tenuiorem reddunt; imminuentes vero istam, eundem crassiolem efficiunt. Unde sol calore suo calefaciens aerem inclusum vapores attenuat, ut altius ascendant (§. 157.): frigore contra vehementiori dum condensatur aer inclusus, bullula fit minor, perinde ac si bullæ aquæ aer, per tubulum stramineum suctione subducatur, sicque crassior redditur vapor. Idem contingit, vapore uno cum altero coalescente in mutuo contactu, more fluidis proprio. Minor enim, rupta cavitate, circumfluit maiorem.

§. 161.

Vapores crassiores cum propius ad densitatem aquæ accedant; instar aquæ humectant, aeremque humidum efficiunt (§. 104. & seqq. *Exper.*).

§. 162.

Nebula cum sit congeries vaporum crassiorum in vicinia collectorum, ceu cuiusvis obvium; aere ob frigus condensato oritur (§. 159.), et si quoque subinde eodem ob imminutam incumbentiam superioris (§. 123.) rariori facto (§. 97. *Exper.*).

§. 163.

Si vapores crassiores fuerint & aere nimis condensato se se mutuo contingant, in guttulas

las confluunt aere specificè graviores (§. 41. *Exper.*), sicque nebula descendit atque humectat (§. 160.). Quodsi aer imminuta incumbentia superioris rarior fiat, nebula descendit, etsi vapores fuerint tenuiores (§. 97. *Exper.*). In priori casu nebula descendens serenitatem; minime autem (§. 74. *Exper.*) in altero nunciat.

§. 164.

Si vapores fiant actione Solis rariores (§. 159.) vel aucta aeris incumbentia aer inferior densior (§. 123.); nebula ascendit, atque in priori casu pluviam portendere potest, minime autem in posteriori (§. 74. *Exper.*).

§. 165.

Vapores non abire in glaciem, qui nebulam constituunt, patet inde, quod hieme arbores humectent & iis adhaerentes demum in glaciem concrecant, si fuerint frigidiores: ut adeo pateat, vapores tenues non posse calore adeo facile privari, quemadmodum aqua densior.

§. 166.

Nubes esse vaporum congeriem, in sublimi collectorum experientia illorum constat, qui montium altorum cacumina petentes per nubes, quasi per nebulam sibi ascendere visi sunt. Nebula enim e longinquo in libero aere visa instar nubis apparet, quod duplici experientia

ria confirmatur. Si pluvia in montem delapsa æstivo tempore extemplo iterum in vaporem resolvitur, instar fumi ascendit; sed in sublimi collectus nubeculam constituit. Similiter si tempore pluvio nubes humiles juxta montes ferantur, instar nebulae apparent, mox nubium formam induentes, quamprimum in aerem liberum intra duo montium juga deferuntur.

§. 167.

Mirum igitur non est, quod in aere rariori oriantur, in densiori dispareant (§. 97. *Exper.*).

§. 168.

Sunt autem nubes tenues, quando nebula, quoad altitudinem, exiguum occupat spatium; crassae autem, quando ingens. Etenim per principia optica, quae observatione confirmantur, diverso intervallo distantes, eandem distantiam mentiuntur, & aliquo intervallo disjuncta contigua apparent. Hinc nubes crassae inter oculum & Solem collocatae nigricant, quia parum luminis ad nos transmittunt; oculo autem medium locum tenenti candidae videntur, quia multum luminis ad nos reflectunt. Unde ex colore & situ nubis ad Solem judicatur de ipsius densitate & raritate.

§. 169.

Diversam nubium a terra distantiam agnoscimus, dum altiores a Sole post occasum adhuc illuminari videmus; dum inferiores tegunt superiores; dum diversæ in contrarias plagas moventur.

§. 170.

Quoniam denique nubes non sunt, nisi vaporum congeries; mirum videri nequit, quod figuram habeant irregularem, eamque una cum magnitudine mutabilem, quodque subinde plures in unam coalescant, una contra in plures dissolvatur.

§. 171.

Quando ros copiose decedit, e longinquo instar nebulæ apparet, ut adeo a nebula decedente parum differat. Vapores itaque in guttulas confluere debent, dum aëre nocturno frigore condensato ad contactum mutuum promoven-
tur. Guttulæ plures confluunt in majores in superficiebus corporum, quibus adhærent. Eodem modo vapores ex aere ad fenestram condensato exclusi fenestris adhærent, quando frigidior evadit aer externus.

§. 172.

Quodsi corpora fuerint frigidiora, quorum superficiebus ros adhæret, guttulæ aqueæ calore suo privatæ in glaciem abeunt, sicque

pru-

pruina gignitur: quam æmulantur vapores ex aëre humido hiberno tempore exclusi & a parietibus frigidis in glaciem conversi (§. 154.). Paret autem ex calore albo, quod vapores crassi decidunt, cavitate adhuc quadam donati, non autem guttulae solidæ.

§. 173.

Dum pluit, aër levior redditur (§. 97. *Exper.*). Vapores igitur superiores delapsi in inferiores cum iis coalescunt, sicque guttæ in descensu continuo fiunt majores. Sane *Mariottus* in *Tra*-*ctatu* de motu aquarum autor est, se per nubem pluviā ascendentem observasse, guttulas fieri continuo minores, donec in summitate non nisi vapores veluti in nebula offenderit.

§. 174.

Vapores crassiores hieme in glaciem concreti in nivem abeunt. Nivis enim raritas, tum imprimis albedo loquitur, eam non constare ex guttulis congelatis, sed particulas nivis aliqua adhuc cavitate donari. Quoniam tempore verno ac autumnali in montibus ningit, quando in vallibus pluit, immo in cacuminibus montium editorum ipsis diebus canicularibus ningit; dubio caret, quod vapores in nubes collecti jam multum recesserint a raritate vaporum primigeniorum atque crassiores facti frigore aëris superioris in glaciem
con-

concreſcant. Hinc fieri poteſt, ut nix liquata in aëre inferiori calidiori in guttas majores confluat.

§. 175.

Vapores autem craſſiores & aëre, in quo innatant, ſpecificè gravioreſ facti una cum guttulis inde formatiſ aliquamdiu in aëre ſuſtentantur impetu venti, quo aguntur, ſi ſcilicet iſ ſuperet exceſſum gravitatis ſpecificæ ſupra gravitatem aëriſ. Vocamus autem *nubem pluviam*, itemque *gravem*, quæ vaporibus craſſioribus in guttulas confluentibus, vel guttulis ex vaporum congelatorum in aquam reſolutione oriſ conſtant. Ceterum ipſe quoque aer vi elatiſticitatiſ reſiſtit vaporum craſſiorum deſcenſui: unde iidem continuæ agitationi obnoxii, quam noctu ſcintillatio ſtellarum prodiſ.

§. 176.

Quod ſi aër fuerit leviſ, vel guttæ majoreſ & plureſ una formentur, *imber*, ſi impetuſ venti ſiſtatur ſimul, ut integra nubes veluti uno impetu deſcendat, *nimbus* oriſtur. Haſ enim eſſe cauſaſ, cum ingeſ nubiſ quantitaſ una vel exiguuſ temporis ſpatio depluat, ſatiſ patet.

§. 177.

Hinc e contrario ſi nubes non ſint admodum pluvia, nec aër admodum leviſ, conſe-

sequenter densior, pluvia non nisi rorat, & *fillicidium* vocatur.

§. 178.


Grando sunt grana *glacialia* & subinde nucleum continent nivolum. *Grando* major ex crustis variis sibi mutuo superinductis constat. Excrefcit nonnunquam in molem majorem, ita ut ad magnitudinem ovi columbarum accedat: immo *Dechales* in Tract. de Meteoris f. 686. Tom. IV. Mundi Mathematici refert An. 1537. eam fuisse molem, quæ 28. librarum pondus æquaverit. Vapores frigore conereti in nivem abeunt, in glaciem perfectam minime (§. 174.): unde patet, vapores in aquam fuisse resolutos, antequam in grandinem abirent. Nucleus autem nivofus prodit, quod aqua ex nive liquefacta originem duxerit. Crustæ diversæ innuunt, molem successive fuisse auctam, aqua circumfluente congelata.

§. 179.

Ut igitur *grando* generetur, nix, quam nubes vehunt, liquefcere, mox ob gravitatem demissa, in aëris regione paulo inferiori a vento frigidiora guttæ majores in glaciem abire debent. Cum ex regione superiori guttulæ continuo destillant, grandinem circumfluentes & in glaciem conversæ ejus molem augent.

§. 180.

Sustentatur autem perinde ac nubes pluviae (§. 175.) impetu venti, quo in transversum feruntur: quo imminuto, proprio pondere decidit in terram adeoque instar gravium perpendiculariter. Quod si ventus directionem mutet, ipsius impetu oblique dejiciuntur, plurimum damni illatura corporibus ad perpendiculari erectis. Grando itaque vim suam acquirit vel a motu vi gravitatis accelerato, vel ab eo & impetu venti simul.



CAP. V.

DE METEORIS EMPHATICIS, IRIDE, HALONIBUS, PARHELIIS ET PARASELENIS.

§. 181.

Iridem generari in guttulis aqueis & fontes artificiales sæpissime confirmant, in aqua saliente iridem certo tempore exhibentes, & pluvia artificiali excitata, guttulis per fundum vasis foraminulis pertusum rorantibus evincitur, in qua iris sole ex adverso posito comparet.

§. 182.

Agnovit autem jam Keplerus in Epistola An. 1605. ad Brenggerum & mox in alia ad Thomam Hariotum atque Johannem Remum

datis; quæ leguntur in Epistolarum volumine
 a Cl. *Hanschio* editarum f. 236. 337. iridis colo-
 res deberi duplici refractioni & simplici refle-
 xioni in eadem gutta: id quod An. 1611. *Marcus Antonius de Dominis* in Tractatu de radiis
 visus & lucis & postea *Cartesius* in Tractatu de
 Meteoris. c. 8. p. m. 212. disertius docuerunt.
 Quodsi enim globus vitreus aqua plenus,
Kepleri atque *Cartesii* exemplo, ex adverso so-
 lis libere suspendatur, donec color ruber Fig. 2.
 appareat; videbis radium solis SA frangi in
 ingressu in A & facta reflexione in G alteram
 pati refractionem in B, recta HI per oculum
 O radio AS parallela cum radio refracto BO
 comprehendente angulum 42. graduum.
 Quodsi globus tantisper elevetur, vel oculus
 deprimatur, successive alii colores apparent,
 omnes vero disparent, si oculus a recta BO sen-
 sibiliter recedat.

§. 183.

Cum itaque colores iridis non nisi per ra-
 dium BO ad oculum deferantur, diversi
 spectatores radios a diversis guttulis reci-
 piunt, qui visionem iridis causantur: ut adeo
 quilibet spectator videat iridem aliam, immo
 mutato loco idem spectator videat a priori
 diversam. Quid? quod hinc porro perspi-
 cua est ratio, quod ibidem constitutus, ubi
 pluvia iridem nobis exhibens destillat, nul-

lam videat, quodque ad iridem accedere non liceat.

§. 184.

Quodsi recta HR per oculum O ducatur horizonti parallela, angulus IOR seu NHO altitudinem solis supra horizontem metitur: quæ cum minor esse debeat angulo BOH , iridem non posse apparere apparet, si sol ultra 42. gradus supra horizontem fuerit elevatus.

§. 185.

Induit autem iris figuram arcus, quia guttulae, a quibus radii colorati sub dato angulo 42. graduum in oculum incidere possunt, sub ea per aërem disponuntur.

§. 186.

Iris secundaria sive inversa, quæ inverso ordine colores exhibet & ordinarie primariam intra ambitum suum continet, gignitur, si radius SA in A refractus ex G reflectatur in D & post Fig. 3. alteram reflexionem in D alteram quoque in B patitur refractionem, angulo HOB eodem, quo ante modo (§. 182.), determinato 52 graduum existente id quod experimento ut ante confirmatur.

§. 187.

Patet vero eodem quo ante (§. 184.) modo altitudinem solis minorem esse debere, quam 52. graduum si iris secundaria apparet.

§. 188.

§. 188.

Pars tantum iridis videtur ob defectum materiæ, quæ sufficiat integræ.

§. 189.

Irides lunares etsi quandoque visæ fuerint, sunt tamen solaribus rariores, ob debilitatem luminis lunaris.

§. 190.

Halorum, seu coronarum, quæ frequentius circa Lunam, quam circa Solem conspiciuntur, nunc coloribus iridis superbientes, nunc iisdem destitutæ, docente *Hugenio* in Dissertatione de Coronis & Parheliis, quæ legitur in operibus posthumis, causa est grando nivolum nucleum continens (§. 178.). Radii enim AB & CD post primam refractionem in ingressu factam nucleum nivolum M Fig. 4. contingentes ab altera refractione in E & F se mutuo intersecant in G, ut oculo intra conum HGI constituto cælum appareat nigrum, ope radii vero HF videat speciem Solis coloratam vel candidam. Etenim & in halonibus, & in iride colores non sunt, nisi innumeræ icunculae Solis intra sphaerulas glaciales seu grandinem & guttulas visæ. Hæc halonum explicatio fit manifesta experimento, si intra globum vitreum aqua plenum suspendatur globulus plumbeus, ita ut centrum vitrei occupet, atque globus vitreus Soli ob-

vertatur, donec intra eum appareat species solis colorata.

§. 191.

A situ granulorum grandinis respectu cœli oritur figura halonis perinde ac iridis a situ guttularum (§. 183.). Et eadem est ratio, cur luna & sole promotis, halo simul progredi videatur, aliis nempe aliisque granulis grandinis situ luminis variato eum respectu oculi obtinentibus situm, ut species colorata vel candida ad eam deferri possit.

§. 192.

Inter meteora emphatica eminent parheliæ & paraselenæ seu spurii soles & lunæ juxta verum luminare & ex adverso visi. Si phænomenon spectatur integrum, quale describit *Hevelius* in Appendice Tractatum de Mercurio & Venere in sole visis f. 171, eo se se habet modo. Solem verum ambiunt coronæ concentricæ Fig. 5. BICG & ZHY iridis coloribus superbi-entes. Per solem vero eundem A transit circulus ingens horizontalis BFC, quem intersecabat alius HEKDP transiens per polum eclipticæ K, etsi integer non appareat. Denique coronam interiorem tangit arcus coloratus QGR & exteriorum alius concentricus THS. In intersectionibus B, C, E, D, in contactu interioris coronæ G & ex adverso solis veri in F sunt soles spurii sive parhelii. Subinde tantum par-

res phaenomeni apparent, ob defectum materiae integro sufficientis, quaecunque tandem illa fuerit, quemadmodum ante in iride vidimus (§. 188.).

§. 193.

Causam spectaculi tam singularis denuo dedit *Hugenius* in Dissertatione de Coronis & Parheliis. Oritur nempe circulus ingens horizontalis per reflexionem factam in superficie grandinis cylindricae nucleum cylindricum nivolum continentis, cum notissimum sit lumen solare a speculo cylindrico reflexum per circulum diffundi: obtinet autem situm horizontalem, quia axes cylindrorum ad horizontem perpendiculares. Parhelii oriuntur ex refractione in parte glaciale, per quam radii incidunt in oculum nucleo nivoso ceteros arcente. Coronarum causa jam ante (§. 190.) tradita. Experimento confirmatur haec circuli horizontalis atque parheliorum genesis, si cylindro vitreo aqua pleno immittatur ligneus, ita ut ejus axis cum axe vitri coincidat, & vitrum soli decenter opponatur. Dari autem grandinem figurae cylindricae jam a *Cartesio* observatum est in Tractatu de Meteoris c. 6. §. 6. & seqq.

§. 194.

Causa adeo singularis cum sit coronarum (§. 190.) atque parheliorum (§. 193.), quid mi-

rum, quod non nisi rarissime istiusmodi spectacula contingant.

§. 195.

Solem per nebulam & nubem tenuem absque radiis undiquaque evibratis instar lunæ transparenere, non mirum, quia lumen ad nos transmissum minuitur, cum plurimum a vaporibus reflectatur. Docent enim vitra colorata vel fuligine obducta, quod Sol per eadem visus eandem exhibeat speciem. Enimvero quando cælo sereno eandem nobis faciem exhibet, quale quid An. 1721. die 1. Jul. circa horam 5. pomeridianam a Cl. *Algæwero* Ulmæ observatum legitur in appendice ad ipsius specimen Hyetometriæ p. 33. simplices vapores non sufficiunt, cum ne nubis quidem tenuior splendori Solis obtundendo sufficiat. Sed sufficere granula nivosa per aërem dispersa facile concipitur, cum plurimum luminis solaris intercipiant.


§. 196.

Vapores tamen communes per aërem dispersi lumini lunari adeo debilitando sufficiunt, ut pallere videatur, quia lumen ipsius solari longe debilius facile debilitatur, vel telescopiis testibus, per quæ visa luna pallet.

§. 197.

Parentius in disquisitionibus physicis & mathematicis Tom. 2. p. 256. & seqq. phenomenon
fin.

singularis umbræ circa meridiem An. 1703. die 7. Jun. in sciatenco retrogradæ commemorat. Refractioni radiorum in transitu per atmosphæram factæ extraordinariæ deberi hunc effectum patet. Quodsi enim vitrum aqua plenum constituas inter candelam accensam & acum in tabula verticaliter erectam, umbram retrogradi observabis. Enimvero cum vapores communes tantæ refractioni non sufficiant, concipiendi sunt in atmosphæra hinc inde dispersi globuli glaciales a grandine coronarum causa (§. 190.) non nisi in eo differentes, quod nucleo nivoso destituantur.



CAP. VI.

DE FULGURE ET TONITRU, ALIISQUE METEORIS IGNITIS.

§. 198.

Fulmen esse ignem actualem constat, quod eodem tacta flammam concipiant.

§. 199.

Flammam istam constare ex exhalationibus sulphureis accensis ex odore sulphureo, quem fulmine tacta spirant, perspicitur. Probabile autem videtur, quod exhalationes istæ sulphureæ ex aliis simplicioribus invicem commixtis in aëre demum gignantur, cum actu sulphureæ tanta copia vix ascendant, qualis

fulmini generando sufficit. Et hæc causa esse videtur, cur æstu vehementiori generetur.

§. 200.

Cum etiam noctu incendantur exhalationes istæ, sol incensionis causa esse nequit. Et quia plures sunt modi, quo materiæ inflammabiles igne absente incenduntur, immo vel aqua subinde concurrat (§. 138. *Exper.*); modus, quo incenduntur, non tuto definiri potest.

§. 201.

Ingens tonitru aliique effectus loquuntur elasticitatem flammæ, dubio procul ab admixtis exhalationibus nitrosis profectam; nec obscure prodant salium quoque alcalinorum admixtionem (§. 235. *Exper.*).

§. 202.

Omnes autem exhalationes non sunt continuæ, alias enim simul incenderentur, minime autem successive. Enimvero non eandem materiam, quæ semel accensa fuit, denuo colligi & novo fulmini inservire, vis major fulminum sequentium, quam precedentium insinuat, quæ subinde sentitur.

§. 203.

Fulmen ignis actualis (§. 198.) fulgur suum undiquaque diffundit, quod in tenebris nocturnis majus, quam interdiu apparet, cum lux major officiat minori. Tonitru autem excitat eodem

mo-

modo, quo flamma pulveris ac auri fulminantis
(§. 235. *Exper.*).

§. 204.

Quoniam sonus successive (§. 232. *Exper.*),
lumen vero quasi in instanti propagatur (§. 74):
fulgur ante percipitur visu, quam tonitru audi-
tu, nisi fulmen vertici immineat. Quamobrem
cum sonus intervallo 21. secundorum spatium
milliaris Germanici conficiat; ex intervallo
temporis inter visum fulguris & auditum to-
nitru intercedens judicatur de distantia fulmi-
nis.

§. 205.

Lapides fulminares finguntur, cum corpora
humana fulmine tacta nullum vulnus osten-
dent.

§. 206.

Effectus autem adeo stupendos, quales ful-
minis esse experimur, a sola flamma per ae-
rem celerrime lata produci posse, duo casus
admodum memorabiles produnt, quos hic
breviter recensere juvat. An. 1718. referen-
tibus medicis Vratislaviensibus in Miscellaneis
Medicis & Physicis ejusdem anni Mart. Class. 8.
Art. 7. p. 819. & seqq. Flamma ex cubano
pistoris subito prorumpens ingenti fragore
pistorem prostravit. Mox in pistrina huc il-
luce lata & in fumarium se se recipiens te-
stas quasdam dejecit, cumque non pateret
exi-

exitus per alterum fumarii tubum in fornacem delata, eam diffregit, cineribus per conclave late sparsis. Reversa denuo in fumarium, postquam in via jauuam clausam aperuisset, cum nec tum exitus pateret, per alium fumarii tubum in hypocaustum subterraneum delata fuit, in muro foramine facto. Inde in pistrinam denuo se se recepit & fenestram projiciens, ut frustula vitri januæ e regione positarum ædium infingerentur, demum in aurum sublata instar fulguris aërem illuminavit, tandemque dissipata fuit. Alterum casum ^{*Hellerwaldensium*} commemorat *Hoffmannus*, Medicus celebris, in *Observat. Physico-chymicis* Lib. 3. p. 340. ubi balsamus sulphuris ob ignem vehementiorem diffracto vitro ingenti cum fragore januas clausas aperuit, in conclavi superioris contignationis vasa disiecit & fenestras projecit, alibi tantum aperuit.

§. 207.

Eduntur fulminis effectus vel vi tonitru seu fragoris ingentis ab eo excitati, vel vi caloris intensissimi, vel denique vi sibi propria vel vi elasticitatis aëris, quam intendit tum comprimendo (§. 45. *Exper.*), dum stupenda celeritate per eum defertur, tum vi caloris rarefaciendo (§. 48. *Exper.*).

§. 208.

Tonitru vi tales effectus produci debent,
qua-

quales ab ingenti fragore pendere observamus, veluti quod fornices rupturas agant, ædificia & præsertim fenestræ veluti terræ tremore concutiantur, homines obsurdescant.

§. 209.

Vi ignis tribuendum, quod corpora inflammabilia fulmine contacta ignem concipiant, si motui ejus resistent; quæ enim flamma celeriter lata tantum lambit, ea non accendit, cum perinde sit, si corpus inflammabile celerrime per flammam moveas, si flamma celeriter juxta illud moveatur. Quoniam tamen calor subito quaquaversum propagatur & a diversis subjectis diversa quantitate recipitur (§. 115. *Exper.*), in transitu fulminis tales contingunt effectus, quales ab intenso calore proficiscuntur. Ita e. gr. celeb. *Scheuchzerus* autor est, fulmen tangens brachium ancillæ ad puteum stantis aquam in vitro contentam fervefecisse.

§. 210.

Vis corporum pendet cum a quantitate materiæ, tum imprimis a celeritate, qua movetur & ista abunde compensatur. Quamobrem cum fulmen celerrime per aërem vibretur, vi ingenti præditum eidem convenienter agit, ubi motui ejus resistitur (§. 31. *Cosmol. gener.*).

§. 211.

Effectus denique in vicinia producti, quo fulmen ipsum non pervenit, non nisi aëri tribui posse manifestum est. Notatu dignus est casus, quem memorant Vratislavienses loc. cit. p. 1188. &c. quod oves ad domum fulmine correptam mortuæ fuerint prostratæ, ossibus singulis ita comminutis & in carnem impactis, ut ea in pabulum cedere non posset. Quodsi enim ipsum fulmen eas concussisset, non potuisset non lanam facile inflammabilem accendere (§. 209.).

§. 212.

Quoniam vero aër a fulmine propulsus ejus directionem sequitur, non dubitandum, quin vis ipsius fulminis cum vi elastica aëris sæpissime conjungatur.

§. 213.

Quæ de globis igneis per aërem latis & cum fragore sæpissime dissilientibus commemorantur, non nisi massa ignea sunt fulmini similis: neque enim globos solidos in atmosphæra generari ex exhalationibus inflammabilibus probari potest.

§. 214.

Ceterum cum in atmosphæra non generetur quicquam nisi ex exhalationibus, origo omnium meteororum igneorum patet, quæ vel ex materia accensa constant, si celeriter per atmosphæ-

spæram ferantur & durationis momentaneæ fuerint, vel ex materia tantum lucente, si eodem in loco consistent, diuque durent. Figuras fingunt varias, qui Geometriæ ignari de figuris non nisi in concreto judicant, figuram corporis ignoti cum alterius noti figura comparantes.

§. 213.

Inter meteora ignita eminet *aurora borealis*, antea rarus, hoc autem ævo sæpissime visa. Integrum phænomenon spectatur, lumen admodum clarum plagam septentrionalem illustrat, veluti si sol ibidem mox oriturus esset. Arcus ibidem apparet admodum latus comprehendens segmentum valde obscurum, in quo stellæ tamen conspiciuntur, per ipsum quoque arcum transparentes. Ex illo segmento evibrantur radii per arcum celeriter ascendentes, iique admodum lati instar columnarum verticalium, nunc majori, nunc minori copia & ipsum denique cælum quasi in flammâ hinc inde serpentes conjicitur. Durat spectaculum vel per integram noctem, variantibus phænomenis.

§. 215.

Phænomenon hoc esse in atmosphæra nostra evidentissime probat observatio *Maraldi* in Historia Academiæ Rég. Scient. An. 1718, inter duo nubium strata ipsum exhibens. Quamob-

rem

rem cum eodem tempore in locis valde diffitis spectatur, non idem numero sed specie saltem est; id quod etiam circumstantiarum singularem diversitas prodit.

§. 217.

Cum An. 1716. non modo *Hallejus* Londini, verum etiam *Bettichejus* Islebiæ coloribus iridis conspicuum viderint arcum, colores autem non nisi per refractionem luminis prodeant (§. 155. *Exper.*); arcum aliunde illuminari & materia a densitate aëris diversa constare patet.

§. 218.

Quoniam vero Sol atmosphæram nostram tunc temporis, quando apparet, illuminare nequit, immo sæpius quoque Luna abest, quam præsentem vincit aurora borealis; in loco altiori materia lucens per atmosphæram expandi debet, cujus lumine arcus illuminatur & quod subinde refractione in colores mutatur (§. 217.).

§. 219.

Materia igitur arcus multo minus accensa est, sed radios evibratos esse exhalationes actu accensas constat (§. 214.), quod celeriter ascendant & subito dispareant, succedentibus aliis.

§. 220.

Contra flammæ hinc inde serpentes non sunt,

sunt, nisi exhalationes opacæ a lumine septentrionali illuminatæ, ejus procul dubio speciei, ad quam materia arcus refertur. Hinc & non mirum, quod arcus dispareat, cum cælum ardere videtur; redeat autem, ubi flammæ istæ fuerint dissipatæ, immo quod arcus materia in nubeculas colligatur.

§. 221.

Materia phænomeni ad nos affertur ex locis septentrionalibus, quod in Islandia & Norwegia quasi domesticum esse constat.

§. 222.

Ceterum cum aurora borealis lumine suo fulgur æmuletur, eandem esse fulminis atque ipsius materiam probabilissimum est: neque enim fingendæ sunt præter necessitatem in atmosphæra materiæ, de quarum existentia minime constat.

§. 223.

Ignes fatui in locis paludosis & cæmeteriis apparentes & flammam candelæ aut facis accensæ æmulantes, cum in aere inferiori huc illucve agitentur, ex crassioribus exhalationibus gignuntur, iisque tantum lucentibus, quoniam per integram noctem durant, atque tenacibus, quod motu aeris non dissipentur pisces pingues putridi lucentes confirmant, exhalationes pingues ex corporibus

(*Thüm. Inst. Phil. nat.*)

Gg

pu.

putridis prodeuntes noctu lucere posse. Loci igitur circumstantia insinuat, materiam ignium fatuorum istiusmodi exhalationes constituere.

§. 224.

Similes iisdem sunt ignes post tempestatem graviolem nautis in mari conspici, *Castor & Pollux* dicti, si fuerint gemini, quos non esse ignem actuale, sed non nisi materia lucente constare evidens est, quod malo atque antennis insidentes nulla flammæ vestigia relinquant. Exhalationes ascendunt e navi imbre imbuta, ubi sudor hominum pinguis intra poros ligni putredine corrumpitur, vel ipso factore teste, quem in navibus experiri licet.

§. 225.

Ignes denique lambentes capitibus hominum ira ad rabiem usque excandescunt & animalibus itinere defatigatis in nocturnis tenebris adhærentes non esse nisi sudorem pinguem noctu lucentem probatur, quod sudor instar fumi ascendat eo tempore, quo ignes lambentes conspiciuntur. Immo sudorem lucere aliis etiam observationibus constat, e. gr. si indusium sudore præditum noctu manu celeriter lata deorsum frices.

CAP. VII.

DE AQUA.

§. 226.

Aqua est fluidum grave, cujus gravitas specifica est ad gravitatem Mercurii fere ut 1. ad 14. In suis poris plurimum aëris continet (§. 239. *Exper.*). Calore rarefit, quod ipsi vulgo notum: fervida autem ejus determinatum gradum admittit (§. 114. *Exper.*, & quæ sunt alia vel communi observatione, vel experimentis nota.

§. 227.

Aqua ex fontibus ortum ducit, unde per rivus in fluvios definit, qui confluentes in flumina degenerant. Fluvii autem cum intumescant, si per dies complures & pluit & nix in aquam resolvitur, pluviae & nix augent aquæ in fluviiis quantitatem. Omnes vero fluvii aquam tandem in Oceanum effundunt.

§. 228.

Cum aquæ in Oceano non exundent, nec fontibus tandem deficient; pronumerat colligere, illas ab Oceano fontibus restitui. Enimvero, qua id fiat via, non satis liquet.

§. 229.

Alveus fluminum a fonte usque ad Oceanum continuo fit declivior, ut adeo superficies aquarum in Oceano sit multo depressior fonte.

Quodsi itaque aqua per canalem subterraneum ad salientem venam reducatur, fieri non potest, ut ibidem profluat (§. 7. *Exper.*).

§. 230.

Cartesius igitur in Princip. Phil. Part. 4. §. 64. p. m. 164. sumit, aquam calore subterraneo in vapores resolvi, qui per poros terræ aut cavitates subterraneas ascendunt, donec saxis adhærentes in guttas confluunt in cavernam quoque præcipitandas, unde in aquas collectæ per rimas effluunt. Et sane *Peraltius* in Tractatu de Origine Fontium p. 819. operum fratris ex editione Batava refert, stratis quibusdam saxeis in monte dirutis intervallo 13. dierum vapores instar nebulæ continuæ provenisse & intervallo 24. dierum fontes tandem omnes ad radicem montis fuisse exiccatos. Nec deest alterum exemplum, quo idem confirmat.

§. 231.

Enimvero, quoniam aqua marina filtratione per arenam aut alia terrarum itinera salsedinem suam deponere nequit; si a sale demum ad fontem liberaretur, sal ibidem in immensum excresceret, tandemque Oceano deficeret; quod naturæ ordini parum congruum.

§. 232.

Aquæ insignem quantitatem quotidie in va-
po-

pores resolvi, nemo ignorat. Unde fieri quoque posse colligebatur, ut evaporatione abeant rursus aquæ a fluviis Oceano. advectæ. Vapores autem cum ventorum vi per terram continentem dissipentur, quos in cacumina montium per integram noctem copiose præcipitari didicit *Hallejus*; placuit ipsi cum *Peirescio* atque *Isaaco Vossio* in Tract. de Origine Nili aliorumque fluminum defendere, in Actis Erudit. An. 1692. p. 308. 311. sic fontibus ab Oceano suas aquas restitui: *Petro Perraltio* in Tractatu (§. 230.) laudato & *Mariotto* in Tractatu de Motu Aquarum Part. I. Disc. 2. p. 17. aquas pluviales in locum vaporum sorrogantibus.

§. 233.

Aquam pluvialem non profundius penetrare in terram, & communi experientia illorum constat, qui eam exercent, & peculiaribus experimentis confirmatum a *Philippo de la Hire* in Comment. Acad. Reg. Scient. An. 1708. p. 68. Enimvero hæc quidem valent de terra communi, quæ instar spongiæ aquam imbibit & in poris majoribus exuberare finit: non vero eadem applicare licet ad terram arenosam & sabulosam, multo minus ad strata lapidea & argillacea rimis interjectis hiantia, per quæ & aquæ pluviali & vaporibus nocturno frigore præcipitatis (§. 232.) aditus patet,

§. 234.

Præterea constat, fluviis, qui urbes alluunt, intumescantibus, aquam in cellas penetrare & in profundioribus stagnantes relinqui, etiamsi in fluviis subsidat. Quamobrem non sine ratione adfirmat *Perraltius*, hac quoque via aquam ad hydrophilacia sub montibus deferri, qualia admitti jubet fontium plurimorum constantia.

§. 235.

Aqua in fluviis decurrit non modo ob declivitatem fundi continuam, verum etiam, quod inferior a superiori prematur: ut adeo motu sit celerior, si alveus fuerit declivior & profundior. Acceleratur motus alveo coarctato aquaque tum intumescente, donec motu accelerato eadem per coarctatum transeat eodem tempore quantitas, quæ per amplum transierat.

§. 236.

Vis aquæ fluentis, cum a quantitate massæ, tum a celeritate, qua movetur, pendet, perinde ac omnium corporum. Quamobrem cum fluvio intumescente celeritas augeatur (§. 235.), vis quoque ejusdem augetur, quam in corpora motui ipsius resistentia exercet tanto majori successu, quod intra aquam minor sit resistentia (§. 16. *Exper.*).

§. 237.

§. 237.

Quodsi in unum mare plus aquæ a fluminibus effunditur, quam in alterum, vel in casu æqualitatis in uno minus evaporetur, quam in altero, vel utraque etiam causa concurrat; aqua in uno altior, quam in altero, ex uno in alterum fluit. Ita experiamur, aquam ex Ponto Euxino in mare mediterraneum fluere.

§. 238.

Inter phænomena naturæ maxime admiranda referri debet æstus maris, cum motu Lunæ arctissime connexus. Quando enim Luna a circulo horæ sextæ ad meridianum ascendit, aqua successive intumescit; dum vero a meridiano ad eundem in parte occidentali descendit, successive iterum detumescit. Et eadem est ratio, dum ad meridianum inferiorem accedit & ab eodem iterum recedit. Quemadmodum Luna motu proprio quotidie 12. circiter graduum intervallo a Sole recedit & $\frac{3}{4}$ unius horæ tardius ad meridianum accedit; ita eodem modo æstus quoque maris quotidie retardatur. Est autem is major in novilunio & in plenilunio, minor in Quadraturis, ita ut a novilunio ad primam Quadraturam decreascet quotidie, inde ad plenilunium crescat, ab eo usque ad ultimam Quadraturam denuo decreascet & ab hæc usque ad novilunium rursus crescat. Non tamen æstus maximus præcise in novilunii vel

plenilunii diem incidit, sed plerumque in tertium a syzygis. Et eadem est ratio æstus minimi. Ajunt quoque æstum esse majorem circa æquinoctia, minorem circa solstitia. Et *Cassinus* junior docuit, æstum quoque majorem esse in Perigæo Lunæ, quam in Apogæo, immo eundem crescente declinatione Lunæ decrescere, ita ut variatio pendens a declinatione sit dimidia ejus, quæ distantia Lunæ a terra debetur. Monet præterea solem eodem modo influere in æstum maris, ut ut effectus ad eum pertinens sit longe minor. Ceterum jam *Varenius* in *Geographia generali* Part. I. sect. 4. c. 13. ostendit, quod in diversis littoribus causæ accidentales multum variant circumstantias, veluti cum aquæ motus ob terram continentem mutatur.

§. 239.

Quoniam æstus maris adeo arcto vinculo cum motu lunæ connectitur, non modo cum communi, verum etiam cum proprio (§. 238); non levis est suspicio, quod luna ejusdem causa existat. Unde porro colligitur, etiam solem ad eundem effectum concurrere, quamvis vi minori (§. 238.).

§. 240.

Aqua sub luna intumescit (§. 238.): quamobrem motus iste maris reciprocus, quo alternatis vicibus intumescit atque detumescit tribui nequit cum *Cartesio* pressionì lunæ per ætherem

rem & atmosphæram nostram usque ad Oceani aquas & continuatæ. Stante hac hypothesi, aquam sub luna detumescere oportere : id quod ab observatione abhorret.

§. 241.

Keplerus in astronomia lunari p. 70. admisit mutuam corporum mundi totalium attractionem, quam phænomenis motuum cœlestium congruam deprehendit *Newtonus* in Princ. Phil. Nat. Mathem. Lib. 3. prop. 24. Et per eandem uterque admirandum hoc naturæ phænomenon explicat. Demonstravit nimirum *Newtonus* l. c. & post eum *David Gregorius* in Element. Astron. Phys. & Geometr. Lib. 1. prop. 46. f. 57. vim, qua luna a motu rectilineo retrahitur, ut in curva incedat, eandem eodem modo urgere versus centrum telluris ac si vi gravitatis versus idem propelleretur. Unde patet, lunam gravitate in terram. Quoniam vero in natura rerum actiones & reactiones corporum mutuæ sunt (§. 61. *Cosmol. gener.*); terra perinde in lunam gravitare debet. Quod si hanc gravitationem sumamus instar phænomeni, quod suam habet causam efficientem naturalem, etsi adhuc latentem; nil obstat, quominus eandem tanquam causam aliorum phænomenorum seu effectuum naturæ explicandum allegamus. Sane per gravitatem corporum

partialium reddimus rationem eorum, quæ inde pendent, etsi ignoremus, quænam sit istius gravitatis causa. Qualitates autem occultas fingit, qui vires attractrices & gravitatem sua natura inexplicabilem admittit, easque sumit, ubi existentiam earundem experimentis vel observatione stabilire nequit.

§. 242.

Quodsi enim ponamus, omnem materiam terrestrem in Lunam gravitare magis quidem ac minus pro diversitate distantiae a centro Lunæ; phænomena fluxus atque refluxus maris in aprico posita sunt. Sit Terra in T, in Z Zenith, in N Nadir, HR vero Horizon & Luna in L. Evidens est, aquas in Zenith esse centro Fig. 6. Lunæ L $\frac{1}{60}$ ipsius TL propiores, quam centrum & alteras in N tanto intervallo remotiores. Aquæ igitur in Z magis gravitant in Lunam & alteræ in N minus, quam materia in centro T. Quamobrem cum aquæ in Z & N versus centrum T minus gravitent, quam in H & R; ibidem intumescent: quæ intumescencia cum globum terraqueum perambulet, Luna circa eundem revoluta fluxus atque refluxus ratio habetur. Sol ob majorem distantiam minus influit in æstum maris: quando tamen cum Luna conjungit vires suas, æstum auget, quando eidem contrariatur, eundem minuit. Ceterum

rum quoque distantiae lunaris variatio attendi meretur, si specialium phaenomenorum ratio reddenda.

§. 243.

Inter causas accidentales, quæ phaenomena æstus variant, referendæ sunt, terræ continentes Oceano adjacentes, quo & motus impeditur & directio mutatur, nec non venti, quorum vi aquæ motus vel acceleratur, vel retardatur.



CAP. VIII.

DE TERRA ET FOSSIBILIBUS.

§. 244.

Terrarum varia genera recensere instituti nostri non est, cum nobis non historia, sed scientia naturalis curæ cordique sit. Juvat tamen adnotasse, quod terram effodienti diversarum terrarum strata se se offerant: cujus memorabile exemplum refert *Varenius* Geogr. gener. p. m. 46. Part. 5. lect. 2. prop. 7. Inde nimirum liquet, terram inundationibus varias subisse mutationes.

§. 245.

Immo hac ratione integros coaluisse montes variis indiciis probat cl. *Svedenborgius* in præfatione ad Prodrum Principiorum rerum naturalium, veluti, quod marina petrefacta

im-

immensa copia in cacuminibus montium reperiuntur & intra eosdem offendantur saxa prægrandia ad horizontem inclinata.

§. 246.

Quemadmodum vero montes ortos fuisse constat, quibus initio non extiterunt; ita dubio caret, quod alii quoque interierint.

§. 247.

Inter fossilia primo loco occurrunt *Salia*, sal scilicet commune seu culinare, nitrum, vitriolum & alumen.

§. 248.

Dividuntur *Salia* a chymicis in alcalina & acida. *Acida* sapore dignoscuntur: *alcalina* cum acidis effervescent, etsi criterium posterius subinde fallat.

§. 249.

Sal commune ex sale acido & alcalino componi hinc constat, quod, si aqua marina vel sale communi imprægnata evaporetur, ut sal in chrystallos abeat, chrystalli priores cum oleo Tartari per æliquium, quod est speciei alcalinæ, non effervescent, effervescent tamen posteriores, haud obscuro indicio (§. 246.), priores esse alcalinos, posteriores acidos.

§. 250.

Nitrum seu *Salpetra* multum salis communis
con-

continere denuo chryſtalliſatio prodiſt. Etenim chryſtalli priores ſunt nitrum purum, poſteriores ſal commune, quod in culina uſui eſſe poteſt. Generatur autem ex ſale alcali & acido, quod ex aere attrahitur. Quodſi enim calx ſal alcali continens argillæ vel terræ commiſceatur & aeri exponatur, ex eo ſal acidum attrahitur, quo cum ſale alcali calcis commixto nitrum inſtar pruinæ effloreſcit.

§. 251.

Vitriolum ingentem aquæ quantitatem continet, quæ leni calore in vapores agitur; ſal præterea acidum & terram metallicam, cum ſpiritu expulſo ex vitriolo calcinato ſeu phlegmate liberato, quæ relinquitur maſſa in cuprum vel ferrum mutari poſſit.

252.

Magnam quoque phlegmatis quantitatem continet *alumen*, itemque ſal acidum, quod vitriolico affine, cum in operationibus chymicis huic ſubſtitui poſſit.

§. 253.

Ad foſſilia porro refertur *ſulphur* ipſique agnatum *ſuccinum*. Sulphur conſtare ex materia oleoſa evincitur, quod calore liqueſcit, facile inflammatur & flamma abſumitur. Fiſſilitatem autem habet a ſale acido cum experi.

rimenta chymia loquantur, olea ab acido spiritu fixitatem nancisci. Evidentius hæc patent per artificialem *Glauberi* productionem sulphuris a Cel. *Hoffmanno* in *Observat. Physico-chymicis*, Part. I. c. 19. p. 308. descriptum.

§. 254.

Succinum ex materia fluida generari testantur heterogenea eidem sæpius inclusa, veluti muscæ, araneæ, culices, formicæ, cicadæ, scarabæi &c. referente *Hartmanno* in succincta succini Prussici historia & demonstratione Sect. 3. c. 3 p. 19. Cum sit inflammabile, ex materia oleosa constet & ob fixitatem ex sale acido (§. 253.). Reperitur in ligno fossili, quod bituminosum vi caloris subterranei materiam oleosam transsudat. Vitriolum etiam magna copia reperitur in solo succini natali, teste *Hartmanno*, quod cum sal acidum contineat (§. 251.), materiæ oleosæ figendæ sufficit (§. 253.). Immo idem autor est, se quoque alumen & nitrum ibidem reperisse, quibus salia quoque acida insunt (§. 252. 250.).

§. 255.

In fossilium numero quoque comparent lapides cum vulgares, tum pretiosi. Inter illos lapides figurati eminent, quos *Scheuchzerus*, *Langius*, *Bayerus*, *Hellwingius*, *Buttnerus* noster, una cum collega nostro celeberrimo *Wolfarthio*

thio in Historia Naturali Regionis Hassiae inferioris descripserunt.

§. 256.

Lapides istos figuratos esse vel conchas marinas, & ossa animalium exoticorum petrefacta vel piscium & plantarum verarum figuras lapidibus impressas, non dubitat, qui petrefacta cum objectis naturæ, quæ referunt, contulit, illorumque structuram internam rimatus est.

§. 257.

Quoniam vero petrefacta aliis lapidibus inclusa reperiuntur, evidenter liquet, lapides a natura generari, nec omnes in primo rerum exordio a Deo fuisse productos.

§. 258.

Cum subjecta marina in locis a mari valde dissitis maxime reperiantur numero, aut inundationibus eo delata sint, aut mare olim ante illa tempora, quorum memoriam monumenta historica conservant, ibi locorum fuit, ubi eadem reperiuntur.

§. 259.

Qui priori hypothese addicti sunt, diluvium Noachicum effectus hujus causam esse tuentur. Enimvero jam *Swedenborgius* loc. cit. ostendit, non esse effectum unius anni, quæ inundationibus

bus tribui deberent, prætereaque refert, reperiri sub terra & in ipsis montibus ligna & ferramenta navium, ut portum ibi quondam fuisse appareat. Quamobrem cum ejusdem fide constet, mare hodiernum in Suecia versus occidentem continuo recedere atque adeo sedem suam mutare, probabilius omnino videtur hypothesis altera, cui nuper suum quoque adjecit calculum in Gallia *Jussieu* variis observationibus adductus in *Historia Acad. Reg. Scient. An. 1720. 21. 22. a Fontenellio* relatis.

§. 260.

Laterum atque testarum præparatio artificialis genesis quorundam saltem lapidum declarat. Nimirum si aqua terram limosam sæpius irrigat & evaporata particulas limosas intra poros relinquit; particulae terreae hoc quasi glutine conjungentur & massa successive indurata tandem in lapideam substantiam abibit. Fieri tamen quoque posse, ut aqua particulas quasdam secum vehat, quæ ipsam ad terram & arenam in massam lapideam convertendam aptam reddunt, observatione *Fabricii* a *Gassendo* relata confirmatur, qui cum Avenione literis operam daret, vidit terram in fundo Rhodani in massulas instar ovorum induratorum convolvi & paucos post dies in lapideam substantiam converti. Enimvero lapidum genesis in eorum

nu-

numero habetur, quæ ulteriori disquisitioni relinquuntur.

§. 261.

Gemmas ex materia fluida concrevisse intelligimus, quod figuram matricis ambientis assumant. Colorem vero esse heterogeneum patet, quod vi caloris eodem priventur. Posse autem eas solis halitibus mineralibus tingi arte docemur, quæ gemmis artefactis halitu minerali colores impertitur, docente *Antonio Neri* de arte vitraria c. 74. p. 136.

§. 262.

Nullus lapidum adeo singularibus phenomenis nobilitatur, quemadmodum *magnes* (§. 210. *Exper.*). Enimvero cum jam causam eorundem (§. 216. & seqq. *Exper.*) stabiliverimus, alibi dicta denuo non reperimus.

§. 263.

Denique inter fossilia comparent metalla, de quorum genesi vix licet in medium proferre conjecturam probabilem, antequam plura de iisdem prostent experimenta. Et si enim *Adepti* & *Philosophi*, qui vocantur, experimenta plurima describant, quibus mixtio metallorum palam fieri poterat: haud tamen ignotum est, ea cimmeriis tenebris ab iisdem involvi, ut in usum physicum recipi nequeant, & ægre distinguere sophismata ab experimentis genuinis nisi ab adepto.

§. 264.

Terra subinde tremit, immo valide concutitur, ut ædificia superstructa similem tremorem concipiant, immo subinde prorsus concidant; qui naturæ effectus *terræ motus* appellatur. Terra tremere nequit, nisi vi quadam pars quædam elevetur iterumque subsidat. Quod cum fieri non possit, nisi vi quadam intra viscera terræ conclusa & a centro telluris versus superiora nitente; causa terræ motuum erit vapor elasticus, seu exhalatio sicca elasticitate prædita, qualem etiam subinde per fissuras terræ a nimia expansione factas prorupisse legimus. Esse autem halitus sulphureos colligitur, quod sub forma flammæ sæpius proruperint & terræ motus plerumque præcedant flammæ ex montibus ignivomis proserpentes, ibi adeo locorum potissimum sævientes, ubi ignivomi montes conspiciuntur. Montes autem ignivomi halitum sulphureum continuo emittunt, qui in sulphuris flores concrescit observante *Tschirnhau-
sio* in *Medicina mentis* Part. 2. p. 131. 132. Incenduntur autem, si vi venti intra cavernas subterraneas repulsi concentrentur, cum procella præcedere soleat antequam ignes emovant montes atque terræ motus excitetur.

PARS IV. DE PLANTIS SEU VE- GETABILIBUS.

CAP. I.

§. 265.

Anatomiam plantarum primi tradiderunt *Marcellus Malpighius* Italus & *Nehemias Grevv* Anglus circa An. 1671. Eandem ulterius excoluit *Antonius van Leeuwenhæk* & Philosophus in Philosophia Experimentalis scriptisque aliis. Nos etiam eandem perfecimus in Anatomia foliorum, quæ legitur in Actis Eruditor. An. 1722.

§. 266.

Partes plantæ sunt radix, caulis, gemmæ, folia, flores & semina, quæ singulæ ex iisdem partibus integrantibus componuntur, sed diversa quadam ratione. Sunt autem partes integrantes fistulæ succiferæ, tracheæ, utriculi, cuticulæ.

§. 267.

Fibras ligneas esse fistulas succiferas & ratio, & experientia loquitur. Etenim succus ex radice per caulem ascendit & per folia atque flores distribuitur (id quod patet, caule a radice avulso & aquæ immerso:) structura autem mox explicanda docet, non aliam patere ex caule in folia, flores, gemmas-

que viam, nisi per fistulas ligneas. Optime conspiciuntur in caule cucurbitæ hiemis furori exposito, ubi exsuccæ cavitatem tubulosam præbent spectandam: tum etiam in iis plantis, quæ succum habent lactei vel alterius coloris.

§. 268.

Tracheæ, quas nonnulli in dubium vocant, non modo in vite & moro per microscopium vulgare facillime conspiciuntur, sed & in ceraso & aliis arboribus per exquisitiora, quia in istis majores, in his minores existunt. Philosophus quoque experimenta easdem prodere docuit, quæ ope Antliæ pneumaticæ instituuntur, & quibus non feliciter usi sumus in foliorum Anatomia.

§. 269.

Utriculos esse vesiculas exiguas congerie quadam congestas, medulla, cortex & folia oculo armato probant.

§. 270.

Radix est pars infima plantæ, quæ terræ infigitur & succum ex ea attrahit in nutrimentum plantæ. Caulis seu Caudex ex radice assurgit & folia cum ramis, floribus atque seminibus sustentat, succumque nutritium ex radice singulis advehit.

§. 271.

§. 271.

Eadem in arboribus est radicis atque caudicis structura. Constant enim ex cortice, substantia lignea atque medulla & partes singulae eodem modo ex fistulis succiferis, tracheis & utriculis componuntur: unde plantatione inversa docente *Leeuwenhæckio* in Arcanis Naturæ detectis p. 142. & seqq. radices in ramos, & ram. in radices vertuntur, & Philosophus experimento monstravit, radicis a frutice rosarum avulsæ partem terræ commissam radices egisse, partem alteram aëri liberiori relictam gemmas protrusisse in ramos explicatas.

§. 272.

Cortex tegitur cute & cuticula poris patentioribus passim instructa, qui in conspectum prodeunt, cortice aquæ ab aëre purgatæ (§. 239. *Exper.*) immersa & aëre aquæ incumbente operantiæ pneumaticæ rarefacto.

§. 273.

Idem constant ex plurimis utriculis, quibus spongiosa redditur ipsius substantia. Habet tamen quoque suas fistulas.

§. 274.

Lignea substantia pluribus e contrario gaudet fistulis succiferis & tracheis, paucioribus vero utriculis. Et præter fistulas verticales ad
Hh 3 sunt

sunt etiam horizontales a medullæ centro versus peripheriam caudicis usque ad corticem excurrentes.

§. 275.

Medulla est mera utriculorum congeries, fistulis succiferis circumsepta, quæ instar venarum transversim sectæ succum effundunt, quales etiam plerumque in extrema peripheria prope corticem conspiciuntur.

§. 276.

In singula folia & gemmas singulas indeque enatos furculos fistulæ quædam succiferæ una cum medulla ex caule sive caudice derivantur a foliis & gemmis usque ad radicem continuæ.

§. 277.

Fistulæ succiferæ cum medulla pediculi distribuuntur instar ramulorum juxta latitudinem folii & fistulas efformant, unde ulterius eodem modo deducuntur tenerrimi ramuli reticulum quasi formantes, cujus interstitia utriculis in congeciem congestis replentur.

§. 278.

Cuticula folii pauciores habet poros in parte obversa, plures in aversa, id quod eodem experimento constat, de quo ante (§. 272.) diximus.

§. 279.

§. 279.

Gemma continet rudimentum totius surculi vel florum atque fructuum, qui inde enascuntur.

§. 280.

Semen vero præter pulpam suam habet plantulam, radicula, foliolis & gemmula intermedia instructam, quæ in seminibus perfectis distincte conspiciuntur, præsertim ubi germinare incipiunt.

§. 281.

Muniuntur semina cute tenaciori, vel putamine duro, quod poris distinctum probat aliquoties laudatum experimentum (§. 272.), per quos aqua ad semen intus conclusum deducitur.

§. 282.

Mittimus alia ad anatomiam plantarum spectantia a Philosopho vel in experimentalis Philosophia, vel in ceteris scriptis ad physicam pertinentibus passim tradita, una cum observationibus & experimentis, quibus singula confirmantur.

CAP. II.

DE VEGETATIONE PLANTARUM.

§. 283.

Ex plantula exigua semini inclusa plantam imo integram arborem successive adolescere, experientia constat.

§. 284.

Eger autem nutrimento aqua: etenim furculi a planta a vulsi in aqua vegetant, & si æstu solis terra exarescit, pluvia deficiente plantæ enecantur.

§. 285.

Terræ particulas non una cum aqua cedere in nutrimentum plantarum, *Helmontii* experimento constat a *Roberto Boyle* in *Chymista* Sceptio p. 37. & seqq. repetito, quo terra ante & post vegetationem in clibano exsiccata ejusdem ponderis deprehensa fuit.

§. 286.

Aquam habere particulas terrestres sibi intime permixtas evidens est, quod putredine ab ea discedentes tandem in fundo præcipitentur viridi colore donatæ, quales in utriculis foliorum per microscopia æquisitissima conspiciuntur.

§. 287.

§. 287.

Celeb. *Woodwardus* Angliæ Decus, in Transact. Anglic. Num. 253. p. 193, experimentis cum cura institutis docuit, materiam terrestrem aquæ pexmixtam potissimum esse nutrimentum plantarum, cum aqua in vitris occlusis putrescens plus materiæ terrestris deposuerit, quam altera, cui plantæ vegetantes erant commissæ. His tamen experimentis nondum evincitur, quod non ipsa quoque aqua fixarum partium constitutionem ingrediatur, quam inter partes constitutivas mineralium locum habere chymicis experimentis probari potest. Imo, qui in metallorum mixtionem accuratius inquisiverunt, aquæ in eadem haud ægre locorum concedunt.

§. 288.

Præter aquam alio adhuc opus esse nutrimente, agricolarum & hortulanorum experientia liquet, qui ut agro fertilitatem concilient, stercorationem adhibent. Fimus autem, quo communiter utuntur, particulas salinas & sulphureas continet.

§. 289.

Ceterum pluvialem aquam & rorem non esse aquam puram, sed multis particulis heterogeneis mixtam intelligitur, quod plantarum & animalium, dum corrumpuntur, particulae in auram abeant cum vaporibus in societatem

euntes, unde pluvia & ros generatur (§. 158. 171.).

§. 290.

Omnes plantas eodem pabulo nutriri non negabit, nisi qui plantarum diversæ admodum speciei, immo ex peregrinis admodum locis allatarum in eadem terra vegetationem non cogitat.

§. 291.

Aqua vero per poros radice in ejus substantiam spongiosam penetrat, & eodem modo vapores aëris humidi & particulæ roris per poros foliorum in substantiam utriculosam se se insinuant: id quod in radice & foliis experimento supra (§. 272.) laudato monstratur.

§. 292.

Idem cum sit omnium plantarum pabulum (§. 290.), diversus tamen in iisdem contentus succus; pabulum immutari debet in succum nutritium intra plantas. Fistulæ succum excoctum vehunt (§. 267.): non ergo sunt nisi utriculi, in quibus ista nutrimenti digestio fieri potest (§. 269.). Potest autem eadem fieri cum in trunco & foliis, tum in radice, quia radix ramorum & rami radice vices subire possunt (§. 271.).

§. 293.

Ascendit autem in fistulis succiferis, aëre calore aëris ambientis externi in tracheis rarefacto

Et, & eadem de causa, qua in tubulis capillari-
bus veluti sponte ascendit, forsan & aliis adhuc
latentibus, & per fistulas caulis ulterius defer-
tur in folia & gemmas (§. 277.).

§. 294.

Succum autem nutritium non modo a radice
per caulem sive truncum in folia, sed & a fo-
liis per eundem caulem deorsum in radicem
moveri primus observavit *Major*, Professor
Kiloniensis in Dissertatione de planta monstro-
sa Gottorpiensi & pluribus deinde experimen-
tis confirmarunt *Perraltius* in Tentamine de
Circulatione succi nutritii & *Mariottus* in Ten-
tamine de Vegetatione plantarum. Sane si fo-
lia immittantur aquæ, inflexo licet caule, suc-
cus per ea ascendit & per caulem inflexum in
radices descendit, ut radículas in libero aëre
emittant. Nos quoque in foliorum anatomia
ostendimus, diversas dari in pediculo folii fi-
stulas, quarum aliæ succum viridem, aliæ vero
magis aquosum vehunt, adeoque istæ succum
nutritium partibus nutriendis advehunt, hæ
venarum instar succum particulis nutritivis or-
batum revehunt.

§. 295.

Gemmas ex medulla erumpere perinde ac
radículas juniores dudum observavit Philoso-
phus & in Tractatu de usu partium in vegetabi-
libus

libus & animali ac humano corpore novis observationibus extra dubitationem posuit, sectiones nempe horizontales ramulorum gemmis contiguorum rite factas oculo vel nudo vel diversimode, prout usu tulit, armato contemplatus. Continent autem arbores medullam non modo in centro, sed si adolescunt, inter fistularum diversæ ætatis ordines: id quod alio tempore distinctius demonstrabit Philosophus, prout ex ipsius ad me literis habeo. Seminis vero plantula in sua gemmula continet furculum in longum excrescentem; reliqua vegetatio fit per gemmarum ex medulla emissionem.

§. 296.

Arbores singulis annis novo fistularum ordine medullari substantia interposita ditantur: unde quotannis truncus atque rami evadunt crassiores.

§. 297.

Succus autem nutritius per fistulas juniores & corticis potissimum ascendit: unde non desunt exempla arbores frugiferarum Philosopho expensa, ubi ramorum haud impedita fuit vegetatio fructibus onustorum per æstatem, etsi a pluribus annis omnis fere substantia lignea interior putredine absumpta fuerit. Et eadem est causa cur cortice avulsa arbores enecent.

centur, immo furculi emarcescant, annulo ex cortice rami adempto.

§. 298.

Plantas quoque transpirare, experimentis *Woordwardi & Philippi de la Hire* constat, foliorumque atque caulis flaccescentia in æstu solis probet, quæ ex defectu humoris oritur. Ita humor inutilis absumitur, materia nutritiva relicta, quæ non adeo facile in vapores abit.



CAP. III.

DE VITA, MORTE ET GENERATIONE PLANTARUM.

§. 299.

Vivit planta, quamdiu vegetat: si vero vegetatio cessat & plantæ substantia arescit, mortua dicitur. Est igitur vita is plantæ status, quæ assumptum alimentum concoquitur & succus excoctus libere ad singulas partes nutriendas defertur. Quæ igitur motum succi nutritii destruunt, plantam enecant.

§. 300.

Moriuntur igitur plantæ, structura organica vel casu quodam vitiata, vel succo nutritio prorsus absumto, fistulisque ligneis nimium rigidis factis, ut succi circulationi inservire amplius nesciant.

§. 301.

§. 301.

Ordinarie plantæ ex seminibus gignuntur, in quibus plantula rudimentum ejus primum continet, una cum primo nutrimento in seminis pulpa.


§. 302.

Possunt vero etiam propagari vel per furculos a planta seniore resectos & in terra radices agentes (§. 271.), vel per gemmas a furculo arboris avulsas & alterius stipiti insertas, cum nec semen nisi unicam gemmulam contineat eamque minus perfectam (§. 280.), vel per radices, quæ etiam sub terra stolones emittunt, hoc est, gemmas in medulla seu substantia utriculosa congesta (§. 295.) latentes non in aëre tantum libero (§. 271.) extrudant.

§. 303.

Unde vero plantulæ in semina & gemmæ in medullam plantarum deferantur, vix adhuc satis liquet. Qui cum Aristotelicis animam fingit vegetantem, quæ plantulas & gemmas ex succo inorganico struit, nodum non solvit, sed secat, aut si mavis, magis perplexum reddit. *Systema involutionis*, quo usus imprimis *Malebranchius*, imaginationi negotium faceffit, propterea quod impossibile videatur, ut in primo semine actu contenta fuerint compendia omnium arborum & fructuum cum seminibus per omnem

omnem telluris ætatem inde continua generatione enascendorum, diverso quidem perfectionis gradu, quo alia sunt ceteris diversis gradibus evolutioni propiora. *Systema præexistentiæ liberæ*, quod *Honorato Fabry*, *Perraltio* atque *J. Christophoro Sturmio* magis arrisit & vicujus plantulæ & gemmæ in prima statim creatione terræ commissæ una cum succo nutritio in plantas evchuntur, majoribus premi videntur difficultatibus, cum non appareat ratio, cur quælibet rudimenta ad plantam suæ speciei, haud quaquam vero ad alias deferantur, immò experientia doceat, furculos arborum truncis aliarum arborum speciei differentium insertos germinare.



PARS V.

DE OECONOMIA ANIMALI.

CAP. I.

DE NUTRITIONE.

§. 304.

Cibus ori assumtus dentibus incisoriis dissectatur in frusta: molaribus autem comminuitur, saliva affluente permixtus: qua incisione, comminutione & commixtione cum saliva *masticatio* absolvitur. Dentes incisores forcem, molares vero lapides molares repræsentant:

tant : superioribus quiescentibus , inferiori maxillæ infixi moventur.

§. 305.

Cibus masticatus ope linguæ devolvitur ad orificium gulæ masculorum actione dilatatum, eique ingestus per eandem fibris spiralibus tunica musculosæ gulæ cavitatem coarctantibus devolvitur , tunica glandulosa interiorem superficiem humectante , ad facilitandum cibi descensum.

§. 306.

Cibus in ventriculum delatus cum liquore gastrico comiscetur, quem per crustam villosam fundunt glandulæ, & calore digestus motibusque ventriculi conquassatus solvitur : fibris autem tunica musculosæ constrictis per pylorum ejicitur in intestinum duodenum, ubi succus pancreaticus cum felle affunditur ulterioris digestionis gratia.

§. 307.

Promovetur autem digestus actione fibrarum tunica musculosæ intestinorum continua ulterius & inde exprimitur in venas lacteas radices suas per intestinalem ductum immenso numero spargentes: unde si canis aliquot a pastu horis secetur, in mesenterio veluti lacte turgidæ conspiciuntur.

§. 308.

§. 308.

Chylus ibidem lymphæ, quam glandulæ copiosæ fundunt, dilutus in cisternam deducitur, commune chyli atque lymphæ receptaculum, ibique magis adhuc dilutus per ductum thoracicum in venam subclaviam deferitur.

§. 309.

Sanguini permixtus ibidem mox per venam cavam dextro cordis ventriculo infunditur & contractione fibrarum carnearum in arteriam pulmonalem exprimitur, ut in pulmonibus aër admisceatur. Docet enim cel. *Bergerius* Lib. I. de Natura humana c. 4. p. 47. quod injecta aqua tepida in ductum bronchiale pulmonum semper cum spuma inde redeat per venam pulmonalem; aqua vero injecta in ratum arteriæ pulmonalis redeat per bronchum.

§. 310.

Redit sanguis ex pulmone ad cor per venam pulmonalem & sinistro cordis ventriculo infusus motu cordis in arteriam magnam exprimitur, per cujus ramos ad omnes corporis partes deferitur, unde per ramos venarum redit in venam cavam dextro cordis ventriculo iterum infundendus.

§. 311.

Continuus iste motus *Circulatio sanguinis* ap-
 (Thüm. Instit. Phil. nat.) li pelæ

pellatur, ab *Harvæo* detectus.' Patet autem ex structura cordis & systemate venarum & artiarum cum eodem connexarum. In dextrum hiant vena cava & arteria pulmonalis, in sinistrum vero pulmonaria & arteria magna. Venæ cavæ & arteriæ magnæ rami distribuuntur per totum corpus, venæ autem & arteriæ pulmonariæ rami per pulmonum lobos. Venæ & arteriæ ubique per totum corpus communicant invicem ope tubulorum capillarium curvatorum, quorum pars una arteriæ, altera pars venæ vices subit, observante *Lecuvvenhækio* (§. 208. *Exper.*). Movetur autem sanguis in arteriis a corde versus extremas corporis partes, in venis contra cor versus: id quod in piscibus aliisque animalibus per microscopium videre licet. Ne in actione cordis sanguis ex ventriculo exprimatur in venam, unde venerat, valvulis impeditur, quibus etiam regressus in cor coercetur.

§. 312.

Cor adeo, quod machinæ hydraulicæ a *Ctesibio* nomen habenti assimilatur, continua alternatione constringitur & dilatatur: vocant autem motum priorem *systolen*, posteriorem *diastolen*, qualem etiam habent tunicæ artiarum & venarum ob alternantem constrictionem & relaxationem fibrarum carnearum tuni-

nicæ musculosæ. Motus autem cordis per arterias continuatus *pulsus* audit.

§. 313.

Motu imprimis arteriarum continuo atteritur chylus, caloreque attritus solvitur, sicque tandem & ipse in sanguinem vertitur, cui permixtus fuerat.

§. 314.

Dum vero sanguis continuo per vasa corporis circulatur, ope glandularum, quæ non sunt nisi arteriolæ conglomeratæ, variæ in variis partibus fiunt secretiones. Sane in hepate a sanguine per venam portæ ex visceribus abdominis advecto secernitur bilis per ductus biliarios partim in vesiculam felleis, partim in intestinum duodenum effundenda; in renibus urina per uretheres in vesiculam urinariam descendens & hujus constrictione ope fibrarum tunicæ musculosæ facta per urethram expellenda; in orte per glandulas salivales saliva; in ventriculo liquor gastricus, in intestinis liquor eidem similis, passim per corpus lymphæ, quæ per vasa lymphatica in venas ad sanguinem reducitur; in pancreate succus pancreaticus in intestinum duodenum effundendus; per glandulas subcutaneas sudor; per lachrymales lachrymæ &c. secernuntur.

§. 315.

Sanguis ad glandulas advehitur per arterias (§. 314.), ut adeo omnis secretio fiat a sanguine arterioso, bile excepta (§. 314.). Cum vero glandulæ non sint nisi tubuli simili liquore repleti, qui a sanguine secerni debet; tubuli autem capillares sugant; testibus experimentis de filtratione, liquorem, quo replentur, si fuerit alteri permixtus: liquor secernendus jam in massa sanguinea a reliqua materia separatur (§. 314.).

§. 316.

Nutritur autem corpus sero sanguinis, quod leni calore in massam gelatinosam abit, quæ tandem induratur: ut adeo ossibus etiam nutriendis sufficiat, quæ per machinam *Papinianam* emollita, perinde ac ceteræ partes solidæ in massam gelatinosam reducuntur.


§. 317.

Fibræ carneæ ex fibrillis minoribus constant, quæ cum sint tubuli intus liquore repleti, crassiores redduntur muscoli, si liquore magis turgent: in corpore contra macilento ejus defectu plurimæ concidunt. Dum vero crescente corpore in longitudinem extenduntur particula nutritivæ accretæ molem augent. Constat, ipsa ossa, quamvis dura, esse vibrosa & tubulosa, & per ea secundum longitudinem moveri

veri serum nutritivum a sanguine per arteriolas intra ipsorum substantiam advecto separato. Etenim ossa aliquando parte intermedia ablata, in longitudinem exereverunt, ut partes distantes denuo coalescerent: immo in iisdem observatæ arteriolæ.

§. 318.

Per glandulas subcutaneas & per respirationem sanguis ab humore superfluo liberatur: quæ materiæ superflue insensibilis secessio *transpirationis* fert nomen, a *Sanctorio* primum accurate expensa & ceteras excretiones per alvum & urethram plurimum superans. Ejus gratia corpus animale nutrimento eget, ut restituatur, quod transpiratione omissum.



CAP. II.

DE SENSATIONE.

§. 319.

Inter sensus eminet *visus*, cui oculus dicatus. Radii nimirum luminis ab objecto per pupillam in eundem immissi in humore chrysalino, figuram lenticularem habente, refringuntur & in retina uniti objectum situ inverso delineant nitidissime (§. 178. *Exper.*). Retina cum sit expansio nervi optici, fibrillæ nerveæ percussæ motum ad cerebrum usque transmittunt.

tunt, quacunque tandem ratione id fiat (§. 190. *Psychol.*).

§. 320.

Pro diversitate imaginis in oculo delineatæ variat visio, ut sit distincta & clara, si imago fuerit distincta & clara; confusa contra & obscura, si imago confusa & obscura. Immo a magnitudine, motu & contiguitate imaginum in oculo pender visio magnitudinis, motus & contiguitas objectorum, ut aliquando hinc visus hallucinetur.

§. 321.

Sonus, qui in motu consistit per aërem propagato (§. 228. *Exper.*), per meatum auditorium in membranam tympani incidens, ope malleoli, incudis, stapedis atque ossiculi orbicularis quantitati soni proportionaliter mox tensam, ut ejus vibrationibus aëri in cavitate tympani contento similis motus imprimatur, quo agitur in eam irruens externus. Internus sic commotus non modo membranam percutit fenestræ rotundæ obductam, ut aëri intra cochleam motus communicetur: unde porro per aperturam in limine cochleæ, observante *Schelhammero* de Auditu c. 4. §. 5. f. 208. Tom. 2. *Biblioth. Anat.* obviam deferitur in labyrinthum. Cochleæ atque labyrinthi cavitates cum fibrillis ex nervo acustico derivatis vesti-
antur;

antur; iisdem impressus motus ad cerebrum usque propagatur (§. 190. *Psychol.*): in cavitatibus vero cochleæ atque labyrinthi undiquaque allidens per reflexionem veluti in tubo stentoreophonico (§. 237. *Exper.*) invalescit, ut impressio in fibrillas nerveas fortior evadat.

§. 322.

Aër per tracheam seu arteriam asperam ex pulmonibus expiratus tremore laryngis ipsis digitis observabili sonorus redditur & pro diversa glottidis apertura vocem magis minusve acutam reddit. Vox modificata varia oris apertura & labiorum, dentium, nasi, linguæ atque palati vario ministerio ab *Ammanno* in Dissertatione de Loquela distinctius exposito in vocem articulatam definit, literis alphabeti designari solitam: unde sermo constituitur. Atque ea de causa ori loquentis attendens percipere potest, quæ loquitur alter, etsi vocem loquentis non audiat: unde *Wallisus* atque *Ammannus* a nativitate surdos effecere loquentes.

§. 323.

Effluvia odorifera miræ, (quod experimenta evincunt) subtilitatis cum aëre, quem per nares ducimus, attracta in fibrillas nerveas per cavitates ossis cribrosi explicatas alliduntur: qua impressione *odoratus* efficitur.

§. 324.

Gustus contra consistit in impressione in papillas nerveas tunicæ papillaris nervosæ a salibus saliva solutis & per poros membranæ exterioris, qua vestitur lingua, illuc delatis: ut adeo non sapiant corpora, nisi comminuta & saliva permista & sapor ibidem percipiatur, ubi papillæ nerveæ protuberant.

§. 325.

Similiter cum tactu percipiamus corpora, ubi papillæ nerveæ subcutaneæ deprehenduntur; facile patet, eas esse *tactus* immediatum organum.

§. 326.

Atque ex his omnibus manifestum est, sensationi destinari nervos una cum cerebro, unde ortum trahunt & per quod motus organo sensorio impressus propagatur (§. 190. *Psychol.*), ut ideæ materiales in cerebro producantur (§. 195. *Psychol.*).



CAP. III.

DE MOTU ANIMALIUM.

§. 327.

Motus instrumentum sunt muscoli, quibus dissectis membrum, cui movendo destinantur, moveri amplius non potest. Venter musculis constat ex fibris carneis secundum longitudinem excurrentibus, qui abbreviantur, ut
pars

pars corporis, cui cauda affixa, versus caput adducatur.

§. 328.

Nervis ligatis vel resectis (quod imprimis phrenico ad diaphragma tendente experiri licet), nulla fieri potest constrictio fibrarum motricium: unde colligitur, per eos aliquid ad musculos deferri, quo actio illorum determinatur.

§. 329.

Patet igitur, nervos non minus motui animali, quam sensationi (§. 327.) inservire: nec præter rationem admitti fluidum aliquod subtile, quod in substantia corticali cerebri, utpote glandulosa, secretum (§. 314.) in nervos ex substantia medullari ortum ducentes influit. Observante nimirum *Leeuwenbækio* fibrillæ nervæ perinde ac substantiæ medullaris cerebri sunt tubuli cavi.

§. 330.

Hinc porro elucescit nervos omnes vel immediate ex cerebro, vel ex medulla spinali inde deducta oriri, ut unum quodlibet organum sensorium cum quolibet musculo communionem habere, sicque motus organorum ex impressionibus in organa sensoria nasci possint. Communicatio autem ista mediante cerebro fieri debet, ut & impressiones anteriores influere in motus determinationem possint, ne

ex eadem impressione in organum unicus tantum idemque semper motus sequatur.

§. 331.

Modus, quo musculorum fibræ carneæ abbreviantur, nondum satis evidens est. Mittimus igitur conjecturas, etsi utiles, ut viam ad ulteriorem disquisitionem sternant.

§. 332.

Motus pulmonum, quo respiratio peragitur, aliquid singulare habet, quod sigillatim explicandum. Nimirum, musculis intercostalibus constrictis, ut costæ incurventur, & diaphragmate depresso, augetur thoracis cavitas, quo facto pulmones ab aëre in vesiculis, ex quibus contextæ, contento rarefacto expanduntur, irruente per nares vel os apertum externo, donec in pulmonibus redeat æquilibrium cum externo ambiente; costis autem, cessante musculorum actione, iterum depressis & diaphragmate elevato, aër in thorace compressus ex pulmonibus inspiratum modo rursus expellit (§. 261. 262. 263. *Exper.*).



CAP. IV.

DE GENERATIONE ANIMALIUM ET HOMINUM.

§. 333.

Generationem fieri per coitum maris & feminae experientia in ipsis insectis probat.

§. 334.

§. 334.

Immittit autem mas semen virile blanda agitatione penis intra vaginam uteri fœmellæ ex vesiculis feminalibus, in nonnullis animantibus ex ipsis testiculis, ubi a sanguine per arterias spermaticas advecto secernitur, per urethram ejectum in uterum per os in coitu hians, quod ibidem 16. a coitu horis elapsis in vacca reperit *Verheyenus* & in cuniculo *Leeuwenhœkii* ope microscopii animalculis spermaticis detectis (§. 207. *Exper.*), immo in adultera occisa *Ruyfchius*.

§. 335.

Harvæus in cervæ utero facta conceptione reperit ovulum, qualia in ovariis deprehenduntur, cum statim a coitu prorsus vacuus esset. Unde colligitur, ovulum in ovario semine virili fœcundatum crescere atque in uterum deferri: quod *Nuckii* experimento clarius patescit, qui canis abdomine a coitu aperto vidit duo ovula in ovario tumefacta & ligato uteri cornu elapsis 20. diebus ejus partem inter ligaturam & ovarium duplici fœtu obsessam.

§. 336.

Semen ad ovarium pervenire nequit, nisi per tubam Fallopiam, in qua etiam illud actu deprehendit *Ruyfchius* (§. 334.). Minimum semen in halitum calore uteri interno resolutum & tubum extendens ad ovarium pertingit &

& ovulum inde intumescens rupta ovarii membrana a tuba Fallopiana assumitur : unde aliquando reperti sunt fœtus in ovariiis & in tubis, si ovulum ab istis minime avulsam vel intra has substitit. Confer. Dissert. *Godofredi Heldii* de tempore partus. Et, quia tuba in coitu fœcundo tantummodo applicatur ovario, minime cum eodem continua, contigit aliquando, ut ovulo in cavitatem uteri delapso, fœtus geniti fuerint extra uterum. Notatu quoque dignum est, quod in ovariiis remaneant cicatriculæ, ovulis avulsis, immo, quod *Ruyfchius* ipsam aperturam viderit cicatrice nondum obductam. Constat adeo hodie, omnia generari ex ovo, ipsas etiam plantas.

§. 337.

Ova gallinarum non sunt fœcunda, nisi a coitu : ut adeo mari tribuenda sit fœcunditas. Quamobrem cum corpus organicum ex massa confusa & inorganica generari nequeat, atque adeo in cicatricula ovuli rudimentum fœtus reperiri debeat, quemadmodum in semine plantarum rudimenta plantæ, cum semine maris corpusculum quoddam organicum deferri verosimillimum est. Infunt semini maris innumera animalcula (§. 207. *Exper.*) : unum igitur eorum ad ovulum delatum in cicatriculam irripit. Abundat autem semen animalculi, cum difficilis sit ex utero per tubam ad ovarium accessus.

§. 338.

Ex hoc animaculo, ovulo in uterum delato, vel si ova oviparorum calore foventur, per quandam transformationis speciem, qualis in insectis observatur, animal prodit: id quod consonum est observationibus *Malpighii* de ovo incubato, qui didicit partem unam post alteram subito in conspectum prodiisse, quemadmodum in plantis crescentibus, etsi parum iuxta proportionem.

§. 339.

Nutritur fœtus in ovis oviparorum primum albumine, tandem ubi ventriculum nactus, vitello: in utero autem materno primum humore ex uteri substantia in ejus cavitatem expresso, deinde sanguine matris per funiculi umbilicalis arterias advecto, quamprimum placenta uterina utero adhæret.

§. 340.

Cum adeo sanguis matris per fœtum una circuletur, infans in utero iisdem accidentibus obnoxius, quæ a motu sanguinis in matre pendunt: atque hinc petenda est ratio stupendæ illius vis imaginationis matris in infantem, cujus exemplum notatu dignum refert *Malebranchius* in Tract. de inquirenda veritate. Mater scilicet videns crurifragium latonis peperit filium in utero crurifragium perpeffum.

§. 341.

§. 341.

Immo patet quoque monstrorum ratio, quæ gignuntur, vel duobus animalculis spermaticis in eandem cicatriculam ingressis, vel quibusdam partibus non evolutis aut in evolutione loco motis & casu quodam extraordinarias mutationes passis.

§. 342.

Si plura ovula una fecundantur, plures quoque fœtus una gignuntur.

§. 343.

Fœtus perfectus tandem ovo, vel utero excluditur. Agitatione fœtus in utero rumpuntur tunicæ, quibus involvitur, & liquor amnii per vaginam profilit. Vagina rugosa valde expanditur, ut fœtui transitum concedat. Excluditur autem fœtus contractione uteri & conatu matris, quæ inter inspirandum diaphragma fortiter deprimit & cavitatem abdominis musculorum constrictione coarctat.

c. §. 344.

Cum fœtus in utero innatet liquori amnii, respiratio fieri nequit. Sanguis igitur non defertur ad pulmones, sed per foramen ovale ex vena cava effunditur in venam pulmonariam, ut statim sinistro cordis ventriculo infundatur, inde in arteriam magnam exprimendus.

CAP.

CAP. V.

DE VITA ET MORTE.

§. 345.

Vita dicitur is status, quo functionibus animalibus, veluti nutritioni, sensationi & motibus locus est. Unde vivere colligitur animal, quamdiu respirationis & motus cordis indicia adsunt, quem posteriorem arteriæ pulsus prodit.

§. 346.

Status iste perdurat, quamdiu motu cordis subsistente circulatio sanguinis permanet. Vita igitur animalium & hominis circulatione sanguinis pendet.

§. 347.

Moritur itaque animal, quamprimum circulatio sanguinis cessat.

§. 348.

Mortis adeo causæ sunt, quæ circulationem sanguinis destruunt, veluti si cordis ventriculus alter perfodiatur (§. 310.).

§. 349.

Monemus autem in genere, quæ in explicanda œconomia animali gratis assumpta videri possent, ex anatomia constare, unde partium structura & connexio patescit.

FINIS PHILOSOPHIÆ NATURALIS.

Con-

Conspectus generalis Tomi prioris.

1. *Institutiones Logicae, seu Philosophiae rationalis.* pag. 3.
2. *Institutiones Ontologiae, sive Philosophiae primae. Metaphysica pars prima.* p. 39.
3. *Institutiones Cosmologiae generalis. Metaphysica pars secunda.* p. 71.
4. *Institutiones Psychologiae empiricae & rationalis. Metaphysica pars tertia.* p. 115.
5. *Institutiones Theologiae Naturalis. Metaphysica pars quarta.* p. 211.
6. *Institutiones Philosophiae Experimentalis.* p. 243.
7. *Institutiones Philosophiae Naturalis, seu Physicae.* p. 381.



INSTITUTIONES
PHILOSOPHIÆ
WOLFIANÆ

IN
USUS ACADEMICOS
ADORNATÆ
OPERA

LUDOVICI PHILIPPI
THÜMMIGII
PROFESSORIS PHILOS. ORDINARII
REG. SOC. SCIENT. BOR.
SODALIS


EDIT. NOVA AB INNUMERIS MENDIS PURGATA.




TOMUS POSTERIOR.

ACCEDIT UTRIVSQUE TOMI INDEX VERBORUM AC RERUM.

FRANCOFURTI & LIPSIAE MDCCXL.
IN OFFICINA LIBRARIA RENGERIANA.






LECTORI BENEVOLO SALUTEM.

INstitutionum *philosophiæ Wolfianæ* tomus nunc sistitur posterior B. L. non ex vano eundem applausum expectans, quo, eoque publico, exceperunt priorem viri cordatissimi. Non sine voluptate intueor, quod ringentibus licet in angulo invidis & frementibus nostris persecutoribus spe mea & scopo præfixo non exciderim, qui fuit eminentioris eruditionis promotio, & detestabilium imputationum, quibus philosophiam hanc presserunt, exoptatissima remotio. Etenim multis in locis egregio cum successu lectionibus academicis inservire impense lætor. Non inesse hisdem tam horribilia opinionum monstra, quæ per equuleum grammaticale extorserunt osiores Wolfiani, nunc aperte fatentur multi & tantum non ex eorum numero, quos sparsi rumores & adversariorum antesignani spississima volumina, eum in finem callida confusione consarcinata, aut dubios aut indignantes reddiderant, antequam ipsam autoris mentem evoluerent perpenderentque.

Disciplinas continet philosophicas practicas, quas non tantum secundum demonstrativam methodum elaboratas, sed & eo ordine collocatas deprehendes, qui in scholis in consuetudinem abiit: vere practicas easdem ideo salutabis, quia non in solis præceptis acquiescunt, sed & modum sufficientem edocent, quo iisdem satisfit. Hoc utrumque est, quod ipsis peculiare tribues B. L. quando easdem penitus intelligere oleum dederis & operam. Eo ipso autem collapsuram fore omnem falsissimarum consequentiarum molem, qua systema harmoniæ præstabilitæ tanquam philosophiæ practicæ inimicissimum opprimere nitebantur, confidenter spero,





INSTITUTIONES PHILO- SOPHIÆ PRACTICÆ UNI- VERSALIS.

PROLEGOMENA.

§. 1.

P*hilosophia practica* est scientia affectiva
practica dirigendi actiones liberas.

§. 2.

Affectiva dicitur, quatenus movet volunta-
tem ad appetendum vel averſandum.

§. 3.

Practica vocatur, quatenus facultatem loco-
motivam determinat ad actus externos exequen-
dos vel omittendos.

§. 4.

Philosophia practica universalis est, quæ tra-
dit actionum liberarum determinandarum regu-
las generalissimas.

§. 5.

Principia adeo eius communia sunt omnibus
philosophiæ practicæ partibus specialibus.

§. 6.

Hæc porro disciplina continet artificia, inveniendi veritates morales atque politicas.

§. 7.

Unde utilitas ipsius insignis elucet.

§. 8.

Et hujus utilitatis gratia condidit eam Philosophus, ac jam anno 1703. methodo mathematica conscriptam in lucem publicam protulit, primum specimen academicum editurus.

PARS I.

DE THEORIA PHILOSOPHIÆ PRACTICÆ GENERALIS.

CAP. I.

DE ACTIONUM HUMANARUM DIFFERENTIA.

§. 9.

Actiones hominum duplices sunt. Aliæ per essentiam & naturam mentis determinantur, aliarum determinatio in nostra po-

potestate posita est. Illæ dicuntur *actiones naturales*, hæ autem *liberæ*.

§. 10.

Actiões liberæ itidem duplices sunt. Aliæ enim tendunt ad mentis, corporis statusque nostri externi perfectionem; aliæ autem ad mentis, corporis statusque externi imperfectionem.

§. 11.

Quicquid nos statumque nostrum perficit, bonum est: quod nos ac statum nostrum imperfectiorem reddit, malum (§. 102. *Psychol.*). Actiões igitur liberæ vel bonæ sunt vel malæ (§. 10.).

§. 12.

Quoniam vero actione sic vel aliter determinata, perfectio vel imperfectio mentis, corporis atque status nostri externi necessario sequitur; ideo actiones aliæ per se sunt bonæ, aliæ per se malæ. Atque in eo consistit *intrinseca* actionum liberarum *moralitas*, siue earundem *intrinseca* *bonestas* atque *turpitud.*

§. 13.

Quoniam appetitus cum sensitivus, tum rationalis in bonum fertur, auersatio autem a malo abhorret (§. 105. 138. *Psychol.*): actiones per se bonæ sunt appetibiles; per se malæ auersabiles.

§. 14.

Et quoniam nil appetimus nisi sub ratione boni, nec quicquam averſamur nisi sub ratione mali (§ 140. *Psychol.*): ideo actiones per se honestas non possumus non appetere, per se turpes non possumus non averſari (§. 12.), ubi eas distinge cognoscimus (§ 7. *Log.*). Cur vero non semper exequamur, quas bonas videmus & probamus, infra docebimus.

§. 15.

De actionum igitur intrinseca moralitate judicaturus attendere debet ad ea, quæ ex actione sua necessario consequuntur. Si enim sequatur mentis, corporis atque status externi perfectio, erit intrinsece bona; sin vero imperfectio, mala (§. 12.).

§. 16.

Actiones naturales suis gaudent rationibus finalibus, per quas determinantur (§. 10. *Cosmol.*), v. gr. ventriculus digerit cibos, quia corpus nutrimento eget, ut restituatur, quod transpiratione abiit (§. 310. *Phys.*); hac vero restitutione opus est, ut corpus conservetur. Quodsi igitur actiones liberæ per easdem rationes generales determinantur, v. gr. ut in assumendo cibo ac potu corporis conservandi habeatur ratio; inter actiones liberæ & naturales datur consensus, adeq-

adeoque actiones tendunt ad hominis perfectionem (§. 44. *Ontol.*).

§. 17.

Eodem modo patet, actiones omnes liberas inter se consentire debere, siquidem ad perfectionem hominis tendunt.

CAP. II.

DE OBLIGATIONE ET LEGE
NATURALI.

§. 18.

Obligatio in genere dicit connexionem motivum cum actione, v. gr. magistratus obligat rebus alienis inhiantes ad omittendum furtum, constituta hujus criminis poena. Cum igitur poena sit furti consequens, idque hypothetice necessarium (§. 30. *Ontol.*); a quo homo abhorret (§. 139. *Ppsychol.*): in motivorum numero locum habet (§. 141. *Ppsych.*). Magistratus adeo motivum quoddam connectit cum actione, dum rebus alienis inhiantes ad furtum omittendum obligat.

§. 19.

Cum in ipsa hominum rerumque natura contineantur rationes, ob quas actiones per se honestae appetibiles, per se autem turpes averfabiles sunt (§. 12. 13.): ipsa hominum re-

rumque natura motiva connexa sunt (§.141. *Psychol*), ut adeo ipsa hominis rerumque natura constituta sit aliqua obligatio, quam *obligationem naturalem* appellamus.

§. 20.

Unde elucet, per ipsam rerum naturam nos obligari ad actiones per se honestas committendas, per se vero turpes omittendas (§.19.); hoc est, ad committendas eas, quæ ad perfectionem nostram tendunt, omittendas vero eas, quæ ad imperfectionem vergunt (§.12.16.).

§. 21.

Rationes ex ipsa hominis rerumque natura petitas in dubium vocare nequit, qui vel Deum dari præfracte negat, vel Autoris Universi seu veri Dei ignorantia laborat, attributa ejus distincte non agnoscens. Unde sequitur in ipsa hypothese impossibili athei, adeoque multo magis in hypothese eius, qui non nisi confusam quandam Numinis supremi notionem habet, adhuc subsistere obligationem naturalem (§.19.). Dico hypothese illam impossibilem, propterea, quod nulla daretur natura rerum, si Deus esset nullus (§.9. *Theol. natur.*).

§. 22.

Obligatione itaque naturali in ruborem dantur athei, in hypothese sua impossibili omnem

omnem vivendi licentiam sibi fingentes, cum inde redarguantur, quod ipsam hominis naturam exuere debeant, si istiusmodi licentiæ locum esse velint, quæ ex ipsorum hypothese impia minime sequitur.

§. 23.

Lex est regula, juxta quam actiones liberas determinare obligamur.

§. 24.

Regula igitur ista, qua præcipitur *actiones ad perfectionem nostram tendentes esse committendas, quæ vero ad imperfectionem tendunt, esse omittendas*, est lex ipsa rerum natura constituta (§. 20. 23.), quam ideo *Legem naturalem* salutamus.

§. 25.

Lex naturæ nos obligat, ad actiones per se honestas committendas, per se turpes omittendas (§. 24. 20.); sed actiones per se honestæ atque turpes, tanquam necessario tales (§. 12.), immutabiles sunt (§. 28. *Ontol.*); *Lex* adeo *natura immutabilis* est, consequenter & *eterna* (§. 29. *Ontol.*).

§. 26.

Et quoniam eadem omnium actionum cum liberarum tum naturalium consensum urget (§. 24. 16.); omnes quoque actiones liberæ, qualescunque tandem sint per eam determinari possunt. Ideo etiam *adequata* dicitur.

§. 27.

Toto igitur aberrant cœlo, qui exinde, quod homo actiones suas ad sui perfectionem dirigere teneatur, inferunt, eum non nisi proprium commodum sectari debere. Patebit enim deinceps, directionem actionum ad sui perfectionem subsistere non posse, nisi una gloria Dei illustretur & aliorum hominum perfectio perinde ac nostra promoveatur.

§. 28.

Qui per rationes ab ipsa rerum natura derivatas actiones suas determinat, is earundem cum natura rerum nexum perspicit (§. 8. *Cosmol.*), atque adeo lex naturæ (§. 14. 16.) per rationem innotescit (§. 88. *Psychol.*), ut actionum liberarum determinatio cum earundem juxta legem naturæ compositione eadem sit.

§. 29.

Quoniam lex naturæ actiones hominis per rationes ab eisdem natura derivatas determinat (§. 24. 16.); illa determinatio *naturæ humanæ* convenire dicitur. Unde omnino affirmari potest, actionum humanarum cum natura hominis convenientiam esse legis naturalis principium (§. 93. *Ontol.*).

CAP. III.

DE DEO AUCTORE LEGIS
NATURALIS.

§. 30.

DEUS rerum omnium ipsiusque hominis naturam libere constituit (§. 15. *Theol. nat.* & 72. *Cosmol.*). Cum adeo naturæ auctor sit: obligationis quoque naturalis (§. 19.), atque adeo ipsius etiam legis naturalis auctor est (§. 24.).

§. 31.

Est itaque obligatio naturalis, divina obligatio; & lex naturalis, lex divina. Nimirum *obligatio divina* dicitur, quæ Deum habet auctorem (§. 18.); & *lex divina*, si obligationis auctor Deus fuerit (§. 23.).

§. 32.

Cum Deus mundum hunc produxerit perfectionis suæ manifestandæ gratia (§. 37. *Theol. natur.*), & fini huic suo convenienter (§. 41. *Theol. nat.*), sibi metipsum contrariari nescius (§. 32. *Theol. nat.*): non potest non velle, ut homo ita determinet actiones suas liberas, quo naturalibus consentiant; consequenter ut eas committat, quæ ad sui perfectionem tendunt, omittat vero, quæ imperfectionem causantur (§. 16.); atque ut faciat, quæ naturæ suæ conveniunt; fugiat, quæ eidem repugnant

gnant (§. 29.). Vult igitur Deus, ut homo actiones suas ad legem naturæ componat (§. 24.).

§. 33.

Qui igitur secundum legem naturæ, adeoque secundum rationem (§. 28.), atque naturæ suæ convenienter (§. 29.) vivit; is vitam suam ad voluntatem Numinis componit.

§. 34.

Omnia subsunt decreto (§. 61. *Theol. nat.*) & directioni Numinis (§. 75. *Theol. nat.*); quamobrem nec fata hominum, sive prospera sive adversa, independentia a Dei decreto & directione dici possunt. Testatur autem experientia, non modo eadem sæpissime ita actionibus humanis respondere, ut bonas prospera, malas adversa sequantur; verum etiam ut homini præbeant motiva bonarum patrandarum, malarum vero omittendarum, qualibus maxime opus habet. Deus itaque motiva ista cum actionibus humanis connectens, homines ad eas omittendas vel committendas obligat (§. 18.). Datur itaque præter obligationem naturalem (§. 19.) a Deo constitutam (§. 21.), adhuc alia, quam ad differentiam a naturali indicandam *obligationem divinam* appellamus.

§. 35.

Enim vero omnia hominum fata sive prospera fuerint sive adversa, posse motivorum vicem

vicem subire, haud ægre admittet, ad sequentia animum attendens. Fata prospera si comitantur actiones malas, quibus tanquam causæ (§. 94. *Ontol.*) tribui nequeunt, effectus bonitatis divinæ agnoscuntur (§. 83. *Theol. nat.*), id quod motivum esse potest, ut vitam ad voluntatem Numinis, consequenter ad legem naturalem componamus (§. 33.). Cum homines sæpe in altum tollantur, ut lapsu graviore ruant; fortuna prospera actionum malarum comes motivum erit, ne rebus secundis nimium tribuens elato sis animo. Quatenus fata adversa ad prospera viam sternunt, motivum fiduciæ erga Deum præbent. Accedit, quod eadem sint motiva ad actiones malas fugiendas, quas alias patrare nulli dubitaremus. Quodsi ergo scruteris in dato quolibet casu obvio, quomodo fata sive prospera sive adversa actionum liberarum motiva esse queant, singularem illam obligationem divinam naturali contradistinctam suspicies.

§. 36.

Actio legi conformis dicitur *moraliter bona*; legi difformis, *moraliter mala*: ut adeo actionum cum lege conformitas, sit *bonitas moralis*, difformitas *turpitudine moralis*.

§. 37.

Deus, quatenus hominem obligat ad actiones

nes

nes naturæ humanæ convenientes, dicitur *Legislator*. Quamobrem cum non modo obligationis naturalis auctor sit (§. 30.), verum etiam alia adhuc ratione hominem obliget (§. 34.); Deus omnino legislatorem agit.

§. 38.

Christus nos docuit, motiva a futuro post hanc vitam statu esse desumenda: unde multo magis apparet Deum esse legislatorem. Enimvero quæ diuinitus revelata sunt, ignorat ratio, etsi eadem eidem non repugnent, quin potius consentanea agnoscantur, quam primum intelliguntur (§. 274. *Psychol.*).

CAP. IV.

DE POENIS ET PRÆMIIS.

§. 39.

Pæna dicitur malum, quod cum actione connectit legislator tanquam motivum eam omittendi vel committendi.

§. 40.

Premium contra dicitur bonum, quod cum actione connectit legislator tanquam motivum eam committendi vel omittendi.

§. 41.

Pœnarum itaque ac præmiorum constitutione introducitur obligatio (§. 18.).

§. 42.

§. 42.

Cum Deus obligationis naturalis auctor sit (§. 30.), naturalis autem obligatio iis nitatur, quæ actionem per se honestam vel turpem necessario consequuntur (§. 12. 19.); necessarij actionum nostrarum effectus in pœnarum & præmiorum numero recte habentur (§. 39. 40.).

§. 43.

Similiter cum Deus fata hominum esse velit actionum committendarum vel omittendarum motiva, sive prospera fuerint, sive adversa (§. 35.); nihil obstat, quo minus eadem in pœnarum & præmiorum numero habeantur, etsi causas suas habeant naturales.

§. 44.

Malum cum actione necessario connexum dicitur *pœna naturalis*; quod vero connectitur cum actione libera ex legislatoris voluntate, dicitur *pœna positiva*.

§. 45.

Similiter bonum cum actione necessario connexum vocatur *præmium naturale*; quod vero connectitur cum actione libera ex legislatoris voluntate, dicitur *præmium positivum*.

§. 46.

Actiones igitur per se turpes singulæ suas habent pœnas naturales (§. 43. 44.).

§. 47.

§. 47.

Similiter actiones per se honestæ singulæ sua habent præmia naturalia (§. 42. 45.), sua itidem positiva divina (§. 43. 46.).

§. 48.

Qui Deum vel esse negat, vel ignorat : is non agnoscit, eum esse obligationis naturalis auctorem (§. 30.), consequenter nec Deum legislatores (§. 37.), nec pœnas naturales, neque præmia naturalia (§. 44. 45.), multo minus pœnas positivas & præmia positiva (§. cit.) agnoscit, etsi ipsum non lateant, quænam sive necessario sive contingenter hominum actiones consequantur.

CAP. V.

DE VIRTUTE ET VITIO.

§. 49.

Virtus est habitus actiones suas legi naturali conformiter dirigendi.

§. 50.

Virtute itaque præditus actiones suas dirigat ad perfectionem sui (§. 42.), adeoque curæ cordique habet, ut inter omnes actiones liberas, tum & inter liberas atque naturales detur consensus (§. 16. 17.).

§. 51.

Lex naturalis nititur obligatione naturali (§. 24.); obligatio autem naturalis absolvitur
mo-

motivis ab intrinseca honestate & turpitudine petitis (§. 19.): quamobrem virtute præditus actiones legi naturali conformes committit ob earundem bonitatem, eidem diffformes omittit, ob earum malitiam intrinsecam.

§. 52.

Nimirum quia actiones legi conformes ad perfectionem sui tendere agnoscit (§. 24.), inde voluptatem percipit (§. 95. *Psychol.*), atque adeo ipso sensuum judicio bonas reputat (§. 103. *Psychol.*); consequenter conspirante appetitu sensitivo & rationali (§. 106. 138. *Psychol.*) fortius appetit (§. 140. *Psychol.*), atque adeo libere & lubenter agit (§. 157. *Psychol.*), quod legi conforme est.

§. 53.

Qui habitu pollet edendi actiones legi conformes, in eo voluptas prædominari debet, quam ex istis actionibus percipit, cum *habitus* sit agendi promptitudo. Homo itaque virtute præditus cum gaudio peragit, quod est legi naturali conforme (§. 49. *Phil. Pract. univ.* & §. 113. *Psychol.*).

§. 54

Ceterum cum libere & lubentissime agat, quod est virtutis (§. 52.): non opus habet pœnis, ut ad actiones legi conformes adducatur.

§. 55.

Nec virtute præditus est, qui edit actionem
(P. II, *Thüm. Inst. Phil. Pr.*) B legi

legi naturali extrinsece conformem metu poenae, vel etiam spe præmii positivi: cum desit intrinseca conformitas, quam perinde atque externam urget lex naturalis (§. 16. 17. 24.), propterea quod desit mentis iudicium, desit inde elicitus appetitus rationalis, & repugnante appetitu proprio coacte agimus, eodem prævalente, quamprimum poenae excussimus metum.

§. 56.

Vitium est habitus actiones suas ratione contraria dirigendi, quam lege naturali præscribitur.

§. 57.

Homo itaque vitiosus actiones suas dirigit ad imperfectionem sui (§. 24.), adeoque non curat inter omnes actiones liberas, multo minus inter liberas & naturales consensum (16. 17.), ut adeo ipsius actiones sibi mutuo contrariantur.

§. 58.

Quoniam nemo appetit malum nisi sub ratione boni, nec aversetur bonum, nisi sub ratione mali (§. 140. *Psychol.*): homo, vitio deditus aut ignorat honestatem & turpitudinem actionum intrinsecam, ob quas appetibiles & averfables sunt (§. 12.), aut sensuum stans iudicio ex actione mala voluptatem

ma-

maiores, quam ex bona, vel ex bona tedium
prorsus percipit (§. 103. *Psychol.*).

§. 59.

Quamobrem cum vitio deditus libere non
agat, quod lege conforme: vel metu poenæ
vel spe præmii (§. 41.) adducendus ad actiones
legi conformes, & ab actionibus legi difformi-
bus abducendus.

§. 60.

Ex actione itaque honesta cum voluptatem
minime percipiat, aut saltem minorem, quam
ex turpi (§. 52. 58.): nec cum gaudio peragit,
quod legi conforme, nec omittit, quod eidem
difforme (§. 113. *Psychol.*). Parum lubens &
quasi coacte agit, imo subinde cum tristitia (§.
114. *Psychol.*).

§. 61.

Infirmi *naturalem* dicimus impotentiam
naturalem, actiones suas ad legem natura-
lem tanquam normam componendi.

§. 62.

Dicitur autem *impotentia naturalis*, cui tol-
lendæ pro rerum nostrarum statu non sumus
pares.

§. 63.

Infirmi *naturali* tribuendum, quod ho-
mines legi naturali subinde contraria agant,
dum summo studio in id incumbunt, ut a-
gant ei conformia, Quando istud ad infir-

mitatem naturalem referri debeat, ex notione impotentiae naturalis decidendum (§. 62.).

§. 64.

Virtus quæ nititur non nisi motivis ab intrinseca actionum honestate & turpitudine petitis, *philosophica* dicitur Philosopho, atque infimi gradus est, cum etiam motiva peti possint a voluntate & attributis Numinis, itemque a veritatibus revelatis, quæ opus redemptionis concernunt: qua de re suo loco quædam dicemus fusius, quando officia hominis erga Deum explicaturi sumus.

CAP. VI.

DE BEATITUDINE ET FELICITATE HOMINIS.

§. 65.

Homo actiones suas dirigere tenetur ad sui ipsius perfectionem (§. 20.), hoc est, dare operam, ut actiones naturales & liberæ per easdem rationes finales determinantur (§. 16.). Quoniam adeo perfectionis obtinendæ gratia actiones has, non alias edere tenetur; erit illa perfectio finis ipsius (§. 97. *Ontol.*), isque ultimus, cum intermedii omnes ad eundem tendere debeant (§. 102. *Ontol.*).

§. 66.

Qui actiones suas dirigit ad sui perfectionem,

nem, is easdem rationibus finalibus iisdem determinat, per quas determinatæ a Deo sunt naturales (§. 16.): sed Deus actiones naturales ultimo determinavit per gloriam suam (§. 37. *Theol. nat.*), ut creaturæ sint specula perfectionum divinarum (§. 38. *Theol. nat.*). Quamobrem qui actiones suas dirigit ad sui perfectionem, is easdem ultimo per gloriam Numinis determinare debet, ut nempe ex illa determinatione eluceat, eum agnoscere attributa & opera divina. Ad hanc ultimam rationem, qui in actionum suarum determinatione attendit, is *gloriam Dei* illustrare dicitur. Unde patet, quod supra annuimus (§. 27.), directionem actionum ad sui perfectionem subsistere non posse, nisi una gloria Dei illustretur.

§. 67.

Homo quoque voluptatem percipit ex perfectione aliena, nisi affectus contrarii obstiterint. Quodsi itaque actionibus naturalibus consentire debent liberæ (§. 16.), ad alterius perinde, atque ad sui perfectionem actiones suas dirigere tenetur. Si secus faciat, actiones liberæ naturalibus contrariantur: id quod naturæ humanæ imperfectiorem arguit (§. 44. *Ontol.*). Unde denuo elucet, quod itidem (§. 27.) monuimus, directionem actionum ad sui perfectionem subsistere

re non posse, nisi aliorum hominum perfectio perinde ac nostra promoveatur.

§. 68.

Homini, creaturæ finitæ summa perfectio communicari nequit: id quod experientia abunde evincit. Sane *Confucius* a decimo quinto ætatis anno usque ad finem vitæ actionum directioni ad sui perfectionem vacans, omnemque curam atque industriam suam huc convergens, ipso septuagesimo ætatis anno se adhuc profecisse expertus est, a meta autem perfectionis multum adhuc abesse agnovit. Homini itaque esse intelligitur, continuo progredi ad maiores perfectiones, atque hoc summum bonum est, quod hac in vita obtineri potest. *Beatitudo* igitur *philosophica* seu *summum bonum* est non impeditus progressus ad majores in dies imperfectiones (§. 14. *Log.*).

§. 69.

E contrario patet, *summum* hominis in hac vita *malum* esse continuum progressum ad majores in dies perfectiones.

§. 70.

Liquet inde porro, summum bonum legis naturalis custodia obtineri; ea autem violata amitti (§. 24. 68.), quippe quod virtutis est indivulsus comes (§. 49.): summum contra malum
le-

legis naturalis neglectum consequi (§. 24. 69.), quippe quod vitii indivulsus comes (§. 56.) est.

§. 71.

Cum ex perfectionis intuitu voluptas nascatur (§. 95. *Psychol.*) & summum bonum in non impedito progressu ad majores in dies perfectiones consistat (§. 68.); summum hominis bonum, ad quod in hac vita pervenire ipsi datur, cum constante voluptate conjungitur.

§. 72.

Status voluptatis seu lætitiæ (§. 113. *Psychol.*) constantis, aut si mavis, durabilis *felicitatem* hominis absolvit.

§. 73.

Summum igitur bonum felicitatem parit (§. 71. 72.); consequenter felicitas legis naturalis custodia obtinetur, virtutis præmium certissimum (§. 43. 70.).

§. 74.

Differt autem voluptas & lætitia durabilis a minus durabili in eo, quod ista nunquam in tædium aut dolorem degeneret, hæc vero e contrario, vel tædium atque dolorem pariat, vel in alterutrum imo utrumque tandem degeneret (§. 96. *Psychol.*).

§. 75.

Hinc status lætitiæ minus durabilis specie-

ciem felicitatis mentitur (§. 70.); qua decipiuntur a ratione alieni (§. 88. *Psychol.*).

§. 76.

Bonum verum est, quod voluptatem durabilem largitur; *bonum autem apparens*, quod minus durabilem,

§. 77.

Bona igitur apparentia nihil conferunt ad hominis felicitatem (§. 72.).

§. 78.

Infelicitas hominis est status tædii ac tristitiæ durabilis,

§. 79.

Non absimili, quo ante usi sumus, modo ostenditur, summum hominis malum cum durabili tædio ac tristitia conjungi, consequenter infelicitatem parere (§. 78.), & legis naturalis neglectum esse infelicitatis causam (§. 70.).

§. 80.

Ex antecedentibus porro evidens est, quomodo differant tædium ac tristitia durabilis (§. 74.), quænam sit infelicitas apparens & quænam differentia inter malum verum & apparens intercedat (§. 76.).

§. 81.

Quoniam legis naturalis custodia felicitate potimur (§. 73.), ea autem violata in infelicitatem incurrimus (§. 79.); Dei bonitati accedat.

ceptum ferendum est quod nos ad illam obliget (§. 34. 35.), ut adeo Deus legislator (§. 37.) parentis personam tueatur non nisi salutaria præcipientis & adversa vetantis.

CAP. VII.

DE CONSCIENTIA.

§. 82.

Homini tribuitur *conscientia*, quatenus facultatem habet de moralitate actionum judicandi, scilicet an actio bona sit, vel mala, sive per se (§. 12.), sive moraliter (§. 36.) & num hæc actio sit committenda, an vero omittenda. *Judicium* in casu priori *theoreticum*, in casu posteriori *practicum* audit.

§. 83.

Si judicium fuerit verum, *conscientia* dicitur *recta*; si falsum, *erronea*.

§. 84.

Quod si de veritate judicii fuerimus convicti, *conscientia certa* est; si saltem probabiles rationes ejus habeamus, *probabilis*; si denique ambigemus, utrum verum sit an falsum, *dubia*.

§. 85.

Hinc *scrupuli conscientiae* appellantur rationes in contrariam contradictionis partem, nobis succurrentes.

§. 86.

Si iudicium fertur ante actionem patrata*m* conscientia dicitur *antecedens*; si a patrata actione, *consequens*.

§. 87.

Si idem theoreticum fuerit, *conscientia* vocatur *theoretica*; si practicum, *practica* (§. 82.).

§. 88.

Si iudicium practicum feratur, nondum spectatis singularibus circumstantiis, *theoretice practica* audit; si vero circumstantiarum singularium habeatur ratio, *practice practica*.

§. 89.

Si non omnium circumstantiarum singularium habeatur ratio, *conscientiam incompletam* Philosophus vocat: quod si vero omnes attendantur, *completam*.

§. 90.

Mens, ubi iudicium fert affectuum impetu abrepta, *conscientiam* habet *servam*; in casu opposito *liberam*.

§. 91.

Si ob rationes a circumstantiis singularibus desumptas iudicium de actionis moralitate mutetur, fieri potest, ut contra conscientiam cum theoreticam (§. 87.), tum theoretice imo practice practicam, sed incompletam (§. 88. 89.) agamus (§. 143. *Psychol.*). Atque tum meliora videmus beneficio conscientiae theoreticae (§. 87.) ac probamus bene-

beneficio conscientiae theoreticae practicae atque liberae (§. 88. 89.), deteriora sequimur beneficio conscientiae practicae completae & imprimis servae (§. 88. 89. 90.).

§. 92.

Quoniam anima voluntatem non mutat, nisi aliis oblatis rationibus, quas ad hanc mutationem sufficientes judicat (§. 149. *Psych.*), in conscientia autem completa omnes circumstantiae singulares attendantur (§. 89.) & si recta fuerit & certa de veritate iudicii sui agens convictus sit (§. 83. 84.), si libera denique, omnis affectuum impetus absit (§. 90.); ut homo contra conscientiam completam agat, si recta, certa atque libera fuerit, fieri non potest.

§. 93.

Qui contra conscientiam practice practicam agit, propterea quod serva, dicitur homo *nullius conscientiae*: contra, qui conscientia fruitur libera, *conscientiosus*.

§. 94.

Identitas conscientiae consequentis ab antecedente dicitur *excusatio*; diversitas vero consequentis ab antecedente *accusatio conscientiae*. Illi quidem locus est, si antecedens fuerit recta & certa (§. 83. 84.); hæc autem memenda, si antecedens fuerit erronea (§. 83.), vel etiam dubia atque probabilis (§. 84.).

§. 95.

§. 95.

Parit autem accusatio conscientæ tædium, mater nempe poenitentiae (§. 121. *Psychol.*), pudoris (§. 123. *Psychol.*), imo & metus ac desperationis (§. 127. *Psychol.*), terroris & iræ (§. 128. 132. *Psychol.*).

§. 96.

E contrario excusatio conscientiae voluptate nos perfundit, parens nempe acquiescentiae in se ipso (§. 120. *Psychol.*), gloriae (§. 122. *l. cit.*), imo & spei atque fiduciae (§. 125. *l. cit.*) ac felicitatis (§. 72.).

§. 97.

Tædium animique ægritudines cum affectibus molestis, quæ conscientiam consequentem comitantur, dicuntur *morsus conscientiae*, pro diverso affectuum gradu diversi, & infelicitatis pars minime postrema (§. 78. *Psychol.*).

§. 98.

Defectus conscientiae antecedentis & consequentis hominis ex consuetudine agentis (§. 146. *Psychol.*) est id, quod *somnum conscientiae* appellamus, qui adeo sensuum & imaginationis vitio contrahitur, dum bonum reputatur, quod sensuum iudicio voluptatem parit; malum vero, quod tædium creat (§. 103. *Psychol.*).

§. 99.

Quodsi ex actionibus patratis vel omissis tandem aliquod enascitur tedium, ut de iisdem iudicium ferre obligemur; conscientia consequens dum redit (§. 86.), *evigilare* dicitur.

§. 100.

Qui nullum ex actione patrata tedium percipit, seu dolorem sentit, conscientia consequente se se exerente; is fruitur *conscientia tranquilla*: in casu opposito autem *inquieta*, quæ adeo infelicitatis parens (§. 78.).

§. 101.

Cura de rectitudine & certitudine *conscientiæ* dicitur ejusdem *custodia*.

§. 102.

Quoniam conscientia motiva suppeditat actionum bonarum committendarum, malarum vero fugiendarum (§. 95. 96. 97. *Phil. Pr. univ.* & §. 141. *Psychol.*); ideo nos obligat ad actiones per se honestas committendas & per se malas fugiendas (§. 18.); atque ideo lex naturæ (§. 24.) est itidem lex conscientiæ (§. 13.).

PARS II.

DE PRAXI PHILOSOPHIÆ
PRACTICÆ GENERALIS.

CAP. I.

DE MODO PERVENIENDI AD
SUMMUM BONUM SEU FELICI-
TATEM TERRESTREM.

§. 103.

Cum felicitas terrena legis naturalis custodia obtineatur (§. 73.), lex vero naturæ urgeat perfectionem sui (§. 24.), tanquam finem ultimum (§. 65.); illam obtenturus sui perfectionem finem ultimum omnium actionum constituere ac adeo omnes omnium actionum fines eidem ita subordinare tenetur, ut sint instar medii ad eum ducentis (§. 102. *Ontol.*), & hoc ipso sapiens (§. 286. *Psychol.*) & ordinata (§. 41. *Ontol.*) directio absolvitur.

§. 104.

Patet e contrario, actionum directionem esse insipientem & inordinatam, si non omnes ad finem ultimum conspirent, imo tum sibi mutuo, tum eidem repugnant.

§. 105.

§. 105.

Mentis igitur aciem ad hoc elevaturus, ut actionis cujuscunque cum fine ultimo nexum perspiciat, 1. mentis, corporis atque status externi perfectiones, 2. omnes actiones liberas, si-
ve fuerint cogitationes animæ, si-ve motus corporis ab ejus arbitrio pendentes, & 3. omnia ob-
jecta externa, quibus habemus opus, dividat in sua genera suasque species (§. 11. *Log.*), 4. ex no-
tionibus horum generum harumque specierum distinctis determinet (§. 58. *Log.*), quænam actiones ad perfectionem hominis tendant, quæ-
nam eidem repugnent, denique 5. judicia ista universalialia memoriæ infigat (§. 49. *Psychol.*), ut eorum in casu quolibet obvio promta sit appli-
catio (§. 33. *Log.*). Judicia ista formabimus in jure naturali.

§. 106.

In sapiente actionum directione nihil agitur sine fine atque finis subordinatur ultimo tanquam medium (§. 103.). Ad eam igitur requiritur, ut fine quæsito potiamur; quod ut fiat, 1. distinguendi sunt omnes casus in executione actionis possibiles, 2. investi-
ganda sunt pro singulis media, 3. detegen-
da sunt impedimenta, unicuique contraria & 4. inquirendum in remedia, seu modum, quo impedimenta tolluntur.

§. 107.

§. 107.

Cum casuum diversitas a variatione circumstantiarum pendeat; actio composita resolvenda est in suas simplices, ex quibus constat, & habenda est ratio personarum, loci, temporis aliarumque rerum respectum quendam ad illas involventium: ita nimirum variatio adeoque casuum diversitas facile innotescet.

§. 108.

Actiones humanæ inter se habent nexum, ita ut data una, illico detur altera, quæ ad istam se habet, ut causa ad effectum. Istum igitur nexum, qui sedulo scrutatur, ei non difficile fuerit in dato quolibet casu invenire media ad finem ducentia (§. 94. 99. *Ontol.*).

§. 109.

Cum *impedimenta* sint actiones objecti cuiuscunque mediis contraria, ne effectus, qui iisdem produci potest, consequatur; innotescunt, ubi objecta in mediorum executione tibi obvia eorumque actiones attente consideraveris & ad te retuleris.

§. 110.

Homo felicitate potiturus, quam naturæ viribus consequi valet, nihil quicquam agere debet perfectioni suæ adversum, nec omittere, quod eidem convenit (§. 103.). Ardo-
rem

rem igitur in se excitet nihil quicquam faciendi, nisi quod huic fini consequendo inservire certo cognoverit: quod ut fiat, non solum ratione, verum etiam exemplis convincendus est, quænam ex actionibus turpibus sequantur rædia, qui dolores (§. 79. 95.), & quam fallax sit boni apparentis facies (§. 76.), & quænam ex actionibus honestis sequatur voluptas (§. 71. 96.) & quam fallax sit mali apparentis species (§. 80.).

§. 111.

Quoniam exempla intuitivam præbent rerum cognitionem, adversus sensum perversa judicia (§. 108. *Psychol.*): majoris sunt valoris, quam demonstrationes.

§. 112.

Nimirum cognitio non fit motivum voluntatis, nisi de ejus certitudine fuerimus convicti aut persuasi (§. 138. 139.). Dicitur autem *cognitio viva*, quæ fit motivum voluntatis: *mortua*, quæ non fit.

§. 113.

Ne contra propositum tuum agas, eam acquiras necesse est mentis perfectionem, ut ad objecti cujuscunque appetibilis conspectum de actionis patrandæ cum fine ultimo nexu cogites. Consuetudo itaque crebro exercitio contrahenda: quod ne omittatur, eidem impendendum erit tempus ab aliis

negotiis & impedimentis vacuum. Mane igitur expergefactus 1. actionum per diem edendarum numerum inito & quænam eas fortuito comitari possint disquirito: 2. singularum nexum cum fine ultimo detegito (§. 105.). 3. Actionem perpetratam denuo examinato, cum plerumque tum libera sit conscientia, quæ ante erat serva (§. 90.). 4. Cubitum iturus actionum per diem commissarum recordare & quantum in fine ultimo consequendo profeceris judicato (§. 103.). Denique 5. ut laborem hunc non interrupta serie continues, ardorem vitæ honestæ in te excitato (§. 110.).

§. 114.

Ut propositi hujus per diem integrum recorderis, constituendum erit aliquod signum sensui obvium (§. 107. *Ontol.* & §. 41. *Psych.*).

§. 115.

En fontem *ceremoniarum*, quæ non sunt, nisi signa eorum, quorum in executione propositi meminisse nos oportet: ut attendenti manifestum sit, quomodo ceremoniarum dijudicatio fieri debeat, utrum rationi conveniant, an repugnent, deinde, quomodo ceremoniæ rationi conformes inveniantur.

§. 116.

Sensus impediunt, quo minus bonum agamus,

mus, malum. omittamus, quatenus nos ad erronea iudicia seducunt, ut bonum & malum apparens cum vero confundamus, (§. 76. 80. *Phil. pr. univ.* & §. 103. 104. *Psychol.*) & quatenus attentionem turbant (§. 56. *Psych.*), ut propositi non recordemur (§. 113.), vel ardor honeste vivendi minuatur (§. 110.), vel actionis cum fine ultimo nexus non perspiciatur (§. 105.).

§. 117.

Idem valet de imaginatione, a sensu ortam & olim ex actione perceptam voluptatem confase repræsentante, dum ejusdem meminimus (§. 41. *Psychol.*).

§. 118.

Dominium igitur in sensus atque imaginationem obtenturus, ad eum gradum mentis aciem eleuet, ut bonum a malo semper discernere queat (§. 105.), ne ad erronea iudicia seduci se patiatur (§. 117.) & ardorem in se excitet honeste viuendi (§. 110.) sibi que conciliet eam mentis perfectionem, ut de actionis cujusvis datæ cum fine ultimo connexionè cogitet (§. 113.), ne deficiat attentio ad actionum committendum vel omittendarum examen (§. 116. 117.).

§. 119.

Atque ita tandem patet, quid fieri debeat, ut naturæ nostræ convenienter vivamus.

Nimirum, ut honeste vivere velimus, excitandus est ardor vitæ honestæ (§. 110.); ut possimus, mens ad eam elevanda est aciem, ut de actionum honestate iudicium certum ferre queamus (§. 105.), dominiumque in sensus atque imaginationem obtineat (§. 118.).

CAP. II.

DE CUSTODIA CONSCIENTIÆ.

§. 120.

Quoniam morsus conscientiæ non postremam infelicitatis partem absolvunt (§. 97.), conscientia autem nos excusans felicitatis parens est (§. 96.); ideo opera danda est, ut conscientia consequens eadem sit cum antecedente (§. 94.), consequenter ut antecedens recta sit atque certa (§. 83. 84.). Conscientia itaque est custodienda (§. 101.).

§. 121.

Ut conscientia recta atque certa sit, enitendum nobis est ad hoc animi acumen (§. 105.), quod bonum a malo discernendum sufficit (§. 82. 83.). Unde demonstrationum in moralibus usus elucet (§. 76. *Log.*).

§. 122.

Cum demonstratio conscientiam certam
red.

reddat (§. 121.); scrupulorum conscientiae tollendorum medium est (§. 85. *Phil. pr. univ.* & §. 99. *Ontol.*). Nisi demonstratio adsit, probabilis persuasio eosdem non funditus tollit, sed ad tempus suppressit (§. 78. *Log.*).

§. 123.

Quamobrem ubi abfuerit demonstratio, fieri potest, ut conscientia nos accuset (§. 94.).

§. 124.

Conscientia igitur dubia nihil est agendum (§. 84. 85.).

§. 125.

Morsibus conscientiae locus est, ubi conscientia consequens ab antecedente dissentit (§. 94. 97.). Quamobrem cum natura ignoret adversus eos remedium aliud, nisi quod factum infectum fieri nequeat atque ferendum sit, quod mutari nequit; philosophiae hac in parte defectus satis manifestus est, cui theologia revelata medetur.

§. 126.

Ne conscientia obdormiat, ardor vitae honestae excitandus, consuetudo contrahenda, data qualibet agendi occasione, de actionis cum fine ultimo nexu cogitandi (§. 98. 110. 113.).

CAP. III.

DE CONJECTANDIS HOMINUM
MORIBUS.

§. 127.

Voluntas nihil appetit, nisi sub ratione boni, nihil averfatur, nisi sub ratione mali (§. 140. *Psychol.*). Homini ergo principia quædam generalia sunt, secundum quæ judicat, hoc vel illud esse bonum vel malum (§. 33. 35. *Log.*). Nobis jam constitutum est ostendere, quomodo principia ista investigentur in casibus singularibus.

§. 128.

Quoniam affectus ex boni malique repræsentatione ortum trahunt (§. III. 106. 107. *Psychol.*); ex iis innotescit, quas homo habeat notiones boni atque mali. Etenim ex specie affectus vi definitionis (§. 113. & sqq. *Psychol.*) liquet, quod sibi objectum repræsentet tanquam bonum vel malum & quidem diversimode determinatum. Præsens objecti conditio attendenti manifestat iudicium, quod de eodem fert affectus impetu abreptus. Quamobrem cum hoc propositionem minorem, istud conclusionem alicujus syllogismi exhibeat (§. 37. & sqq. *Log.*), omne negotium huc redit, ut ex data conclusione & propositione minori alicujus syllogismi inveniatur
ma-

major (§. 39. *Log.*), seu ut enthymemati sua assignetur major (§. 45. *Log.*). Nimirum enthymema generale hoc est: *Objectum ita est comparatum, Ergo est bonum (vel malum)*. Major talis: *quod ita comparatum est, istud bonum (vel malum) est.*

§. 129.

Affectus ex mutatione vultus, vocis, gestuum innotescit (§. 111. *Psychol.*), & inde quoque ipsam speciem discernere liceret, modo theoria non in numero desideratorum adhuc esset, quæ ex diversitate vultus, vocis, gestuum in diversis subjectis eodem affectu agitis, quæ universalia insunt, eruenda. Hac vero deficiente, circumstantiarum præsentium cum definitionibus affectuum (§. 113. & seqq. *Psychol.*) collatio speciem affectus prodit.

§. 130.

Difficultatem facesset imaginatio, quæ, dum ob ea, quæ in sensus incurrunt, olim percepta in memoriam revocat (§. 41. *Psychol.*), dubios nos reddit, quòdnam sit iudicium intuitivum in genesin affectus influens (§. 128.)

§. 131.

Plures igitur circa idem subjectum institutione observationes inter se conferendæ sunt, ut in conjectando reddamur certiores, num

aliquæ & quænam imaginationi tribuendæ sint partes.

§. 132.

Quoniam actiones quoque per boni malique repræsentationem determinantur (§. 141. *Psychol.*), ex his eadem ratione, quam de affectibus modo explicatam dedimus (§. 128.), notiones boni malique eruere licet, quibus utitur hic vel ille in bono maloque discernendo.

§. 133.

Habenda vero & hic est ratio imaginationis, dum iudicium intuitivum de objecto vel actione rimamur, ob rationem ante (§. 130.) allatam.

§. 134.

Utraque methodus habet etiam in cognitione sui ipsius locum, nec tanta hic occurrit difficultas circa iudicium intuitivum (§. 130. 133.), ut adeo facilius se, quam alios cognoscere possit, qui distincta cognitione utitur.

§. 135.

Fieri potest, ut homo ob rationes singulares agat, cujus contrarium istis deficientibus appetit, vel etiam omittat, cujus alias contrarium averfatur. In hoc ergo casu methodus præscripta (§. 132.) fallit.

§. 136.

Dissensus iste actionis externæ & internæ di-

dicitur *simulatio*, quæ opponitur *sinceritati*, consensui actionis externæ cum interna.

§. 137.

Ne igitur methodus conjectandi ex actionibus aliorum mores fallat (§. 135.); opera nobis danda est, ut simulatio deregatur, quæ in affectu non tam facile absconditur, quam in actionibus.

§. 138.

Qui constantem idealis in mente & mechanici in corpore sine Psychologiæ rationalis pertractatione elucentem consensum perpendit; haud ægre concedet, alium esse debere vultum, aliam vocem, alios gestus, si actio externa fuerit sincera, quam si simulata fuerit. Differentia nobis ignota, olim *Sinis* perspecta fuit: qua de re vide Philosophum in Annotationibus ad Orationem de *Sinarum* Philosophia practica not. 78.

§. 139.

Dum igitur latet, ex affectibus, quos simulare vix licet (§. III. *Psychol.*), & actionibus sinceris investigentur notiones, quas habet, boni ac mali generales (§. 128. 132.), ut inde motiva ordinaria appareant (§. 141. *Psych.*). Ex præsentibus circumstantiis inquiratur in motivum actionis (§. 132.), quod si ordinariis repugnet, dissensum actionis externæ cum interna manifestat, adeoque simulationem prodit (§. 136.).

§. 140.

Praxis hæc faciliteretur, si in philosophia practica speciali actionum externarum singula motiva distincte enuclearentur, sive locum habeant in animo sincero, sive simulato.

§. 141.

Cujus igitur interest, ne actio simulata detegatur; is caveat, ne ex præcipitantia per actionem sinceram aut affectum prodatur motivum, cui simulatio contrariatur (§. 136.). Quamobrem ne attentio ad actiones suas deficiat, vitanda est nimia cum aliis familiaritas, vitanda etiam sunt libera de aliis judicia, omnibus in meliorem partem versis.

§. 142.

Quoniam voluntas hominum ambulatoria, notionibus boni & mali mutatis (§. 110. *Psychol.*), de alterius simulatione judicaturus, certus esse debet, hominem mentem suam de eo, quod bonum vel malum est, nondum mutasse (§. 4. *Log.*).

§. 143.

Constans consensus, idealis in mente, atque mechanici in corpore, quem Psychologia rationalis prodit, haud obscure insinuat, differentiam in structura corporum observandam convenire differentię animorum, ut adeo hæc ex ista agnosci possit. Non igitur ratione destituitur ars judicandi de animo

mo alterius ex indiciis corporis, in conformitate partium, lineamentis præsertim faciei obviis, quam *Physiognomiam* veteres dixerunt,

§. 144.

Quoniam vero hinc non nisi inclinationes naturales agnoscuntur (§. 143.), educatione, consuetudine cum aliis, institutione & exercitio mutabiles, experientia teste: cavendum est, ne in numerum actionum simulatorum referantur, quas alter rationi conformes decrevit, quia inclinationi naturali sunt adversæ.

§. 145.

Vultus, gestus & vox inclinationibus naturalibus conformes dicuntur *liberi*; iisdem repugnantes *coacti*: ut adeo nova exsurgat scientia consensus vultus, gestus ac vocis cum inclinationibus naturalibus, quæ adhuc inter desiderata habetur. In ea una expediendum esset, quomodo vultus, gestus & vox coacti in concordiam cum liberis reducantur, ne coactio displiceat.

§. 146.

Quoniam bruta, præsertim feræ, quæ extra hominum consortium degunt, inclinationibus naturalibus conformiter actiones suas determinant; corporis humani cum corporibus brutorum similitudo haud leve momentum in Physiognomia erit.

§. 147.

§. 147.

Et si autem physiognomiæ possibilitatem adstruamus; hoc ipso tamen minime probamus, quæ huc usque sub hoc titulo prostant, sed talia esse judicamus, quæ rigidiori examini submittenda, antequam admittantur.

FINIS PHILOSOPHIÆ PRACTICÆ UNIVERSALIS.



INSTITUTIONES
JURIS NATU-
RALIS.

STANLEY
JAN



INSTITVTIONES JURIS NATVRALIS.

PROLEGOMENA.

§. 1.

PER *Jus Naturæ* hic loci intelligimus legum
naturalium scientiam,

§. 2.

Legis naturalis notionem evolutam dedimus
(§. 14. *Phil.pr. univ.*), ejusque principium de-
monstravimus (§. 29. *Phil. pr.univ.*), ut adeo
tractatione generali de lege naturali hic merito
supersedeamus.

§. 3.

Homo potest duplici modo considerari,
vel in *statu naturali*, in quo actiones pro arbi-
trio suo determinat, nullo superiore his in
terris libertatem ejus limitante: vel in *statu*
civili, in quo actiones suas ex alterius ar-
bitrio dirigere tenetur, qui libertatem ejus
limitat.

§. 4.

§. 4.

Duplices itaque habemus leges naturales, quarum aliæ statui naturali conveniunt; aliæ statui civili. Illæ *jus naturæ ethicum*; hæ *jus naturæ politicum* absolvunt.

§. 5.

Jus adeo naturæ commode dispescitur in duas partes, quarum altera *jus naturæ ethicum*, altera *jus naturæ politicum* pertractat.

§. 6.

Quoniam virtus, Ethicæ objectum, est habitus dirigendi actiones legi naturali conformiter (§. 49. *Phil.pr.univ.*); *jus naturæ ethicum* theoriam Ethicæ continet.

§. 7.

Similiter *jus naturæ politicum* theoriam Politicæ suppeditat (§. 4.).

§. 8.

Utrumque patebit evidentius, vbi Ethicæ ac Politicæ definitionem suo loco tradiderimus.

PARS I. DE JURE NATURALI ETHICO.

CAPUT I.

DE OFFICIIS HOMINIS ERGA DEUM.

§. 9.

O*fficium* dicitur actio ad legem determinata, quatenus ad eam ita determinandam obligamur.

§. 10.

Officium erga Deum vocatur, cujus motiva sunt attributa divina.

§. 11.

Homo actiones suas per attributa divina determinans, gloriam Dei illustrat (§. 66. *Phil. pr. univ.*): officia igitur erga Deum gloriæ divinæ illustratione absolvuntur.

§. 12.

Homo gloriam Dei illustrare tenetur, seu attributis divinis tanquam actionum suarum motivis uti (§. 66. *Phil. pr. univ.*). Quoniam vero hoc fieri nequit, nisi eadem agnoscat; (P.II. *Thüm. Inst. Jur. nat.*) D agni-

agnitio Numinis est officium hominis erga Deum (§. 10.).

§. 13.

Deus cum velit, ut homo actiones suas ad legem naturæ componat (§. 32. *Phil. pr. un.*); homo quoque voluntate divina tanquam actionum suarum motivo uti debet (§. 66. *Phil. pr. univ.*). Atque hac ratione omnes suas actiones ad gloriam Dei dirigit (§. *cit.*); id quod alia adhuc speciali ratione contingit, si dogmatis de Deo specialibus tanquam actionum specialium motivis utitur. Dabimus infra ejus rei exempla.

§. 14.

Qui omnes actiones suas non modo per voluntatem Numinis, sed & attributa ac opera Numinis agnita determinat, is *Deo vivere* dicitur. Evidens adeo est, quod homo Deo vivere teneatur (§. 13.).

§. 15.

Qui perfectiones divinas agnoscit, ex iis voluptatem percipit (§. 95. *Psychol.*), atque adeo in amorem Dei fertur (§. 115. *Psychol.*). Quamobrem quia homo ad Deum agnoscendum obligatur (§. 12.); Deum quoque amare teneatur.

§. 16.

Cum perfectiones divinæ perfectiones creaturarum intervallo infinito post se relinquunt

quant (§. 89. *Theol. nat.*): qui eas distincte cognoscit, majorem inde voluptatem percipit, quam ex perfectionibus creaturarum (§. 97. *Psychol.*), atque adeo majori amore flagrabit erga Deum, quam erga creaturas omnes (§. 115. *Psychol.*). Quamobrem cum homo Deum agnoscere teneatur (§. 12.): eum quoque super omnia diligat necesse est.

§. 17.

Qui alterum amat, is voluptatem percipit ex voluptate ejusdem (§. 115. *Psychol.*), adeoque veretur, ne quidquam committat, quod eidem displiceat. Quamobrem qui Deum super omnia diligit, is multo magis veretur, ne quidquam committat, quod voluntati Numinis adversum. Quoniam itaque homo Deum super omnia diligere tenetur (§. 16.): maximòpere etiam vereatur, ne quid voluntati ipsius adversum committat. Hæc animi sollicitudo, ne forte quidquam a nobis fiat, quod voluntati Numinis repugnet, *metus filialis* dicitur: ut adeo appareat, hominis esse, Deum timere super omnia metu filiali.

§. 18.

Metus filialis opponitur *metui servili*, qui est formido pœnæ. Quoniam Deus pœnis quoque utitur ad homines obligandos (§. 41. & seqq. *Phil. pr. univ.*): earum formidine te-

neri debet homo, consequenter studere; ut eas agnoscat. Sed formidine pœnæ non amplius opus est, quam primum Deus super omnia amatur (§. 17.); ideo tum demum metui servili locus est, ubi & in quantum filialis deficit.

§. 19.

Qui ad perfectionum diuinarum magnitudinem attendit, is non potest non easdem admirari, Deumque & sibi & rebus omnibus ceteris præferre. Atque in eo consistit *reverentia Numinis*, & simul patet, nostrum esse Deum super omnia revereri.

§. 20.

Qui firmiter persuasus, Deum unicuique creaturæ tantum perfectionis, tantum boni tribuere, quantum ipsi tribui potest, ita ut etiam mala ad bonos fines dirigat (§. 83. *Theol. nat.*): is certus de bono obtinendo & mali præsentis saluari usu lætatur (§. 113. *Psycho.*), cum, quod adhuc absens est, tanquam jam præsens habeatur, adeoque in Deo fiduciam collocat (§. 128. *Psycho.*). Homo itaque qui Deum agnoscere tenetur (§. 12.), in eo quoque fiduciam suam collocare obligatur.

§. 21.

Qui persuasus est, Deum omnia dirigere ad bonos fines (§. 83. *Theol. nat.*); is quoque in ipsius voluntate constanter acquiescens probat,

bat, quæ a Deo in mundo sunt vel permittuntur. Atque in eo consistit *acquiescentia in Numinis voluntate*; unde ut ante (§. 20.) perspicitur, hominem in voluntate Numinis acquiescere debere.

§. 22.

Imo qui firmiter persuasus est, Deo acceptum ferendum, quicquid ipsi adest boni (§. 83. *Theol. nat.*), is non potest non desiderare, ut Deus bona præsentia conservet, plura impofterum conferat atque mala nocua vel avertat, vel ad bonum sibi finem dirigat (§. 140. *Psych.*). Atque hisce *invocatio Numinis interna* absolvitur, ut adeo eadem, qua ante, ratione (§. 20.) constet, Deum esse invocandum.

§. 23.

Si quis verbis ore prolatis exprimit, quæ animo concipit, dum Deum interne inuocat; *orare* dicitur.

§. 24.

Deus cum sit omniscius (§. 16. *Theol. nat.*): invocatio interna sufficere videri poterat (§. 22.). Enimvero sunt aliæ actiones complures, quæ orationem suadent. Etenim serio cogitantes bona, in quæ ferimur, dum Deum invocamus (§. 23.); verba animo concipientes, conatum percipimus eadem ore proferendi, cui cum non sit ratio, cur resistamus, eadem utique proferimus. Quamobrem quia invo-

catio seria præcipitur, eidem quoque jungenda oratio (§. 23.). Accedit, orationem & nobis prodesse & alteri. Alteri prodest, dum ad imitationem invitatur: nobis vero, quod sic rectius conservetur attentio, sensu minus occupato alienis (§. 56. *Psychol.*), & affectu prolata eandem conservent, imo intendunt,

§. 25.

Qui beneficia divina perpendit, non potest non ex iis percipere voluptatem (§. 102. 95. *Psychol.*); atque adeo Deum amat, propterea quod benefacit (§. 115. *Psychol.*). Amor in benefactorem ob præstita beneficia est id, quod gratitudinem, seu animum gratum appellamus (§. 124. *Psychol.*). Eundem igitur testari debet homo actionibus externis, ut eadem internis consentiant (§. 17. *Phil. pract. univ.*), consequenter Deo gratias agere.

§. 26.

Gratiarum actio hic loci est oratio, qua Deo gratum animum, ob præstita nobis beneficia testamur,

CAP. II.

DE OFFICIIS HOMINIS ERGA
SE IPSVM.

§. 27.

Officia erga se ipsum illa sunt, quæ homini respectu sui ipsius præstanda.

§. 28.

Alia mentem respiciunt, alia corpus, alia denique statum externum.

§. 29.

Homo obligatur ad istiusmodi actionum suarum directionem, ut tendant ad perfectionem sui ipsius (§. 20. 32.). Ut igitur judicare possit, quænam ad sui perfectionem tendant, quænam vero eidem contrariantur, se ipsum nosse debet, & quidem cum animam, tum corpus ac statum externum.

§. 30.

Non cujusvis est ea proprio Marte eruere, quæ ad animæ, corporis & status humani notitiam in genere spectant, & quæ applicata notitiam in singulari pariunt (§. 33. *Log.*). Quamobrem cum homo aliorum perfectionem perinde promovereteneatur ac suam (§. 67. *Phil. pr. un.*); cui facultas est talia eruendi, is quoque eadem præstare obligatur.

§. 31.

Non abſimili modo generaliter demonſtrari poteſt, dari nonnulla, ad quæ genus quidem humanum in genere ſpectatum obligetur, ſed non perinde quodlibet eius individuum. Obligatio enim in ſingulari non niſi ad eos ſpectat, qui eidem ſatiſfacere valent,

§. 32.

Diſtinguenda nimirum ſunt ea, quæ in noſtra poteſtate ſunt, ab iis, quæ in ea non ſunt. *In poteſtate noſtra ſunt*, quæ virium animi, corporis & rerum externarum, veluti opum noſtrarum & amicorum beneficio conſequi vel evitare poſſumus. *Iſis oppoſita in poteſtate noſtra non ſunt.*

§. 33.

Intellectus eſt facultas poſſibilia diſtincte re-præſentandi (§. 61. *Psychol.*). Quoniam itaque crebro exercitio habitus cognoscendi comparatur; nemo non ad iſta exercitia adſtringitur (§. 16. *Phil.pr.un.*), conſequenter intellectum ad majorem perfectionis gradum evehere tenetur.

§. 34.

Major perfectionis gradus eſt, ſi intellectus ad plura poſſibilia repræſentanda extenditur, quam ſi ad pauciora, deinde ſi majorem poſſidet notionum diſtinctarum gradum (§. 213.

(§. 213. *Psychol.*) Ergo intellectus omni cognitione, quantum datur, imbuendus, omnisque opera adhibenda, ut distincta cognitio in potestatem nostram magis magisque redigatur.

§. 35.

Quoniam tamen fieri nequit, ut omnium rerum cognitioni vacemus: ea omni reliquæ præferenda est, qua in vitæ nostræ genere, item in hono maloque discernendo opus habemus.

§. 36.

Vitanda ergo omni studio est ignorantia, & quantum in nobis est, præsertim ignorantia ejus, quod bonum est atque malum.

§. 37.

Ignorantia adeo neminem excusat, si eam excutere fuerit in potestate: quam *vincibilem* appellant, sicut in causa opposito *invincibilem*.

§. 38.

Obligamur intellectui majorem perfectionis gradum conciliare (§. 33.): adeoque intendenda est attentio (§. 56. *Psychol.*), augendum est acumen cum profunditate (§. 62. 63. *Psychol.*), concilianda est facilitas abstrahendi (§. 66 *Psych.*), ars observandi (§. 71. 72. *Psych.*), ratiocinandi (§. 78. *Psych.*), inveniendi (§. 84. *Psych.*),

Psych.), intendendum ingenium (§. 86. *Psych.*), excolenda ratio (§. 88. *Psychol.*).

§. 39.

Voluntas generaliter determinata est ad bonum appetendum, malum vero averſandum (§. 140. *Psychol.*). Opera hinc danda est, ut ad hanc perfectionem evehamur, ne unquam appetamus nisi bona vera, nec averſemur nisi mala vera (§. 16. *Phil. pr. univ.*).

§. 40.

Quoniam appetitus sensitivus sæpiſſime fertur in bonum apparens (§. 103. 105. *Psych.*): curandum est, ut idem, consequenter & affectus (§. 111. *Psychol.*), cum appetitu rationali consentiant (§. *præc.* & 138. *Psychol.*).

§. 41.

Unde ferendum non est, ut affectus & appetitus sensitivus in genere a rationali dissentiant.

§. 42.

Consentiunt affectus cum appetitu rationali, si sint motiva, aut si mavis, stimuli actionum bonarum committendarum, vel malarum omittendarum: dissentiunt, ubi fuerint stimuli bonarum omittendarum, malarum committendarum.

§. 43.

Ex physices parte quinta de œconomia
ani-

animali patet, actiones corporis naturalis tendere ad conservationem corporis. Hominis ergo est, ut corpus suum conservare studeat (§. 16. *Phil. pr. un.*), consequenter ut vitet pericula vitæ, quantum in potestate ipsius positum est.

§. 44.

Multo minus itaque sibi met ipsi manus violentas inferre debet adversitatum finiendarum gratia, quas patientia vinci convenit. Ad sunt rationes aliæ politicæ, suo loco commemorandæ.

§. 45.

Corpus per naturam suam disponitur ad varios motus, quibus homo ad munia sua subeunda habet opus. Quamobrem danda est opera, ut dispositiones naturales in habitus adolescant, quantum fieri potest (§. 16. *Phil. pr. univ.*).

§. 46.

Status iste, quo homo omnes motus edere potest, quorum ipsi per naturam suam est potentia, *sanitas* audit. Sanitatis ergo conservandæ curam gerat homo (§. 45.), consequenter caveat, ne in morbos incidat, & si quidem hoc acciderit, ut sanitas amissa restituatur, curet.

§. 47.

§. 47.

Eodem modo ostenditur, quod ad curam integritatis membrorum conservandæ adstringatur.

§. 48.

Neque porro cibum ac potum appetere licet, nisi qui ad sanitatem conservandam conducunt: neque in utroque capiendo modum excedere cum detrimento sanitatis (§. 46.).

§. 49.

Appetitus sensitivus fertur in cibum ob saporem gratum (§. 103. 105. *Psych.*): qui cum ad concordiam reducendus sit cum rationali (§. 40.) in sanitatem corporis itidem laço (§. 48.); cibus boni saporis præferendus alteri, qui minus sapit, ubi uterque fuerit in potestate & ad sanitatem æque conducatur,

§. 50.

Cum status mentis internus & externus inter se consentire debeat, ut obtineatur perfectio (§. 44), ad quam Homo obligatur (§. 20. *Phil. pr. univ.*); in capiendo cibo ac potu habenda quoque ratio opum & dignitatis civilis.

§. 51.

Homo sanitatem tueri tenetur (§. 46.). Vitandus igitur labor nimius, vitandæ vigiliæ
ni-

nimiæ, vitandum quidquid sanitati inimicum.

§. 52.

Homo sanitatem tueri tenetur (§.46.). Ergo corpus vestimentis adversus injurias tempestatum muniendum. Et cum obiecta moveant sensus, & per eos cieant appetitum (§.103.105.109. *Psych.*); ad declinandam libidinem partes obscenæ velandæ sunt.

§. 53.

Eodem, quo ante (§.50.) modo demonstratur, in vestitu habendam quoque esse rationem opum & dignitatis civilis, nec non laboris & negotiorum statusque animi interni.

§. 54.

Domicilio opus habemus, ut res nostras custodire, negotiis fungi, cibos præparare & corpus lassum somno reficere & ab injuriis tempestatum tuti esse queamus. Atque hinc deducenda sunt, ad quæ homo circa domicilia tenetur.

§. 55.

Eodem, quo ante (§.50.) modo demonstratur, in domicilio quoque eligendo, imo & in suppellectile habendam esse rationem opum & dignitatis civilis. Rationes alias politicas cum de victu, tum de amictu, tum de domicilio dabimus infra in jure naturæ politico.

§. 56.

Membrorum integritatem cum conservare debeat homo (§. 47.): in situ ac motu corporis circumspēctus sit opus est, ut non modo a lapsu damnum daturō immunis persistat, verum etiam alio quocunque modo eadem minime lædat.

§. 57.

Quamobrem cum incauto quoque usu sensus depraventur, v. gr. visus ex lectione scripturæ minutæ ad lucem crebram: quidquid eorum aciem obtundit cum cura vitandum.

§. 58.

Idem valet de memoria & imaginandi facultate.

§. 59.

Quoniam vero eadem exercitiis extendi possunt (§. 53. *Psych.*); ut iisdem homo navet operam recte præcipitur.

§. 60.

Homini cura incumbit, victus (§. 48.), amictus (§. 52.) & domicilii (§. 54.), non modo ad necessitatem (§. §. *cit.*), verum etiam ad jucunditatem vitæ atque decorem (§. 49. 50. 53. 55.); imo cura mentis quoque variis modis perficiendæ (§. 33. 38.). Vocamus autem *opes* res externas, quibus homo ad vitæ necessitatem, jucunditatem atque decorem habet opus.

Ma-

Manifestum ergo est, hominem quoque de acquirendis opibus sollicitum esse debere, ne ad vitæ necessitatem, jucunditatem & decus facientia desint.

§. 61.

Facile perspicitur, necessitatis primam esse habendam rationem, cum ad perfectionem hominis per se tendat (§. 46. 48. 52. 54.); deinde decoris, cum ad eandem secundario tendat (§. 50. 53. 55.); tertio demum loco jucunditatis, quæ permittitur, quatenus necessitati ac decori non contrariatur (§. 49.).

§. 62.

Quoniam opum acquisitio non semper in nostra potestate est, variis obstaculis se se objicientibus, quæ inter morbi, virium defectus in senectute, & injuriæ temporum non postremum sibi vendicant locum; non modo ratio habenda est necessitatis præsentis, verum etiam futuræ.

§. 63.

Quamobrem sollicitudo recte inculcatur, ut futuræ necessitatis gratia quædam conserventur, nec parva præter necessitatem dilapidentur.

§. 64.

Ex eadem ratione liquet, nullam prætermittendam esse occasionem, quæ salvis officiis erga nos & alios imprimis etiam erga Deum,

Deum, opes parare datur. Accedet inferius ratio alia, quod abundantia opum egentium necessitas sublevanda sit. Imo in politica juris naturæ parte non deerunt rationes adhuc aliæ.

§. 65.

Opes parare obligamur, ne careamus iis, quæ ad satisfaciendum officiis circa mentem atque corpus (§. 60.), tum erga alios (§. 64.) inserviunt: non igitur per se sunt appetendæ, sed quatenus vñibus illis serviunt. Unde patet ratio, cur in parandis opibus peccet, qui contra ista officia delinquit.

§. 66.

Labor sunt actiones humanæ opum parandarum gratia editæ. A labore qui abstinet, *otiosi* dicitur.

§. 67.

Apparet adeo, omni homini esse laborandum, nemini otiaandum, si quis vel maxime fuerit dives (§. 64. 66.).

§. 68.

Ex eodem, quo supra (§. 50.) fonte derivatur, laborem convenire debere dignitati nostræ & opum quantitati, v. gr. qui non opus habet labore, ut necessitati & jucunditati atque decori prospiciat, opibus, quas possidet, abunde sufficientibus; scientias & artes excolat in usum generis humani, vel patriæ officia utilia præstet.

§. 69.

§. 69.

Et si autem necessitatis sublevandæ gratia laborandum sit (§. 67.): quoniam tamen omnis quoque labor per se tendit ad aliquem finem; hujus non minus habendam esse rationem, ex principiis generalibus liquet (§. 163. *Phil. pr. univ.*). Danda nimirum est opera, ut, quod perficimus opus sua non careat perfectione, nostræ perfectionis indice.

§. 70.

Opes parandæ sunt, ne desint officiis erga nos atque alios instrumenta (§. 66.); in administrandis itaque iisdem non modo curandum, ne quid erogetur, nisi officiorum illorum gratia, sed inprimis etiam, ut futuræ olim necessitati prospiciatur (§. 62.).

§. 71.

Ne igitur erogandum sit, quod servari debet, vestitus ac utensilium aliarumque ad vitam necessariorum rerum tanta habenda est cura, ne damnum detur, quod averti potest.

§. 72.

Quod si excipias, non convenire dignitati tuæ, nec opum quantitati, cujus tamen non minus habenda est ratio (§. 53. 55.), ut eadem veste indutus per longum temporis tractum incedas: haud difficilis est responsio ex officiorum erga alios doctrina petenda, vi cujus
(P. II. *Tbüm. Inst. Jur. nat.*) E pa.

patebit, eum nudos vestire obligari, qui vestium copia abundat. Tacemus rationes a decoro desumendas, quas ernere valet, qui ad universalem omnium actionum consensum decori principium attendit.

§. 73.

Homo omnes suas actiones ad sui perfectionem (§. 20. *Phil. pr. univ.*), adeoque & ad aliorum perfectionem (§. 67. *Phil. pr. univ.*), & gloriam Numinis (§. 66. *Pb. pr. un.*) dirigere, consequenter nihil quidquam committere obligatur, quod perfectioni suæ aliorumque atque gloriæ Numinis repugnat. Aliorum de hac perfectione judicium est id, quod *honoris* nomine compellamus: incumbit adeo omni homini, ut honore se dignum præstet.

§. 74.

Enimvero cum judicium alterius non sit in nostra potestate (§. 32.), multo minus efficere valeamus, ut alterius verba & actiones externæ cum ipsius judicio actu mentis interno (§. 24. *Log.*), conveniant; nemo sanus honores appetit, etsi speciminibus se honore dignum præbeat, ne aliorum sinistris judiciis sua culpa sit locus.

§. 75.

Elucet porro, non nisi eum honorare posse alterum, qui de actionibus ipsius vernunfer-

ferre valet judicium (§. 73.): absonum igitur est, si quis honorem exigit aut exspectat a non intelligentibus. Intelligentis solius est honorem deferre alteri, etsi non intelligentium sit, non admittere quidquam eidem adversum.

§. 76.

Quoniam actus externi cum internis semper consentire debent (§. 17. *1^a pr. un.*): ad honorem quoque referuntur actus externi internis mentis judicio respondentes, qui tamen eodem absente, non nisi umbram honoris exhibent.

§. 77.

Homini incumbit, ut se honore dignum præstet (§. 73.), idemque speciminibus probet, ne sinistris aliorum judiciis sit locus (§. 74.). Famam ergo suam ut tueatur par est, nisi sinistrorum judiciorum falsitas sit in aprico posita, & calumniatorum genius perspectus, ac speciminibus contrarium doceri nequeat.

§. 78.

Fortuna est concursus indeliberatus plurimum causarum, atque adeo nostram eludit potestatem (§. 32.). Eadem igitur secunda minime efferri, nec nimis eidem fidere, adversa autem neutiquam confundi licet. Idem jubet fortunæ utriusque inconstantia.

CAP. III.

DE OFFICIO HOMINIS ERGA
ALIOS IN GENERE.

§. 79.

Homo actiones suas dirigere obligatur etiam ad alterius perfectionem (§. 67. *Pb. pr. un.*). Perfectionis intuitus voluptatem parit (§. 95. *Pfych*), atque adeo illam qui promovet, felicitatem alterius promovet (§. 72. *Phil. pr. univ.*). Debemus ergo felicitatem alterius promovere.

§. 80.

Homo omnes quoque actiones suas ad sui ipsius perfectionem dirigere tenetur (§. 20. *Pb. pr. un.*): officia igitur erga alios eadem sunt cum officiis erga se ipsum, hoc est, alteri debes, quod tibi metipsum debes.

§. 81.

Facile autem patet, non posse alterum a me exigere, quod in sua habet potestate. Neque enim ulla ratio suadet, ut hoc ab altero exigatur, vel ego in gratiam alterius faciam, quod propriæ perfectioni promovendæ inservit.

§. 82.

Aliter se res habet, si alter, ad quod obligatur, non habeat in sua potestate; ego autem habeam in potestate mea, ut ipsi succurram.

§. 83.

§. 83.

Nihil appetimus nisi sub ratione boni (§. 140. *Psychol.*). Quamobrem homo alterius felicitatem promoturus (§. 79.) ex ea voluptatem percipere (§. 102. 95. *Psychol.*), consequenter alterum amare tenetur tanquam se ipsum (§. 115. *Psych.*).

§. 84.

Hinc apparet, quod alterum amet tanquam se ipsum, qui ex alterius felicitate perinde voluptatem percipit atque ex sua: id quod ipsa amoris definitio (§. 115. *Psychol.*) insinuat.

§. 85.

Amicus est persona, quæ nos amat; *inimicus* contra persona, quæ nos odit.

§. 86.

Cum igitur omnes amare debeamus tanquam nos ipsos (§. 83.); omnibus amicos (§. 85.), atque adeo nemini inimicos nos præbeamus necesse est (§. *cit.*).

§. 87.

Inimicus nos odit (§. 85.) atque adeo ex infelicitate nostra voluptatem sentit (§. 116. *Psychol.*), consequenter eam appetit (§. 103. 105. *Psychol.*). Danda ergo nobis est opera, ne alios nobis redamus inimicos.

§. 88.

Quoniam vero obligatio legis naturalis

ob huius immutabilitatem (§. 25. *Phil. pr. un.*) indispensabilis; a regula exceptionem admittit, si inimicitia alterius evitanda est, legi naturali contraria agendo (§. 47. *Ontol.*).

§. 89.

Homo ex alterius felicitate perinde ac ex propria percipiat voluptatem (§. 83.). Alterius itaque felicitatem propriam respicere tenetur; ut hinc nulla ratio suadeat, cur se super alterum extollat.

§. 90.

Cum quivis speciminibus se honore dignum probare debeat (§. 74.); unus quoque alterum honore prosequi tenetur, agnoscendo perfectionem alterius verbisque ac factis testando, quod eam agnoscat (§. 73.).

§. 91.

Opera danda est, ne inimicum nobis red- damus alterum (§. 87.), si id salva legis naturalis custodia fieri queat (§. 88.). Lex vero naturalis inviolata persistit (§. 24. *Phil. pr. un.*), ubi alterius nævos ac male facta non divulgamus, quin potius, quæ carpunt alii, in bonam partem interpretamur, quamdiu talem interpretationem admittunt, imo cum id placeat alteri, amorem ejus (§. 115. *Psych.*), adeoque amicitiam nobis conciliat (§. 85.). Nequaquam igitur, quæ alterius famæ nocent vel alio modo noxia sunt, a nobis pro-
pa-

palanda, quin potius ab aliis prolata in partem meliorem vertenda.

§. 92.

Multo magis ergo æquum est, ut alterius famam ab hominibus nequioribus injuste laceffitam vindicemus.

§. 93.

Qui agit, quæ ad alterius imperfectionem tendunt, eum *lædit*. Quoniam itaque actiones nostræ ad alterius perfectionem dirigendæ (§. 67, *Phil. pr. un.*), nemo a nobis lædendus est.

§. 94.

Qui alterum impedit, ne in veritatis cognitione proficiat, & boni præsertim atque mali ignorantia laborantem sustentat; is imperfectionem ipsius promovet (§. 34. 36.), adeoque alterum lædit.

§. 95.

Eodem modo constat, alterum lædere, qui culturam intellectus ipsius impedit (§. 34.), qui voluntati emendandæ obicem ponit (§. 39.), qui vitæ alterius insidiatur, aut quovunque modo eam abbreviat (§. 43.), qui sanitati ejus nocet (§. 46.), qui opibus eum emungit (§. 60. & seqq.), qui famam ejus laceffit (§. 90.).

§. 96.

Malum ex læsione resultans *damnum* dicitur.

tur. Nemo adeo cum sit lædendus (§. 93.); nemini quoque damnum inferendum.

§. 97.

Damnum itaque nostra culpa datum, quod evitari poterat, resarciendum: quodsi autem illud evitare non fuerit in potestate, nec ad ejus reparationem tenemur (§. 32.).

§. 98.

Quodsi restitutionem damni urgentes peccaremus in officia alteri debita, eadem urgenda non est (§. 47. *Ontol.*), v. gr. si quem oporteret vestem, quæ ipsi est, unicam vendere, ut damnum resarciat, cum in eo casu nudum a me vestiri conveniat (§. 82.).

§. 99.

Cum damni illati restitutionem urgere liceat (§. 97.); multo magis damnum avertere licet.

§. 100.

Mediis adeo utendum, quibus solis damnum arcetur. Curandum scilicet, ut hostem nobis damnum illaturum compescamus, donec de non dando simus securi.

CAP. IV.

DE OFFICIIS ERGA AMICOS
ET INIMICOS.

§. 101.

Quoniam homines in universum omnes amandi (§. 83.); multo magis a nobis amandi sunt benefactores, propterea, quod beneficia ab iisdem in nos collata alteram amoris rationem suppeditant (§. 115. *Psychol.*). Qui benefactorem amat, grato erga ipsum est animo (§. 124. *Psychol.*): gratos igitur in benefactores nos geramus æquum est.

§. 102.

Amicus nos amans (§. 85.) ex nostra felicitate (§. 115. *Psychol.*), consequenter voluptate ac lætitia nostra (§. 72.) voluptatem sentit. Fieri adeo nequit, ut sciens ac volens id agat, unde tædium nobis suboriatur & quod jure displiceat. Quodsi igitur ex inadvertentia admiserit, quod nobis adversatur; id quidem ægre ferendum non est, etsi admoneri placide possit, ut in posterum hos scopulos evitet.

§. 103.

Inimicus nos prosequitur odio (§. 85.). Quodsi a nobis perpetretur, quod ipsi displicet ac tædium creat, odium intenditur (§. 116. *Psychol.*), adeoque inimicitia capit incrementa. Cum

vero danda sit opera, ne alios nobis reddamus inimicos (§. 87.); nec admittenda sunt ea, quæ rædium inimico creare queunt.

§. 104.

Qui non admittere debet, quæ rædium creant inimico (§. 103.); nec voluptatem ex ipsius rædio percipiat (§. 40. *Psychol.*), consequenter nec eum odio prosequatur (§. 116. *Psychol.*).

§. 105.

Quodsi alter, quæ nobis displicent, admisit, ad odium propendet animus (§. 116. *Psychol.*). Enimvero ne inimicos quidem (§. 104.) multo minus alios odio prosequi licet (§. 83.); ergo rædium, quod ex actione alterius nobis subnascitur, suppressi convenit, quasi factum sit infectum. Eo qui est animo, alteri ignoscit, quod adversus ipsum perpetravit. Omnibus itaque hominibus, ipsis etiam inimicis ignoscere tenemur, si qua in re nos læserint (§. 93.).

§. 106.

Quodsi ergo alterius offensa, odii causa esse nequit (§. 105.); qui nos offendit, pro non offendente habetur. Quamobrem cum omnes in universum homines amandi sint tanquam nos ipsi (§. 83.): nec offensa est ratio, cur a lege recedamus. Ipsi adeo inimici amandi sunt, ac si non essent inimici.

§. 107.

Inimicos amaturus (§. 106.) ex ipsorum felicitate voluptatem percipit (§. 115. *Psychol.*). Inimicorum itaque felicitatem promovere convenit.

§. 108.

Amor in inimicos arduum officiorum erga alios genus, ex principio generali legis naturæ consequitur, actionum omnium requirit consensum (§. 17. 24. *Pb. pr. un.*), odio in inimicos sublatum.

§. 109.

Omne damnum cum sit avertendum (§. 99.), inimicus autem nos læsurus damnum inferre intendat (§. 96.); quod idem quoque arcendum sit satis evidens est.

§. 110.

Cum mediis uti liceat, quibus solis avertitur damnum (§. 100.): nec dubium est, quin idem adversus inimicum valeat, salvo amore ipsi debito (§. 106.). Etsi enim durioribus utendum sit mediis, quibus ægre fit inimico; non tamen in damnum alterius ferimur, ut ex eo voluptatem percipiamus, sed ut medium sit averrendi damni, nec alterius studium nocendi invalescat, si impune lædere queat.

§. 111.

Quamobrem si aggressor violentus mortem nobis intendit, nec depelli aliter possit, quam si e medio tollatur; quin e medio tollendus sit nemo dubitabit (§. 110.). Atque in hac defensione *jus inculpatæ tutelæ*, quod appellant, constitit.

§. 112.

Quodsi fuga consulere nobis detur, vel aggressorem in ipso actu constitutum pœniteat facti, ut nullum amplius immineat vitæ periculum; juri inculpatæ tutelæ locus non est.

§. 113.

In vitæ periculo constitutus terrore aliisque pro re nata affectibus perturbatur (§. 135. *Psychol.*), ut culpa aggressoris non sit sui potens (§. 136. *Psychol.*), nec adeo limites inculpatæ tutelæ in præsentī casu satis accurate discernere valeat (§. 111. 112.). Hinc non omnis excessus, qui committitur, defendenti imputatur, modo non pateat animus nocendi, tum enim casus variatur.

§. 114.

Similiter si in statu naturali fuerint rebus alterius inhiantes & ex rapto vivere asueti, nec aliter securitati prospici possit, quam si e medio tollerentur; quum idem obtineat, iisdem, quibus ante (§. 111.) rationibus ostenditur.

CAP. V.

DE OFFICIIS CIRCA SER-
MONEM.

§. 115.

F*alsiloquium* est sermo, animi nostri sententiae contrarius: dumque illud in alterius vel ipsius loquentis vergit damnum *mendacium* evadit.

§. 116.

Nemini damnum est inferendum (§. 96.), mendacium vero in alterius damnum cedit, (§. 115.); ergo hoc in casu neutiquam mentiri licet.

§. 117.

Homo actiones suas dirigere tenetur ad sui perfectionem (§. 20. *Ph. pr. un.*), neque adeo se ipsum lædere (§. 93.), consequenter nec sibi met-ipsi damnum inferre (§. 99.). Abstineat itaque a falsiloquio, quoties in sui ipsius damnum cedat. Unde simul apparet, nec in hoc casu mentiri licitum esse (§. 115.).

§. 118.

Cum omne mendacium vel in loquentis vel in alterius damnum vergat (§. 115.); in nullo prorsus casu est mendacium committendum (§. 116. 117.).

§. 119.

Homo & suam (§. 20. *Ph. pr. un.*), & alterius per-

perfectionem promovere studeat pro virili (§. 27. *Ph. pr. un.*). Quod si ergo falsiloquium vel in nostrum vel in alterius emolumentum cedat, non in alterutrius damnum, nec aliud suppetat medium illud obtinendi, hoc avertendi, nisi falsiloquio admissio; quin id committat, quis sibi religioni ducat?

§. 120.

Ipsa autem definitio mendacii insinuat, istiusmodi falsiloquium perperam ad mendacium referri (§. 115.).

§. 121.

Quoniam lege naturali consummatissimus exigitur actionum internarum & externarum consensus (§. 17. *Ph. pr. univ.*): nec temere falsiloquia committenda sunt, etsi in nullius cedant damnum, modo non sint medium unicum damnum avertendi, commodum vero nostrum vel alterius promovendi,

§. 122.

Ex haftenus dictis quoque conficitur, quando tacere conveniat, etsi loquens, a veritate seu animi tui sententia non recedas.

§. 123.

Verba animi sinceri signa, seu quæ a nobis eum in finem proferuntur, ut animi sinceri-

ceritatem alteri testemur, dicuntur *contestationes*.

§. 124.

Cum nihil fieri debeat sine ratione sufficiente; iisdem utendum non est, quamdiu adfuerint rationes sinceritatem animi in dubium vocatam probandi, vel nemo fuerit, qui eandem dubiam reddat.

§. 125.

Et si autem iisdem locus sit, quoties de sinceritate animi non constet, v. gr. ubi negamus aliorum calumnias, quarum falsitatem probare non possumus; haud quaquam tamen majoribus uti fas est, quam necessarium videtur.

§. 126.

Inter illas contestationes refertur *juramentum*, quod non est, nisi contestatio cum invocatione Numinis vindicis coniuncta.

§. 127.

Juramentum igitur deferri nequit, nisi illi, qui credit dari Deum, mali ab hominibus perpetrati vindicem.

§. 128.

Quod si alia ratione veritas in apricum produci nequit, quam tamen in apricum produci multum interest; juramento locum esse nemo sane negabit, nisi, qui medium finis ob-

ti-

tinendi unicum illicitum pronunciat, quando tamen finem legitimum pronunciat.

§. 129.

Reverentia erga Deum obstat, ut eundem in rebus levioris moment appellemus testem, vel quando veritas aliis modis in aprium produci aut confirmari potest (§. 29.). In his ergo casibus jurandum non est (§. 126.).

§. 130.

Qui verbis significat, velle sese, ut alteri male sit, is eidem *maledicit*. Sed non licet velle, ut alteri sit male (§. 79.), adeoque nemini maledicendum est.

§. 131.

Sermo, quo alteri significamus, nos in ejus gratiam quidpiam facturos, vel omissuros esse, *promissum* appellatur.

§. 132.

Quoniam homini nihil quidquam committendum, nisi quod legi naturali conforme; nec omitendum, nisi quod eidem repugnat (§. 26. *Phil. pr. un.*); alteri promitti nequit, nisi quod eidem conforme, neutiquam vero, quod eidem repugnat.

§. 133.

Quia homo obligatur ad actiones legi naturali conformes (§. 32. *Phil. pr. univ.*), si quid

quid promisit eidem consentaneum & minime adversum; promissum servare tenetur.

§. 134.

Enimvero quoniam facienda non sunt, quæ legi naturali adversantur (§. 32. *Ph. pr. un.*); si quis vel maxime promiserit, quod eidem repugnat, promissis tamen stare non tenetur.

§. 135.

Fieri potest, ut in naturæ legem injurius sis, siue promissa serves, siue minus, v. gr. ut impingas in officia erga te ipsum, si stes promissis, in officia vero erga alios, si eadem non adimpleas. Alterutrum tamen cum fieri par sit; exceptioni locus est (§. 47. *Ontol.*), quæ ex circumstantiis singularibus determinanda.

CAP. VI.

DE OFFICIIS CIRCA PACTA.

§. 136.

Pactum est promissum mutuum de factis sibi mutuo præstandis.

§. 137.

Cum nemo promittere queat, se facturum, quæ lege naturali prohibentur, vel omissurum, quæ vi ejusdem præcipiuntur (§. 132.);
(*P. II. Thom. Inst. Phil. Pr.*) F si

si utraque vel alterutra paciscentium pars promittat, quæ juri naturali adversantur, pacta servanda non sunt.

§. 138.

Quoniam vero promissis stare tenemur, quæ juri naturali minime repugnant (§. 134.); si alterutra paciscentium pars promisit eidem conformia, pacta servanda sunt.

§. 139.

Loquimur hic de obligatione naturali pacta servandi, cui etiam locus foret in statu naturali: quam enim status civilis addit, de ea suo dispiciemus loco. Quapropter cum in statu naturali etiam absque promisso quilibet teneatur præstare alteri, quæ ipsi exhibere potest officia; multo magis iis satisfacere obligabitur, si nova accesserit ratio, nempe promissum, quo quis alteri sese obstrinxit.

§. 140.

Fieri sapissime solet, ut non obligemur naturaliter huic individuo in singulari, sed indefinite vel hominibus promiscue vel in certo statu spectatis, tumque per promissum, & consequenter etiam per pactum (§. 136.), naturalis obligatio nondum sufficienter determinata, ad hoc individuum restringitur:

id

id quod notasse plurimum refert, ne obligationem ad servanda pacta cum naturali minime coherentem introducamus, neque tamen ex doctrina pactorum subnascantur dubia contra dogma generale (§. 16. *Pb. pr. un.*), quod omnes actiones liberae, qualescunque tandem sint, per eam determinari possint.

§. 141.

Nemo obligatur ad præstandum ea, quæ suam potestatem eludunt (§. 82.). Idcirco si quis talia promisit alteri; promissum non tantum in se adimpletu impossibile, verum etiam actus promittendi juri naturali repugnat.

§. 142.

Quamobrem pacta quoque invalida habentur, si alterutra pars promittit potestatem suam transcendentia, atque adeo & alterius partis promissum cessat, nec implendum est (§. 137. 141.).

§. 143.

Qui cum altero paciscitur, ille promittit se hoc vel istud facturum, posito, quod alter itidem hoc vel istud faciat (§. 131. 136.). Quoniam itaque utraque paciscentium pars alterius promissum respicit tanquam actionem (§. 9. *Ontol.*), aut si mavis, conditionem sui promissi; apparet sane, utramque consentire in promissum mutuum. Et cum

per pactum obligatio naturalis indefinita ad certa individua restringatur (§. 140.): mutuo consensu pacta perfici dubitari nequit.

§. 144.

Qui metu ad paciscendum inducitur, ille consensum simulat, revera non consentit. Quamobrem cum pactum non perficiatur nisi consensu mutuo (§. 143.), vero scilicet ac sincero, non simulato; si pars alterutra ad paciscendum metu inducitur, pactum validum non est.

§. 145.

Quodsi quis dolo ad paciscendum inducitur, ille non consentit, nisi sub ea conditione, quam dolose simulat alter. Dolo enim locus est, quando in errorem adducimur, ut de promisso alterius non ex veritate statuamus. Dum igitur conditio ab eo, qui dolose agit, minime adimpletur; nec alter, qui dolo inductus fuit, ad promissum suum implendum tenetur. Luculenter itaque constat, istius modi pactorum in statu naturali nullam esse validitatem.

§. 146.

Aliter sese res habet, si alteruter paciscentium erroris sui causa fuerit ipsemet, nec damnum ex pacto in eum redundet ab altero; tum enim nulla suadet ratio, cur pactum, altero invito, sit dissolvendum. Etenim

nim si is in pacti dissolutionem consentire nolit, inde aliquod in ipsum damnum redundare potest (§. 140. *Psycb.* & §. 96. *Jur. nat.*). Quamobrem cum nemini sit damnum dandum (§. 96.); a pacto discedere licitum non est.

§. 147.

Pactum mutuo consensu perficitur (§. 143.). Quocirca utroque paciscentium in dissolutionem pacti consentiente idem dissolvi posse tanto minus dubitari potest, quanto evidentius liquet, nullam esse obligationem naturalem, quæ paciscentes in individuo stringat ad præstanda sibi mutuo semel promissa (§. 140.).

§. 148.

Quoniam vero pactum dissolvi nequit, etiamsi alter per errorem de ipsius conditionibus staverit, ipse deceptor sui, altero nimirum invito (§. 146.): multo minus dissolvi potest invito altero, si ob rationes alias alterum promissi pœniteat.

§. 149.

Neuter paciscentium consentit, nisi sub conditione adimplendi promissi alterius (§. 143.). Quamobrem si adsint rationes, cur verearis, ne alter promissum adimpleat, ubi tu satisfeceris promisso; ab altero exigere licet, ut pacto ex sua parte ante satisfaciat, quam præ-

sterur a te præstandum, vel ubi id fieri nequeat, alterius est efficere, ut tibi cautum sit (§. 99.).

§. 150.

Fac, ut alterutri paciscentium parti damnum inferatur, siue pactum fervetur, siue minus: id omnino fieri par est, ut damnum transferatur in partem noxiam. Quamobrem nunc servandum, nunc rescindendum, prout hac vel illa ratione damnum a parte innocua avertitur,

§. 151.

Quoniam vero quilibet quoque tenetur damnum a se avertere, quod evitare potest (§. 99.); antequam quis pactum ineat, singula probe ponderet, cum quæ a se ipso, tum quæ ab altero promittuntur.

§. 152.

Quamprimum utraque pars promissum adimplevit, pacto satisfactum est, nec altera amplius alteri obligatur (§. 139.). Quodsi una pars consentiat, ut altera promissum suum adimplere intermittat; perinde est, ac si idem fuisset adimpletum, adeoque & in hoc casu obligatio expirat,

§. 153.

Si pactum fuerit interpretandum, verba accipienda sunt eo in significato, quem ipsis usus loquendi tribuit. Cum enim nulla ad-
sit

fit ratio, cur quis a communi loquendi usu recessisse dicatur, imo cum ab eo recedere non liceat, siquidem alter mentem tuam assequi debet; in communi significatu utique verba accipienda sunt.

§. 154.

Quodsi verba sensum ambiguum fundant; ea ita sumenda sunt, ne verbis clavis contradicant, cum nemo sanus sibi contradicere præsumatur.

§. 155.

Et quia unusquisque fini suo conformiter agere præsumitur (§. 103. *Phil. pr. un.*); ideo interpretatio locum habet, quæ eidem respondet.

CAP. VII.

DE OFFICIIS CIRCA DOMINIA RERVM.

§. 156.

Cum non omnes homines sincero amore sese mutuo prosequantur, nec officiis cum erga se ipsos, tum erga alios vacent, prout fieri convenit; ideo fieri haud quamquam potest, ut omnia, ad vitæ necessitatem & commoditatem necessaria, sint communia. In hoc enim rerum statu stante communione

bonorum salutem omnium in universam hominum prospici nequit.

§. 157.

Quoniam homo rerum externarum subsidio habet opus, officiis suis satisfactorius (§. 66. 64.), communio autem bonorum subsistere nequit (§. 156.); ideo *proprietas* sive *dominium* introducendum erat, quod est jus sive potestas utendi aliqua re, ut alii eandem perinde convertere in suum usum non liceat.

§. 158.

Quia eum in finem introducuntur dominia, ne cuiquam desint, se atque alios officio suo convenienter perficiendi instrumenta (§. 157.); res usus inexhausti, velut aer, aqua &c. nemini sunt propriæ, sed in communione relinquuntur. Cessante nimirum ratione, cur dominia sint introducenda, communio autem bonorum subsistere nequeat (§. 156.), cessant quoque dominia, & communio bonorum subsistit.

§. 159.

Cum soli domino sit facultas re sua utendi, nulli autem alii idem jus competat (§. 157.); nemo quoque invito ac inscio domino rem alterius auferre vel quomodocunque in rem suam convertere valet.

§. 160.

§. 160.

Eodem modo perspicuum est, nemini licere alterum impedire, quo minus re sua utatur ad arbitrium: etsi re sua abutentem amice mone-
re queat, neabutatur (§. 79.).

§. 161.

Eum in finem introducuntur dominia, ne desint necessaria sese atque alios perficiendi instrumenta (§. 157.). Quamobrem cum omnis homo & se & alios perficere teneatur, quantum in ipso est (§. 67. *Pb.pr.un.*); plura occupare nemini licet, quando dominia rerum primum introducuntur, quam quæ huic scopo sufficiunt. Singulorum sane in statu naturali idem jus est, nec quisquam sibi prospicere debet, cum neglectu alterius (§. 79.).

§. 162.

Quamvis itaque unicuique incumbit rem suam familiarem pro virili augere; nemini tamen id licet cum detrimento alterius (§. 64. 161.).

§. 163.

Quæ igitur adhuc nullius sunt, ea occupare potest, qui iisdem ad suam alioquinque perfectionem habet opus: quibus enim ipse minime eget, ea egentibus relinquenda sunt.

§. 164.

Ab altero omissa, quorumque dominus ignoratur, pro rebus nullius habentur, adeo-

que cedunt occupanti, observata tamen conditione modo allata (§. 163.).

§. 165.

Quæ ex re proveniunt emolumenta, eadem ad dominum pertinere ipsa dominii notio loquitur (§. 157.): nec ulla sane ratio est, cur ad alium pertinere dicantur.

§. 166.

Finis dominiorum cum sit, ne desint nobis instrumenta, nosmet ipsos atque alios perficiendi; eum quoque nec alium in finem rebus nostris uti licet. Secus qui facit, iisdem abutitur.

§. 167.

Rectus adeo bonorum nostrorum usus nostris erga nos & alios officiis convenit: qui vero iisdem repugnat, abusus censetur.

§. 168.

Et si nemo alterum impedire possit, nec debeat, quo minus re sua ad arbitrium utatur (§. 160.); arbitrium tamen domini absolutum non est, sed per officia erga nosmet ipsos atque alios limitatum (§. 166.).

§. 169.

Quando abusus dominii cum detrimento alterius fuerit conjunctus, alter eundem ferre minime tenetur, cum damnum avertere liceat (§. 99.). Licet autem hic uti mediis ad impediendum abusum sufficientibus (§. 106.).

§. 170.

§. 170.

Quoniam fieri nequit, ut ea fiat bonorum divisio, ut quilibet abunde sibi prospicere valeat; quin potius unusquisque rebus alterius subinde habeat opus (id quod vel sola experientia clarissime eloquitur): dominia rerum ex uno in alterum transferri possunt, imo debent (§. 80.).

§. 171.

Enimvero cum unus ab altero gratis exigere nequeat, quod sibimetipso comparare valet (§. 81.); gratis quoque in eum alicujus rei dominium, qua ipse habet opus, transferre non obligatur, quin alter vicissim suæ rei cujusdam dominium in ipsum transferat, hoc est, *res permutandæ* sunt.

§. 172.

Ut permutatio fieri queat, rebus statuendum est aliquod pretium, hoc est, fingenda aliqua quantitas, juxta quam earum ad se invicem ratio determinanda, v. gr. ut avenæ dupla quantitas censeatur æqualis simplici secalis quantitati.

§. 173.

Ita igitur definienda sunt pretia rerum, ut unusquisque pro virili labore fungens, lucrari possit, quæ ad vitæ necessitatem, decus atque jucunditatem requiruntur (§. 60.);

minimum, ut laboranti haud desint, quæ vitæ necessitas postulat (§. 61.).

§. 174.

Idem quoque, quod rebus statuitur pretium, operis aliorum statuendum. Quoniam enim nemo ab altero exigere potest, quod in sua habet potestate (§. 81.); qui rebus alterius indiget, operas suas collocare tenetur illi, qui iisdem habet opus.

§. 175.

Pretium operarum *merces* appellatur. Quamobrem cum nemo alteri operas suas gratis præstare obligetur (§. 174.); merces promerita exemplo solvenda, præsertim ubi alter eadem indiget ad vitæ necessitatem tolerandam.

§. 176.

Cum nemo sit lædendus (§. 93.) neminique damnum inferendum (§. 96.); in permutatione pretii rerum permutandarum servanda æqualitas.

§. 177.

Ubi paucorum hominum est societas, qui multo ad vitæ necessitatem & commoditatem apparatu haud quaquam indigent: permutatio ad transferendum dominium sufficit. Neque enim solum pretia rerum facile inter se æquantur, verum etiam dolus, qui cum permutatione facillime conjungitur,

cavetur, propterea, quod unus statim alterius opera indiget: ac præterea rem suam permutaturus haud difficulter invenit alium, qui eadem habet opus, & rebus, quæ ipsi sunt necessariae, abundat.

§. 178.

Liquet inde, quod in casu opposito permutatio ad translationem dominii minime sufficiat.

§. 179.

Inventa igitur est *pecunia*, communis mensura pretiorum, quod statuitur rebus ad vitæ necessitatem, commoditatem & jucunditatem necessariis.

§. 180.

Pecunia ergo constanda est ex materia durabili, cujus non multus in vita usus, ut & servari, & exiguae quantitati ingens pretium statui queat. Atque ex his rationibus in eum usum adhibentur metalla, argentum præsertim atque aurum.

§. 181.

Ne moneta adulterari queat ergo damno alterutrius partis contrahentium; certum eidem pondus assignatur, certumque signum imprimatur.

§. 182.

Pretia rerum ita constituenda sunt, ut utriusque acquirere detur, quæ ad vitæ necessi-

tatem, decus atque jucunditatem requiruntur (§. 173.); haud obscurum esse potest, quis pecuniæ valor conveniat.

CAP. VIII.

DE CONTRACTIBUS.

§. 183.

Contractus sunt pacta, quæ circa dominii translationem versantur.

§. 184.

Contractus igitur ab utraque contrahentium parte sunt explendi, nisi cum alterius damno conjungantur (§. 99.).

§. 185.

Iidem mutuo consensu perficiuntur (§. 147.), minime autem tantum unius (§. 148.).

§. 186.

Quodsi alter vel metu vel dolo ad contrahendum fuerit inductus; contractus validus non est (§. 144. 145.).

§. 187.

Inter contractus maxime familiaris est *emptio venditio*, qua quis pro determinata mutuo consensu pecuniæ quantitate transfert rei suæ dominium in alterum.

§. 188.

§. 188.

Quoniam itaque Titius dominium rei suæ transfert in Mævium sub conditione pecuniæ determinatæ solvendæ; rem suam Mævio tradere non tenetur, quamdiu pecunia nondum fuit numerata.

§. 189.

Si nondum numerata pecunia rem suam Mævio tradit, pecuniam debitam eidem mutuo dedisse censetur.

§. 190.

Quodsi damnum ex mora emergat venditori, si emtor in solvendo eandem nectat; rem suam alteri vendere potest in solvendo promtiori (§. 184.).

§. 191.

Quamprimum vero emtor pecuniam solvit; venditor eidem rem emtam tradere obligatur, cum pecunia numerata res desinat esse venditoris.

§. 192.

Quodsi conventum fuerit, ut emtor certo temporis spatio elapso pretium solvat; venditor ante terminum elapsum idem exigere nequit, nisi consenserit emtor ipsis commodis velificaturus; elapso autem termino, solvendi moras ne nectat emtor (§. 184.).

§. 193.

§. 193.

Quoniam contractus mutuo consensu perficiuntur (§. 185.), atque ab utraque parte contractuentium adimplendi sunt, nisi cum alterutrius damno conjungantur (§. 140.); si quæ adjectæ emtioni venditioni fuerint conditiones, cum damno alterutrius partis minime conjunctæ, quin singulis satisfieri debeat, dubitandum non est.

§. 194.

Qui in emtione ac venditione damnum dedit alteri, contractu licet adimpleto, damnum restituere tenetur (§. 97.).

§. 195.

Fac, rem venditam damnum pati casu, antequam tradatur, contractu utriusque consensu firmato; nemo ignorat, damnum ferre eum, qui traditioni moras dedit. Cur enim alter idem ferat, ratio nulla est. Perinde nimirum est ac si res emta tradita fuisset, sed in securitatem pretii venditori data.

§. 196.

Uterque vero damnum ferre debet, si uterque fuerit in mora.

§. 197.

Homo alteri debet, quod sibi debet (§. 80.); innocuum itaque rei suæ usum alteri gratis concedere tenetur, quando alter, non autem ipse eadem habuerit opus (§. 82.).

§. 198.

§. 198.

Quoniam tamen alteri non conceditur nisi innocuus usus; nullum jus aliud in rem alterius ipsi competit, quod ab hoc usu sit diversum.

§. 199.

Minime ergo licet rei alterius usum, quem mihi concessit dominus, denno alteri concedere, nisi ipso consentiente sive expresse, cum consensum ejus requisiverimus, sive tacite, cum eundem ex ratione sufficiente præsumamus.

§. 200.

Similiter cum non nisi innocuus usus nobis fuerit concessus (§. 197.); rem quoque alterius sollicita cura servari convenit, ne nostra culpa aliquid patiatur damni.

§. 201.

Quodsi acciderit damnum; illud alteri re-sarciendum (§. 97.).

§. 202.

Damnum si fuerit fortuitum, quod evitare in nostra non erat potestate, eadem tenenda sunt, quæ in genere de damni restitutione dicta sunt superius (§. 98.).

§. 203.

Ex eadem ratione, quod ex domini consensu mihi non competat, nisi usus rei innocuus
(P. II. *Thüm. Inst. Phil. Pr.*) G cuus

cus (§. 200.), liquet, eandem in individuo restituendam esse.

§. 204.

Quodsi vero damnum datum fuerit, ut res in individuo restitui nequeat : istud tamen refarcire domino cum teneatur is, cujus culpa accidit (§. 201.); restitutio vel in specie vel in pretio facienda est, prouti visum fuerit domino.

§. 205.

Quodsi res usu consumitur, veluti cum frumentum alteri mutuo datur : restitui individuum nequit, adeoque species restituenda, ejusdem tamen quantitatis & qualitatis.

§. 206.

Ne ab æquitate naturali in hoc contractu, qui *contractus mutui* appellari solet, unquam recedatur, casus cum cura sunt distinguendi : casus enim a circumstantiis pendent, circumstantiæ autem diversæ variant jus.

§. 207.

Ponatur itaque, alterum a me mutuum petere eo tempore, quo rem meam vendere constitui, pecunia in nullum usum convertenda, sed tantummodo asservanda : rem meam alter accipere tenetur ea lege, ut

non

non rei, sed pretii æqualitas in restituendo observetur, majore quantitate restituenda statuto tempore, si pretium diminutum interea fuerit, minore vero, si idem fuerit adauctum. Æquitas enim est (§. 82.), ut contractu adimpleto, mutuum dantis status idem sit, ac si nihil alteri dedisset mutuo.

§. 208.

Quod si pecunia mutuo datur, evidens est, eandem in individuo restitui non posse. Iisdem itaque, quæ ad §. præcedentem modo dicta sunt, patet, sufficere, ut restituatur pecunia tanti valoris, quanti fuit credita, nisi intersit creditoris, ut eadem monetæ species restituatur.

§. 209.

Quoniam ex pecunia in futuros usus seposita nullum percipimus fructum; ubi certi fuerimus, alterum, qui eadem ad usus necessarios indiget, unde non fit locupletior, statuto tempore eandem nobis redditurum, gratis eandem ipsi mutuo dare jubemur (§. 82.). Idem elucet ex ratione generali ad §. 207. allata.

§. 210.

Enimvero si alter pecuniam nostram in

lucrum futum convertit, quod & a nobis fieri poterat, emtis v. gr. bonis immobilibus; æquum est, ut in lucri communionem nos admittat, atque adeo pecuniam cum emolumento restituat, quod *usura* nomen tenet, lucro inde percepto proportionali (§. 81.).

§. 211.

Porro hinc clarissime colligitur (§. 81.), usuras æquitati minime repugnare, a debitore, salvis vitæ, quas inde tolerat, necessitatibus exactas.

§. 212.

Debitore autem vix eum ex pecunia sibi credita fructum percipiente, qui vitæ necessitatibus tolerandis sufficit, hocque stante rerum nostrarum statu, ut usuras negligere liceat (§. 60. & seqq.); usuras ab illo exigere utique foret iniustum (§. 81.).

§. 213.

Usurarum ratio si nobis habenda est (§. 60. & seqq.), quas tamen debitor salvis vitæ necessitatibus solvere nescit; eidem pecuniam credere minime obligamur (§. 81.), quin potius ille tenetur credere, cui usurarum neglectus nihil obest.

§. 214.

Usuræ per longum temporis tractum mul-

tiplicatæ solutionem debitori reddunt onerosam, imo sæpissime eundem in extremum paupertatis statum conjiciunt. Ideo debitoris est, statuto tempore solvere usuras; creditoris vero monere, imo adigere debitorem, ut solvat, si moram damnosam trahat.

§. 215.

Usuræ immodicæ dicuntur *foenus*. Censentur autem immodicæ, quæ regulis hætenus demonstratis (§. 210.) repugnant: unde statim inferre nemo non potest, foenus esse tanto iniquius, quanto magis debitori damnosum.

§. 216.

Si quis rei suæ usum, vel etiam operam suam (§. 174.) pro certa alteri concedit mercede (qui contractus *locationis conductionis* fert nomen); dominium illius simul translatum non est, adeoque de ea disponere nihil licet, nisi ex voluntate domini, non nisi usum concedentis sive limitatum, sive nullis conditionibus adstrictum, nec eandem, ipso inscio ac invito, alteri locare, multo minus vendere aut in pignus tradere convenit.

§. 217.

Ex eadem ratione sequitur, rem locatam deteriorandam non esse, nisi quatenus ne-

cessarius ejus requirit usus; huic autem pretium locationis simul proportionari debeat.

§. 218.

Pretium cum detur propter usum definitum (§. 216.); dominus curam gerat, ut res locata eidem sit idonea.

§. 219.

Ob rationem eandem locantis domini est, ut ferat impensas ad hoc requisitas, quo res locata usui idonea perennet.

§. 220.

Quodsi conductor dederit damnum ab usu rei locatæ alienum; ad ejus restitutionem tenetur (§. 217. 97.).

§. 221.

Damno autem existente casuali, nulla adest ratio, cur idem conductori sit ferendum: ergo dominus illud patitur.

§. 222.

Cum conductori non sit permissus nisi rei locatæ usus (§. 216.), isque pro certo pretio (§. cit.), neque is eandem deteriorare debeat, nisi quatenus usus necessarius id requirit (§. 217.); finito contractu, non modo locationis pretium promte solvendum, verum etiam res restituenda domino, qualem ab eo-

eodem accepimus & quatenus necessario usu de-
terior reddita fuit.

§. 223.

Opes acquisitæ conservandæ sunt (§. 70.).
Pecunias itaque alteri credituri de securitate
soliciti simus necesse est, quippe qua cavetur,
ne credantur debitori, qui soluturus solvendo
non est.

§. 224.

In nostram adeo securitatem debitor, cujus
nobis suspecta, saltem non certa fides est, vel
rem quandam suam mobilem, quæ *pignus* ap-
pellatur, tradere, vel immobilem, quæ *hypothecæ*
nomine venit, assignare jubetur.

§. 225.

Pignoris vel hypothecæ nomine quod tradi-
tur vel assignatur; ejus pretium non modo
summam creditam cum usuris adæquare, ve-
rum etiam superare debet, ne, si statuto tempo-
re debitor solutione deficiat, pignus statim sit
alienandum.

§. 226.

Pignus in solam datur securitatem (§. 124.),
adeoque nullus nobis integer usus, nisi consen-
siente domino, quo in casu una commodati spe-
ciem præ se fert (§. 197.).

§. 227.

Qui usu deterioravit pignus, damnum resarciat (§. 97.).

§. 228.

Pignus cum in securitatem detur (§. 226.), non modo nostri, sed etiam domini gratia cum cura servandum, ne nostra culpa patiatur damnum (§. 227.).

§. 229.

Casu fortuito, quem evitare nostræ potestatis non fuit, si pereat pignus, vel saltem quomodocunque deterioretur; idem domino suo perit, vel deterioratur. Neque enim ulla adest ratio, cur pignoris custodia sit creditori onerosa.

§. 230.

Quodsi statuto tempore pecunia nostra ipsimet habeamus opus, nec debitor sit solvendo, vel si pignoris pretium non ferat moram in solvendo ob usurarum incrementum; debitor pignus vendere tenetur.

§. 231.

Vendere si renuat, damnum nobis ex mora imminens averfuri, ipsimet ut idem vendamus haud iniquum (§. 100.): quod est superfluum, hoc domino restituendum.

§. 232.

§. 232.

Ne autem alter de injuria sibi facta possit conqueri; in statu naturali arbitrorum consensu venditio fiat,

§. 233.

Ex mora solutionis si securitas minime periclitetur, nec ipsimet pecunia nostra habeamus opus; æquum omnino est, ut venditionem pignoris haud urgeamus, præsertim ubi debitoris cum damno fuerit conjuncta (§. 82. 96.).

§. 234.

Quæ de pignore dicta sunt, ea, quantum res patitur, mutatis mutandis, haud difficulter ad hypothecam applicantur.

§. 235.

Pignore vel hypotheca deficiente, securitati servit *fideiussor*, qui in mutuum consentiens, ejus solutionem promittit, si debitor statuto tempore non solvat, vel solvendo non sit.

§. 236.

Quoniam absque securitate pecunias alteri credere non tenemur (§. 223.); ubi alia ratione, quam per fidejussorem eandem obtinere non datur, fidejussio utique licita est.

§. 237.

Ex eadem ratione colligitur, neminem obligari pro altero fidejubere, nisi eum solvendo esse fuerit certus.

§. 238.

Cum fidejussori solutio non incumbat, nisi ubi principalis debitor solvendo non sit (§. 236.); hic ante urgendus, quam solutio ab illo postuletur.

§. 239.

Si vero creditor in fidejussionem non consensit, nisi hac expressa conditione, ut fidejussor statuto tempore solvat debitum, ubi debitor principalis vel solvere nolit vel non possit, beneficio excussionis renuncians; solvere statim tenetur. Perinde enim est, ac si pecunias suas fidejussori credidisset creditor, hic vero eas debitori principali.

§. 240.

Ubi fidejussor damnum incurrit, id sibi imputet: deliquit enim, dum securitatis suæ nullam improvigis habuit rationem (§. 237.).

§. 241.

Plures uno si fuerint fidejussores, ex fidejussionis indole & conditionibus res decidenda. Qui pro parte fidejussit, pro eadem parte tenetur; qui pro integra massa,
te-

tenetur pro integra. Nec negligendæ sunt conditiones aliæ, quæ contractui adjectæ fuerant (§. 185.).

§. 242.

Qui gratis in alterum confert rei suæ dominium, eandem eidem *donat* : quodsi conferat in egentem ad vitæ necessitatem serviens, quod confertur, *eleemosynæ* fert nomen.

§. 243.

Cum alterius necessitati pro virili succurrere, cui ipse prospicere nequit, lex jubeat (§. 82.); eleemosynas egenti offerat, qui eas elargiri valet.

§. 244.

Egentibus adeo quoniam debentur eleemosynæ (§. 243.); eas petere prohibetur, qui ipsemet sibi de victu & amictu aliisque vitæ necessitatibus prospicere pollet.

§. 245.

Eleemosynas qui petit, *mendicus* vocatur. Mendicare adeo non licet nisi egentibus, hoc est, iis, qui de vitæ necessitatibus sibi metipso prospicere nequeunt.

§. 246.

Et si autem quis habeat, quæ ad commoditatem & decorem requiruntur, cui perinde, si fieri possit, habenda ratio (§. 48. & seq.),
ubi

ubi ob merita meliori fortuna fuerit dignus, ut opibus abundantes donis eundem ornent, laudem inde reportaturi, æquissimum est (§. 82.).

§. 247.

Similiter ex ratione eadem dona meretur, qui iisdem utitur ad felicitatem generis humani promovendam, atque iis nobis rectius uti valet.

§. 248.

Ejusdem commatis sunt, quæ dantur in grati animi tesseram (§. 101.).

§. 249.

In his adeo casibus, quin dona licite accipiantur, dubitari nequit.

§. 250.

Nec iniquum est, donis favorem nobis conciliare alterius, qui felicitati nostræ promovendæ par sit. Finis enim liciti (§. 103. *Pb. pr. univ.*) medium, quod officiis nullis repugnat, licitum esse nemo negaverit.

§. 251.

Cum operæ respondeant pecuniis atque rebus ceteris, quæ sunt in dominio (§. 174.); gratuita operarum præstatio donis respondet. Atque ideo de eadem valent, quæ de donis sunt dicta,

§. 252.

§. 252.

Quoniam alterius commodis pro virili infer-
vire jubemur, ubi sibi metipſi non ſufficit (§.
82.); nec curam in custodienda re aliena de-
negare possumus.

§. 253.

Res in custodiam nobis tradita *depositum* sa-
lutatur.

§. 254.

Quoniam depositum non nisi custodiæ gratia
traditur (§. 253.); nullus nobis ejus convenit usus,
nisi consentiente domino, quo in casu commo-
dati speciem induit (§. 197.).

§. 255.

Multo minus idem inscio domino alienare
licet.

§. 256.

Si culpa nostra damnum patiatur deposi-
tum, id a nobis resarciendum esse patet
(§. 97.).

§. 257.

Quodsi damnum fuerit fortuitum, id do-
mino ferendum esse per se evidens est.

§. 258.

Interea, quoniam securitatis gratia custo-
diæ nostræ committitur, omnis quoque in eo-
dem custodiendo præstanda diligentia (§. 133.).

§. 259.

§. 259.

Si depositum clauso receptaculo fuerit commissum ; nostrum non est idem inde eximere, cum nihil competat nisi custodia (§. 252. 185.).

§. 260.

Ubi custodia alteri fuerit onerosa vel sumptuosa , eandem gratis præstare non tenetur (§. 81.).

§. 261.

Perinde cum sit , sive per nos , sive per alium contractui satisfiat ; ubi eidem explendo non fuerimus pares , quin alterum in locum nostrum substituere possimus dubitari nequit, modo hac ex substitutione alteri contrahenti non enascatur damnum (§. 96.).



PARS II.

DE JURE NATVRALI
POLITICO.

CAPUT I.

DE SOCIETATE IN GENERE.

§. 262.

Homo alterius felicitatem perinde ac suam promovere obligatur (§. 79. 80.). Vitam adeo solitariam in eremo agere haud quaquam licet,

§. 263.

Et quoniam nemo sibi solus sufficit, sed unusquisque alterius ope indiget, si quidem vitam homine dignam ducere velit, officiis satisfactorius, quæ parte prima demonstrata fuere: ut plures conjunctis viribus promovere inter se bonum commune consentiant opus est; quo facto, unus alteri ex pacto obligatur (§. 136. 138.).

§. 264.

Pactum commune bonum conjunctis viribus promovendi gratia initum dicitur *societas*.

§. 265.

§. 265.

Salus itaque societatis consistit in non impedita promotione boni communis conjunctis viribus obtinendi (§. 68. *Pbil. pract. univ.*).

§. 266.

Salus societatis est finis ejusdem (§. 97. *Ontol.*).

§. 267.

Pactum cum sit societas (§. 264.), ab ea discedere licet ei, qui vel metu, vel dolo ad eam ineundam fuit inductus.

§. 268.

Cum pacta servanda non sint, si vel utraque, vel alterutra pars promisit, quæ juri naturali repugnant (§. 137.), a societate quoque discedere licet, imo tenetur socius, cujus finis legi naturali adversus. Talis nimirum societas ipso jure nulla est.

§. 269.

Fine autem societatis juri naturali existente congruo, ipsa quoque societas eidem conformis existit (§. 64. & seqq.).

① §. 270.

Cum nemini sit damnum inferendum (§. 96.); nec a societate cum ceterorum damno discedere licet.

§. 271.

Quodsi id factum fuerit, damnum datum resarciendum (§. 97.).

§. 272.

§. 272.

Nullo autem damno exinde emergente sociis, ubi a societate recesseris, nulla sane ratio obstat, quo minus ab eadem recedere liceat.

§. 273.

Pater, id eo magis fieri posse, si quidem societati nullum inde damnum emergit, ubi ab eadem discesseris; emergat autem tibi, si in eadem permanseris (§. 270.).

§. 274.

Fine societatis obtento, eandem finire nemo non perspicit. Si demonstrationem desideras: cogita, societatem esse pactum (§. 264.), pactum vero iterum dissolvi, si ab utraque paciscentium parte adimpletum fuerit, quod erat promissum.

§. 275.

Sociorum est, conjunctis viribus bonum commune societatis promovere (§. 263.). Ferendum igitur non est, si quis sociorum idem vel negligat, vel eidem contraria perpetret.

§. 276.

Quodsi ex negligentia vel malitia socii datum fuerit damnum; id societati resarcire tenetur (§. 96.).

(P. II. *Thüm, Inst. Phil. Pr.*) H §. 277.

§. 277.

Immo cum damnum avertere debeamus (§. 99.), adhibitis mediis, quibus solis averti potest (§. 100.); sociorum quoque est, omnem movere lapidem, ut socius degener vel ad frugem, vel si quidem id fieri nequeat, ad eum statum redigatur, quo saluti sociorum officere amplius nescit.

§. 278.

Cum pacta sint servanda (§. 138.), socii autem in bonum commune conjunctis viribus promovendum consenserint (§. 264.); suprema societatis lex est: *Fac ea, quæ salutem societatis promonent, omitte, quæ eam impediunt* (§. 265.).

§. 279.

Quamobrem si contingat, salutem unitis socii cum salute totius societatis collidi; salus societatis saluti sociorum singulorum præferenda est (§. 47. *Ontol.*).

§. 280.

Integra societas unam personam repræsentat (§. 264.). Cum nemo a me exigere possit, ut ipsius necessitatibus impendam, quod propriæ urgent (§. 82.); nemo sociorum cum neglectu socii extraneo succurrere tenetur. Socius ergo extraneo præferendus est.

§. 281.

§. 281.

Ex eadem ratione, quod societates integræ instar singularum personarum spectari queant, patescit, mutua societatum integrarum erga se invicem officia eadem esse cum officiis hominis erga alios.

§. 282

Dividuntur societates in simplices atque compositas. *Simplices* sunt, quæ ex personis singulis: *compositæ* autem, quæ ex aliis societatibus coalescunt.

CAP. II.

DE SOCIETATE NÜPTIALI.

§. 283.

S*ocietas nuptialis* est societas simplex inter marem & foeminam sobolis procreandæ & educandæ gratia inita. *Mas* maritus, *foemina* uxor, ambo *conjuges* dicuntur.

§. 284.

Actiones liberæ per eadem rationes determinandæ, per quas determinantur naturales (§. 16. *Ph. pr. un.*). Coitus, quod vel animalia loquuntur, per procreationem sobolis

tanquam rationem finalem (§. 16. *Theol. nat.*) determinatur : ergo idem quoque per eandem rationem ab homine libere determinari debet.

§. 285.

Qui ergo fit sobolis procreandæ gratia, juri naturali conveniens (§. 16. 24.).

§. 286.

Quamobrem qui alio fine celebratur, eidem nequaquam convenit.

§. 287.

Unde damnantur coitus libidinosi quicunque, & qui tutius ignorantur, quam explicantur, per regulam generalem hic propositam dignoscendi, si quando eorundem detur occasio.

§. 288.

Liberi procreati, cum semetipsos educare nequeant, ab aliis eorum educatio suscipienda venit (§. 82.) Nulla autem est ratio, cur aliis potius, quam parentibus educandi competat cura. Abunde itaque patet, eorum esse educare prolem, qui eandem procrearunt.

§. 289.

Educatio sobolis cum a procreatione se-
jun-

jungi nequeat; societas nuptialis utriusque gratia ineunda est (§. 283.).

§. 290.

Consequenter ex matrimonio, minime autem ex promiscuo concubitu educandi sunt liberi.

§. 291.

Sobolis educandæ & procreandæ gratia cum matrimonio contrahatur (§. 289.); ad matrimonium sunt inhabiles, cum qui liberos procreare, tum qui eosdem educare nequeunt.

§. 292.

Qui extra matrimonium procreat prolem, ad eam educandam tenetur (§. 288.). Quamobrem si foemina, cum qua illicitum concubitus celebravit, sumtus ad prolem educandam suppeditare nequeat; eandem ducat in uxorem æquum est.

§. 293.

Maritus generandi facultate pollens cum uni foeminae sufficiat; foemina quoque non plures ducere debet maritos (§. 280.).

§. 294.

Similiter cum ex foemina foecunda liberi plures procreantur, quorum educatio pa-

rentibus incumbit (§. 283.); nec plures uxores ducere convenit.

§. 295.

Quodsi enim sterilitas doceri possit, inhabilitas ad matrimonium, idem dissolvit (§. 291.). Difficilis autem ista probatio, nedum sæpe impossibilis.

§. 296.

Matrimonium tanquam societas non dissolvitur nisi sine obtento (§. 274.), adeoque liberis non modo procreatis, verum etiam educatis (§. 279.). Quo circa cum plurimi elabantur anni, antequam liberi ad eum perveniant rei familiaris statum, ut parentum ope non indigeant, ipsique potius, quam alii extranei (§. 280.) hæredes bonorum post mortem parentum designentur; conjugium perpetuum prodest, non solvendum nisi alterius conjugis morte.

§. 297.

Qui corporis sui copiam facit alteri non conjugii, hoc est, adulterium committit, & pacto contraria agit (§. 281.). Cum vero nemo paciscatur cum altero nisi sub conditione promissi adimplendi reciproci (§. 136.); pars innocens ad implendum promissum suum minime tenetur. Atque ea est ratio, cur adulterium solvat matrimonium.

§. 298.

§. 298.

Uxorem adulteram non repudians, de novo matrimonium contraxisse dicendus.

§. 299.

Mutuo consensu perficiuntur pacta (§. 143.). Quamobrem cum matrimonium sit pactum (§. 283. 264.); idem quoque mutuo mariti & uxoris consensu perficitur.

§. 300.

Declaratio mutui hujus consensus *sponsaliorum* nomine venit.

§. 301.

Consequenter cum pactum altera parte invita dissolvi nequeat (§. 148.), celebratis sponsalibus matrimonium est consummandum.

§. 302.

Eadem ratio loquitur, id fieri minime debere, parte alterutra vel dolo vel metu vel aliis conditionibus illicitis & non adimplendis ad consensum allecta (§. 143. 144. 145.).

§. 303.

Unusquisque socius commune societatis bonum promoveat pro virili (§. 278.). Ergo & conjuges oportet omnem dare operam (§. 283.), ut commune suum & liberorum edu-

candorum bonum promoveant: quæ mutua opera *mutuum adiutorium* dicitur, recte inter fines secundarios (§. 101. *Ont.*) referenda.

§. 304.

Utriusque igitur conjugis est, augere pro virili rem familiarem, qua ad vitæ communes necessitates & iucunditates & ad prolis progentæ educationem habent opus; servatis nempe officiis de parandis & administrandis opibus (§. 60. & sqq.) præscriptis.

§. 305.

Cum educatio non absolvatur nisi liberis ad eum statum perductis, quo sibi metipsis prospicere valent: ut parentes divites filiabus dotem ad sublevanda matrimonii onera constituent, opus est.

§. 306.

Marito itaque cum non conveniat nisi ususfructus: substantia dotis manet uxori propria, a morte illius ex ejus bonis repetenda, nisi separata permanferit.

o.

§. 307.

Consequenter uxor, quoniam semper dominium habuit in res suas, nullo habito respectu aliorum creditorum, quod suum est, repetit, atque adeo creditoribus præfertur.

§. 308.

§. 308.

Aliter vero se res habet, si in debitum mariti consenserit, tum enim ex fidejussione tenetur (§. 235.).

§. 309.

Conjunctis viribus salutem communem promoveant maritus atque uxor (§. 304.). In eius adeo consilium descendendum est, quo isti optime consulitur.

§. 310.

Enimvero ne litibus materia sit continuis in definiendo cujus consilium præstet; mariti esse debet imperium, præcepturi, quid fieri consultum sit, uxoris vero parere, etsi maritum errantem monere queat (§. 209.), per modum consilii non imperii.

§. 311.

Consilium itaque uxoris cum auscultare debeat maritus (§. 310.); verbis lenibus atque blandis uxori imperet; quod optimum factu arbitratur.

§. 312.

Quodsi tamen nihil profecerit, morosa mediis convenientibus coercenda (§. 277. 283.).

§. 313.

Altero conjugum mortuo, mutui amoris

officium est (§. 79.) per societatem nuptialem restricti, ut superstiti eam bonorum suorum partem relinquat, quæ ad vitæ suæ rationem continuandam inservit (§. 49. & sqq.).

CAP. III.

DE SOCIETATE PATERNA.

§. 314.

Societas paterna est societas simplex inter parentes atque liberos horum educandorum gratia subsistens.

§. 315.

Parentes liberos educaturi ea ipsis præstare jubentur, in quibus sibi metipsis non sufficiunt, officio suo satisfacturi (§. 288.). Cum liberi de victu & amictu sibi metipsis prospicere nesciant, nec actiones ad legis naturalis normam attemperare valeant; parentum est, non modo victum & amictum suppeditare liberis, verum etiam illorum dirigere actiones.

§. 316.

Porro ipsorum est, præcipere liberis, quid ab iisdem fieri, quid omitti debeat: quod ne irritum stet successu, liberis obediendum est parentibus.

§. 317.

Quoniam tamen parentes præcipere nequeunt, nisi legi naturali conformia (§. 315.): secus præcipientibus obediendum non est.

§. 318.

Infantes cum lacte nutriendi, quod naturæ beneficio matris mammæ præparant: quod mater ipsamet infantem lactare debeat, nisi quidam oblitterit casus, satis perspicitur.

§. 319.

Parentum est id agere, ut liberorum actiones legi naturali convenienter dirigantur. Quamobrem ipsorum cura adducendi sunt, ut officiis & circa mentem, & circa corpus, & circa statum externum, tum etiam erga Deum & alios satisfaciant, & habitum iisdem satisfaciendi acquirant.

§. 320.

Ut olim sibimetipsis de vitæ necessitatibus aliisque subsidiis prospicere possint; certo vitæ generi destinandi & ad idem sollicita cura præparandi sunt.

§. 321.

Jus illud actiones liberorum pro suo arbitratu dirigendi dicitur *patria potestas*: & liberi dicuntur *minores*, quamdiu patriæ po-

potestati subsunt; *maiores* autem, quam primum ex eadem evaserunt.

§. 322.

Potestati ergo patriæ subsunt, quamdiu ipsi sibi de vitæ necessitatibus prospicere actionesque legi naturali convenientes dirigere nesciunt (§. 315. 321.). Cessat autem potestas illa in casu opposito.

§. 323.

Cum minores sine parentum consensu nil agere possint (§. 321.): nullus quoque ipsorum consensu contractus constituitur validus, nisi parentum accesserit consensus; quem vero præsumere licet, nisi dissensus ratio detur justa.

§. 324.

Parentes vi educationis multa in liberos beneficia conferunt. Sed erga benefactores grati esse debemus (§. 101.): ergo & liberi grato erga parentes sint animo.

§. 325.

Qui gratus est erga parentes, eosdem amat (§. 124. *Psych.*). Quoniam itaque liberi erga parentes grati esse debent (§. 324.); eosdem quoque amare, consequenter ex ipsorum

rum

rum felicitate voluptatem percipere tenentur (§. 115. *Psychol.*).

§. 326.

Qui alterum amat, continuo veretur, ne quidquam committat, quod eidem displiceat. Quidni itaque liberos, qui parentes amare obligantur (§. 325.), continua cura ac sollicitudo urgeat, ne forsitan quidquam ab iis committatur, vel omittatur, quod parentibus displiceat?

§. 327.

Istiusmodi sollicitudo cum *timoris* nomine veniat: liberi parentes timeant necesse est (§. 326.).

§. 328.

Liberis obediendum est parentibus (§. 316.), adeoque eos se superiores agnoscere, consequenter venerari debent.

§. 329.

Liberi parentes ament, atque adeo ex eorum felicitate voluptatem percipiant (§. 325.): ergo danda quoque ipsis est opera, ne ullam prætermittant occasionem, qua eandem promoveri valent.

§. 330.

Cum amor & gratus animus sint officia hominis erga alios in genere (§. 34. 101.); ea quo-

quoque per vitam omnem parentum & liberorum perennant.

§. 331.

Enimvero obedientia, quæ ex patria potestate fuit (§. 316.), cum eadem quoque expirat.

§. 332.

Quodsi parentes diem supremum ante obeant, quam absoluta est educatio; eam honorum suorum partem ipsis tenentur relinquere, quæ ad hoc requiritur, ut ad eum promoveantur statum, quo & sibimetipsis de victu & amictu prospicere, suasque actiones dirigere valeant (§. 315.).

§. 333.

Parentes adeo cum nesciant, quam prope dies instet ultimus: de opibus quoque in hunc necessitatis casum conservandis opportune cogitent & prospiciant.

§. 334.

Quodsi parentes, nondum finita patria potestate, moriantur; eadem in alios post mortem transferenda est: id quod ex eadem ratione elucet, ex qua necessitatem patriæ potestatis comprobavimus (§. 319.).

§. 335.

Personæ, quibus a morte parentum edus

educationis cura committitur, dicuntur *tutores*, qui vero eorum curæ committuntur, *pupilli*. Tutorum itaque est, bona a parentibus relicta administrare & pupillorum dirigere actiones (§. 319.).

§. 336.

Patria potestas cum tutoribus sit demandata (§. 334.): pupillis imperare atque pœnis & præmiis eosdem ad obediendum obligare valent (§. 316.).

§. 337.

Hæc obligandi facultas cum esset nulla, nisi pupilli obedientiam præstarent tutoribus; facile perspicitur, iisdem perinde ac parentibus obedire pupillos teneri.

§. 338.

Tutores cum sint parentum loco (§. 335.), patria potestate in ipsos translata (§. 334.); pupilli tamdiu tutelæ subsunt, donec patria potestas expiret (§. 322.), hoc est, donec bona sua ipsimet administrare actionesque suas dirigere valeant.

§. 339.

Tutori in bona pupillorum jus competit nullum, præter administrationem & fructuum in educationem impendendorum facultatem (§. 334.): bona igitur eorum immobili-

lia alienare nequit, nisi ob educationis necessitatem, aut ob avertendum certissimum damnum (§. 99.); id quod tamen fieri debet in statu naturali consensu & consentientibus agnatis, ut omnem privati commodi suspicionem a se amoliat. Neque enim sufficit agere, quæ iusta sunt, sed efficiendum quoque, ut idem pateat aliis.

§. 340.

Eadem ex ratione in statu naturali vel agnatis, vel aliis arbitris eum in finem sive ab ipsis parentibus, sive ab agnatis & amicis defunctorum parentum designatis, statuto tempore rationes bonorum administratorum reddere tenentur.

§. 341.

Quemadmodum liberi, quamdiu patria sub potestate continentur, valide non contrahunt sine parentum consensu (§. 323.); ita similiter pupilli sine tutorum consensu contractum inire nequeunt (§. 334.).

§. 342.

Consentire autem obligatur tutor, quando contractus cedit in salutem pupilli, cum ejus salutem pro virili promovere debeat, cujus quippe gratia actionum liberorum directio ipsi committitur (§. 335.).

§. 343.

§. 343.

Ubi tutor in administratione bonorum damnum, quod evitari poterat, dedit; illud refarciat (§. 97.).

§. 344.

Ne igitur damnum nimis ingens dari possit; cum rationes urgendæ sunt (§. 340.), tum etiam in statu naturali in definitis casibus, ubi istud metui poterat, illorum consilio & consensu administratio bonorum fieri par est, quibus ratio administrationis reddenda.

§. 345.

Cum nemo obligetur ad gratis alteri præstanda, quæ remunerari in sua habet potestate (§. 81.); ubi pupilli fructibus ex bonis a tutore administratis percipiendis abundant, æquum omnino est, ut tutoris cura compensetur,

§. 346.

Aliis autem in casibus omnino foret iniquum (§. 82.), præsertim ubi cum neglectu educationis conjugeretur.

§. 347.

Tutores in pupillos beneficia conferre, si munere rite fungantur, dubitari nequit. Quoniam itaque erga benefactores grati
(P. II. *Tbim. Inst. Phil. Pr.*) I esse

esse debemus (§. 101.); pupilli quoque erga tutores grati sint necesse est.

§. 348.

Gratitudo consistit in amore erga benefactorem (§. 124. *Psych.*): a pupillis itaque tutores amandi sunt.

§. 349.

Quoniam adeo ex eorum felicitate voluptatem percipere debent (§. 115. *Psychol.*); eandem quoque pro virili promovere tenentur.

§. 350.

Ex amore nascitur reverentia & timor filialis (§. 327. 328.). Pupilli itaque tutores revereri atque timere (§. 335.), consequenter nihil agere obligantur, quod ipsis jure displiceat.

§. 351.

Bonis defuncti patris ad educationem non sufficientibus, mater de impensis ad eandem necessariis prospicere tenetur (§. 315.).

§. 352.

Quodsi vero mater liberis relinquat bona, quorum fructus educationi sufficiunt; pater eosdem hunc in usum impendat, ipsa bonorum substantia facta rectaque conservata (§. 157.).

§. 353.

Idem valet, ubi liberis aliunde bona fuerint acquisita; iisdem enim rationibus adhuc locus est.

§. 354.

Si utroque parente mortuo superstites fuerint liberi patria potestate nondum soluti, nec bona relicta adfuerint, ex quibus sustentari queant; educandi cura devolvitur ad agnatos vel amicos opibus pollentes (§. 82.).

CAP. IV.

DE SOCIETATE HERILI.

§. 355.

Deficientibus ad vitæ necessitatem necessariis, alteri eorum obtinendorum gratia operas nostras collocare tenemur (§. 174.). Juri ergo naturali convenit pactum, quod quis cum altero ea conditione init, ut is victum & amicum vel ad vitæ necessitatem requisita præster, suasque operas ad licitos adhibeat usus.

§. 356.

Pactum istiusmodi societas est (§. 264.), & in specie *societas herilis* nuncupatur.

§. 357.

Persona operas suas alteri collocans *servus*

dicitur vel *serva*; illa autem, cui operæ collocantur, & quæ ad vitæ necessitatem requisita suppeditare debet, *herus* vel *hera*.

§. 358.

Pacta legitima cum sint servanda (§. 138.), societas vero herilis in eorum censum referenda (§. 356.); servorum est, ut promte exequantur, quæ ab hero, legi (§. 137.) & pacto congrua, imperantur: neque enim servus obligatur hero nisi ex pacto.

§. 359.

Similiter herus ex eadem ratione victum sanitati minime nocuum (§. 48.) & quæ amictus gratia promisit præstare debet, ne desit muneri suo in prompta promissi adimplerione.

§. 360.

Pactum cum dissolvi nequeat altero invito (§. 148.); nec servo a societate herili discedere licet invito domino ante diem, neque etiam herus eundem invitum dimittere potest ante eundem (§. 356.).

§. 361.

Quoniam servus operas suas collocavit hero, ut easdem adhibeat in suos usus (§. 357.); eo tempore, quo heri negotia obeunda sunt, sua curare nequit, nisi consentiente domino.

§. 362.

§. 362.

Ab heri autem negotiis liber, quin suorum curam gerere possit, dubium non est: cum nulum inde hero emergat damnum.

§. 363.

Cum hero, consentanea pacto jubenti, obedire teneatur servus (§. 358.): hero competit facultas imperandi, quæ e re sua esse arbitratur, & ne irritum sit imperium, servum obligandi, ad exequenda jussa.

§. 364.

Multo magis itaque servum segnem officii sui admonere potest herus.

§. 365.

Et quoniam bonum socii præfertur bono extra societatem degentis (§. 279.); amor universalis (§. 33.) singulari ratione ex parte heri restringitur ad servum, & vicissim ex parte servi ad herum.

§. 366.

Unde & servus heri commoda quodocunque detur occasio, & herus vicissim servi salutem oblata quacunque occasione promovere debet.

§. 367.

Herum itaque cum servus amare obligetur, eundem quoque revereri & timere tenetur: id quod eadem rationes loquuntur,

quibus reverentiam & timorem pupillorum erga tutores stabilivimus (§. 350.).

§. 368.

Quodsi servus sua culpa hero dederit damnum, quod evitari poterat; idem quoque resarciat æquum est (§. 97.).

§. 369.

Tenenda tamen esse ab hero, quæ de restitutione damni in genere demonstrata sunt (§. 98.), per se liquet.

§. 370.

Mancipium est servus hero proprius, ut operis ejusdem uti possit pro arbitrio, nullo nimirum intercedente pacto, quo idem limitatur seu ad certos casus restringitur.

§. 371.

Mancipium itaque omnia exequi debet ab hero imperata, quibus vires suæ sufficiunt, modo non sint legi naturali adversa. Naturalis enim obligatio ob legis naturæ immutabilitatem immutabilis & indispensabilis (§. 25. *Phil. pr. un.*).

§. 372.

Cum mancipium domino sit proprium (§. 370.): eidem quoque ad finem usque vitæ subiectum est.

§. 373.

Quoniam tamen dominus de re sua ad arbitrium

bitrium disponere valet (§. 160.); quin mancipium in libertatem asserere, vel etiam dominium suum in alium transferre possit, dubitandum non est. Quidquid domino licet in rem suam; idem licet in mancipium, quod est res sua (§. 370.).

§. 374.

Enimvero cum arbitrium domini absolutum non sit, sed per officia erga semetipsum & alios limitatum (§. 168.); officiis vero erga alios repugnet, ut in ipsorum sanitatem vel vitam sumus injurii (§. 80. 46. 47.): mancipio quoque de victu & amictu necessario prospicere tenetur dominus, nec imperare operas, viribus ejusdem superiores, adeoque cum detrimento sanitatis præstandas.

§. 375.

Quodsi mancipium operas justas præstare recusaverit: omnia in ipsum licitia sunt media, quibus ad obsequium compellatur, modo amoris universali (§. 83.) non repugnent. Secus enim irritum foret domini imperium.

§. 376.

Quoniam homo unusquisque alterius felicitatem promovere tenetur, quantum in ipso est (§. 76.); status autem servitutis perpetuæ & illimitatæ plurimum alicui continet, propterea quod dominus jure suo abuti posset in

mancipium (§. 370.); in servitutem minime redigendus, qui in statu libertatis vitæ necessitatibus prospicere valet.

§. 377.

Enimvero positis ejuscemodi farinæ hominibus, qui animo fuerint a societate herili alieniores, & ut habeant, unde commode ex lubitu vivant, modo minus licito ad hunc finem necessaria acquirere studeant, plurima damna daturi; tamdiu in servitutem redigendi sunt, donec ad meliorem frugem redeant, adeoque nulla emendationis spe superstite, ad vitæ usque finem. In hoc enim casu servitus est medium Mancipiorum salutis invigilandi, & ab aliis damni avertendi.

§. 378.

Obiter notamus, quæ de societate herili dicta sunt, cum nitantur pacto inter herum & servum intercedente, & ex pacti conditionibus generalibus fuerint derivata (§. 136. & seqq.), etiam applicari posse ad omnes promiscue in universum, qui summis imperantibus in obeundis muneribus operas collocant.

CAP. V.

DE DOMO.

§. 379.

EX societatibus simplicibus hætenus descriptis componitur *domus*, vel *perfecta*, si omnes coalescant in unam; vel *imperfecta*, si tantum binæ coaluerint.

§. 380.

Domus adeo imperfecta vel ex societate nuptiali & paterna, vel ex nuptiali & herili, vel ex paterna & herili constat: perfecta autem ex nuptiali, paterna atque herili simul (§. 283. 314. 356.).

§. 381.

Eadem persona, quæ in societate nuptiali mariti (§. 283.), in paterna patris (§. 314.), in herili heri fert nomen (§. 362.), in domo *paterfamilias* appellatur. Unde simul liquet, quænam sit *materfamilias*.

§. 382.

Marito competit imperium in uxorem (§. 310.), patri in liberos (§. 316.), hero in servos (§. 363.), consequenter patrifamilias imperium quoque competit in domum universam.

§. 383.

Enimvero quoniam mater quoque in libe-

ros (§. 316.), & hera in servos atque ancillas (§. 363.) imperium aliquod habet, maritoque a consiliis esse jubetur (§. 310.); ideo etiam materfamilias in domo imperium quoddam tenet ex consensu patrisfamilias, sive imperet ad arbitrium mariti, sive ad arbitrium proprium, ubi maritus idem non restrinxit.

§. 384.

Quoniam singulis societatibus, ex quibus (§. 279. & 380.) componitur domus, sunt fines observatis officiis obtinendi (§. 284. 314.): ideo omnis cura huc redit, ut actiones singulorum in domo ita dirigantur, ne finis unius societatis obtineatur cum jactura alterius, potius e contrario una societas finem suum prosequendo alteram in prosequendo suo juvet.

§. 385.

Consequenter paterfamilias^{ris} tanquam in domo imperantis est curare, ut consensus actionum omnium domesticorum ad commune totius domus bonum obtineatur.

§. 386.

Quamobrem ubi singulis præcepit, quid eum in finem ab ipsis fieri par sit; haud quaquam impune ferat, si quis contraria agit.

§. 387.

§. 387.

Quodsi salus totius domus cum salute singulorum domesticorum collidatur; illa huic præferenda (§. 47. *Ontol.*). Nimirum societates simplices sunt instar singularum personarum respectu domus tanquam societatis.

§. 388.

Salus tamen domesticorum præfertur saluti extraneorum (§. 280.).

§. 389.

Unusquisque ergo in domo præter domestica, quæ eidem incumbunt officia, alterius cujusvis domestici commoda & salutem data quavis occasione promovere recte adstringitur.

CAP. VI.

DE REPUBLICA IN GENERE ET
DIVERSIS RERUMPUBLICARUM
FORMIS.

§. 390.

Quodsi cogitemus, quam multa requirantur, ut officiis erga nosmetipsos (§. 27. & seqq.) atque alios (§. 79.), satisficiamus, immo præsentem hominum multitudinem minime
fer-

ferre, ut singulorum necessitatibus prospiciatur; si quidem non nisi ea facere velint, quæ necessitatibus vitæ sufficiunt, præsertim cum otia dum sit nemini, cui vires ad laborandum suppetunt (§. 67.): haud difficulter intelligemus, homines, ut vitam jucunde ac suaviter degant, plures in unam societatem coalescere debere, varia negotia ad vitæ necessitatem & jucunditatem requisita inter se partituros.

§. 391.

Quod si porro perpendamus, maximam generis humani partem vitiis indulgere nec ab aliorum offensa sibi temperare, nisi effrenis licentia & audacia vi coërceatur; haud minus difficulter intelligemus, singulas domus sibi-
metipsis non sufficere ad defensionem sui. Plures igitur in unam societatem coalescant necesse est, ut ab hostilibus aliorum insultibus tuti sint.

§. 392.

Hominum ingens multitudo in societatem coalescens, ut conjunctis viribus commune bonum promoveant, & contra hostiles aliorum insultus sese defendere queant, *Respublica* appellari solet.

§. 393.

Patet adeo *Rerumpublicarum* necessitas (§. 390--392.).

§. 394.

§. 394.

Immo exinde satis abunde perspicitur, finem Reip. esse salutem communem & securitatem seu tranquillitatem (§. 97. *Ontol.*).

§. 395.

Atque adeo lex suprema reipublicæ hæc est: *Fac ea, quæ salutem & tranquillitatem Reip. promonent; omitte, quæ utrique contrariantur* (§. 278.).

§. 396.

Consequenter in republica actiones non amplius æstimandæ sunt intuitu singulorum, verum etiam totius communis.

§. 397.

Atque adeo in Rep. injustum esse potest, quod in statu naturali erat licitum.

§. 398.

Ferendum ergo in Rep. non est, quod salutis & tranquillitati publicæ repugnat (§. 395. 275.).

§. 399.

Immo si quis contraria agat, vel agenda omittat: omnino danda est opera, ut vel ad meliorem frugem reducatur, vel (si quidem id fieri nequeat,) ad eum statum redigatur, quo salutis & tranquillitati publicæ officere amplius nescit (§. 277.).

§. 400.

§. 400.

Ponamus, bonum singulorum privatum cum publico collidi; publicum præferendum esse privato nemo non concedet (§. 279.).

§. 401.

Similiter si salus civium seu membrorum Reip. cum salute exterorum collidatur; cives exteris sunt præferendi (§. 280.).

§. 402.

Plures autem respUBLICÆ singulas personas in statu naturali degentes repræsentant. Quamobrem mutua earundem erga se invicem officia coincidunt cum officiis hominis erga alios: id quod etiam exinde liquet, quod respUBLICÆ sint societates (§. 392. 281.).

§. 403.

Quoniam Resp. ideo introductæ, ut homo unusquisque officiis lege naturali præceptis rectius satisfacere possit (§. 390. 392.): in republica constituenda & administranda operam adhibeamus necesse est, ut ad satisfaciendum obligationi naturali proni juventur, nec ab aliis impediuntur; immorigeri autem vi adigantur, ut minimum externorum actuum cum lege naturali sit conformitas.

§. 404.

Abunde itaque apparet, quod juris natura-

ralis & Philosophiæ moralis multus sit in Politica usus.

§. 405.

Ut sine quæsito potiri liceat, certis personis deleganda est cura disponendi circa ea, quæ ad communem salutem & tranquillitatem necessaria sunt (§. 394.), ceteris spondentibus, sese facturos, quæ ab ipsis eo sine præcipientur.

§. 406.

Illi dicuntur *imperantes*, hi *parentes*: illi *magistratus*, hi *subditi*.

§. 407.

Pactum consequenter intercedit inter imperantes atque parentes, quo illi promittunt, omnem curam sese adhibituros, ut, quæ ad salutem & tranquillitatem publicam spectant, scrutentur & reperta exequantur; hi autem vicissim pollicentur, sese facturos ea, quæ ipsis commoda judicabuntur (§. 106.).

§. 408.

Pacta quoniam servanda sunt, quæ legi naturali minime repugnant (§. 138.); pactum autem, quod inter imperantes & parentes (§. 407.) intercedit, ipso jure naturali exigitur (§. 390. 391.): imperantes in administranda republica omnia ad salutem & tranquillitatem publicam dirigere; parentes fa-

facere tenentur, quæ ab illis præcipiuntur (§. 407.).

§. 409.

Cura administrandæ reipublicæ vel uni vel pluribus committi potest, & quidem vel absolute, vel sub certis conditionibus: unde diversæ rerumpublicarum formæ resultant.

§. 410.

Imperantium cum sit curare ea, quæ ad salutem & tranquillitatem publicam spectant (§. 408.): iidem non modo nosse debent media, quibus salus & tranquillitas publica promovetur; verum etiam constans & perpetua eorundem sit voluntas, nihil quidquam faciendi, vel præcipiendi, nisi quod huic fini inservit.

§. 411.

Ergo imperantium quoque est, efficere ut legum naturalium custodia vigeat in republica (§. 403.).

§. 412.

Legum naturalium custodia obtinetur summum bonum (§. 70. *Phil. pr. un.*): imperantes itaque summum subditorum bonum intendunt (§. 411.).

§. 413.

Necesse igitur est, ut omnia dirigant ad felicitatem subditorum (§. 43. *Phil. pr. un.*).

§. 414.

§. 414.

Cum ergo ex felicitate subditorum voluptatem percipere debeant (§. 140. 102. 95. *Psych.*); eos amare tenentur (§. 115. *Psych.*).

§. 415.

Quemadmodum parentes id agunt, ut liberi actiones suas legi naturali convenienter dirigant (§. 319.), & curant, ne iis desint ad vitæ necessitatem & jucunditatem necessaria (§. 315.); ita similiter imperantes curam gerunt, ut subditis legum naturalium custodia sancta habeatur (§. 411.), & ne iis desint ad vitæ necessitatem & jucunditatem necessaria (§. 390.). Imperantes igitur se habent ad subditos, sicuti parentes ad liberos.

§. 416.

Simili modo evincitur, imperantes esse ad subditos, sicuti patremfamilias ad domesticos.

§. 417.

Quæ igitur de officiis parentum erga liberos (§. 316. sqq.), nec non de officiis patrisfamilias erga domesticos (§. 359. & sq.) præcepimus: ea quoque haud difficulter ad imperantes applicantur.

§. 418.

Similiter, quæ de officiis liberorum erga parentes, & domesticorum erga patremfamilias (P. II. *Thüm. Inst. Phil. Pr.*) K di-

dicta fuere : ea ad subditos applicanda sunt.

§. 419.

Qui opinantur, parentalem respectum non convenire imperantibus, legislatorum personam tuentibus, per ea, quæ inferius demonstranda veniunt; illi oppido falluntur. Quoniam enim parentes liberis præcipiendi facultatem habent, quæ ipsis commoda videntur (§. 316.), & ne irrum sit imperium, eos quoque obligare possint, sive pœnis sive præmiis; parentes quoque liberis ferre possunt leges, immo actum ferunt (§. 23. *Phil. pr. un.*). Atque idem eodem modo evincitur de patrefamilias. Etsi autem parentes non nisi liberis, nec paterfamilias nisi in domo sua leges ferre possit; respectus tamen parentalís hoc ipso minime tollitur in imperante, quoniam idem non nisi in republica, cujus fasces tenet, leges ferre valet.

CAP. VII.

DE REPUBLICA CONSTITUENDA.

§. 420.

IN republica constituenda adhibenda est opera, ut prout ad satisfaciendum obligationi

naturali juventur, minime autem ab aliis impediuntur in præstandis officiis; immorigeri contra vi adigantur, ut minimum actuum externorum cum lege naturali conformitatem observent (§ 403.). Quamobrem ea instituenda sunt, quæ non modo mediorum vicem præstant, officia sua adimpleturis, verum etiam ipsam officiorum executionem facilitant; tum etiam obligatio civilis introducenda, ubi naturalis non sufficit ad coercendos actus salutis & tranquillitati publicæ adversos (§. 395.).

§. 421.

Tanta hominum multitudo in societatem coalescat in republica, quæ conjunctis viribus promovendo bono communi & defensionis adversus insultus hostiles par est (§. 392.). Curandum itaque, ne numerus subditorum minor sit, quam qui huic scopo sufficiat.

§. 422.

Neque vero ferendus est justo major, ne desint ob multitudinem nimiam ad vitæ necessitatem & jucunditatem necessaria; cum inde plura emergant salutis incommoda, immo & tranquillitati publicæ adversa, quæ sigillatim recensere nimis foret prolixum. In rep. nimirum ferenda non sunt, quæ salutis & tranquillitati publicæ contrariantur.

§. 423.

Respublica societas est (§. 392.), a societate autem cum damno ceterorum discedere minime licet (§. 270.): ergo nec in republica ferendum, ut quisquam cum damno reipublicæ ex eadem discedat.

§. 424.

Quemadmodum itaque damnum resarcire tenetur, qui discessu suo a societate illud dedit ceteris (§. 271.); ita similiter ad damni restitutionem tenetur, qui ex republica discessum instituit, si quod inde emergit.

§. 425.

Incumbit homini parare victum & amictum ad vitæ necessitatem, jucunditatem atque decus (§. 48. & seqq. 52. 53.), una cum habitatione commoda (§. 54. 55.), adeoque opes ei fini necessarias (§. 60.). Prima igitur in rep. cura sit, ne deficient bona naturalia ad victum, amictum atque ædes necessaria, & ut subditi proventum bonorum naturalium industria & labore promoveant, ex iisque tanquam materia artificialia effingant, sive in usus proprios, sive in usum commerciorum, aliunde lucraturi, quæ patrium denegat solum.

§. 426.

Nemo victum & amictum ab alio petat, qui proprio labore eundem sibi parare valet (§. 81.);

(§. 81.); immo omni homini laborandum, nemini otiaandum, si quis vel fuerit ditissimus (§. 67.). Curandum itaque in rep. ne desit labor laborem quærentibus pretiumque labori statuendum, quod vitæ, victui & amictui congruo parando sufficit, minime autem ferendum, ut otio diffuant, quibus vires ad laborandum superpetunt (§. 420.).

§. 427.

Homo unusquisque & Deum (§. 12.), & semetipsum qua animam, corpus atque statum externum (§. 29.), porro boni malique discrimen, eaque omnia, quorum in suo vitæ genere notitia prodest, cognoscere debet (§. 35.). Curandum itaque in rep. ut incolæ de Deo ipsiusque cultu instituantur, animique eorum omni reliqua notitia imbuantur, ad quam obligantur (§. 420.).

§. 428.

Et quoniam illi, quibus a Deo concessa est facultas, veritates ad vitam utiles investigandi, singulari quadam ratione ad eas eruendas obligantur (§. 20.): in rep. ingenia eminentia quoque juvanda sunt, ut scientiis ac artibus perficiendis cum fructu vacare queant.

§. 429.

Parentum ea est cura, ut liberi habitum acquirant satisfaciendi officiis, cum erga

Deum, tum erga semetipsum, tum erga alios (§. 319.), & ut ad certum vitæ genus destinentur atque ad idem præparentur (§. 320.). Quamobrem in republica cura gerenda est, ut liberi absque sumtu, parentibus oneroso, instituantur, atque ad futurum vitæ genus præparentur (§. 420.); item ne illi negligantur, quorum educationi sumtus necessarios suppeditare nequeunt parentes (§. 32.).

§. 430.

Eam sibi homo conciliet perfectionem, ut non appetat nisi vera bona, nec aversetur nisi vera mala (§. 39.), & ut appetitus sensitivus atque affectus cum rationali tandem veluti sponte consentiant (§. 40.), consequenter virtutem colat (§. 49. & seqq. *Phil. pr. un.*), vitium fugiat necesse est (§. 56. *Phil. pr. un.*). Non postrema ergo in republica sit cura, ut non modo liberi a primis incunabilis ad virtutis culturam & vitiorum fugam adducantur; verum etiam, ut adulti in virtutis tramite contineantur, & a vitiorum deviiis anfractibus retineantur (§. 430.).

§. 431.

Nemo est lædendus (§. 93.), damnum vero datum restituendum (§. 97.). Curandum ergo in republica, ne quis alterum facile lædat; & ubi

ubi quis damnum dederit, ad ejus restitutionem adigatur (§. 429.).

§. 432.

Quoniam contractibus læsiones facillime irrepunt, vi eorum quæ cap. 7. de iisdem demonstrata dedimus; nec validus contractus est, ubi alter contrahentium vel dolo, vel metu ad contrahendum fuerit inductus (§. 186.): in republica, quantum datur, cura gerenda est, ut contractus legitime celebrentur, & illegitimi publica auctoritate rescindantur.

§. 433.

In nonnullis contractibus, veluti in contractu mutui, prospiciendum est securitati (§. 223.). Quamobrem cum hic privatis facillime imponi possit: publica de eadem statui debet auctoritate (§. 420.).

§. 434.

Homo vitæ pericula evitare obligatur (§. 43.), atque sanitatem (§. 46.) membrorumque integritatem tueri (§. 47.), immo cavere, ne in morbos incidat, & ubi morbo laborat, ut sanitati pristinae restituatur (§. 46.). Curandum ergo in republica, ne quis in vitæ pericula incurrere, sanitatisque atque membrorum integritatis jacturam facere possit, & ut præsto sint media morbos,

K 4

quan-

quantum datur, avertendi, & curandi eos, quos avertere minime licet.

§. 435.

Nemo sibi metipsum manus violentas inferat (§. 44.), immo nec inferat alteri (§. 80.). Quamobrem nec autochiria, nec homicidia in republica (§. 420.), adeoque nec injuriæ, homicidiorum causæ, tolerari possunt.

§. 436.

Immo cum labore nimio sanitati ac vitæ insidiæ struantur; nimius quoque in rep. labor minime tolerandus (§. 434. 435.).

§. 437.

Hominis est, in administrandis opibus id agere, ne quid erogetur, nisi officiorum erga se atque alios gratia, in primis etiam, ut futuræ olim necessitati prospiciatur (§. 70.): ferendum itaque in rep. non est, ut quis contra officia opes consumat, nec futuræ olim necessitati prospiciat (§. 420.).

§. 438.

Cum stipem emendicare non liceat nisi egentibus (§. 245.); nec in republica tolerandi sunt mendici otii dulcedine ad mendicandum allecti.

§. 439.

§. 439.

Neque ferendum porro est, ut petantur elemosynæ ampliores, quam quæ vitæ necessitatibus sufficiunt.

§. 440.

Quamobrem nec perpetuæ esse debent, ubi extraordinariæ casui extraordinario sufficiunt.

§. 441.

Cum in republica otiosi homines tolerandi non sint, operisque tale statuendum sit pretium, ut labore victus & amictus ab hominibus sanis & virium integrarum parari queat (§. 429.): non levis sit cura, quæ in œconomiam ruralem, rem in primis agrariam & pecuariam impenditur; quo pertinent ea, quæ jam supra de bonorum naturalium & artificialium multiplicatione præcepimus.

§. 442.

Ebrietas mater est multorum malorum, cum homines inde fiant morbis obnoxii, & ad obeunda negotia inepti, opesque inutiliter profundant, immo sæpius alienas dilapident, & sexcenta alia damna hoc ex vitio propullulent; ideo nec ea in republ. impunis esse debet.

§. 443.

Homo domicilio opus habet ad res suas

custodiendas, negotia obeunda, cibos præparandos, corpus lassum somno reficiendum, & se contra tempestatis injurias tutum præstandum. Curandum ergo est in republica, ut ædificia excitentur firma, utilia & pulchra, juxta architectorum leges; inprimis vero, ut sumtum in ædificando profusio, ex incuria & lubricine architectorum & fabrorum, aut fastu fundatorum resultans, coërceatur: confer. quæ in *specimine architecturæ civilis ad politicam applicatæ* de cura principis circa ædificia pleniori calamo commendavimus.

§. 444.

Si dubitaveris, pulchritudinis seu ornatus quoque habendam, esse rationem: cogitandum est, 1. quod, si eodem sumtu extrui possit ædificium venustum, qui in minus venustum impendendus; rationi consentaneum sit, ut illud huic præferatur: 2. quod ædificia venusta voluptatem creent transitoriam equidem, sed minus nocuam, ut adeo felicitatem hominis adaugeant (§. 72. *Phil. pr. un.*): 3. quod auctoritatem concilient possessoribus præsertim apud vulgum sensuum judicio stantem: 4. quod urbes quoque reddantur splendide & hominum de se adaugeant opinionem. Taceo alia, quæ hinc nascuntur reipublicæ cominoda.

§. 445.

Quoniam vero ipsa in universum sensuum oblectamenta innocua felicitatem hominis ingrediuntur, quemadmodum demonstratum dedimus (§. 72. *Pb. pr. un.*): de sensuum quoque oblectamenti innocuis creandis ut sollicitus sit, qui reipublicæ salutem curæ cordique habet, dubitare nequit (§. 395.).

§. 446.

Unusquisque hominum alterum honore, quo se dignum reddidit, prosequi jubetur (§. 90.). Quoniam vero solius intelligentis est eundem deferre alteri, non intelligentium vero non admittere quidquam eidem adversum (§. 75.); in republica excogitandi sunt honorum tituli & prærogativorum jura concedenda iis, qui honoribus digni æstimantur & sunt.

§. 447.

Cum etiam par sit, famam adversus eos tueri, qui eidem insidiantur (§. 77.); istiusmodi insidiæ in republica plane non sunt ferendæ (§. 420.).

§. 448.

Immo quia nemo lædendus est (§. 93.); multo minus ferendum est in rep. ut unus subditorum alterum lædat.

§. 449.

Publica ergo in republica cura cum sit
tu.

rueri famam subditorum, & quascunque injurias ipsis illatas vindicare (§. 447. 448.): vindictæ privatæ nullus concedi potest locus, præsertim cum vindicta propria, ob affectus impetum vehementiorem (§. 132. 135. *Psychol.*), limitibus non contineatur suis, ut læsiones eadem non finiantur, sed multiplicentur.

§. 450.

In publica autem vindicta ut lubenter acquiescat læsus, non modo publica autoritate ipsi satisfieri, verum etiam caveri debet, ne animadversionem publicam expertus, ad vindictam privatam redeat.

CAP. VIII.

DE LEGIBUS CIVILIBUS.

§. 451.

CUM in rep. omnes, qui obligationem naturalem insuper habent, vi adigendi sint, ut minimum actuum cum lege naturali studeant externæ conformitati (§. 410.); leges naturales, quibus actiones salutis & tranquillitati publicæ adversæ prohibentur, nova obligatione muniendæ sunt.

§. 452.

Pœnarum & præmiorum constitutione in-

introducitur obligatio (§. 41. *Phil. pr. un.*): leges itaque naturales nova obligatione muniuntur, si pœnæ transgressoribus, præmia cultoribus decernuntur.

§. 453.

Connectendum adeo est aliquod malum, siue corporis siue fortunæ, cum transgressione legis, quod sit motivum actionem legi adversam omit-
tendi (§. 39. *Phil. pr. un.*); cum custodia vero legum bonum quoddam, siue corporis siue fortunæ, quod sit motivum actionem legi conformem committendi (§. 40. *Phil. pr. un.*).

§. 454.

Obligatio ista, quæ in republica introducitur, *civilis* appellatur.

§. 455.

Lex adeo *civilis* est, juxta quam subditus actiones liberas determinare tenetur, vi obligationis civilis (§. 23.).

§. 456.

Quamobrem *lex naturæ* transit in civilem, quatenus obligatione civili munitur (§. 455.).

§. 457.

Fieri subinde solet, ut legis naturalis custodia exacta in republica non habeat locum, propterea quod lites in judiciis multiplicarentur.

rentur nimis & protraherentur, immo difficillime definirentur, ubi secundum legem naturalem jus dicendum foret: in eo igitur casu lex civilis id, quod a jure naturali generaliter determinatur, ipsamet specialiter determinat. Unde altera ratio prodit, cur leges civiles naturalibus superaddendæ,

§. 458.

Fieri quoque præterea solet, ut in diversis casibus jus naturæ diversimode actionem eandem determinet, quam ad minuendam in judiciis litem constanti ratione determinari præstat. Unde novus fons legum civilium prodit.

§. 459.

Atque in his duobus casibus posterioribus, legum civilium a naturalibus diversitatem quoque suadent earundem ad facta applicandi facilitas, & quod parum tutum videatur, nimis multa arbitrio judicis relinquere.

§. 460.

Et si autem civiles leges a naturalibus subinde differre queant: haud quaquam tamen ob harum indispensablem immutabilitatem (§. 25. *Pb. pr. un.*) obligandi sunt subditi ad faciendum ea, quæ juri naturali repugnant; sed tantummodo permittendum esse patet, ut ab æquitate naturali subinde desistant, qui obligationi naturali non cedunt,

§. 461.

Atque hac ex ratione judex in foro litigatu-
ros movere nitatur, ut æquitati locum relin-
quant, antequam lis decernatur.

§. 462.

Cum imperantibus cura salutis & tranquilli-
tatis publicæ commissa sit, subditis autem obe-
dientiæ gloria relicta (§. 405.); leges quoque in
republica ferre nequit nisi is, penes quem sum-
mum est imperium (§. 459.).

§. 463.

Quoniam vero summi imperantes, & qui
ipsis a consiliis sunt, actionum indolem non
semper perspiciunt, quantum ad earum cum
salute & tranquillitate publica convenientiam
dijudicandam sufficit; leges a personis rerum,
de quibus ferendæ sunt, satis gnaris concipien-
dæ sunt.

§. 464.

Ut autem vim legis acquirant, a summo im-
perante confirmandæ sunt (§. 462.).

§. 465.

Patet itaque statuta quoque collegiorum &
artificum, ab artis peritis condenda, atque a sum-
mo imperante confirmanda esse (§. 463. 464.).

§. 466.

§. 466.

Quia nemo actiones conformare potest legi, quam ignorat; ideo leges promulgandæ sunt, nec ante publicationem quempiam obligare valent.

§. 467.

Quoniam porro in republica suprema lex est salus & tranquillitas publica (§. 395.); ideo legum civilium materiam præbent, quæcunque in numero mediorum illam promovendi habentur.

§. 468.

Quamobrem si animo revolveris, quæ capite præcedente inculcata sunt; amplissimus legum civilium campus sese veluti sponte aperiet.

CAP. IX.

DE POTESTATE ET POTENTIA
SUMMORUM IMPERANT-
TIUM.

§. 469.

Summis imperantibus competit facultas ferendi leges (§. 462.), adeoque obligandi subditos (§. 455.), ac disponendi de salute & tranquillitate publica. Facultas ista *potestatis summa* nomen gerit. Hinc fluit per se, sum-
mos

mos imperantes summam in republica tenere potestatem.

§. 470.

Enimvero, quoniam subditos obligare nequeunt ad actiones legi naturali contrarias (§. 460.); potestas ipsorum ipso jure naturali limitatur, atque eidem contraria imperanti minime obedientia debetur.

§. 471.

Ubi summi imperantis potestas etiam per reipublicæ formam limitatur (§. 138.); lex publicata non obligat, nisi eorum accesserit consensus, quos imperans consulere debebat per leges fundamentales.

§. 472.

Ne igitur hoc in casu summus imperans potestate sua abutatur, ad custodiam legum fundamentalium obligandus.

§. 473.

Qui potestatem tenet prorsus illimitatam, ejus *imperium* dicitur *despoticum* sive *absolutum*. Etsi autem absit limitatio civilis, haud quam tamen ideo cessat naturalis (§. 470.).

§. 474.

Summo imperanti competit facultas obligandi subditos (§. 469.); habent adeo potestatem
(P. II, *Tbüm, Inst. Phil. Pr.*) L rem

tem constituendi poenas in legum transgressores (§. 41. *Phil. pr. un.*).

§. 475.

Quamobrem ubi poena non suffecerit ad obligandum homines refractarios, ne salutis ac tranquillitati publicæ adversentur, nisi quæ fuerit capitalis; poenas quoque capitales transgressoribus dictari posse dubio caret.

§. 476.

Competit consequenter summis imperantibus jus vitæ & necis in subditos, quo tamen uti ipsis integrum non est, nisi quantum salus & tranquillitas publica poenas in legum transgressores capitales statui jubet.

§. 477.

Multo magis itaque subditos ab obedientia alienos vi compellere possunt, ut, quæ ab iis iuste præcipiuntur, promte exequantur, imperio ipsorum sese submittentibus,

§. 478.

Qui reipublicæ salutem ac tranquillitatem promovere debet, ad gerenda negotia sumptibus indiget. Quoniam itaque summo imperanti competit facultas disponendi de salute ac tranquillitate publica (§. 469.), nisi irritos ipsius velint conatus: subditi sumtus ad

ad executionem operis cujusunque necessari-
os suppeditare tenentur. Potestas ergo summa
comprehendit quoque facultatem imponendi ci-
vibus onera,

§. 479.

Quodsi potestas in imperio non fuerit abso-
luta (§. 473.), sed ex parte sive ad optimates,
sive ad integrum populum restricta; summo
tamen imperanti competit jus convocandi eos,
quorum consensu de salute & tranquillitate
publica dispositurus habet opus,

§. 480.

Ne autem irrita & vana sit convocatio;
convocati comparere tenentur, adeoque impe-
ranti competit potestas, eos ad comparendum
obligandi.

§. 481.

Ut executioni dari possint, quæ imperans
utiliter sancivit in reipublicæ salutem, ut-
que pœnas transgressores dare queant, qui-
bus subditi ad parendum obligantur (§. 474.),
immo ut sumtus ad executionem operis ne-
cessarios a subditis exigere valeat impe-
rans, potentiam habeat necesse est. Desi-
gnat enim potentia in genere agendi possi-
bilitatem (§. 85. *Ontol.*), atque adeo *potentia*
imperantis consistit in possibilitate exequen-

di ad salutem & tranquillitatem reipublicæ necessaria: vana autem foret omnis potestas (§. 469.), nisi potentia accederet.

§. 482.

Quoniam potentia designat possibilitatem exequendi ea, quæ ad salutem & tranquillitatem reipublicæ necessaria sunt (§. 481.); ad eam referenda sunt omnia, quæ executionem eorum, quæ sancivit imperans, quocunque modo juvant.

§. 483.

Unde sine negotio intelligitur, ad potentiam imperantis referri pecunias, rerum gerendarum nervum, milites, jus constituendi & removendi magistratus ac iudices in oppidis, pagis atque provinciis, conferendi munera publica & dignitates civiles. Sumtibus enim ad gerenda negotia opus esse, nemo ignorat. Milite opus est tempore pacis ad cogendum refractarios, tempore belli ad defendendam remp. adversus insultus hostiles. Iudices & magistratus, quibus legum civilium executio incumbit, sive in reddendo jure, sive in pœnis infligendis, sive in refractariis adtribuendum alteri, quod debet, cogendis, a nutu summi imperantis pendent perinde ac ceteri omnes, quotquot muneribus præsent publicis, ut sic agnoscant
su-

suam in manu imperantis positam esse salutem, qui animos subditorum facile alienare poterant, ut in rebelles degenerent. Ita nimirum omnes obligantur ad parendum imperanti (§. 18. *Phil. pr. un*), ne quidquam moliantur adversus ea, quæ sancivit.

§. 484.

Quodsi in republica potestas non fuerit absoluta, nec potentia absoluta esse potest. Etenim qui potentia gaudet ad cogendum consensum, quem requirere debet; ejus potestas frustra limitatur. Sicubi enim visa fuerint, in quæ consentire nolunt sive optimates, sive populus universus; ei, qui consensum cogere potest, resisti nequit.

§. 485.

Et si autem potestas & potentia summi imperantis limitatur; utraque tamen in rep. illimitata est, ita ut alteri reip. non competat jus eam limitandi. Sunt enim respublicæ instar personarum in statu naturali degentium (§. 402.), nemini autem in statu naturali competit jus limitandi potentiam & potestatem alterius, nisi quatenus istiusmodi limitatio inter media damnum avertendi unica referenda est (§. 100.).

§. 486.

Potestas & potentia junctim sumtæ, *majestatem* summi imperantis constituent.

§. 487.

Unde majestatem lædit, qui contra principis potestatem atque potentiam quidquam molitur, & *perduellis* dicitur.

§. 488.

Criminis igitur læsæ majestatis maximus gradus est, qui summum imperantem potestate atque potentia prorsus privare conatur.

§. 489.

Quoniam vero contra Principis potestatem atque potentiam variis modis peccari potest; ideo hujus criminis permulti dantur gradus, non una eademque pœna coercendi.

§. 490.

Abunde autem inde colligitur, graves infligendas pœnas crimen hoc committentibus, cum salva atque sancta esse debeat majestas, hoc est, potestas atque potentia summi imperantis (§. 486.), si salus ac tranquillitas publica salva esse debet (§. 451. 481.). Hinc legimus lapidari olim consuevisse hujus facinoris reos, aliaque dura suppliciorum genera in more fuisse posita contra perduellio-

liones. Confer, quæ *illustris Gundlingius* summa cum eruditione tradidit in tractatu; *Singularia ad legem majestatis itemque de silentio in hoc crimine*, inscripto.

CAP. X.

DE ADMINISTRANDA RE-
PUBLICA.

§. 491.

Regimen consistit in exercitio potestatis & potentiae ad promovendam salutem & tranquillitatem publicam.

§. 492.

Quodsi igitur summus imperans non præcipit, nisi saluti ac tranquillitati publicæ congrua, eidemque adversa amolitur, nec quidquam omittit, quod ad eam promovendam conducere deprehendit; *bene regnat*: in casu opposito *male*.

§. 493.

Quamobrem leges ferre debet, quotiescunque deprehendit, actiones saluti & tranquillitati publicæ adversas invalescere, nec obligationem naturalem sufficere.

§. 494.

Leges civiles meliorari possunt, omnem quippe perfectionem ab initio raro adeptæ. Imperantis ergo est emendare ac meliorare, si quando nævi earundem sese produnt (§. 492.).

§. 495.

Similiter, quando delictum aliquod in consuetudinem abit, & fit familiare, certo indicio, obligationem civilem non amplius valere apud plurimos; ex eadem cura promovendi salutem & tranquillitatem publicam liquet, pœnas esse intendendas, levioribus in graviores transmutatis.

§. 496.

Enimvero summi imperantes ipsimet civium controversias juxta leges a se latas definire nequeunt, nec ipsorum est inquirere in delicta & delinquentibus pœnas constitutas infligere. Constituendi ergo sunt judices, quibus id muneris demandatur.

§. 497.

Judicibus consequenter tribuenda est potestas sententiam ferendi de controversiis civilibus, ut unicuique tribuatur, quod suum est, & pœnas decernendi delinquentibus promeritas.

§. 498.

§. 498.

Ut cum sententiam de controversiis civili-
bus latam; tum pœnas delinquentibus dictatas
exequi valeant; potentiam quoque habeant me-
rito requiritur.

§. 499.

Judices adeo regunt cives (§. 491.), etsi non
autoritate propria, sed summi imperantis, a
quo nempe potestatem habent & potentiam,
tanquam ipsius vicarii (§. 469.).

§. 500.

Judicum est, secundum leges definire con-
troversias civiles & legum transgressores pœnis
afficere (§. 496.). Debent adeo legum esse
periti.

§. 501.

Ut sententiam legi conformem dicant judi-
ces; non sufficit nosse legem, verum etiam
opus est, ut non, nisi legi conformem, dicere
velint. Omnis igitur personarum respectus,
omne lucrum privatum, omnis ratio alia abes-
se debet, quæ voluntatem ad sententiam legi
adversam flectit.

§. 502.

Quoniam sententiam ferre nequeunt, nisi
causa cognita: non modo facilis sint accessus,
sed & aurem præbeant unicuique patulam.

§. 503.

Nemo alterum odio prosequatur (§. 83.); ideo nec judicem decet ob delicta perpetrata inquisitum odisse. Delictum odio prosequatur; personam delinquentis amet.

§. 504.

Ut cum autoritate adversus delinquentes animadvertat, ipsemet ab omni vitiorum inquinamento procul sit remotus.

§. 505.

Non una autem eademque est ratio, cur causæ tam civiles, quam criminales statim decidendæ, nec inutiles nec tendæ moræ. Processus enim civiles multas creant molestias, tædia multa, multisque & sæpissime cum opum interitu conjunctis stant sumtribus: judex autem maximi fit, qui nos a tædio, sumtuumque profusione liberat. Processus criminalis carcerem inquisito molestum & sumtus ut plurimum publicos postulat.

§. 506.

Summis imperantibus cum sit obediendum (§. 499.), judices autem eorum vicarii sint (§. 499.); ipsis quoque obediendum est, si quid officii ratione fieri jubent.

§. 507.

§. 507.

Ipforum adeo potestati & potentiae neminem decet impetuose resistere aut ullo modo contra eam delinquere.

§. 508.

Et quoniam unicuique honorem, quem meretur, deferre debemus, perfectionem ipsius agnoscendo, verbisque factisque testimonium perhibendo, quod eam agnoscamus (§. 90.); iudicibus quoque honor, quem merentur, debetur, agnoscendo potestatem & potentiam a summo imperante in ipsos collatam, & virtutes in administranda justitia elucentes.

§. 509.

Judices itaque & magistratus inferiores quoscunque reverenter haberi par est (§. 508.).

§. 510.

Ne autem iudices & magistratus alique muneribus publicis a summo imperante praefecti potestate & potentia in reipublicae damnum, si-
ve ex ignorantia, si-ve ex malitia abutantur; curandum omnino est, ne munera publica nisi dignis conferantur, hoc est, iis, qui & norunt, quomodo sint obeunda, ut salus & tranquillitas publica promoveatur, nec ab his diversa agere volunt (§. 395.).

§. 511.

§. 511.

Cum pecunia sit rerum gerendarum nervus & non postremam potentiae partem absolvat (§. 483.); summi quoque imperantis est, cavere, ne ex suis regionibus in exteras deferatur; sed curam potius intendere, ut exterorum nummi in proprias redundant. Quorsum spectat cura commerciorum, cultura soli patrii, scholarum & academiarum incrementum, artificum & operariorum sustentatio, &c. de quibus in Politica superiori calamo præcipientur.

§. 512.

Et quoniam fieri nequit, ut nemini ad vitae necessitatem & commoditatem desint necessaria, nisi dominiorum translatione (§. 170.); dominiorum autem translatio in hominum multitudine vigere nequit absque pecunia (§. 178. 179.): id quoque summo imperanti agendum est, ut pecunia conveniente ratione inter incolas distribuat, ne unus abundet opibus cum ceterorum damno.

§. 513.

Summi imperantis est promovere tranquillitatem reipublicae (§. 407.); subditos ergo defendat, cum adversus inimicorum injurias, tum adversus hostium impetus,

§. 514.

§. 514.

Cum minime fieri queat, ut imperans omnia norit, quæ ad salutem & tranquillitatem rei-publicæ quomodocunque faciunt, & ut omnibus expendendis ipsemet sufficiat; aliorum virorum prudentum & ad gerenda negotia aptorum consilio uti convenit, ne quid temere decernatur, quod a salute & tranquillitate publica alienum (§. 408.).

CAP. XI.

DE BELLO ET PACE.

§. 515.

Diversæ respublicæ sunt instar personarum in statu naturali degentium (§. 402.); sed singuli homines & damni restitutionem urgere (§. 97.), damnumque, quod alter intentat, avertere possunt (§. 99.), utendo mediis, quibus solis damnum datum reparari, aut quod intentatur, averti potest (§. 100.); ergo etiam respublica una, damni ab altera dati restitutionem urgere, damnumque, quod intentat, avertere potest, utendo mediis, quibus solis damnum datum reparare vel intentatum avertere licet.

§. 516.

Quodsi ergo reparatio damni obtineri nequeat nisi vi, nec nisi eadem vi, quod intendatur, avertere liceat; vis vi repellenda. Quid enim est, quod contra vim sine vi fieri possit?

§. 517.

Bellum est status reipublicæ, quo una alteram vi adigere tentat, ad præstandum, quod poscit.

§. 518.

Pax vero est status a vi externa liber.

§. 519.

Vim igitur cum vi repellere liceat, quando aliis mediis damni reparatio obtineri vel, quod intenditur, averti nequit (§. 516); bellum quoque hoc in casu licitum est (§. 517.).

§. 520.

Dicitur, autem hoc in casu *bellum offensivum*, quando respublica alteram aggreditur, vi, damni restitutionem urgens, vel, quod intendatur, avertere tentans.

§. 521.

Quodsi vero bellum inferenti resistitur, vel
illa,

illaturæ prævenitur; bellum defensivum appellatur.

§. 522.

Licetum esse bellum defensivum evidens per se est, si offensivum fuerit illicitum: cum imperantis sit defendere subditos adversus hostium insultus (§. 513.). Hic illud *Livii* valeat: justum bellum, quibus necessarium, & pia arma, quibus nulla nisi in armis relinquitur spes,

§. 523.

Enimvero, si bellum offensivum licitum: defensivum illicitum redditur; propterea, quod eo in casu ad damni reparationem teneatur pars læsa, & quod a damno inferendo se abstinere jubeatur (§. 520. 96. 402.).

§. 524.

Nullam esse bello salutem, diuturna experientia dudum constitit. Quamobrem cum summi imperantis sit, salutem reip. quomodocunque promovere (§. 408.), a justo etiam bello abstinendum est, si damnum ex bello in rempublicam redundaturum majus sit, quam quod reparandum vel avertendum. Hinc *Cæsar Augustus* recte dixit: Prælium aut bellum nunquam suscipiendum, nisi cum major emolumenti spes, quam damni metus ostenderetur,

§. 525.

Belli adeo evitandi cum maxima ipsi incumbat cura: tentanda quoque sunt remedia leniora, antequam ad illud procedat, qualia sunt monere per legatos partem lædentem, ut a læsione abstineat, damnumque datum resarciat, vel minis coërcere mōitis blandis atque seriis reluctantem, vel damnum opponere damno (id quod *repressaliorum* nomine venire solet), vel per arbitros controversias componere.

§. 526.

Ex eo, quod republicæ repræsentent personas in statu naturali degentes (§. 402.), decidere quoque datur, quænam in bello liceant, quæ minus. Nimirum cum singulis in statu naturali iis uti liceat mediis, quibus solis damnum avertitur, & hostem damna daturum compescere convenit, donec de non offendendo simus securi (§. 100.): ideo quoque in bello licent omnia, sine quibus pars lædens adigi nequit, ut damnum datum repararet, atque ab inferendo abstineat; & quibus solis adeo compescitur hostis, ut de non offendendo impofterum possimus esse securi.

§. 527.

Cum bellum geratur, vel ut damnum datum reparetur, vel ut imminens avertatur (§. 526.);

(§. 526.); ubi finiendum venit, pars lædens damnum datum restituere, & de non lædendo amplius satis cavere tenetur.

§. 528.

Et quoniam non exiguis stant bella sumtibus, quo pars lædens causata est; ideo ad hos quoque refundendos tenetur (§. 402. 97.).

§. 529.

Quod si tamen eos refundere non possit, nisi omnis reipublicæ nobis adversæ salus prorsus pessumdetur; sumtuum refusio urgenda non est (§. 98. 402.).

§. 530.

Qui non habet in potestate positum ad quod tamen obligatur, huic succurrere debet, qui illud in potestate tenet (§. 82.). Quamobrem cum summi imperantes eodem jure, quo singuli in statu naturali, teneantur (§. 402.); unus quoque alteri suppetias ferre tenetur, si quis eum injusto bello aggreditur, contra quem sese satis defendere haud valet.

§. 531.

Exposuimus itaque generalia principia ex fine reipublicæ deducta; juxta quæ dijudicatio eorum instituenda, quæ in republica
(P. II. *Thüm. Inst. Phil. Pr.*) M li-

licent, quæ minus. Quamobrem cum finis reipublicæ legi naturali conveniat, immo lex naturæ eundem urgeat (§. 390. 391.); etiam principia generalia fini isti consentanea legis naturalis vim habere, quis unquam dubitabit? Qua ratione vero legibus istis naturalibus ceteris principiis rationis (§. 83. *Phil. pr. univ.*) in re publica satisfiat, in politica docemus.

FINIS INSTITUTIONUM JURIS NATURALIS.




INSTITUTIONES


PHILOSOPHIÆ

MORALIS

SEU

ETHICÆ.





INSTITUTIONES PHI- LOSOPHIÆ MORALIS SEU ETHICÆ.

PROLEGOMENA.

§. 1.

P*hilosophia moralis* sive *Ethica* est scientia af-
fectiva practica, acquirendi habitum acti-
ones liberas quascunque legi naturali con-
venienter determinandi.

§. 2.

Habitus actiones liberas legi naturali confor-
miter dirigendi virtus dicitur (§. 49. *Phil. pr. un.*);
ergo in philosophia morali docendus est modus
pervenienti ad virtutem (§. 1.).

§. 3.

Quoniam vitium est habitus dirigendi actio-
nes suas contraria ratione, quam lege naturali
præscribitur (§. 56. *Phil. pr. un.*), adeoque ad
virtutem adduci non possit, nisi quis ante a vi-
tio abducatur (§. 49. *Phil. pr. un.*); evidens est,
in *Ethica* esse præcipienda, quomodo vitiis de-
ditus a vitiis abduci queat (§. 2.).

§. 4.

Et cum fieri possit, ut a virtutis tramite ad

vitiorum devia declinemus, quod vel experientia comprobatum sumere licet: in Ethica porro doceri debet, quomodo vitia sint vitanda.

§. 5.

Jus naturæ urget omnium actionum liberarum cum inter se, tum cum naturalibus consensum (§. 26. *Phil. pr. un.*), atque adeo totius quoque vultus, oris atque gestuum eam compositionem, quæ actioni virtuosæ respondet. Quamobrem cum Ethica doceat modum actiones liberas quascunque, consequenter omnes corporis motus, qui imperio ipsius subsunt (§. 9. *Phil. pr. un.*) legi naturali convenienter determinandi; eadem quoque docere debet modum comparandi habitum, quo vultus, oris atque gestus ita componuntur, ut virtutis actioni conformis sit compositio.

§. 6.

Illam vultus, oris atque gestus compositio, quæ actioni virtutis, quam comitatur, conformis, *decorum* constituit; contraria autem *indecorum* absolvit.

§. 7.

Ethici igitur est, docere, quid sit decorum, quid indecorum; & quomodo habitus edendi actiones decoras, vitandi indecoras acquiratur.

§. 8.

§. 8.

Continet itaque jus naturæ Ethicæ theori-
am (J. N. §. 1. & supra §. 1.).

§. 9.

Atque ea ratio est, cur Philosophus jus natu-
ræ in ipsa Ethica tradiderit.

§. 10.

Enimvero quemadmodum juris naturalis
præcepta ex theoria in Philosophia practica uni-
versali tradita fuere deducta; ita quoque Ethica
utitur tanquam principiis praxi in Philosophia
practica universali pertractata.

§. 11.

Cum summum bonum legis naturalis custo-
diæ obtineatur (§. 70. *Phil. pr. un.*); Ethica do-
cet modum ad summum bonum perveniendi
(§. 4.). 73.

§. 12.

Similiter cum felicitas non nisi ejusdem cu-
stodiæ fructus sit (§. 73. *Phil. pr. un.*); Ethica
docet modum felicitate potiundi.

§. 13.

Hinc Ethicæ utilitas & præstantia abunde elu-
cescit.

SECTIO I.

CAPUT I.

DE VIRTUTIS STUDIO.

§. 14.

Virtus est habitus actiones liberas legi naturali conformiter dirigendi (§. 49. *Phil. pr. un.*). Ad virtutis itaque studium requiritur, ut nobis comparemus habitum actiones liberas juxta legem naturalem, consequenter ad sui perfectionem (§. 24. *Phil. pr. univ.*); adeoque & ad Dei gloriam (§. 66. *Phil. pr. un.*), & hominum aliorum perfectionem (§. 67. *Phil. pr. un.*) componendi,

§. 15.

Efficiendum ergo est ut voluntas non appetat nisi actiones ad nostri aliorumque perfectionem ac Dei gloriam tendentes; nec aversetur nisi nostræ aliorumque perfectioni ac gloriæ Dei adversas, adeoque, si alia est, emendetur.

§. 16.

Ad intellectum pertinet ferre judicium, utrum actio ad nostri aliorumque perfectionem ac Dei gloriam tendat, nec ne (§. 24. 25. *Log.*); ut igitur voluntas emendetur, intellectus perficiendus seu boni malique cognitione viva instruendus est (§. 112. *Phil. pr. un.*).

§. 17.

§. 17.

Cognitio viva quoniam non est, nisi de cuius certitudine fuerimus convicti aut persuasi (§. 112. *Phil. pr. un.*); certitudo autem cognitionis haud postrema est, si ipso facto iudicii veritatem experiamur: exemplis confirmanda sunt atque fabulis, quæ de actionum honestate ac turpitudine præcipiuntur, cognitione symbolica sic in intuitivam transeunte (§. 68. *Psychol.*).

§. 18.

Ne autem pravi habitus contrahantur antequam intellectus sufficiente boni malique cognitione imbuatur; vitandæ non modo sunt male agendi occasiones, verum etiam viva adhuc destituti cognitione pœnis coercendi, ne patrent actiones malas; præmiisque alliciendi, ut committant bonas (§. 41. *Phil. pr. un.*).

§. 19.

Enimvero sic nondum emendari voluntatem haud difficulter ostenditur. Etenim qui non nisi metu pœnæ atque spe præmii actiones quasdam committit, quasdam vero omittit, illius appetitus adhuc fertur in actionem turpem. Cum adeo coactus agat, quæ averfatur, & omittat, quæ appetit; cessante metu pœnæ atque spe præmii appetitui suo conformiter agit, atque ad pristinam consuetudinem recidit.

§. 20.

Voluntate emendata, actiones bonas committimus, propterea, quod eas bonas cognoscimus; malas vero omittimus, propterea, quod malas esse persuasi sumus (§. 16.), adeoque libere (§. 156. *Psych.*).

§. 21.

Elucet hinc necessitas emendandi voluntatem, non modo, quod in eo demum casu actiones sint virtuosæ (§. 55.), sed & bonum propositum constans (§. 19. 20.).

§. 22.

Cum felicitas sit virtutis præmium certissimum (§. 73. *Phil. pr. un.*), vitiumque infelicitatis causa (§. 79. *Phil. pr. un.*); voluntatis autem motiva sint boni atque mali repræsentationes (§. 141. *Psych.*): operam dare convenit, ut a prima statim juventute intellectus genuina felicitatis atque infelicitatis notione imbuatur (§. 72. 78. *Phil. pr. un.*), & illius cum virtute, hujus cum vitio nexus evincatur (§. 73. 79. *Phil. pr. un.*), differentia in bonum verum atque apparens sedulo inculcata (§. 74. 75. 76. *Phil. pr. un.*), una cum hac maximi momenti veritate, quod Deus legislator parentis personam tueatur, non nisi salutaria præcipientis & adversa vetantis (§. 81. *loc. cit.*).

§. 23.

§. 23.

Quamdiu bonum apparens vero præfertur, voluptas ex illo percepta, superat eam, quæ ex hoc percipitur (§. 76. *Phil. pr. un.* & §. 104. 140. *Psych.*). Quodsi ergo voluntas emendanda, ut bonum verum præferat apparenti; in id omnino entendum est, ut major sit, quæ ex vero, quam quæ ex apparente hauritur voluptas.

§. 24.

Facum bonorum apparentium detegit, qui vel in se ipso experitur, vel ex alieno casu didicit, tædium subsequens superare voluptatem præsentem (§. 70. 74. *Phil. pr. un.*), ita, ut si optio daretur, voluptate carere malit, quam ejus gratia tædio subsequenti excruciarı: hoc ut fiat, convincendus est animus, tædium istud ex ipsa omnino actione profluxisse, immo si non semper numero, attamen specie idem profluere debere. Qui enim negligentia tribuit, quod tale quid fuerit secutum; in potestate positum esse sibi persuadet, idem imposterum evitare.

§. 25.

Consuetudines pravæ difficili negotio immutantur, propterea, quod habitus pravus ante dediscendus, quam bonus inducatur.

§. 26.

§. 26.

Apparet adeo necessitas cavendi, ne pravi habitus contrahantur (§. 18.).

§. 27.

Quodsi ergo consuetudo prava contracta corrigenda, ut habitum perversum dediskas; vitanda est eidem conformia agendi occasio: & ut bonum tibi concilies; quærenda est eidem contraria agendi occasio.

CAP. II.

DE REGIMINE AFFECTUUM.

§. 28.

Affectibus debetur, quod ex præcipitantia ad actiones feramur, quarum postea pœnitet (§. 135. *Psychol.*). Quamobrem cum ex confusa cognitione ortum ducentes (§. 105. 111. *Psych.*), a natura humana inseparabili (§. 27. *loc. cit.*), minimum in hujus vitæ statu, de quo loquimur, penitus extirpari nequeant: compescendi saltem sunt, ne appetitus in actiones pravas externas erumpat; & regendi, ut cum appetitu rationali consentiant.

§. 29.

Quoniam fieri nequit, ut duobus affectibus contrariis una indulgeamus, affectus præsens coërcetur, excitato contratio, repræsentatione nimirum boni vel mali alicujus convenientis (§. 113. & seqq. *Psychol.*).

§. 30.

§. 30.

Tristitia itaque lætitia, & lætitia tristitia (§. 113. 114. *Psychol.*), amor odio, odium amore (§. 115. 116 *l. c.*), atque adeo invidia misericordia, pœnitentia, pusillanimitas, desiderium, pudor atque metus cum tristitia affine quidpiam habentes (§. 118. 119. 121. 123. 127. 128. 130. 132. *loc. cit.*), lætitia; amor e contrario, irrisio, acquiescentia in se ipso, gloria, gratitudo, favor, spes, fiducia, cum lætitia affine quidpiam habentes (§. 115. 117. 120. 122. 124. 125. 126. *l. c.*), tristitia coërcentur. Immo in genere paret, propterea, quod omnes affectus in diversa voluptatis atque tædii modificatione consistunt (§. 112. *loc. cit.*); voluptatis modificationes tolli, tædio excitato, tædii autem modificationes cessare, voluptate producta: id quod quomodo in casu quolibet dato fieri possit, non modo voluptatis & tædii definitiones generales (§. 195. 199 *loc. cit.*), verum etiam ipsorum affectuum in utriusque modificatione consistentium definitiones speciales (§. 113. & *sqq. l. c.*) insinuant.

§. 31.

Talia non abhorrent a praxi, nec a præceptis specialibus a scriptoribus hinc inde inculcatis, etsi generale præceptum e libellis ethicis hætenus exulaverit, a Philosopho

pho cum fructu Philosophiæ morali vindicatum.

§. 32.

Omnes affectus ex confusa cognitione ortum ducunt (§. 105. 111. *Psychol.*): sedantur itaque, si a confusa ad distinctam boni malique cognitionem perducamur; id quod denuo & experientiæ & praxi consentaneum deprehendit, qui ad omnes casus obvios cum cura attendit.

§. 33.

Affectus intenduntur, si imaginatio multa confuse repræsentet ex olim perceptis (§. 133. *Psychol.*), immo & ubi ob rationes prægnantes alias ad eos jamjam dispositus fuerit animus (§. 134. *Psych.*). Quamobrem ut affectu correptis facile succurrat distincta cognitio; quolibet affectu sedato inquirere debent, quasnam imaginatio suppeditaverit perceptiones confusas veritati parum conformes (§. 41. *Psychol.*).

§. 34.

Quoniam vero affectus ex confusa boni malique repræsentatione ortum ducunt (§. 105. 111. *Psych.*); ne iidem appetitu rationali adversentur, quin cum eadem potius consentiant, bonorum verorum atque apparentium discrimen quovis modo perpendendum.

dum. Ut adeo denuo appareat, non nisi ab intellectus perfectione expectandam esse voluntatis emendationem (§. 16.).

§. 35.

Ceterum difficultas compescendi affectus rationis beneficio evidenter demonstrari potest. Non exiit affectus, nisi eidem indulgens fuerit convictus, suam mali atque boni repræsentationem esse erroneam (§. 105. III. *Psych.*). Enimvero alterum erroris convincere, res omnino difficilis: utendum enim est non nisi rationibus ab ipso perspectis, ac principiis ab eodem concessis (§. 76. *Log.*); & qui convincendus, non modo attentionem, verum etiam dispositionem singularem afferat necesse est (§. 77. *Log.*); error autem ab eodem in iudicando admissus demonstrandus est in hypothese singulari (§. 89. 92. *Phil. pr. un.*).

§. 36.

Quamobrem cum diversæ sint hominibus notiones, ex quibus de boni atque mali ratione iudicant; consultum omnino est, ut tantisper veritate seposita ex domesticis notionibus alterum erroris redarguas, præsertim ubi medela prompta opus est.

§. 37.

Praxis domandi affectus redit ad refellendum

dum syllogismum aliquem practicum. Nimirum cum affectus omnes ex boni malique representatione ortum ducant (§. 105. III. *Psychol.*); qui affectui indulget hunc format syllogismum practicum:

Quidquid ita se habet, illud est bonum vel malum.

Atqui hoc objectum ita se habet.

Ergo est bonum vel malum.

Aut igitur impugnanda est major, evicta falsitate notionis boni atque mali; aut minor refellenda, ostenso erroneo de objecto judicio. Atque hic posterior casus est, de quo modo (§. 36.) diximus.

§. 38.

In genere constat, nos nihil appetere, nisi sub ratione boni, nec averfari, nisi sub ratione mali (§. 140. *Psych.*); omnem itaque praxin moralem syllogismo isto practico inniti evidentissimum est.

§. 39.

Præceptum generale de domandis affectibus (§. 37.) sine multo negotio applicatur ad omnes affectus speciales, si modo definitionum, de iisdem traditarum, habeatur ratio.

§. 40.

Lætitia oritur ex boni præsentis opinione (§. 113. *Psych.*). Ut igitur evanescat, convin-

cendus erit, qui lætatur, illud, quod in objecto bonum judicat, vel esse malum, vel aliquam saltem boni speciem habere; aut tale quid prorsus objecto non convenire, quale eidem tribuit (§. 140. *Psycb.*).

§. 41.

Tristitia ex mali præsentis opinione nascitur (§. 114. *Psycb.*). Ut igitur in auras abeat: convincendus erit qui contristatur, illud, quod in objecto malum judicat, vel non esse malum, quin potius bonum, vel aliquam saltem mali speciem habere, aut tale quid objecto prorsus non convenire, quale eidem tribuit.

§. 42.

Amor oritur ex eo, quod in altero quidpiam deprehendamus, unde voluptatem percipimus (§. 115. *Psycb.*). Suffocatur itaque, si amans convincitur, illud, ex quo voluptatem percipit, revera non adesse; aut ita esse comparatum, ut voluptas durabilis esse nequeat, aliquando in ædium degeneratura.

§. 43.

Quodsi quis distincte non agnoscat, quidnam sit illud in amato, unde voluptatem percipit, rationem amoris sui ignorans; odio excitato pellitur amor (§. 27. *Psycb.*). Neque vero opus est, ut odium excitetur adversus
(P. II, *Tbüm, Inst. Phil. Pr.*) N per-

personam, excitari potest adversus vitia, quibus laborat.

§. 44.

Odium in mente prodit, ubi in altero deprehenditur, quod tedium creat (§. 116. *Psychol.*). In fugam adeo conjicitur, si alterius osor convictus reddatur, illud, ex quo tedium percipit, revera non adesse, aut ita esse comparatum, ut absque ratione tedium inde contrahamus.

§. 45.

Quoniam hic affectus valde noxius & plurimarum actionum malarum scaturigo existit, vel ipsa experientia teste: id omnino agendum est, ut ad ea potissimum animum advertamus, quæ bona sunt in aliis, & mala in bonam partem vertamus (§. 116. *Psychol.*).

§. 46.

Irrisio est lætitia ex alterius infelicitate orta (§. 117. *Psych.*). Cessat itaque ostendendo irridentis errorem esse de alterius infelicitate judicium, vel in ipso facto committi errorem.

§. 47.

Immo quoniam affectus iste ab insigni odio ortum trahit (§. 117. *Psych.*); sublatq odio cessat irrisio (§. 44.).

§. 48.

§. 48.

Invidia est rædium ex infelicitate alterius perceptum (§. 118. *Psych.*). Supprimitur adeo, si monstremus, vel invidentis iudicium de alterius felicitate esse erroneum, vel in ipso facto committi errorem.

§. 49.

Ex odio nascitur invidia (§. 118. *Psych.*). Exspirat itaque odio extincto (§. 44.).

§. 50.

Quodsi ægre ferimus alterius felicitatem, quod nobis eam deesse iudicamus; omnis bonorum nostrorum cumulus conferendus est cum bonis, quæ alteri adsunt, non neglecta quoque utriusque fortuna adversa, præsertim si fortuna secunda fuerit connexa cum sinistra, ut appareat, nos respicere bonum, tanti mali socium.

§. 51.

Misericordia est rædium ex infelicitate alterius perceptum (§. 119. *Psych.*). Exinguitur adeo, dum ostendimus, nostrum de infelicitate alterius iudicium esse erroneum, vel nos circa ipsum factum errare.

§. 52.

Ex amore nascitur misericordia (§. 119.

Psychol.). Deletur ergo, amore extincto
(§. 42.).

§. 53.

Acquiescit in se ipso, qui ob bonum a se patratum lætatur (§. 120. *Psych.*). Ubi hoc fieri non conducit: convincendus est, vel actionem suam non esse istius commatis, cujus videtur; vel iudicium de ipsa erroneo suffultum esse principio.

§. 54.

Pœnitet eum, qui ob malum a se patratum contristatur (§. 121. *Psych.*). Cessat igitur pœnitentia, dum convincitur, actionem ipsius non esse malam, sive non esse ejus speciei, ad quam eandem refert, sive ex errore statui, utrum bona sit an mala.

§. 55.

Gloria est lætitia orta super bono a nobis patrato, quatenus ad aliorum opinionem refertur (§. 122. *Psych.*). Exultat itaque, quamprimum quis convincitur opus suum esse minime bonum, non absq̃nili modo, quo ante (§. 54.), vel aliorum non istiusmodi futurum esse iudicium, quale expectat.

§. 56.

Enimvero quoniam gloria stimulus est ad præclara facta spretis difficultatibus & absque
lu-

lucris cupidine obeunda (§. 122. *Ppsych.*): idcirco minime extirpanda, sed tantummodo moderanda, ne ad devia deducat; id quod quomodo fieri debeat, ex officiis circa honorem (§. 73. & seqq. 90. & seqq.) cognoscitur.

§. 57.

Pudor oritur ex malo a nobis patrato vel patrando quatenus ad aliorum opinionem refertur (§. 123. *Ppsych.*). Extinguitur adeo, dum ostendimus, nos per errorem de actione malæ speciei vel in data hypothese statuere, aut alios, ad quorum opinionem eandem referimus, secus sentire, aut factum ipsum non referendum esse ad hanc speciem vel hypothesein, aut alios idem ad eandem minime relativos.

§. 58.

Quodsi aliorum sinistrum de actione mala a nobis perpetrata iudicium in dubium vocari nequit: tum aut convincendus erit, quem actionis suæ pudet, quod aliorum iudicium attendere minime habeat opus; aut docendus erit, ut hoc utatur stimulo ad contrariis eaque præclara præstanda.

§. 59.

Gratitudo oritur, ubi beneficia ab alio in nos profecta agnoscuntur (§. 124. *Ppsych.*). Evanescit adeo cum beneficiorum memoria, vel

ubi mutato rerum nostrarum statu, non tanti amplius a nobis fiant, quanti videbantur primum, vel ubi ex beneficio successu temporis aliquod nobis enascitur tedium, vel ubi a benefactore lædimur, & quæ sunt causæ complures aliæ. Neque enim semper veritatis, sed tantum opinionis habetur ratio.

§. 60.

Favemus alteri ob mores nobis acceptos (§. 125. *Psych*). Favor adeo cessat, ubi alter de moribus mutat judicium, vel convictus falsitatis principii, ex quo judicat, vel ipsos mores aliter sibi repræsentans, vel alias ob causas accidentales, veluti quod alia in subiecto, cui faver, postea animadvertit, quæ magis displicent.

§. 61.

Spes oritur ex bono obtinendo. Evanescit itaque, ubi convincimur, vel bonum non esse, quod speramus, vel idem a nobis frustra expectari.

§. 62.

Quoniam fiducia a spe non nisi gradu differt (§. 126. *Psych*), adeoque majori certitudine boni obtinendi nititur, ita ut veluti jam præsens idem intueamur (§. 126. 132. *Psych*); eadem de causa evanescit, ob quam spes in auras abit. Minuitur autem, si boni obtinendi

nendi non tantam esse certitudinem ostendatur, quanta videtur alteri.

§. 63.

Metus est a malo imminente (§. 127. *Psychol.*). In fugam ergo conjicitur ostendendo, malum non esse, quod metuimus, aut ^{non} imminere, quemadmodum videtur.

§. 64.

Desperatio cum a metu non nisi gradu differat (§. 127. *Psychol.*), ob mali magnitudinem, & quod de eo venturo nimis persuasi simus exorta: eadem de causa arcetur, ob quam metum fugari diximus (§. 62.). Ostendi tamen præterea potest, malum non esse, quantum videtur; nec tanta certitudine imminere, quantam judicat desperabundus.

§. 65.

Terror ex malo improvise oritur (§. 128. *Psychol.*). Minus prævisa cum evitari non possint: terror quoque præcaveri nequit, nisi quatenus casus futuros præmeditantur, ne ex improvise in nos irruat malum. Ubi autem in terrorem conjicimur, utendum est remediis generalibus (§. 29. & sq.).

§. 66.

Vacillat animus, voluptate atque dolore

alternante, propterea, quod certi fieri nequeamus, utrum bonum, in quod ferimur, sit obtentu possibile, necne (§. 129. *Pfych.*). Cessare ergo nequit, nisi evincatur, vel bonum non esse, quod ita videtur, minimum non esse tanti, quanti apparet, vel quanta spes vigeat ejus obtinendi, palam ostendatur.

§. 67.

Puſillanimis evadit, qui cogitat difficultatem boni obtinendi (§. 130. *Pfych.*): medemur adeo affectui, dum vel commonſtramus, non esse bonum, quod ita videtur; vel idem obtentu non adeo difficile esse.

§. 68.

Mora bonum obtinendi gignit desiderium (§. 131. *Pfychol.*). Ne igitur molestum sit: aut ostendendum est, id non esse bonum, quod ejus speciem præ se fert; aut evincendum, moram non esse tantam, quanta judicatur, vel in ea nullum situm esse momentum.

§. 69.

Ira ab injuria nobis vel aliis illata nascitur (§. 132. *Pfych.*). Ut igitur extinguatur, vel ostendendam est, illum, cui irascimur, non fecisse, quod ab eo factum sumimus; vel factum istud non esse istiusmodi, quale nobis
vi-

videtur; vel denique non esse in nos aut alios, quos amamus, injurium.

§. 70.

Ne vero facile irascamur : de actionibus in nos injuriis tempestive statuendum, ut judicia ista occasione data veluti sponte sese offerant (§. 41. *Psych.*). Tum etiam inquirendum est in rationes iræ vehementis, ut appareat, nos per errorem de injuria nobis illata statuisse, & ipsa affectus vehementia magis in nos ipsos injurios fuisse, quam alios, quibus irascebamur.

§. 71.

Quoniam vero affectus prorsus eradicari nequeunt (§. 28.): in eo tantum enitendum est, ut cum appetitu rationali consentiant, ne a virtutis tramite ad vitiorum devia nos abducant; id quomodo fieri possit, in casu dato minime latet, si cogitemus rationes, ob quas (§. 113. & sqq. *Psych.*) oriuntur. Omnis nimirum applicatio (§. 77. *Psych.*) ad hunc redit syllogismum practicum: In actione data hæc vel ista boni aut mali relatio occurrit. Ubi hæc vel ista boni aut mali relatio occurrit, ibi hic vel iste locum occupat affectus. Ergo in præsentī actione hic vel iste locum occupat affectus. Ut igitur excitetur, monstrandum erit, istam boni relationem hic adesse.

§. 72.

Quodsi hoc principium ea, qua par est, mentis acie intueamur: miram ejus foecunditatem deprehendemus. Ex eo nimirum deducere licet, circa actionum quamlibet speciem, appetitus sensitivi cum rationali consensum, de quo haecenus parum cogitarunt Philosophi, etsi is non infimum virtutis gradum absolvat (§. 53. *Phil. pr. un.*), quemque obtinere, hic labor, hoc opus (§. 118. *l. c.*).

§. 73.

Quoniam vero experimur, alios ad alios affectus vel natura vel consuetudine contracta esse proniores: ad flectendum alios, iis potissimum uti decet affectibus, ad quos proni deprehenduntur. E. gr. Si quis fuerit ad metum pronus, propterea quod idem ex malo imminente ortum ducit (§. 127. *Psych.*), representanda sunt pericula ex actione mala commissa, vel bona omissa oriunda.

SECTIO II.

DE VIRTUTIBVS INTELLE-
CTUALIBUS.

CAP. I.

DE VIRTUTIBUS INTEL-
LECTUALIBUS IN
GENERE.

§. 74.

Virtutes intellectuales appellantur habitus in-
tellectus in cognoscenda veritate & detegen-
da falsitate.

§. 75.

Omnis homo tenetur intellectum ad mayo-
rem perfectionis gradum evehere (§. 33. *Jur.*
nat.). Quamobrem cum virtutes intellectu-
ales intellectum perfectiorem reddant (§. 74.);
ad eas colendas obligatur omnis, quantum da-
tur (§. 31. *Jur. nat.*).

§. 76.

Quoniam voluntas emendari nequit, nisi in-
tellectum perficias (§. 16.): virtutum intelle-
ctualium inde elucet necessitas (§. 74.).

§. 77.

§. 77.

Nisi voluntas emendetur, non nisi umbra virtutis locum habet (§. 21.). Quamobrem cum voluntas emendari nequeat, nisi intellectus perficiatur (§. 16.); absque intellectus perfectione vera virtus minime datur. Hujus igitur præmium cum sit certissimum felicitas (§. 73. *Phil. pr. un.*): virtutum intellectualium cultura viam ad felicitatem pandit.

§. 78.

Habemus adeo motivum intellectus perficiendi, ut scilicet bonum atque malum accurate in dato quolibet casu discernere possimus (§. 141. *Psych.* & §. 110. *Phil. pr. un.*).

§. 79.

Quamvis vero ea potissimum cognitio reliquæ præferenda, qua in nostro vitæ genere & bono maloque discernendo habemus opus (§. 35. *Jur. nat.*); ferendum tamen non est, ut sub prætextu inutilitatis negligatur discendi occasio, aut prorsus contemnantur, quibus in nostro vitæ genere nos carere posse opinamur. Etenim hæc excusatio nulla est, nisi ubi cum neglectu magis necessariorum istis vacaremus (§. 34. 35. *Jur. nat.*).

§. 80.

Ne igitur ignaviæ nostræ velificemus :
exem-

exempla cum domestica tum aliena ponderanda sunt, quibus docemur, sæpius occurrere casus minime prævisos, ubi non modo utilia, verum prorsus necessaria experimur, quæ nullius utilitatis videbantur. Nec negligenda sunt exempla, quæ loquuntur, quomodo nobis vel aliis aliqua notitia inimicorum amorem atque Patronorum favorem conciliarit,

§. 81.

Enimvero ne in judicio de utilitate cognitionis errori sit locus, non modo singularum perfectionum mentis atque corporis statusque nostri externi habenda est ratio (§. 20. *Ph. pr. un.* & §. 60. & sqq. *Jur. nat.*); sed exemplis præsertim cum domesticis tum alienis docere debemus, quod sæpissime a vero aberraverit de utilitate cognitionis judicaturus. Sane, qui veretur, ne cognitionem olim sibi utilem negligat; in casu dubio partem tutissimam amplectatur.

§. 82.

Similiter, quamvis veritati consentaneum sit, quod non obligemur ad eam cognitionem, quæ sive ob naturalem quandam impotentiam sive ob externorum subsidiorum defectum in potestate non est (§. 31. 32. *Jur. nat.*); sollicita tamen circumspectio necessaria est, ne de eo, quod in potestate non est,
præ-

præcipitemus iudicium, officio nostro defuturi (§. 35. 36.).

§. 83.

Qui igitur ingenii defectum accusat: eundem intempestive agnoscit, ubi intentatum relinquit, quod vires ingenii excedere putat, nec in continuando tentamine fuit pertinacis laboris. Exercitio enim acquiritur habitus, *exercitium* vero eorundem actuum repetitione continua absolvitur.

§. 84.

Exempla cum plus valeant adversus sensuum iudicia, quam demonstrationes (§. 111. *Pb. pr. un.*): usu non careret, si doceretur, quos ingenio minus valentes progressus fecerint, modo ingenii æstimandi methodus proflaret.

§. 85.

Qui tempus atque sumtus sufficere negat ad studium aliquod tractandum: eum pariter exemplis, ubi a vero aberrat iudicium, contrarium docere debet.

§. 86.

Ut autem boni atque mali ignorantiam obligationi naturali (§. 36. *Jur. nat.*) satisfacturi, quantum in nobis est, evitemus: probe perpendendum est, ignorantiam non excusare, nisi fuerit invincibilis (§. 37. *Jur. nat.*).

§. 87.

§. 87.

Cum invincibilis non sit, quam evitare in nostra positum fuerat potestate (§. 37. *Jur. nat.*), animi corporisque viribus subsidiisque externis minime deficientibus (§. 32. *Jur. nat.*); nihil intentatum relinquere, nec in continuando tentamine remittere debemus, ut ad eam mentis aciem evehamur, quæ bono atque malo in dato quolibet casu discernendo sufficiat.

§. 88.

Motiva præbet conscientia, nos in casu ignorantiae vincibilis accusans (§. 94. 95. *Phil. pr. un.*), & morsus conscientiae excitans (§. 97. *loc. cit.*), dum evigilat (§. 99. *loc. cit.*).

§. 89.

Ceterum ignorantia & intellectus perficiendi neglectus semetipsam prodit, ut aliis signis, quibus detegeretur, non habeamus opus.

CAP. II.

DE ACUMINE.

§. 90.

Accumen est facultas multa in eodem objecto distinguendi (§. 63. *Psych.*). Constat
an-

antem experientia, hanc facultatem posse in habitum adolescere. Quamobrem dubitari nequit, quod in numero virtutum intellectualium locum mereatur (§. 74.), et si *Aristoteles* ipsumque secuta omnis philosophantium turba ante Philosophum nostrum ejus nullam fecerint mentionem, propterea, quod in mentis cognitione non eos fecere progressus, quos *Wolfio nostro* reservaverat providentia divina.

§. 91.

Ad virtutes intellectuales colendas obligatur omnis homo, quantum datur (§. 75.): neminem itaque acumen negligere decet.

§. 92.

Habitus non comparatur, nisi exercitio: ergo nec acumen absque exercitio comparare licet (§. 90. 33.).

§. 93.

Quoniam itaque vi acuminis multa in eodem objecto distinguimus (§. 63. *Psych.*): a prima juventute danda est opera notionibus distinctis (§. 7. *Log.*), exercendo methodum alibi (§. 53. *Log.*) traditam.

§. 94.

Notio distincta acquiritur, ubi attentione nisi, singula primum sigillatim contemplamur, mox eadem inter se conferentes ordinem, quo

quo se invicem sequuntur, ac nexum, quo inter se coherant, perspicimus (§. 53. *Log.*); a primis itaque incunabilis adsuesieri debemus, ut ad omnia, quæ nobis obvia sunt objecta, mentem adferamus attentam, & super iis reflectamus.

§. 95.

Exercitii hujus facilitandi gratia, non irritò successu commendantur figuræ geometricæ, & numerorum species diversæ, a veteribus præsertim commemoratæ in arithmetica.

§. 96.

Enimvero cum illi potissimum cognitioni studendum, qua in bono maloque discernendo opus est (§. 35. *Jur. nat.*); opera imprimis danda est, ut boni atque mali in casibus singularibus non desint notiones distinctæ speciales, acimine circa actiones patrandas vel patratas sese exerente (§. 90.).

§. 97.

Cui notiones boni atque mali speciales in promptu sunt, is in dato quolibet casu de actionibus ex veritate statuet (§. 77. *Psych.*). Verendum consequenter non est, ut conscientia erronea seducti malas patremus, bonas vero omittamus (§. 83. *Ph. pr. un.* & 140. *Psych.*). & periculo nos exponamus, conscientiæ olim nos accusaturæ (§. 94. *Ph. pr. un.*), ac in ille tædia creaturæ (§. 95. 97. *l. c.*).

§. 98.

Cui notiones boni atque mali speciales in promptu sunt, is de aliorum actionibus non ex errore statuet. Atque adeo non imitabitur, quæ ab aliis male facta, nec iniquis censuris in alios injurius evadet, nec enipiam in malo proposito perseverandi ansam præbebit.

§. 99.

Haud parum reprehendendi sunt, qui acumen contemnunt notiones morales distinctas minime curantes, sed ex confusis judicia de actionum moralitate, virtute atque vitiis præcipitantes.

§. 100.

Quodsi acumen ad universalialia extenditur, quæ singularibus & specialibus insunt: incrementorum in sera adhuc ætate capax est homo; id quod suo exemplo probat philosophus.

§. 101.

Neque vero poenitebit studii indefesse continuati, cum notionum universalium longe amplissimus sit Cæus (§. 77. *Psych.*).

§. 102.

Ut quis ea, quæ in objecto distinguit, suis quoque nominibus insignire valeat: verborum quoque significatum rimari decet acuminis studiosos (§. 23. *Log.*).

§. 103.

Hoc ipso obtinetur simul, ut acumine suo & pro-
fit alteri.

CAP. III.

DE PROFUNDITATE.

§. 104.

P*rofunditas* est facultas notionem distinctam in
alias simplices continuo resolvendi (§. 62. *Psych.*). Constat autem experientia faculta-
tem hanc absque prævio exercitio vix ac ne vix
quidem sese exercere, exercitio autem ad ha-
bitum adolescere: quamobrem dubitari ne-
quit, quod in numero virtutum intellectualium
recte collocetur a philosopho, etsi ceteris huc
usque neglecta fuerit.

§. 105.

Ad virtutes intellectuales colendas omnis ob-
ligatur homo, quantum datur (§. 75.): profun-
ditas itaque non est negligenda, si quidem fue-
rit in potestate (§. 32. 33.).

§. 106.

Habitus non nisi exercitio comparatur: ergo
nec profunditatem absque exercitio comparabis
(§. 104.).

§. 107.

Profundus notiones distinctas in alias simpliciores continuo resolvit (§.62. *Psyche.*): ergo ad profunditatem obtinendam haud parum conducit, si definitiones eo ordine se invicem excipiant, ut definitum anteriorum ingrediatur in definitiones posteriorum. Hanc igitur legem sibi fixit philosophus non modo in Mathesi, verum etiam in philosophia, omnium omnino disciplinarum definitiones hoc pacto inter se connectens, ejusque vestigia & nos in præsentì opere pressimus.

§. 108.

Ad majorem gradum extollitur profunditas, ubi cum acumine jungitur (§.63. *Psyche.*). Huic itaque operam daturus: acumen jungere ac imprimis ad universalìa, quæ singularibus & specialibus insunt, extendere debet.

CAP. IV.

DE INTELLIGENTIA.

§. 109.

Intelligentia, quæ virtutum intellectualium prima vulgo habetur, per habitum principiorum cognoscendi definitur.

§. 110.

Quoniam principium cognoscendi continet rationem, cur alterum cognoscatur (§. 93. *Ontol.*); omnis autem nostra cognitio a definitionibus & judiciis intuitivis dependet (§. 51. *Log.*): intelligentia pollet, qui gaudet habitu formandi definitiones & judicia intuitiva (§. 109.).

§. 111.

Definitiones sunt notiones distinctæ completæ (§. 14. *Log.*). Qui notionem distinctam formare voluerit, in objecto distinguere debet, quæ diversa insunt (§. 53. *l. c.*): acumine igitur opus habet (§. 84.).

§. 112.

Intelligentiæ igitur operam daturum, acuminique quoque studere oportet,

§. 113.

Notiones claræ etsi confusæ sufficiunt ad rem oblatam agnoscendam (§. 7. *Log.*), eamque nomine suo compellendam (§. 76. *Psychol.*). Quamobrem cum notionibus distinctis & judiciis intuitivis formandis (§. 53. & 54. *Log.*), veroque verborum significatui eruendo (§. 23. *Log.*) ansam suppeditent; initium intelligentiæ sunt (§. 110.).

§. 114.

Intelligentiæ igitur operam daturus, ante studeat notionibus clavis licet confusis, discatque nomina eisdem convenientia.

§. 115.

Quodsi non modo totius nomen, sed etiam nomina partium singularum notentur: a notionem confusa ad distinctam absque ullo tædio ac labore transitur.

§. 116.

Notiones vero obscuræ cum non sufficiant ad rem repræsentatam agnoscendam (§. 5. *Log.*): absit, ut vocabulis, quibus obscura aut prorsus nulla respondet notio, memoriam oneremus. Istiusmodi enim vocabulis jungi solent a iudicaturis notiones deceptrices, conscientiam erroneam parientes (§. 83. *Phil. pr. un.* & §. 33. *Log.*), olim nos accusaturam (§. 94. *Phil. pr. un.*) & sexcenta tædia procreaturam (§. 95. *l. c.*).

§. 117.

Intelligentia caret, qui non ex notionibus de rebus iudicat, aut ex principiis æquipollentibus, ubi istæ deficiunt, quæ in definitionum locum surrogantur.

CAP. V.

DE SCIENTIA.

§. 118.

Scientia est habitus illud demonstrandi, quod affirmamus vel negamus (§. 62. Log.). Qui igitur scientia pollet: quod affirmat vel negat syllogismis eo usque inter se connexis confirmare valet, donec occurrant, quorum præmissæ definitionibus, experiētiis indubitatis, axiomatis, propositionibus identicis &c. constant (§. 50. Log.).

§. 119.

Quodsi ergo quis vel in se ipso vel in alio, experimentum faciat probandæ thesæ, quæ defenditur: latere haud potest, utrum ipse, vel alter scientia polleat, nec ne.

§. 120.

Quoniam scientia definitionum aliorumque principiorum evidentium præsupponit notitiam, unde enunciationum veritas pendet (§. 118.); scientia præsupponit intelligentiam (§. 109. & sqq.).

§. 121.

Intelligentiæ igitur ante studere debemus, quam ad scientiam animum appellimus (§. 120.).

§. 122.

Quoniam unumquemque decet operam navare, ut distinctam cognitionem (§. 34. *Jur. nat.*) boni inprimis atque mali (§. 38. *l. cit.*) in potestatem suam redigat; distincta autem cognitio (§. 7. *Log.*) absque scientia non detur (§. 118.): quemlibet etiam decet operam impendere, ut scientia, boni præsertim atque mali, polleat.

§. 123.

Nisi quod affirmas vel negas demonstrare noveris, sed scientia carueris (§. 118.), opinionibus contentus (§. 93. *Log.*): fieri omnino potest, ut per errorem statuas (§. 64. *Log.*). Hinc porro fieri potest, ut secundum conscientiam erroneam agas (§. 83. *Phil. pr. un.*), atque ut conscientia te aliquando accuset (§. 123. *Phil. pr. un.*): id quod conscientiae custodiae repugnat (§. 120. *l. c.*).

§. 124.

Demonstratio conscientiam reddit rectam atque certam & scrupulorum conscientiae tollendorum medium est (§. 121. 122. *Phil. pr. univ.*). Scientia itaque (§. 118.) conscientiae custodiendae medium est (§. 120. *Phil. pr. un.*),

§. 125.

Cum scientia dicat habitum demonstrandi (§. 118.): non dubito fore aliquos, qui sibi per-

persuadebunt, perperam eandem inter virtutes intellectuales referri, ad quas pro virili colendas homo obligatur. Habitum enim demonstrandi Mathematicis convenire, nec fieri posse, ut homo de face plebis eundem sibi comparer, qui tamen ab obligatione naturali non est immunis.

§. 126.

Enimvero adsunt varia, quæ ad hæc reponi possunt. Nimirum 1. oppido falluntur, qui opinantur, demonstrandi habitum solis Mathematicis convenire, cum demonstratorum in moralibus usum, immo necessitatem abunde ostenderimus (§. 105. 112. 121. & sqq. *Phil. pr. un.*), idque in istiusmodi casibus, qui ad omnes omnino homines extenduntur. Nec, 2. ab experientia abhorret, quod homines plebeji demonstrandi habitum sibi comparare, immo eodem multos eruditorum antecellere possint, quod non mirum videtur intelligentibus, siquidem methodus demonstrandi communi cogitandi modo ad amissim respondet (§. 80. *Psychol.*). Notandum 3. habitum demonstrandi hic potissimum urgeri in boni malique noticia (§. 122.), nequaquam vero præcipi, ut homo quilibet omni scientiæ vacet, id quod fieri non posse per se patet. Quemadmodum vero 4. in omni virtute dantur

gradus, nec unusquisque hominum eundem ubivis gradum sortitur; ita perinde diversi dantur scientiæ gradus inter homines diversos diversimode distributi. Quamobrem 5. hic quam maxime repetendum, quod jam alibi monuimus (§. 31. *Jur nat.*), nonnulla dari, ad quæ genus humanum in genere spectatum obligatur, etsi non perinde singula ejus individua eadem obligatione teneantur; nec opus est, obligationem naturalem usque ad impossibilia extendi.

§. 127.

Demonstrandi habitus, quemadmodum ceteri omnes, continuo exercitio acquiritur. Ut igitur in demonstrationibus sis assiduus: legendi sunt (§. 72. *Log.*) libri methodo demonstrativa conscripti, quo demonstrationum quoque ideam animo concipias (§. 52. *Log.*). Ut autem hæc notio fiat distincta: demonstrationes resolvendæ sunt (§. 53. *Log.*) in sua principia, quo concludendi forma & ratiociniorum concatenatio (§. 50. 60. *Log.*) appareat. Utile præterea est, ubi simul demonstrationum identitatem cum naturali cogitandi modo frequenter mediteris (§. 80. *Psych.*) & eam Logicam tibi reddas perspectam, quæ non nisi naturalis cogitandi & cognoscendi modi distincta explicatio est (§. 2. *Log.*), ut constet, quomodo regulis demonstrandi fuerit

rit satisfactum in dato quolibet casu. Assiduitatem in his exercitiis ipsa difficultas hunc habitum comparandi urget; ejus autem insignis utilitas suadet (§. 123. 124.).

§. 128.

Enimvero modo exercitia eo usque continuaveris, donec demonstrationum pulchritudine capiaris; ipsa quæ inde percipitur voluptas, ad continuandum ea stimulum addit.

§. 129.

Exercitiorum neglectui debetur, quod pauci admodum demonstrandi habitu polleant, atque scientia adeo rara sit (§. 110.).

§. 130.

Quoniam tamen demonstratio cum communi cogitandi modo ad amissim convenit (§. 80. *Psychol.*): ideo accidit, ut bene multi negotia rerum administrantes rerum particularium scientiam sibi comparent, eademque felicissime utantur.

§. 131.

E contrario, si qui eruditorum in disciplinis addiscendis methodo utuntur a demonstrativa, consequenter a communi cogitandi modo aliena (§. 80. *Psych.*): illi naturales dotes pervertunt, ut scientia non modo sint

vacui, verum etiam ad eam capeffendam prorsus inhabiles,

§. 132.

Qui demonstrationis ideam si non distinctam, minimum claram (§. 127.), animo concepit; is in dato quolibet casu sine negotio iudicabit (§. 5. 33. *Log.*), num alter polleat scientia, ubi ejus, quod affirmat vel negat, rationem requisiverit (§. 118.). Thesin enim probaturus domonstrandi formam minime observabit, historica tantum rerum cognitione imbutus, vel umbram quandam scientiæ affecutus.

§. 133.

Demonstratio convictionem parit (§. 75. *Log.*). Quamobrem qui scientia pollet, ab eo, qui diversa sentit, sese minime in dubitationem adduci patitur, ut anceps inter affirmandum & negandum hæreat (§. 118.).

§. 134.

Hoc tamen non obstante, negari haud quam potest, esse scientiæ deficientis iudicium, si quis objectiones dissolvere nescit, quarum falsitatem pervidere eum oportet, qui veritatem thescos perspexit.

§. 135.

Qui scientiam amat, voluptatem ex ea per-

percipit (§. 115. *Psyche*). Quod si ergo quis voluptate perfunditur, quando de scientia aut veritatis demonstratione verba fiunt: amorem scientiæ prodit.

§. 136.

In admirationem rapimur, quando fieri posse experimur, quæ fieri haud posse persuasi fueramus: admiratio itaque ignorantiae filia est.

§. 137.

Ne tamen ex admiratione alterius ignorantiam inferas, ubi locum minime habet; probe considerandum est, num ipsa veritas, de qua sermo est, admirationis causa existat, an admiratio ideo excitetur, quod non putassemus, eam ab hoc autore inveniri potuisse, aut in libro isto extare.

§. 138.

Cavendum præterea est, ne ab ignorantia particulari ad universalem argumentemur, nec ab ignorantia terminorum technicorum ad ignorantiam rei ipsius concludamus.

§. 139.

Ardore scientiam promovendi flagrat, qui de veritatibus antea sibi minime cognitis gaudet: est enim amoris insignis indicium (§. 115. 113. *Psyche*). Qui autem veritatem impen-

penſe amat, multas omnino veritatēs cognoscere avet.

CAP. VI.

DE SOLIDITATE.

§. 140.

Soliditas est habitus diſtincte ratiocinandi & ratiocinia concatenandi, tantoque quis ſolidior cenſetur, quanto in probandis præmiſſis ad prima principia ſeu notiones irrefolubiles propius accedit (§. 214. *Psychol.*). Cum igitur ſcientia ſit habitus demonſtrandi, quod affirmamus vel negamus (§. 118.): ſoliditas ſublimum ejus gradum conſtituit.

§. 141.

Quamobrem ſi exercitiorum, quæ ad comparandam ſcientiam commendavimus (§. 127. & ſeq.) fueris tenax; ſoliditatem tandem aſſequeris.

§. 142.

Prodit autem ſoliditatem, qui demonſtrare novit propoſitiones, quas alii tanquam principia abſque ulteriore probatione admittunt; & qui ex notionibus a priori demonſtrare valet, quæ alii a poſteriori ſumunt (§. 140.).

§. 143.

§. 143.

In primis autem evidens soliditatis indicium est, ubi quis multas veritates inter se connectere, & procul remotas, ex principiis e longinquo petendis, continuo ratiociniorum filo deducere valet (§. 142.).

§. 144.

Quoniam intellectum perficere tenemur, quantum datur: quin ad soliditatem quoque continuo majorem tendere debeamus — ecquis dubitabit (§. 33. *Jur. nat.*) ?

§. 145.

Cum omnis habitus intellectus cognoscendi veritatem & detegendi falsitatem virtutum intellectualium nomine veniat (§. 75.): soliditas quoque in earum censum refertur, etsi *Aristoteles* eumque secuta philosophantium schola eam non expenderint, sed cum scientia dubio procul confederint,

§. 146.

Nova hinc ratione conficitur, soliditatem esse excolendam (§. 76.).

§. 147.

Quoniam soliditas sublimiorem scientiæ gradum constituit (§. 140.): ulterius patet, — quod

quod ad eam adspirare nequeat, nisi qui multa jam scientia pollet.

§. 148.

Ex eadem quoque ratione (§. 140.) soliditas eos inprimis decet, qui scientiæ incrementa curæ cordique habent.

§. 149.

Boni præsertim malique scientiam sectari convenit (§. 122.); in ea igitur ut soliditatem consequemur opera danda est indefessa.

§. 150.

Laborem suadent fructus ex boni malique scientia resultantes, de quibus diximus ante (§. 122. & sq.).

CAP. VII.

DE ARTE INVENIENDI.

§. 151.

Ars *inveniendi* est habitus ex quibus divinitatibus cognitis eliciendi alias incognitas (§. 84. *Psych.*); adeoque in censum virtutum intellectualium venit (§. 74.), consequenter eadem excolenda, quantum datur (§. 76.).

§. 152.

§. 152.

Adfunt quoque rationes speciales, quæ idem suadent; nemo scilicet prævidet casus futuros, & quænam in iisdem usui esse queat cognitio. Ut igitur ad omnes simus parati: opus est habitu, ex veritatibus cognitis eliciendi incognitas, hoc est, arte inveniendi (§. 151.).

§. 153.

Proficuum est generi humano, si ars inveniendi excolitur, cum sic plures in ipsius usum elici possint veritates.

§. 154.

Cum veritas vel a priori eruatur, vel a posteriori (§. 51. Log.): ars inveniendi duplex est, alia nimirum, qua veritas ex observationibus & experimentis elicitur, alia vero, qua ex notionibus & propositionibus cognitis veritates concluduntur. Prior itaque in *artem observandi & experimentandi* dividitur; posteriori nomen *artis inveniendi* peculiari quadam ratione vindicatur.

§. 155.

Artis observandi ideam nanciscimur, si observationes ab aliis factas meditemur, inquirentes in actiones, ob quas unumquodque eorum, quæ enumerantur, annotarint, & quomodo regulas de formandis

(P. II, *Thüm. Inst. Phil. Pr.*) P no-

notionibus distinctis atque judiciis intuitivis applicuerint (§. 53. & sqq. *Log.*). Ut autem eandem quoque ipsimet consequamur: imitari artificia observandi, quæ in aliis annotavimus, in casu simili, conducit.

§. 156.

Neque usu suo destituitur, si quidem præterea disquiramus, an nos quoque ad eadem attenti fuissetus, quæ ab altero annotata deprehendimus. Quodsi appareat, in aliquo defuturum fuisse nostrum acumen: ratio defectus in aprium producenda.

§. 157.

Quoniam nemo mortalium artem excoluit observandi tanta industria tantoque successu, quem Astronomi fuerunt experti; quin Astronomorum observandi methodos ineditatus, illam perspicere valeat, dubio caret.

§. 158.

Quibus hæc via parum trita: illi regulas veritatem a posteriori investigandi (§. 53. & sqq. *Log.*) traditas sibi familiares reddant; veritates a posteriori detectas, & passim apud eruditos obvias secundum easdem examinent, ut appareat, quomodo inventores beneficio illarum regularum ad eas pervenerint, & quotiescunque observandi oc-

casu sese offert, eodem modo easdem applicent alios cum ratione imitaturi.

§. 159.

Qui philosophiam naturalem cum successu hodie excolunt; experimentandi arte felicissime utuntur. Et quæ nos pro instituti ratione in institutionibus philosophiæ experimentalis breviter delineavimus experimenta: eadem philosophus, annotatis minimis quibuslibet circumstantiis, una cum omnibus artificiis singularibus quam accuratissime descripsit. Quem igitur Astronomia practica artis observandi cultoribus præbet usum: eundem a philosophia experimentalis methodo philosophi pertractata expectent artis experimentandi studiosi.

§. 160.

Artem denique inveniendi proprie sic dictam consecuturum, artificia meditari decet, quibus alii inventa sua debent, eademque in casu simili imitari.

§. 161.

Ut autem imitatio cum ratione fiat: regulæ quædam artis inveniendæ generales perspectæ sint necesse est, & secundum eas examinandæ veritates ab aliis inventæ, quomodo earum applicatione erui poterint.

Utilitatem istiusmodi exercitiorum , propria fretus experientia , non possum non commendare.

§. 162.

Quoniam inter disciplinas mathematicas Arithmetica , Trigonometria , Algebra cum omni analysi Mathematicorum sunt methodi inveniendi speciales ; acumine præditus methodi generalis regulas inde derivabit (§. 63. *Psych.*). Dedit ejus rei specimina philosophus in Elementis Arithmeticæ , quæ leguntur Tomo primo Elementorum Matheseos universæ §. 116.

§. 163.

Veritas latens non eruitur , nisi ex cognitis (§. 151.). Artem igitur inveniendi , qui cum successu exercere instituit : veritates ab aliis inventas sibi cognitæ atque perspectas familiaresque reddere tenetur , non neglecto examine logico atque heuristico (§. 161.). Hinc dijudica , quæ *Illustris de Tschirnhausen* in Medicina mentis p. m. 30. de arte inveniendi magnifice scribit : *hanc qui sibi comparavit , omnes alias scientias una cum ea sibi acquisivit , aut eas absque alterius adjumento semper sibi acquirendi potentiam habet : quin omnes utiles scientiæ , quæ ab aliis præter hanc statuuntur , non nisi hujus artis specimina sunt. Ab hac scientia*
vul-

vulgares philosophi longius remoti sunt, quam vulgus existimat,

§. 164.

Artem inveniendi inventa probant, etenim opus commendat artificem.

§. 165.

Ne autem iudicium a vero aberret: probe notandum est, artem inveniendi minime ex utilitate inventi, nec ex frustrato multorum per plura secula successu, sed ex modo, quo inventor veritatem antea incognitam in apricum produxit, æstimandam esse.

§. 166.

Quodsi eundem assequi haud poterimus: suspendendum est iudicium, siquidem non omnia in nostra sunt potestate.

§. 167.

Et si plura hoc de argumento delicato addat philosophus; ab iis tamen exponendis manum retrahimus, ne brevitatis dictioni, cui studere nos oportet, officiat perspicuitati; unicum adhuc annotasse contenti, quod accurata scientiarum & artium historia, ab omni seculorum memoria repetita, & ad nostra usque tempora continuata, non parum commodi huic instituto allatura sit.

§. 168.

Sunt, qui aliorum inventa sibi arrogant, quorum fastum inopportunum ex circumstantiis singularibus subinde retundere licet.

§. 169.

Qui præ se fert, quasi omnia sibi, aliis nihil debeat; næ is aut parum novit, aut veritati minime consentanea pronunciat, cum non nisi ex aliis jam cognitis eruatur veritas, primis inventoribus in limine subsistentibus,

§. 170.

Ne vero quempiam offendat ars inveniendi, inter virtutes intellectuales relata, propterea quod fieri haud quaquam posse sibi persuadeat, ut omnes omnino homines ejus compotes fiant: ea hic repetenda, & ad præsens argumentum applicanda sunt, quæ in casu simili (§. 125. & seqq.) de habitu demonstrandi incalcavimus,

§. 171.

Ceterum artis inveniendi utilitas non parum se commendat in vitæ negotiis expediendis, multoque magis in negotiis publicis tractandis, ubi non modo de ipsis negotiis ferenda sunt judicia, verum & consilia capienda, quomodo ad metam perveniatur. Sed de his plura dicemus suo loco in Politica.

CAP. VIII.

DE CULTURA INGENII,

§. 172.

Ingenium philosopho est facilitas observandi rerum similitudines (§. 87. *Psycb.*). Quoniam itaque dispositio naturalis, experientia teste, usu perficitur: in habituum intellectus numerum, consequenter ejus cultura inter virtutes intellectuales recte refertur (§. 75. 76.).

§. 173.

Homines in actibus suis empirici sunt, (sunt autem plerique, nec illis exceptis, quorum consiliis regitur mundus,) in plerisque olim facta in casu simili imitantes (§. 75. *Psycb.*). Ne igitur judicium de casuum similitudine fallat, in quod sæpissime accidere solet; & ut casuum similitudo promte agnoscat, nec Tantalus inter undas sitiatur, ingenio opus est (§. 172.).

§. 174.

Culturam ingenii præterea suadet, ejus in inveniendis utilitas, immo necessitas (§. 87. *Psycb.*). Artis autem inveniendi fructus sunt prorsus egregii (§. 153. 154.).

§. 175.

Opus quoque ingenio est in condendis notionibus specierum atque generum (§. 53. 57. *Log.*). Sunt enim species individuorum, genera specierum, & genera superiora generum inferiorum similitudines (§. 11. *Log.*): ingenii autem est observare rerum similitudines (§. 87. *Psychol.*).

§. 176.

Qui in objectis obviis accurate discernit quæ diversa sunt, & quæ in diversis discrevit, inter se confert, ille idenditatem eorundem deprehendit, si qua occurrit. Quamobrem cum idenditas eorum, per quæ res discerni debent, similitudinem absolvat (§. 23. *Ontol.*); patet fane hoc modo similitudinem objectorum agnosci. Habemus adeo medium exercendi ingenium.

§. 177.

Acumine multa in eodem objecto distinguuntur (§. 91.): patet ergo, ingenium perficiacumine (§. 176.).

§. 178.

Habemus adeo motivum excolendi ingenii novum (§. 141. *Psych.*).

§. 179.

Inter exercitia perficiendi ingenii commendatur lectio librorum ingeniosorum, si-
ve

ve argumentum sive diſtinctionem ſpectes. Verbis ingenium produunt Oratores atque Poëtæ; rebus autem inventores nova artificia heuristica excogitantes.

§. 180.

Ex diſtinctione itaque ac artificiis heuristicis, itemque artificiis demonſtrandi, ingenium innotescit, ſubinde quoque ex actionibus.

CAP. IX.

DE SAPIENTIA.

§. 181.

S*apientia* philoſopho eſt habitus actionibus ſines convenientes præſcribendi & media ad eos ducentia eligendi, ſinesque particulares ita ſibi invicem ſubordinandi, ut propiores ſint media remotiorum (§. 286. *Psychol.*). Cum ad eo eadem opus ſit, ſi quidem actiones legi naturali conformiter dirigere (§. 103. *Phil. pr. un.*) atque conſequenter virtutem ſectari velis (§. 49. *l. c.*): quin ad ſapientiam nobis comparandam obligemur, dubitari nequit.

§. 182.

De actionibus in ſingulari judicium fieri
P 5 ne.

nequit, nisi applicatione principiorum generalium (§. 33. *Log.*). Nec aliter de finium subordinatione, & mediis ad eos ducentibus judicatur. Ut itaque in istiusmodi judiciis discursivus promptus sis; habitu demonstrandi (§. 58. *Log.*), consequenter scientia pollere debes (§. 62. *l. c.*). Est itaque scientia medium sapientiæ (§. 99. *Ontol.*).

§. 183.

Negari quidem non potest, maximam hominum partem, tantum non semper plurimos, plerumque in actionum suarum directione alios imitari, expectatione casuum similium scientiæ loco utentes (§. 75, *Psych.*). Enimvero cum expectatio casuum similium non eadem firmitate nitatur, qua scientia nititur (§. 62. *Log.*); adeoque lapsus facilius sit, præsertim ubi ingenio careas (§. 173.): sapientia absque scientia est admodum imperfecta. Idem elucet abunde ex iis, quæ de sapiente actionum directione in philosophia practica universalis (§. 103. & seq.) uberius demonstrata sunt.

C

§. 184.

Requiritur ergo ad sapientiam boni mali-que & actionum humanarum negotiorum-que vitæ inprimis scientia (§. 182.). Etsi igitur in disciplinis aliis scientiam insignem fueris

ris consecutus ; habitus tamen demonstrandi, quam tibi v. gr. in Mathesi comparasti, in vita minime utilis, ubi materia ratiocinandi cares (§. 33. *Log.*).

§. 185.

Arte inveniendi ex cognitis eliciuntur incognita (§. 84. *Psych.*) : ergo ad sapientiam ars ista mirum in modum conducit (§. 181.).

§. 186.

Quoniam vero ars inveniendi exerceri nequit, nisi præsto sit veritatum inventarum apparatus (§. 163.) ; eadem quoque sapientiam parum juvat, nisi veritatibus ad usum vitæ compositis perspectis.

§. 187.

Incrementa haud contemnenda capit sapientia, si negotia ab aliis gesta ita mediteris, ut in finem ab ipsis intentum inquires ; media, quibus in prosequendo fine usi sunt, mediteris, & quid ad finem consequendum contulerint, observes, non neglectis iis, quæ^æ vel superflua, vel prorsus impedimenta fuerint. Ita nimirum ex alieno casu sapiens, & quæ vitanda sint, discet.

§. 188.

Istiusmodi meditationes cum non sint cuiusvis ; illorum est de genere humano bene me-

mereri, quibus istam meditando facultatem Deus concessit (§. 31. *Jur. nat.*).

§. 189.

Iis consequenter incumbit parare aliis sapientiae media, qui acumine & ingenio pollent (§. 63. 37. *Psych.* & 137. *Eth.*).

§. 190.

Hinc vero itidem patet acuminis & ingenii exercendi necessitas atque utilitas,

§. 191.

Et si autem ad sapientiam requiratur, ut finis sit legitimus, nequaquam autem sufficiat, quod media fini respondeant (§. 181.): hominum tamen improborum exempla meditantibus offerunt, quibus sapientiam locupletare valent, si quidem mediis utuntur ad finem ducentibus. Unde ipse *Christus* eum in finem exemplum iniusti oeconomi commendat.

§. 192.

Quoniam non singula media, quæ ad finem ducunt, ejusdem sunt valoris, cum alia ambages respuant, alia aliis prærogativis emineant: ideo in decernendis mediis vitanda præcipitantia, ne electio cum ratione redargui possit,

§. 193.

§. 193.

Sapientia nos instruit, quomodo actiones legi naturali conformiter in dato quolibet casu dirigantur (§. 181.), consequenter quomodo felicitatem consequamur (§. 73. *Phil. pr. un.*). Quamobrem a vero minime aberrat *Leibnitius* in præfat. ad Codicem Juris gentium diplomaticum, cum sapientiam per scientiam felicitatis definit.

§. 194.

Sapiens agit propter finem eumque fini ultimo, nempe perfectioni suæ subordinat (§. 103. *Ph. pr. un.*): sapientiæ itaque indicium est, si quis ad agendum invitatus quarit, quem in finem illud sit agendum, atque ulterius disquirat, num finis ille sit licitus, nec ne.

§. 195.

Porro cum ad sapientiam quoque requirantur media, ad finem via brevissima ducentia (§. 181.); ipsa vivendi ratio sapientiam prodit. Quodsi enim ea fuerit, quæ intento fini ^aaversatur; sapientiæ defectum arguit, aut si mavis stultitiam, sapientiæ oppositum: quæ autem fini respondet, sapientiæ comes habetur.

§. 196.

Cavendum vero est, ne ex eventu de
sa-

sapientia iudicium fiat. Fieri enim potest, ut propter impedimenta minime prævisa, successu careat, quod sapienter decretum.

§. 197.

Denique quoniam sapiens fines sibi mutuo subordinat, ut posteriores sint fines anteriorum (§. 181.); nihil temere agit, nec nisi re probe expensa statuit, quid agere conveniat.

CAP. X.

DE PRUDENTIA.

§. 198.

PER *Prudentiam* intelligimus habitum exequendi, quæ sapienter decreta fuerunt.

§. 199.

Quoniam sapientia nihil juvat, nisi quoque opere ipso exequaris, quæ decreta sunt; prudentiæ necessitas apparet.

§. 200.

Et quia ad sapientiam obligatur homo (§. 181.); ad prudentiam quoque eum obligari satis evidens est (§. 199.).

§. 201.

Cur in hominibus prudentia differat a sapientia.

piencia, ratio hæc est, quod homo circumstantias singulares in executione operis obvias, eisdemque vel faventes vel inimicas prævidere nequeat. Ideo enim accidit, ut in executione eorum, quæ sapientissime decreta sunt, hæreat, immo subinde prorsus scopo suo excidat.

§. 202.

Nimirum dum de mediis deliberamus ad finem ducentibus, vel ipsius etiam finis rationem inimus: non nisi circumstantiarum ad præsens negotium spectantium rationem habemus. Enimvero ob rerum in universo quotidie, immo singulis momentis contingentium multitudinem in executione operis plurima obijciuntur, de quibus non cogitaveras: rebus igitur alienis una concurrentibus, perplexus redditur, qui prudentia vacuus, omnis prorsus consilii inops.

§. 203.

Prudentia adeo potissimum in eo versatur, ut impedimenta, inprimis fortuita, declinemus, atque adjumenta, quæ fortuito offeruntur, in usum nostrum dextre vertamus.

§. 204.

Atque ita intelligitur, cur subinde licite fieri judicentur, (cum ipse nimirum actus
in-

in se nihil habeat, quod jure reprehendas,) quæ tamen prudenter non sunt, propterea, quod ex accidente non evitatur damnum, quod evitari poterat, aut negligitur commodum, quod poterat obtineri.

§. 205.

Quoniam autem Deo nihil est fortuitum (§. 16. *Theol. natur.*): ideo quoque in eodem tantum locum habet sapientia, minime autem prudentia.

§. 206.

Exinde porro manifestum redditur, cur prudentia experientiæ debeatur. Nam scientia tantum versatur circa ea, quæ necessario connectuntur, ita ut finem obtenturus uti debeat istiusmodi mediis, sed iis neglectis finem obtinere impossibile sit: quæ vero fortuito accidunt, nec ex circumstantiis negotii determinantur, experientia addiscere tenemur.

§. 207.

Experientia cum sit res plurimorum annorum: prudentia senibus atque expertis, minime autem juvenibus atque inexpertis propria deprehenditur.

§. 208.

Et quia in historiarum monumentis plurima

ma de hominum factis, unde prudentia locupletari potest, annotantur: ideo accurata historię tractatio experientiæ vicem subit, ut minori temporis spatio prudentia comparetur, quæ longius alias requireret.

§. 209.

Extendi prudentiam ad omnes quascunque hominum actiones ex ipsa ejus notione intelligitur (§. 198.).

§. 210.

Circa omnes igitur actionum species colligere licet prudentiæ regulas, quæ diuturnæ experientiæ fructus sunt (§. 207.).

§. 211.

Quodsi autem plures istiusmodi regulæ proflarent accurate determinatæ (§. 55. *Log.*); facilis foret ad experientiam via.

§. 212.

Qui prudentia pollet, habitu gaudet, circumstantiis singularibus executionem consilii attemperandi (§. 198.). Prudentiæ itaque defectum senties, si quem circumstantiæ non prævisæ turbant.

§. 213.

E contrario, si quis circumstantias singulares circumspicit, & in conversatione cum
(P. II. *Tbüm. Inst. Phil. Pr.*) Q aliis

aliis præsertim sibi adhuc ignotis cante sibi met-
ipsi atque aliis attendit: eum prudentem col-
liges.

§. 214.

Quodsi consultum est, alios operis, quod me-
ditaris, non esse conscios; taciturnitas & oppor-
tuna simulatio prudentiæ signum est.

§. 215.

Probe autem tenendum est, ex prudentiæ
defectu in casu particulari non argui debere de-
fectum prudentiæ omnimodum. Quamobrem
observanda sunt, quæ de judiciis intuitivis in-
culcavimus (§. 56. *Log.*).

CAP. XI.

DE ARTE.

§. 216.

Artus est habitus determinandi actum alicujus
entis difficiliorem.

§. 217.

Varia igitur est pro diversitate entium,
quorum actus hominum opera determinari
potest. E. gr. Poëma aliquod possibile est,
etiamsi non sit, qui idem condat. Enimvero
si quis habitu gaudet condendi poëmata, ejus
opera actum consequi potest poëma, quod

ante non nisi condi poterat. Habitus adeo iste dicitur ars poëtica & qui hac arte pollet poëta. Eadem est ratio artis horologiopœæ, artis typographicæ, artis saltandi & ita porro.

§. 218.

Quoniam fieri non potest, ut unus idemque homo omni arte polleat; itaque iis potissimum artibus operam dare tenetur, quibus ad vitæ negotia obeundum potissimum habet opus (§. 24. *Phil. pr. un.*).

§. 219.

Artem continuo exercitio acquiri, cum experientia loquitur, tum ex notione habitus generali patet.

§. 220.

Enimvero etsi fieri nequeat, ut aliquis sufficiat exercitiis, quibus ars comparatur; fieri tamen potest, ut scientiam artis sibi comparet. Quodsi itaque usui esse possit, ut norit, quomodo aliquid efficiatur: scientiam istam negligi minime convenit (§. 35. *Jur. nat.*).

§. 221.

Utile igitur foret, si omnium artium descriptiones accuratæ proflarent. Datis enim istiusmodi descriptionibus, scientiam artium excolere liceret ingeniis ad rationes rerum scrutandas natis.

§. 222.

Artificem commendat opus, ut aliis signis tuto careamus.

SECTIO III.

DE VIRTUTIBUS MORALIBUS.

CAP. I.

DE VIRTUTIBUS MORALIBUS IN GENERE.

§. 223.

Virtutes morales appellantur habitus voluntatis legi naturali conformes.

§. 224.

Vocantur virtutes per eminentiam quandam. Unde de ipsis potissimum intelligi debent, quæ de virtute in genere (§. 49. & sqq. *Phil. pr. un.*) & de studio virtutis (§. 14. sqq.) dicta fuere.

§. 225.

Differunt autem virtutes morales pro diversitate objectorum externorum, quæ appetitum movent atque inde in varias abeunt species variaeque sortiuntur nomina.

§. 226.

§. 226.

Virtus per conformitatem cum lege naturali in esse suo constituitur (§. 223.). Quamobrem cum constet, quid sit juris naturalis; haud difficulter quoque in qualibet actionum humanarum specie constat, quid sit virtutis.

§. 227.

Vitium morale appellatur habitus voluntatis legi naturali difformis,

§. 228.

Vocatur vitium per eminentiam quandam. Unde de ipso itidem valet, quod de vitio in genere (§. 56. & seqq. *Pb. pr. un.*), & de fuga vitii (§. 18, 22. & seqq.) commentati sumus.

§. 229.

Differunt autem vitia pro diversitate objectorum externorum, quæ appetitum movent, atque inde sicuti virtutes (§. 225.) in varias abeunt species, variaque sortiuntur nomina.

§. 230.

Vitium per difformitatem cum lege naturali in esse suo constituitur (§. 227.). Quamobrem per legem naturalem determinatur, quid in unaquaque actionum humanarum specie vitii sit.

§. 231.

Quoniam omnis virtus est legi naturali conformis (§. 223.), omnis autem lex naturæ immutabilis veritatis (§. 25. *Phil. pr. univ.*), atque Deus vult, ut homo ad eandem actiones suas componat (§. 32. *Phil. pr. univ.*): ideo unusquisque hominum omni quoque virtuti studere rectissime jubetur.

§. 232.

Convenit legi naturali & mentis & corporis perficiendi (§. 33. 39. 45. *Jur. nat.*), immo etiam rerum externarum cura (§. 60. *Jur. nat.*). Quamobrem omnis hæc cura animum ipsius sollicitum tenere debet (§. 231.).

§. 233.

Peccant igitur, qui virtutibus intellectualibus operam dantes, morales negligunt & contra. Immo peccant, qui virtutes morales minime conjungunt: peccant, qui curam corporis habentes mentem negligunt & contra: peccant denique, qui rerum externarum rationem non habent, etsi menti ac corpori perficiendo operam navent.

§. 234.

Quodsi quis ex ignorantia curam animæ, corporis atque rerum externarum minime conjungit; docendus est meliora, nimis.

mirum, quod lex naturæ perinde urgeat animæ ac corporis perfectionem, nec velit rerum externarum neglectum (§. 231.). Tradidimus in philosophia practica universali, quæ huc conducunt, dogmata, parte prima.

§. 235.

Inprimis autem inquirendum est in rationem, cur unius curam gerat, ceteris neglectis. Quodsi enim eundem convincas, ceterorum eandem esse rationem; nil sane amplius obstat, quominus & eorum cura ipsum tangat.

§. 236.

Quodsi contingat, rationem finalem legi naturali repugnare; demonstranda est illius contrarietas, atque ardor vitæ honestæ excitandus (§. 110. *Phil. pr. un.*).

CAP. II.

DE NOTITIA SUI.

§. 237.

Quilibet homo semetipsum nosse tenetur, & quidem cum animam, tum corpus, & statum quoque externum (§. 29. *Jur. nat.*). Officio igitur satisfactorius: cum semetipsi,

tum aliis attendat, solícite observans omnes omnino actiones, gestus, vultum, verbaque omnia, item res, quæ ad se aliosque, quomodocunque pertinent, singulorum sibi notiones distinctas (§. 53. *Log.*) formans, & de eorum bonitate vel malitia iudicium ferens. Ita nimirum innotescit, quæ nobis bona vel mala adsint, & quibus adhuc virtutibus careamus,

§. 238.

Cum igitur nemo ex alieno casu discere queat, quæ vitet, nec aliorum exemplis doceri possit, quibus studere debeat, nisi aliis attendat (§. 237.); officio suo deest, qui secum tantum habitat, aliorum hominum prorsus incurius,

§. 239.

Multum autem juvat, si ex alio temet cognoscere studeas. Etenim boni nascitur æmulationis, vitiorum rectius sentitur turpitudine, & alieno damno sapere licet: immo modus quidpiam obtinendi vel evitandi absque difficultate innotescit. Singula adeo manifesta sunt & experientia confirmantur, ut plura addere supervacaneum habeatur.

§. 240.

Tenendum porro est, notitiam, quæ hoc modo acquiritur, esse admodum certam. Quæ enim

enim fieri observamus, de iis, quod fieri possint, dubitandum non est (§. 14. *Ontol.*); istiusmodi autem cognitio movet voluntatem.

§. 241.

Animæ notitiam, qui curæ cordique habet, ad ipsius operationes attendere debet. Intellectum adeo, seu universam facultatem cognoscitivam tibi reddes perspectam, ubi scientias atque artes perscruteris; voluntatem vero ac quidquid ad facultatem appetitivam ulla ratione spectat; ubi virtutes & vitia hominum ad stateram appendas. Commendanda hic loci venit historia, quatenus gentium mores ac consuetudines recenser, & exempla virtutum atque vitiorum suppeditat.

§. 242.

Corporis notitia acquiritur studio anatomico & physiologico. Anatomia enim corporis structuram edocet, unde reddenda est eorum ratio, quæ eidem accidere possunt; Physiologia tradit, quomodo corpori noceri queat. Accedat præterea scrutinium eorum, quæ experientia domestica, aliorum corpori vel salutaria vel noxia deprehenduntur.

§. 243.

Quinam sit status hominum externus &

quibus mutationibus obnoxius esse queat, quibusnam fortunæ casibus exponatur, experientia cum domestica, tum historiarum volumina abunde docent.

§. 244.

Quodsi tecum perpendas, quanta diligentia opus sit in observandis aliis atque te ipso (§. 237. 241. & sqq.), & expendendis singulis, quæ observasti, ut te ipsum noscas: haudquaquam mirum videbitur, quod plurimi a cognitione sui sint adeo procul remoti, & quod ad summum perfectionis culmen pervenisse sibi videantur, cum ne in limine quidem consistent.

§. 245.

Puerorum est imitari, quæ in aliis videntur. Plurimum adeo utilitatis haberet, si in prima pueritia ad notitiam sui ex aliis hauriendam & bonum, quod in aliis laudent imitandum, malum vero, quod in aliis reprehendunt, fugiendum mature adducerentur liberi. Etsi enim in prima pueritia imitatio ratione destituatur: ubi tamen ad ætatem maturiorem pervenerint, rationes facile doceantur.

§. 246.

Consultum inprimis est, ut liberis, quamprimum certo vitæ generi destinantur, exemplum
plum

plum viri in eo genere excellentis proponatur, ad cujus similitudinem nitantur.

CAP. III.

DE TEMPERANTIA.

§. 247.

T*emperantia* est habitus determinandi appetitum circa cibum & potum legi naturali convenienter, seu est virtus moralis dirigens appetitum circa cibum & potum.

§. 248.

In capiendo igitur cibo ac potu sanitatis potissimum rationem habere debemus, cum respectu qualitatis, tum respectu quantitatis (§. 48. *Jur. nat.*).

§. 249.

Temperans igitur non appetit cibum ac potum, nisi quem sanitati suæ conducere novit, nec plus cibi ac potus capit, quam qui conducit sanitati.

§. 250.

Nimia cibi quantitas sese prodit, si a cœna & prandio quandam corporis lassitudinem sentimus. Caput quoque non minus cibi quam potus nimiam quantitatem sentit ob
mu-

mutuum capitis cum ventriculo consensum, dudum a medicis animadversum, etsi nimius cibus minus capitis functiones turbet, quam potus nimius,

§. 251.

Constat tamen experientia, eandem cibi quantitatem uni nimiam esse, quæ alterius ventriculo proportionata.

§. 252.

Ex solita igitur cibi quantitate, quam quis ipse capit, judicare nequit, num alter temperans sit, an potius intemperans.

§. 253.

Nos non nimis cibo nec potu opplevisse ventriculum in cœna, hinc quoque colligitur, si somnus subsequutus fuerit quietus, & omnium corporis membrorum sentiamus quandam quasi levitatem,

§. 254.

Contrarium accidit, ubi ventriculus nimio cibo ac potu fuerit oppletus,

§. 255.

Negari tamen haud quaquam potest, eundem sensum subinde quoque a qualitate cibi pendere.

§. 256.

§. 256.

Haud difficulter autem intelliges, num quantitati num qualitati cibi tribui debeat, tum si quantitatem cibi præcedentis proximæ cœnæ cum quantitate cœnæ alterius, tum si statum corporis, qui fuerat alio tempore, quo eundem cibum comederas, cum statu præsentis conferas.

§. 257.

Supponimus præterea corpus esse sanum & a passionibus animi functiones animales perturbantibus liberum.

§. 258.

Quæ de qualitate ciborum a medicis præciuntur, nondum evidentia sunt, deficientibus observationibus, unde judicia sua (§. 56. *Log.*) deduxerunt. Optandum igitur foret, ut illi medicinæ parti, quam diæteticam salutant, majores accessiones fierent.

§. 259.

Quoniam vero non omnibus eadem sana; præstat hac in re unumquemque suum esse medicum, collectis observationibus domesticis.

§. 260.

Sanns censetur cibus, qui bene in ventriculo digeritur & transpirationem promovet.

vet. Observandum itaque, num tempore digestionis quædam sentiantur incommoda, veluti ructus, ardor ventriculi; capitis dolor, &c. item num absoluta digestionem, præsertim quando mane summo expergefacti sumus, nullum percipiamus languorem. Subinde quoque fæces atque urina digestionis peractæ, consequenter qualitatis ciborum indicia sunt,

§. 261.

Temperantiæ opponitur *intemperantia*, quæ est vitium determinandi appetitum circa cibum & potum ratione sanitati contraria.

§. 262.

Quoniam motivum esse debet, cur quis cibum sanitati, vel qualitate vel quantitate adversum appetat (§. 140. *Psych.*): is vero, quia lege naturali recedit, minime rationis (§. 28. *Phil. pr. univ.*) sed sensuum iudicio stat; necesse est, ut intemperans gustus potissimum voluptatisque gratia cibum ac potum appetat (§. 104. *Psych.*).

§. 263.

Ut igitur temperantiæ studeamus, intemperantiamque aversemur, necesse est, ut sanitatem amemus certoque persuasi simus, hanc cibi ac potus quantitatem vel qualitatem esse eidem adversam. Qui enim amat sanitatem,

tem, voluptatem ex ea percipit (§. 115. *Psych.*). Quamobrem si ea major fuerit, quam quæ ex cibo potuque percipitur, illa prævalebit, erisque potius temperans, quam intemperans (§. 262.). Evidens vero est, sanitatis amorem nihil proficere, nisi constet, cibum hunc aut potum vel qualitate vel nimia quantitate sanitati tuæ ad^{versari}~~servari~~.

§. 264.

Intemperanter itaque vivunt plurimi, quoniam minime capiunt, quantum bonum sit sanitas, vel non prævident damna olim secutura, quæ sanitati inferuntur.

§. 265.

Qui ignorat, quantum bonum sanitas haberi debeat; is secum perpendat, quæ a sanitate pendeant, pro uniuscujusvis conditione diversa, adeoque in casu singulari singulariter urgenda. Perpendendi porro sunt dolores, quos morbi procreant, una cum incommodis aliis, illorum sociis. Inprimis quoque considerandum, quod affectus molesti istis sociantur, veluti pœnitentia, ubi agnoscimus, nos esse dolorum ac incommodorum istorum causam, eaque a nobis evitari potuisse (§. 121. *Psych.*). Cum hoc in casu conscientia hominem accuset (§. 94. *Phil.*
pr.

pr. un.); expendendum quoque est tædium inde resultans (§. 95. *Phil. pr. un.*).

§. 266.

Si qui non nisi vitæ jacturam ex intemperantia metuunt, & voluptas, quæ intemperantiæ socia, vitam brevem longæ, ipsa destitutæ, præferre suadet: illis morborum imprimis incommoda graphice delineanda. Exemplis quoque convincendi, quod morte instante, vitæ jactura majus malum reputetur, quam ubi procul adhuc abesse censetur. Rationes, quibus idem confirmatur, singulares uniuscujusque conditio in casu dato suppeditat.

§. 267.

Majoris negotii videtur, persuadere intemperantibus, intemperantiam esse morborum causam, præsertim cum hoc in argumento destituamur demonstrationibus, ob rationum evidentiam magnum pondus habituris. Consultum itaque foret, ut hunc defectum supplerent, quibus causas morborum scrutari datum (§. 31. *Jur. nat.*).

§. 268.

Non sola hic difficultates facessit ignorantia, verum etiam præjudiciis multum tribuitur, quorum rationes videntur esse evidentes. Negari nimirum non potest, homines quos-

quosdam, etsi minime temperanter vivant, ad
seram tamen senectutem pervenire; alios con-
tra temperantiæ admodum deditos non modo
cum morbis continuo conflictari, verum etiam
ante diem obire.

§. 269.

Huic igitur præjudicio ut obviam eatur, non
unum idemque monendum est. Qui intempe-
ranter vivens, ante diem, minime obire censetur:
is quidem ob corporis habitum robustiorem ad
eam ætatem pervenit, quæ multis, etsi tempe-
ranter vivant, negatur; pro certo tamen haben-
dum, quod ad senectutem multo majorem per-
venturus fuisset, nisi intemperantia mortem sibi
accelerasset. Quod ut magis manifestum fiat:
non inutile foret, si historia longævorum ho-
minum memoriæ mandaretur, non neglecta
victus ac potus ratione, affectuumque regimi-
ne, quo fuerint usi. Cogitandi præterea mor-
bi, cum quibus conflictandum est intemperanti-
bus: immo cogitandæ sunt morborum ac mortis
causæ aliæ, ob quas temperantibus quoque an-
te diem obeundum.

§. 270.

In casibus singularibus dantur quoque alia
motiva temperantiæ a statu hominum singu-
lari petenda. Huc refer opum dilapidatio-
(P. II. *Tbüm. Inst. Phil. Pr.*) R nem

nem & periculum senectutis egenæ, immo quod matura morte extincti non relinquunt liberis sumtus ad educationem necessarios, ad quos tamen obligantur (§. 315. *Jur. nat.*). Ratio quoque habenda famæ, cujus maximum subinde pondus: ratio habenda aliorum, quæ circumspecta circumstantiarum singularium observatio suppeditat.

§. 271.

Voluptas corporis intemperantiæ causa (§. 262.). Hanc eradicaturus variis utatur remediis, pro subjectorum aliarumque circumstantiarum diversitate.

§. 272.

Si quis ergo dolore exiguo multum concutitur; exemplis doceri debet (§. 266.), quomodo sit dolor morborum socius, in quos incidunt intemperantes.

§. 273.

Quodsi voluptuosus modicas tenet opes, aut majorem pecuniæ vim quotannis erogat, quam acquirit; monendus est de molestiis ac inde oriundis tædiis, ob defectum boni apparentis, quod appetit. Inprimis autem docendus est, tedium intendi, ubi nos causam boni absentis intuemur (§. 121. *Psych.*), & nobismetipsis nos indignari, quod saniora
mo:

monentibus aurem non præbuerimus (§. 132. *Pfych.*), aliosque opipare viventes videamus, quos olim, cum opibus diffliueremus, parce viventes contemnebamus.

§. 274.

Omnis autem voluptuosus probe perpendere tenetur, quod rarior eorum usus, quæ sensus demulcent, voluptatem intendat: id quod facile persuaseris ei non modo per experimenta, verum etiam si prima tempora, quibus voluptati se dedit, cum præsentibus conferas.

§. 275.

Ne voluptas corporis illi damno sit, qui eadem uti decrevit: ante persuasus sit, quod in tadium degenerare, & mille molestias procreare non possit. Ita nimirum corporis voluptas non erit infelicitatis causa (§. 78. *Phil. pr. un.*), quin potius felicitati aliquod addet incrementum (§. 72. *loc. cit.*).

§. 276.

Intemperantia circa potum *ebrietas* dicitur. Est adeo ebrietas vitium in capiendo potu, modum ita excedens, ut functiones capitis turbentur.

§. 277.

Inde est, quod in ebrietate pereat primum

rationis, deinde sensuum usus, tandem quoque cessent functiones animales, quæ a sensu pendent.

§. 278.

Quamprimum usus rationis perit; actiones aliæ non amplius locum habent, quam quæ sensui & imaginationi debentur: de quo minime dubitabit, cui ex Psychologia empirica innotuit differentia inter facultates animæ superiores & inferiores intercedens.

§. 279.

Perceptio præterita integra recurrit, cujus præsens continet partem (§. 41. *Psych.*). Quæ igitur alio tempore de objecto aliquo cogitavimus: ea eodem conspecto veluti sponte sua nobis recurrunt. Quamobrem si rationis usu cohibere nequimus appetitum sensitivum; executioni dantur eidem conformia.

§. 280.

Ea de causa ebrii instar puerorum & somno oppressorum, quibus perinde deest rationis usus, effutire solent, quæ silentii sipario involvenda erant; & actiones alias committunt, quarum poenitet postera die ad animum redeuntes.

§. 281.

Cui itaque arcana sunt, quæ prodi periculo-

iosum ; ille ab ebrietate abstinere, & societatem fugere debet, ubi in eam facile incidere possit (§. 280.).

§. 282.

Idem tenendum est illi, qui pravis cupiditatibus animum obnoxium habet, quas non nisi rationis usu & occasionem vitando reprimere valet (§. 280.).

§. 283.

Similiter ebrietatem fugiat, cui inimicus fuerit præsens, ne vel verbis eum lacestat ebrius, vel ira exardescens vindictæ laxet habenas (§. 200. & 132. *Psych.*).

§. 284.

Ex eadem ratione (§. 280.) patet, cur ab ebrietate sibi temperare debeat, ad vitia quædam natura vel consuetudine olim contracta proclivis.

§. 285.

Immo eadem militat ratio, si quis juvenis in consuetudine cum aliis perpetravit, quæ a præsentis vitæ conditione prorsus aliena sunt.

§. 286.

Ceterum ex his omnibus manifestum evadit, quantum ordinatæ ac sapienti actionum directioni obstat ebrietas (§. 103. *Phil. pr. un.*) :

viranda adeo illis, qui felicitatis suæ rationem habent (§. cit.).

§. 287.

Ne Baccho litemus: perpendenda quoque sunt tædia, quibus postero die excruciamur, dum factorum nos pœnitet (§. 121. *Psych.*), atque pudet (§. 123. *Psych.*), & cum nobis ipsimet indignamur (§. 132. *Psych.*).

§. 288.

Tædia hæc dam percipiuntur: ebrietatis vitandæ consilium capitur. Enimvero quamdiu quis ab ebrietate nondum abhorret; oblata exhauriendi scyphi occasione sibi persuadet, in potestate sua esse, ut sibi temperet a tactis, quorum postea pœnitet. Cessat igitur vis motivi (§. 287.).

§. 289.

Quamobrem ut ab ebrietate avocetur: vitanda est occasio, ac interea temporis perpendenda sunt damna, quæ inde oriuntur, & in quæ alios incidisse audit. Perpendendum quoque, quam bene ipsi nunc sit, quod habeat animum ab ægritudine, corpus a membrorum lassitudine vacuum, cum tamen perinde sit, si præterito die voluptati corporis indulserit, si minus, quæ transitoria non amplius sentiuntur.

§. 290.

§. 290.

Qui a nimio potu sibi temperat, quo inebriatur, *sobrius* dicitur. Ut adeo *sobrietas* virtus sit sibi a nimio potu, quo inebriamur, temperandi.

§. 291.

Sobrietas cum temperantiæ species sit (§. 247.): eadem eandem suadent, quæ temperantiam commendant (§. 267. & seqq.).

§. 292.

Virtute præditus lætatur, quod ea agere debet, quæ legi naturali conformia sunt (§. 53.). Sobrius itaque (§. 290.) lætatur, quod a nimio potu ipsi abstinere datum sit, adeoque a potu nimio abhorret (§. 113. 95. 99. *Psyche*.), & tristatur, quando alios videt nimio potu se ingurgitantes (§. 114. *Psyche*.), ipsisque indignatur (§. 132. *Psyche*.).

§. 293.

Omnes hominis actiones liberæ inter se consentire debent (§. 17. *Phil. pr. univ.*). Quando itaque cibum ac potum capimus: vultus quoque, gestus omnes, verba omnia, immo actiones omnes ceteræ cum temperantia convenire, minimum eidem haudquaquam repugnare debent.

§. 294.

Ecce tibi fontem multarum actionum, quæ in capiendo cibo ac potu decoræ, iisdem vero oppositæ indecoræ censentur.

§. 294.

Enimvero propterea, quod omnium omnino actionum requiritur consensus (§. 17. *Phil. pr. univ.*): opera quoque danda est, ne officiis aliis parum respondeat, quæ circumstantiis istis absentibus temperantiæ convenirent. E. gr. Si quis adfuerit honoratior, honor alteri debitus præferendus gustui, eidem offerendo, quod fortuna quasi nobis oblatum jure quodam nostrum censeretur poterat.

§. 296.

En alterum decori fontem in capiendo cibo atque potu.

CAP. IV.

DE CURA CORPORIS.

§. 297.

Etsi temperantia sanitatis rationem habeat (§. 248.); minime tamen hæc virtus ambitu suo omnia comprehendit hominis circa corpus officia (§. 43. & seqq.). Quamobrem ha-

habitum officiis, circa corporis conservationem reliquis, satisfaciendi, sub generali *cura corporis* nomine complectimur.

§. 298.

Opponimus eidem *neglectum corporis*, qui est vitium in exequendis officiis circa corpus deficiens.

§. 299.

Opponitur quoque eidem *nimia corporis cura*, quæ extenditur ad officiorum ceterorum circa animam & statum externum neglectum.

§. 300.

Quoniam officiis hominis circa corpus conformis vitæ conservatio, corporis sanitas, ejusdem custodia adversus tempestatum injurias, integritas membrorum, multiplex corporis habitus (§.43.46.47.52.54.59. *Jur.nat.*); qui curam corporis habet, vitam conservare, sanitatem corporis & integritatem membrorum custodire idemque adversus tempestatum injurias munire & convenientes statui suo habitus acquirere, acquisitos exercere studet.

§. 301.

Qui vitam vilipendet : eum doceri convenit, quanta sit ejusdem jactura, rationibus ab uniuscujusque statu desumptis. Perpenden-

denda nimirum sunt bona, quæ ex vita cum in ipsummet, tum in ejus familiam, tum genus quoque humanum redundare possint: quorum cum nimia sit varietas, nostrum jam non est ea distincte enumerare.

§. 302.

Ut autem istiusmodi meditationibus simus pares; non modo acumine opus est (§. 91.), verum etiam ex historia convincendi sumus, quantum profuerit aliorum longævitæ in casu simili (§. 75. *Psych.*).

§. 303.

Inprimis quoque meminisse præstat, quod Deo vivat (§. 14. *Jur. nat.*), non sibi, quærens perfectionem sui, ut gloriam Numinis illustrare valeat (§. 66. *Phil. pr. un.*). Nostrum adeo non est statuere de termino vitæ, sed Dei.

§. 304.

Eodem modo patet, quod aliis quoque vivamus perfectionem nostri quærentes, ut aliis prodesse possimus (§. 67. *Phil. pr. un.*). In alios adeo injurius est, qui vitæ terminum sibi accelerat, quibus prodesse & poterat & debebat.

§. 305.

Hac quoque pertinet cura educandi liberos, quam ipsis debemus (§. 315. *Jur. nat.*).

§. 306.

§. 306.

Temperantia cum faveat longævitati vitæ (§. 247.); cura corporis, quæ se circa vitæ conservationem exerit, medium ipsius certissimum est.

§. 307.

Vitæ conservationem appetit, qui voluptatem ex ea percipit (§. 103. 140. *Pfych.*): vitam adeo amare debet, qui eidem conservandæ studere obligatur (§. 155. *loc. cit.*).

§. 308.

Ut vitam amemus: consideranda est felicitas, vitæ bene actæ præmium (§. 37. *Pb. pr. un.* & 115. *Pfych.*), adversitatibus minime turbanda, ubi in Deum fiduciam collocamus & in voluntate ipsius acquiescimus.

§. 309.

Si quem adversitates reddunt vitæ præsentis pertæsum: ille & convincendus est, ex iisdem tantum damni in ipsum minime redundare, quantum videtur; & docendus præterea, quomodo easdem convertere possit in suum usum.

§. 310.

Maximo hic adjumento est, si quis de bonitate divina convictus (§. 83. *Theol. nat.*), eliminatis scrupulis adversus eam militantibus (§. 84.

(§. 84. *Theol. nat.*), firmo assensu tenet, Deum mala quoque dirigere ad bonos fines (§. 75. *loc. cit.*).

§. 311.

Sanitatis curam quoque habet, qui voluptatem ex ea percipit (§. 103. 140. *Psyche.*), adeoque eandem amat (§. 115. *loc. cit.*).

§. 312.

Ut igitur sanitatem amemus : expendenda sunt commoda sanitatis, incommoda morborum pro diverso diversorum statu multiplici ratione variantia ; de quibus diximus , cum de temperantia ageremus (§. 265.).

§. 313.

Etsi autem temperantia ad sanitatem conservandam plurimum conducat ; satis tamen superque constat , plures adhuc præter intemperantiam esse morborum causas, vitandas ei, qui sanitatem conservare studet,

§. 314.

Juvat igitur detegere morborum causas, easque ad captum quoque eorum proponere, qui arti salutari operam minime navant.

§. 315.

Istiusmodi autem observationes collecturus, temperanter vivere debet, nec causis aliis

aliis tribuat effectum, cibi ac potus vel quantitati vel qualitati adscribendum.

§. 316.

Quamdiu autem aliorum ea in re opera destituimur; quilibet sibi & aliis attendat, intellecturus, quæ sanitati inimica sint, quæ amica.

§. 317.

Qui labore nimio sanitati officit, vel indigentia, vel avaritia, vel ambitione ad eundem compellitur. Indigentia locus est, si tantum numorum acquiri non detur, quantum erogari necesse est. Avarus lucri cupidine tenetur. Quem vero ambitio ad laborem sanitati inimicum stimulat, is virtutibus intellectualibus alios antecire intendit, minimum inferiori esse loco recusat.

§. 318.

In priori casu probe considerata veniunt, num expensæ minui vel alio labore plus acquiri, vel aliunde denique subsidium peti possit: quem in finem excutiendæ sunt circumstantiæ singulares.

§. 319.

Avaritia ubi sanitati insidias struit: malo huic medebimur ea ratione, quam suo loco explanabimus hoc vitium debellaturi.

§. 320.

§. 320.

Sufficit interea annotasse, quod per longos annos absque dispendio sanitatis lucrari possimus, quæ cum ejus dispendio brevi in tempore lucramur; priori tamen in casu metuetendum sit, ne morbus intempestive parsa absumat, cum in posteriori contra tempestive partis frui detur.

§. 321.

Eadem mutatis mutandis ad ambitionem quoque applicantur, laboris nimii, sanitatis inimici causam.

§. 322.

Integritati membrorum ne officiamus: in omnibus vitæ negotiis, in omni motu ac situ corporis perpendenda sunt damna, quæ incanis imminent.

§. 323.

Plurimum juvat, experientiæ beneficio annotare damna, quæ pro diversitate casuum incanis acciderint. Nec male de genere humano mererentur, qui diuturna experientia annotata, luci publicæ exponerent (§. 31. *Jur. nat.*).

§. 324.

Sensuum acumen obtunditur excessivo morandem usu. Ita oculos hebetat, qui vel in spectandis remotis vel in vicinis asiem ocu-

lorum nimium intendit ; inde enim fieri potest, ut vel myops vel presbyta evadat. Aures obtundit, qui fragoribus & sonis vehementioribus easdem sæpius admover. Vitandus igitur est sensuum excessivus usus, v. gr. minime legendi sunt libri typis minutissimis exarati, ad lucem præsertim crebram, nec capite nimis ad scripturam pensili, item campanis majoribus prope adstare hand debemus, dum pulsantur.

§. 325.

Ut quis circa vestitum & domicilium observet, quæ decora sunt ; non modo omnium actionum liberarum consensum inter se meditari (§. 16. 17. *Phil. pr. univ.*), verum etiam meminisse debet, quod aliorum contemptui sese exponens, ob negligentiam corporis sæpissime obstacula ponat fortunæ suæ, suoque de genere humano bene merendi studio.

§. 326.

Immo si quis attendit ad ea, quæ levioris momenti esse videntur ; is sibi comparat habitum singula circumspicte expendendi in negotiis vitæ magis arduis, ubi nempe cum ratione de istis statuit, minime ex præjudicio aut vana consuetudine.

§. 327.

Habitus corporis cum plures sint, quæ ad

eos possint esse motiva & quibus mediis ad eosdem perveniatur, in genere exponi nequit. Facile autem huc applicantur, quæ de arte in superioribus tradidimus.

CAP. V.

DE CASTITATE.

§. 328.

Temperantiæ vocabulum ab *Aristotelicis* latius sumitur; ita ut ad voluptates corporis quascunque extendatur. Latior significatus, quia minime convenit idiomati germanico, quo scripsit philosophus noster, temperantiæ objectum constituit solum cibum ac potum. Quæ itaque de castitate erant dicenda; ea ad œconomicam doctrinam de societate conjugali reservavit. Quoniam nos ea, quæ sunt juris naturalis a doctrina ethica, œconomica & politica separavimus; nihil sane obstat, quo minus de castitate in ipsa Ethica verba faciamus, principiis theoreticis in jure naturali stabilitis.

§. 329.

Est autem *castitas* virtus determinans appetitum venereum legi naturali conformiter.

§. 330.

§. 330.

Juri naturali non convenit coitus, nisi qui sobolis procreandæ gratia suscipitur (§. 285. 286. *Jur. nat.*): castus igitur non appetit venerem, nisi sobolis procreandæ gratia (§. 329.).

§. 331.

Coitus solius voluptatis gratia cum persona soluta celebratus, dicitur *fornicatio*; cum maritalitate *adulterium*.

§. 332.

Castus igitur a fornicatione & ab adulterio abhorret (§. 330.).

§. 333.

Quoniam castus aversatur coitum, solius voluptatis gratia celebrandum (§. 330.); ab iis quoque omnibus abstinet, quæ ad coitum stimulum addunt.

§. 334.

Castus igitur non est, qui verbis & gestibus aliisque actionibus lascivis voluptatem percipit (§. 333.).

§. 335.

Etsi autem voluptati, quæ ex tactu venero percipitur, difficulter resistatur; danda tamen est opera, ut *libidinem*, quæ castitati oppositum vitium est, aversemur. Quem in finem, momentaneum, quod hic delectat,
(P. II. *Thüm. Inst. Phil. Pr.*) S con-

conferendum est cum tædio, quod inde enatum diu multumque excruciat. Perpendenda porro est vanitas, quæ voluptati hoc in genere admiscetur, veluti cum ex partium quarundam contactu voluptas sentitur. Inprimis autem consideranda sunt damna, ex libidine & coitu libidinoso emergentia, pro diversis circumstantiis diversa, veluti sunt neglectus negotiorum nobis pro vitæ ratione obeundorum, jactura sanitatis, æstus veneris intensitas, opum & salutis sæpe omnis dilapidatio, fama sinistra, discordiæ, neglectus foetus sive in utero formandi, sive in lucem editi educandi, pœnæ civiles diversis criminibus decretæ, & quæ sunt alia his affinia.

§. 336.

Quoniam vero consuetudo inveterata ægerime eradicatur; a teneris unguiculis castitati litare debent liberi, & inprimis curandum, ut occasionem vitent, qua ad actiones libidinosas seducuntur.

§. 337.

Solet vulgo *salacis* nomine insigniri, qui ex tactu venereo voluptatem sentit nimiam, qua nempe impellitur ad actus legi naturali contrarios seu a castitate abhorrentes.

§. 338.

§. 338.

Quod *stupiditatis* nomine venire solet vitium in defectu cum sit longe rarissimum, de eo silemus.

CAP. VI.

DE LIBERALITATE.

§. 339.

Liberalitas dici suevit virtus, circa pecunias landas & accipiendas. Si sumtus faciendi fuerint magni, *magnificencia* salutatur.

§. 340.

Virtus cum sit habitus dirigendi actiones legi naturali conformiter (§. 49. *Pb. pr. un.*); liberalitas erit habitus dirigendi actiones, in opibus parandis & acquirendis, legi naturæ conformiter (§. 61. & sqq. & §. 70. & sqq.).

§. 141.

Non quidem negamus, communem loquendi usum vix ferre significatum adeo latum & eundem potius ad eas actiones restringere, quæ circa dona versantur: enimvero cum verba valeant sicut nummi, communi significatui non erimus contrarii, etsi autor nominibus germanicis usus, ad eundem non attenderit.

§. 342.

Cum vero vox liberalitatis adeo late sumatur: sub virtute hac universali admittendæ sunt veluti contentæ particulares, in acquirendis opibus *continentia* seu animus sorte sua contentus, in iisdem administrandis *parsimonia*, in largiendo *liberalitas* strictè sic dicta.

§. 343.

Erit adeo *continentia*, sensu strictiori accepta voce, aut si mavis *animus sorte sua contentus* virtus, quæ versatur circa opes acquirendas, consequenter habitus dirigendi actiones circa opes acquirendas legi naturali conformiter (§. 340.)

§. 344.

Parsimonia virtus est, quæ circa opes administrandas occupatur, adeoque habitus dirigendi actiones legi naturali conformiter circa opes administrandas (§. 340.).

§. 345.

Liberalitas strictè sic dicta est virtus, versans circa opes gratis in alterum conferendas, adeoque habitus dirigendi actiones legi naturali conformiter, circa dona & eleemosynas.

§. 346.

Dicuntur nimirum *dona*, bona fortunæ in alterum gratis collata.

§. 347.

Elemosynæ autem appellantur, quæ egentibus ad vitæ necessitatem gratis exhibentur.

§. 348.

Prætermittenda quidem occasio non est, qua salvis in Deum, nos atque alios officiis, opes parare datur (§. 64. *Jur. nat.*): eadem tamen propter se appetendæ non sunt (§. 65. *loc. cit.*). Qui ergo sorte sua contentus est; is non appetit opes, nisi quæ necessitati, ac jucunditati vitæ & decori sufficiunt (§. 60, *loc. cit.*), & quæ salvis in Deum, nos atque alios officiis parari possunt (§. 343.).

§. 349.

Qui opes propter seipsas appetit, adeoque plures, quam quæ necessitati ac jucunditati vitæ atque decori sufficiunt, & quæ salvis in Deum nos atque alios officiis parari nequeunt, *avarus* vocatur.

§. 350.

Est adeo *avaritia* opum appetitus officiis in Deum, nos atque alios adversus, consequenter vitium (§. 56. *Pb. pr. un.*).

§. 351.

Qui elabi patitur occasionem, qua salvis in Deum, se atque alios officiis, opes parare valet, nec in iisdem parandis ad vitæ

necessitatem, jucunditatem atque decorem attendit: is opum acquirendarum *incurius* audit,

§. 352.

Incuria adeo ista in vitio ponitur (§. 56. *Ph. pr. univ.* & 60. 64. *Jur. nat.*). Opponitur nempe animo sorte sua contento in defectu, sicuti avaritia in excessu.

§. 353.

Opera cum danda sit in opibus administrandis, ne quid erogetur, nisi officiorum in Deum, nos atque alios gratia, & ut futuræ olim necessitati prospiciatur (§. 74. *Jur. nat.*); parsimoniz quid conveniat, liquet (§. 344.).

§. 354.

Qui pecunias erogat, officiis in Deum, nos atque alios minime poscentibus, *prodigus* habetur, in erogandis adeo pecuniis modum excedens.

§. 355.

Prodigalitatis gradus insignis *luxus* appellatur, & magnificentiz in excessu opponitur.

§. 356.

Prodigus itaque plus pecuniæ erogat, quam vitæ necessitas, jucunditas atque decus exigit, neglecta præsertim necessitate futura.

§. 357.

§. 357.

Qui in impendendis pecuniis parcat iis, quæ vel jucunditas vel decor vitæ postulat, etsi nec præsens nec futura vitæ necessitas obster, *sordidus* appellatur, præsertim ubi magnificentiae opponitur in defectu: alias enim communiter id vitii sub avaritiæ nomine continetur.

§. 358.

Patet autem ad prodigalitatem atque luxum quoque referri excessum in donis conferendis, juxta leges naturæ (§. 334. & sqq.) determinandum.

§. 359.

E contrario qui in defectu peccat circa elemosynas atque dona *illiberalis* nuncupatur. Communiter illiberalitas ad avaritiam una refertur. Cur autem eandem ab hac recte distinguat Philosophus, clarum evadet deinceps.

§. 360.

Incuria ex voluptate oritur. Cum enim voluptuosus bonum & malum corporis reputet, quod voluptatem corporis, & quod rædium parit (§. 103. *Psych.*), rationem vero inire lucri atque expensarum calculum subducere molestum sit; is in parandis opibus curam omnem abjicit atque adeo non unam

præterire patitur occasionem , qua salvis in Deum , se ipsum atque alios officiis lucrari pecunias aliaque fortunæ bona poterat, consequenter incurius est (§. 351.).

§. 361.

Fugatur adeo incuria , voluptate corporis profligata (§. 360.). Inprimis paupertatis periculum inde imminens multa , cum ob defectum boni jucundi , tum ob pœnitentiam , tædia creaturum , perpendendum est.

§. 362.

Fiunt quoque incurii , quibus a primis incunabulis abunde suppetunt ad vitæ necessitatem , jucunditatem atque decorem necessaria , ut indigentia non habeant sensum , præsertim ubi adultis ea contigit felicitas , ut non cogitantibus acquirantur , quæ ad vitam commode transigendam sufficiunt.

§. 363.

Parentum igitur est , cavere , ne præjudicium tam noxium animis tenellis ingeneretur : id quod fiet , ubi in præbendis ad jucunditatem præsertim atque decorem vitæ facientibus se præbeant quodammodo difficiliiores , & mature doceant liberos , quam difficulter opes acquirantur , quam facile contra partæ dilabantur.

§. 364.

§. 364.

Si quis fortuna secunda confusus incurius evadit (§. 362.) : docendus est, quam parum tuto secundis rebus confidamus, fortuna nimium mutabili ; & quam faciles sint casus, in quibus olim desint necessaria. Rationes circumstantiæ singulares offerunt, ad persuadendum idoneæ.

§. 365.

Ex incuria in prodigalitatem atque luxum facilis est prolapsus. Incurius enim cum non nisi præsentis rerum statui attendat, de futuro parum sollicitus (§. 351.) : oblata pecuniarum erogandarum occasione sumptibus non parcat, modo iis faciendis par sit, etsi eos nec vitæ præsens necessitas, nec jucunditas, nec decor postulet, multo magis vero ubi futuræ saltem necessitati præjudicatur. Prolabitur adeo in prodigalitatem atque luxum. (§. 354. 355.).

§. 366.

Corrigendum ergo est vitium istud, antequam prodigus factus, dilapidaverit bona, quæ futuris vitæ necessitatibus debentur. Plurimum hic valet, si damna incuriorum exemplis doceantur.

§. 367.

Homines voluptuosos in prodigalitatem

atque luxum omnium facillime prolabi, satis liquet. Voluptuosus enim ex corporis voluptate statuit de bono; objecta autem, quæ istam creant, non sine expensis ut plurimum multis comparantur: quamdiu adeo sumtus, eam in rem impendendi, suppetunt, nihil obstat, quo minus iisdem ad objectum adeo amatum obtinendum utatur, consequenter prodigus sit (§. 354.), immo luxui sese immittat (§. 355.).

§. 368.

Eradicanda igitur voluptas, minimum compescenda (§. 367.), ut luxus vitetur. Inprimis autem voluptuosus docendus est, quam durum sit paupertatis telum, præsertim ubi recordatus fuerit, se olim profudisse, quæ nunc necessitati sublevandæ defunt (§. 95. *Ph. pr. un.*).

§. 369.

Ambitione ad luxum trahuntur, qui maximè ab aliis fieri animadvertunt, quotquot luxui dediti sunt, id quod ex notitione ambitionis inferius explicanda, clarius constabit.

§. 370.

Corrigitur adeo luxus, sublata causa. Ambitioso nimirum monstrandum est, quam parum inde honoris consequatur, rationibus à
cir-

circumstantiis singularibus petitis. Inprimis autem demonstranda est ignominia olim secutura, ubi opibus dilapidatis vix habuerit, quæ necessitati sufficiant.

§. 371.

Sunt etiam, qui ad stultitiam prope simplices, aliorum persuasionibus facile sese adduci patiuntur, ut in erogandis pecuniis fiant prodigi, præsertim ubi rationes ad persuadendum electæ inclinationi naturali aut consuetudini contractæ respondent.

§. 372.

Trutinandis rationibus cum non sufficiant istiusmodi homines: præsentissimum erit remedium, ut alio fine a consortio illorum avocentur, qui lucrum ex ipsorum luxu capiunt, & ad consuetudinem cum aliis adducantur, qui pecuniis profundendis ansam hand offerunt.

§. 373.

Qui veretur, ne sibi immineant casus funesti, in quibus desint vitæ necessitati vel decori necessaria; is facile avarus evadit (§. 349.).

§. 374.

Continuo conqueruntur avari meticulosi de temporum adversitatibus & de periculis im-

imminentibus, atque de futura necessitate continuo solliciti sunt.

§. 375.

Adversus avaritiam hoc in casu optimum præsidium est providentia divina, fiduciam erga Deum gignens : de qua inferius plura.

§. 376.

Qui summum hominis bonum in opum affluentia consistere autumant : opes propter se appetunt (§. 140. *Psychol.*) : avari ergo sunt (§. 349.).

§. 377.

Erroris ut vincatur avarus : docendus est, quinam sit opum usus, nimirum, quod eadem non serviant, nisi vitæ necessitati, jucunditati atque decori. Quodsi enim opibus partis non fuerit usus : perinde erit, etsi vitam cum morte commutaverit, ac si ipsi fuissent prorsus nullæ.

§. 378.

Nihil efficitur, ubi quis ex pecunia præsentem voluptatem percipit, tanto majorem, quanto majore copia abundat, qua adeo careret iisdem destitutus. Hic itaque inquirendum in rationes, cur ex pecunia sentiat voluptatem, ut eas esse nullas ostendi possit : optimum ea in re præsidium judicamus, ubi quis
de

de felicitate (§. 71. & sqq. *Ph. pr. un.*) meliora fuerit edoctus.

§. 379.

Ambitio avaros reddit, quando maximi eos fieri videmus, qui opibus circumfluunt; contemni e contrario, qui iisdem destituuntur (§. 349.).

§. 380.

Perversus hominum mos, quo ex opibus statuunt valorem personis, in dubium vocari nequit. Quamobrem non video, quodnam hic remedium locum habere possit, quam ut ambitiosus de honore veriora edoceatur (§. 73. & sqq. *Jur. nat.*), de quo plura paulo inferius.

§. 381.

Fieri etiam potest, ut ex prodigalitate atque luxu nascatur avaritia. Luxum qui amat: opibus circumfluat necesse est, ut desideria animi expleat. Etsi itaque opes non propter se appetat, atque adeo avarus minime videri possit (§. 349.): plures tamen appetit, quam quæ necessitati, jucunditati atque decori vitæ sufficiunt, salvisque in Deum, seu atque alios officiis parari queunt, atque adeo in numerum avarorum recte refertur (§. cit.).

§. 382.

Quibus absurdum videtur, prodigum esse avarum : avaritiam cum sorditie confundunt (§. 357.).

§. 383.

Quodsi ob luxum avarus tantundem opum acquirere nescit, quantum ad explenda animi desideria sufficit: continuis querelis ac tædiis vitam transigit,

§. 384.

Corriges autem immodicum opum appetitum, si luxus vanitatem graphice delinees & damna inde oritura repræsentes, v. gr. quod aliorum invidiæ nos exponamus, & ipsi in alios invidia correpti, nunc odio, nunc ira flagremus (§. 116. 118. 132. *Psych.*), nunc pœnitentia, pudore ac mœrore conficiamur (§. 114. 121. 123. *loc. cit.*), nunc tandem metui ob pericula ab invidiis imminencia conturbemur (§. 127. *l. c.*).

§. 385.

Ipsa etiam corporis voluptas in causa esse potest, ut avaritiæ sese dedat sorte sua non contentus. Voluptuosus enim pabuli voluptaris absque nummis particeps cum fieri nequeat; iis deficientibus, non adest, quod appetitum officii in Deum, nos atque alios adversum reprimere possit. Avaritiæ igitur locum lubentissime concedit (§. 349.).

§. 386.

§. 386.

Ut malo medeamur, voluptas oppugnanda. Quamobrem si cui non desint ad necessitatem, jucunditatem & decorem vitæ necessaria: is doceri debet, quod frui detur voluptate, felicitati haud inimica; ex reliqua, cujus gratia tot opes appetit, metuendam esse felicitatis jacturam. Rationes ad persuadendum suppeditabunt notiones felicitatis & infelicitatis (§. 72. 78. *Pb. pr. un.*), ad experientiam applicatæ.

§. 387.

In genere autem hic notandum est, ne voluptate corporis abutamur, ineundum esse calculum de voluptate per omnem vitam percepta. Ita nimirum uti decet voluptate, ne efficiat, ut si totum vitæ curriculum spectemus, maxima pars temporis tædio fuerit confecta, sane pars major tædio, quam voluptate. Neque enim hic inter se conferimus nisi quantitatem voluptatis cum quantitate tædii.

§. 388. 9

Attentionem merentur, quæ modo diximus. Latent enim in his principia foecunda, felicitatem vitæ accurate æstimandi, magnum pondus apud eos habitura, qui ratione ac consilio dirigunt actiones suas.

§. 389.

§. 389.

Quodsi quis & ab avaritia & incuria fuerit alienus, is animo vivit contento (§. 343.).

§. 390.

Quamobrem ut animus alicui sit sorte sua contentus: procul arcenda est incuria (§. 351.), atque avaritia (§. 349. & seq.).

§. 391.

Expendi tamen quoque meretur animi tranquillitas, ubi quis sorte sua fuerit contentus. Vacuus est animus ab affectuum impetu, quo inquietatur avarus, sive quod contristetur ob opum absentiam (§. 114. *Psych.*), sive, quod invidet alteri divitias, fortunamque secundam (§. 118. *l. c.*), sive quod odio prorsus adversus eum flagret (§. 116. *l. c.*), sive quod pœniteat occasionis opum acquirendarum neglectæ, aut expensarum inutiliter factarum (§. 121. *l. c.*), sive quod desperet de consilii eventu (§. 127. *l. c.*), sive quod irascatur illis, quos fortunæ suæ adversos experitur (§. 132. *l. c.*). E contrario lætatur, quando inuenitur, tantundem sibi constanter suppetere, quantum vitæ necessitati, vel etiam jucunditati atque decori sufficit, quod non irritus fuerit labor (§. 120. *l. c.*), & si quando voto & labori non respondeat eventus, conscientiae excusantis perceperit fructus (§. 94. 96. *l. cit.*).

§. 392.

§. 392.

Maximum hic pondus habet pietas, præsertim fiducia erga Deum & acquiescentia in ipsius voluntate ; id quod ex infra dicendis constabit plenius.

§. 393.

Turbatur subinde animus ceteroquin sorte sua contentus, si alios, ejusdem nobiscum conditionis, opibus affluentes contueamur.

§. 394.

Ne igitur tranquillitas pereat, animi sorte sua contenti fructus eximius ; non modo fors aliorum, qui sunt ejusdem nobiscum conditionis, sed fortuna tamen minus læta utuntur, cum nostra conferri debet, verum etiam inprimis quæ fortunæ aliorum secundæ admixta sint mala socia, ab iis non separanda percipi convenit. Accidit enim sæpissime, ut bonum alterius non anhelemus, si quidem habuerit malum socium.

§. 395.

Si avaritia ex vana de summo hominis bono persuasionem ortum trahit (§. 376.), sorditiem (§. 357.), minimum parsimoniam nimiam (§. 344.) habet sociam.

§. 396.

Eadem nonnunquam comes avaritiæ est, si illa ambitionis filia (§. 380.) fuerit.

(P. II, *Tbüm. Inst. Phil. Pr.*) T §. 397.

§. 397.

Enimvero avaritiam minime comitatur, ubi ea prodigalitatis, luxus atque voluptatis proles (§. 382. 386.).

§. 398.

Atque eadem est ratio, cur parsimoniam nimiam & sorditiem ab avaritia discreverimus, hoc est, vitium excedens in opibus acquirendis ab eo, quo in pecuniis erogandis committitur excessus, præsertim cum philosophus lingua, qua scripsit vernacula, dudum nominibus discreverit, quæ *Aristotelici* communi avaritiæ nomine designarunt.

§. 399.

Sordidus & parsimoniæ legem excedens, nummis parcit, etsi circumstantiæ suadeant singulares, decoris atque jucunditatis habere rationem. Famæ igitur labem adspergit, fortunæ variis modis nocuam, pro circumstantiarum diversitate. Hinc proverbium: Pecuniam negligere in loco, prudentia summa est. Præterea felicitatis parte sese privat, quæ a jucunditate innocua pendet (§. 72. *PA. pr. un.* & §. 14. *Ethic.*).

§. 400.

Quodsi sordities fuerit avaritiæ soboles: hæc oppugnanda est (§. 275. & sqq.), ut, causa sublata, tollatur effectus.

§. 401.

§. 401.

A prodigalitate & sorditie aut nimia parsimonia alienus, in parsimonia tenet, quod virtutis est (§. 354. 357. 344.).

§. 402.

Quodsi cavetur, ne sorde ista inficiatur animus (§. 354. & seqq.): virtuti haud difficulter concedetur locus.

§. 403.

Vestitus ac utensilium aliarumque ad vitam necessariorum rerum tanta habenda est cura, ne damnum detur, quod averti potest (§. 71. *Jur. nat.*). Singularis adeo hinc pendet cura, ne contra parsimoniam pecces (§. 344.), multarum in vita actionum determinatrix, quas ad decorum referre solemus.

§. 404.

Animi forte sua contenti signum est, ubi nec de fortuna nostra conquerimur, nec limis oculis alienam contuemur (§. 348.).

§. 405.

E contrario continuæ de acceptis & expensis querelæ, avaritiæ & nimiae parsimoniæ seu sorditiei indicia præbent (§. 349. 358.).

§. 406.

Similiter avarus est, qui alteri, etsi odii

causa adsit nulla, invidet fortunam prosperam (§. 118. *Psych.*), & qui contristatur, quando narrantur bona, quibus abundat alter, ipse autem destituitur (§. 113. *Psych.*).

§. 407.

In eundem censum referri debet ingens ob jacturam opum tristitia (§. 114. *Psych.* & §. 349. *Eth.*).

§. 408.

Huc quoque pertinet ira adversus eum, quem tanquam jacturæ opum causam consideramus (§. 132. *Psych.* & §. 349. *Eth.*).

§. 409.

Prodigalitas & sordities signis minime habet opus, modo luxui non tribuamus sumtus, quos vitæ jucunditas atque decor exigit (§. 60 *Jur. nat.*), nec parsimoniam cum sorditie confundamus.

§. 410.

Liberalis in conferendis donis, rationem tenet juris naturalis (§. 345.). Iisdem adeo ornatur personas ob merita benigniori fortuna dignas, ne defint ad jucunditatem vel decorem vitæ requisita (§. 246. *Jur. nat.*), immo dona præbet in animi grati tesseram (§. 248. *Jur. nat.*), ac larga manu nummos offert iis, qui iisdem rectius quam ipse ad felicitatem generis humani promovendam uti valent (§. 247. *Jur. nat.*): donis quoque eorum sibi favorem concipi-

ciliat, quos felicitati suæ promovendæ pares existimat (§. 250. *Jur. nat.*).

§. 411.

Liberalitatis igitur motiva sunt in diversis casibus diversa, facile autem eruenda, modo cogitemus emolumenta, ex donis in alios collatis redundantia,

§. 412.

Qui ducuntur gloria, in grati animi tesseram dona exhibent promptissime & hominibus benigniori fortuna dignis (§. 122. *Psych.*).

§. 413.

Qui prudens est, donis favorem sibi conciliat, quos felicitati suæ promovendæ pares existimat.

§. 414.

Qui felicitate generis humani delectatur, amore universalis erga omnes fervens, a donis non abstinebit, quæ in eandem impenduntur.

§. 415.

Liberalitati inimicam esse avaritiam & sordiditatem, ex ipsis notionibus statim liquet.

§. 416.

Eidem affinis est *officiositas*, quæ est habitus gratis alteri commodandi operam suam.

§. 417.

Eadem ergo hic sunt motiva, quæ ad liberalitatem ducunt (§. 348.). Accedit, quod nobis alios reddat amicos, sicuti vitium contrarium hominum animos a nobis alienare solet.

§. 418.

Proficiscitur officiositas ex amore in alterum (§. 115. *Psych.*): hac igitur virtute potiturus, amori generis humani studeat; qua de re inferiorius plura dicentur suo loco.

§. 419.

Qui eleemosynas promte elargitur, egentis miseriam sublevaturus, dicitur *beneficus*. Unde simul intelligitur, quænam virtus *beneficentia* appelletur.

§. 420.

Oritur ex misericordia (§. 119. *Psych.*), quæ cum porro ex amore originem trahat; idem beneficentiæ, quod officiositatis, medium est (§. 418.)

§. 421.

Misericordia supponit agnitionem infelicitatis alterius (§. 119.). Prodest itaque, aliorum infelicitatem atque miseriam sibi reddere perspectam, eamque cum nostro conferre statu, ut intelligamus, quo animo essemus, si in eum

eum prolapsi, alterum in nos beneficium experiri-
remur.

CAP. VII.

DE MODESTIA.

§. 422.

Modestia est virtus actiones circa honorem
versantes legi naturali conformiter de-
terminandi.

§. 423.

Modestus adeo honores minime appetit, iis-
dem tamen se dignum præstat, speciminibus
probat (§. 73. 74. *Jur. nat.*), famamque suam
tuetur, si quando opus fuerit (§. 77. *l. c.*).

§. 424.

Ambitio e contrario est vitium, majores me-
rito appetendi honores & plures, quam per re-
rum præsentium statum consequi datur; ut adeo
in excessu peccet ambitiosus.

§. 425.

Inambitiositas est vitium, quod consistit in ho-
noris neglectu: ut adeo in defectu peccet, qui
hoc vitio contaminatur.

§. 426.

Quoniam modestus se honore dignum
T 4 præ-

præstare atque speciminibus probare debet (§. 423.): fieri haudquaquam potest, quin ex honore voluptatem percipiat. Qui nullam inde percipit, vicio inambitiositatis laborat (§. 415.).

§. 427.

Honor cum sit iudicium aliorum de nostra perfectione (§. 73. *Jur. nat.*): qui ex eo voluptatem percipit, præclare factorum gloria ducitur, atque adeo lætatur, quando præclare facta ad intelligentium opinionem refert (§. *cit.*).

§. 428.

Gloria cum sit stimulus ad præclara præstanda (§. 122. *Psych.*): modestus quoque facillime flectitur ad virtutem colendam & vitium fugiendum (§. 427.).

§. 429.

E contrario qui inambitiositate laborat, difficillime flectitur (§. 425.): vi igitur adigendus ad ea, quæ ab ipso peragi debent, & sedulo opera est danda, ut casu suo sapere discat.

§. 430.

Plurimum adeo virtuti obsunt, qui modestiam cum inambitiositate confundentes, ab ambitione avocandos, ad inambitiositatem perducunt; id quod proh dolor! experientia clarissime loquitur.

§. 431.

§. 431.

Quoniam ambitiosus appetit honorem, atque in eodem appetendo modum excedit (§. 424.): a vitio ad virtutem revocandus doceri debet, quinam sit verus honor (§. 73. *Jur. nat.*), ne nubem pro Junone amplectatur, quodque honor non sit in potestate honorati, sed honorantis (§. 74. *l. cit.*), ne temeritatis notam incurrat; nec honor deferri possit nisi ab intelligente (§. 75. *l. c.*), ne vanitate delectetur.

§. 432.

Probe autem perpendendum, eum, qui honores appetit, multis affectibus perturbari. Nunc enim odio flagrat adversus eos, qui honorem ipsi deferre renunt (§. 116. *Pfych.*); nunc poenitentia corripitur, vel quod honorem ea quæsiverit ratione, qua eundem consequi haud potuerit, vel quod ea fecerit, quibus aliorum animos a se alienaverit, vel ob alia facta singularia (§. 121. *Pfych.*); nunc metu angitur, ob honorem quæsitum, forte non obtinendum, vel obtentum amittendum (§. 127. *l. c.*); nunc invidia contabescit ob honorem, quo alii afficiuntur (§. 118. *l. c.*).

§. 433.

Illud quoque considerari meretur, honorem minime promeritum viam sternere posse

ad maiorem ignominiam. Cum enim ex elogiis intelligentes magnum de honorato spem concipiant, quam frustratam experiuntur, ubi eundem propius norunt; omissis iis, quæ laudi esse poterant, in aliis recensendis defleuntur, quibus aliis persuadent, in ipsum elogia istiusmodi non cadere.

§. 434.

Quibus honores civiles, veluti tituli & locus honoratior nimium placent, illos doceri præstat eorundem vanitatem, cum nemo intelligentium sincero cultu ob eosdem aliquem prosequatur, sed ob merita, quæ efficiunt in republica, ne indignis conferatur.

§. 435.

Eodem pertinent elogia & encomia, quæ sunt sine mente sonus, nisi nobis insint, quæ vocibus respondent laude digna.

§. 436.

Nec illud infimi commatis est, plurimos in laudandis aliis non esse nisi echo aliorum: id quod perinde est, ac si psittacus memoriæ mandata recitaret. Istiusmodi adeo laudibus non statuitur pretium, nisi quatenus ab intelligente ex animo sincero profectum.

§. 437.

§. 437.

Quodsi honores civiles alicui ex merito decernantur: nobis laudi ducuntur, quatenus meritorum signa sunt; ipsi autem per se laudis argumentum haud præbent.

§. 438.

E contrario liquet, eos in laudem minime vergere, ubi viis obliquis fuerint consecuti: immo sæpe ignominiam parere, cum refricent memoriam causarum, ob quas eos fuimus consecuti.

§. 439.

Intelligimus adeo, honores civiles non esse appetendos, nisi quatenus signa sunt meritorum, atque adeo ansam præbent ad honorem nobis promeritum deferendum (§. 434. 437.).

§. 440.

Similiter bona fortunæ honori non sunt, nisi quatenus modus acquirendi virtutum intellectualium atque moralium index (§. 73. *Jur. nat.*) est,

§. 441.

Et si vero vulgus aliter sentiat: ejus tamen consensus non parit errori patrocinium. Multo minus error vulgi, actionum norma recte iudicatur.

§. 442.

§. 442.

Immo fieri potest, ut bonum fortunæ defectus præbeat argumentum laudis, quatenus nempe studium virtutum intellectualium & moralium eodem evadit difficilius. Exempla quotidiana sunt.

§. 443.

Fieri quoque e contrario potest, ut bona fortunæ, studio virtutum intellectualium & moralium obstant, idemque difficilius reddant; quo in casu ipsa quoque laudem consummant.

§. 444.

Ex hætenus dictis manifestum evadit, quam circumspècta sollicitudine versari debeamus in laudandis aliis.

§. 445.

Erit eadem sollicitudo in potestate, quamdiu de honore non statuimus, nisi ex ejus notione (§. 73. *Fur. nat.*).

§. 446.

Honori opponitur *ignominia*, quæ adeo est judicium de nostra imperfectione, quatenus ejusdem causa sumus.

§. 447.

Qui igitur imperfectiones alterius recenset,
ali-

aliisque suum de illis iudicium probat actibus; is alterum ignominia afficit.

§. 448.

Quemadmodum itaque homo meretur honorem, quatenus se aliosque perficit ac gloriam Numinis illustrat (§. 50. *Phil. pr. un.*); ita ignominia dignus est, quatenus vitio deditus (§. 57. *Phil. pr. univ.*).

§. 457.

Plurimum hic homines dant opinioni, sed ex honoris (§. 73. *Jur. natural.*) & ignominiae (§. 446.) notione in dato quolibet casu refellendæ.

§. 450.

Qui alteri tribuit imperfectiones, quibus non obnoxius est, eum *calumniatur*.

§. 451.

Cum ignominiae locus non sit, si imperfectionis nostrae causa non sumus (§. 446.); fortuna adversa ignominiae non est, nisi quatenus ejusdem ipsimet fabri sumus. Non ipsa fortuna adversa, sed ejusdem causa ignominiae esse potest.

§. 452.

Eodem modo intelligitur, fieri posse, ut ipsa etiam bona fortunæ ignominiae sint, quatenus

tenus nempe modus acquirendi virtuti contrarius (§. 438.) existit.

§. 453.

Ex hætenus dictis claret, quam circumspccta sollicitudine versari debeamus, in aliis ignominia afficiendis.

§. 454.

Erit hæc in potestate, quamdiu de ignominia non statuimus, nisi ex ejus notione (§. 447.).

§. 455.

Quoniam modesti est, se honore dignum præstare atque speciminibus probare (§. 434.); idem quoque cavere debet, ne ignominia det locum (§. 446.), id quod obtinetur indefesso virtutum cum intellectualium tum moralium studio (§. 448.).

§. 456.

Cum judicium aliorum, quo ignominia continetur (§. 446.), non sit in nostra potestate; ferendum quod mutari nequit, ubi invidi ac malevoli convitiis famam nostram laceßunt, nosque calumniantur (§. 450.).

§. 457.

Quia tamen modestus famam suam tueri jubetur, si quando opus fuerit (§. 423.); ope-
ram

ram quoque adhibere tenetur, ut innocentia orbi fiat manifesta, & calumnia in apricum producat.

§. 458.

Quando itaque calumnia per se manifesta est: ut innocentia vindicetur, superfluum haberi debet (§. 457.).

§. 459.

Superflua quoque est innocentiae vindictio, si calumniatori nulla est fides,

§. 460.

Optima adversus calumnias defensio est, ubi speciminibus evidentibus contrarium docueris.

§. 461.

Quodsi tamen deficiat occasio, qua speciminibus refellere possis calumniatores, vel calumnia ejus sit generis, quæ hac ratione refelli nequit: famam suam cum tueri debeat (§. 457.), iis utendum est mediis, quæ huic instituto sufficiunt. Ostendendum scilicet, malevolum esse calumniatorem, ob virtutum cum intellectualem tum moralium distinctius enumerandarum defectum.

§. 462.

Quibus hæc a modestia videntur aliena,
il-

illi non perpendunt, in tuenda fama licere, quæ in tuenda vita membrorumque integritate jus inculpatæ tutelæ concedit (§. III. & seqq. *Jur. nat.*).

§. 463.

Ab his pendent, quæ ab eruditis observari convenit in controversiis tractandis.

§. 464.

Arrogantia sive *fastus* est vitium, quo quis se ob bona sive animi, sive corporis, sive fortunæ supra alios effert.

§. 465.

Arrogans adeo majoris sese facit, quam par est.

§. 466.

Humilitas contra est virtus, qua quis ob bona sive animi, sive corporis, sive fortunæ supra alios sese minime effert.

§. 467.

Humilis consequenter ab arrogantia maxime alienus (§. 464.), neque adeo sese majoris facit, quam par est (§. 465.).

§. 468.

Quilibet homo pro virili ad perfectionem sui eniti tenetur (§. 20. 32. *Pb. pr. un.*), consequen-

quenter notitiæ sui omnem impendere operam (§. 237. & sqq.). Humilitas itaque cum virtus sit (§. 467.): eidem minime repugnat (§. 49. *Phil. pr. un.*), ut tibi certo constet, quantum in studio virtutum intellectualium atque moralium profeceris. Immo cum ex alio nos cognoscere debeamus (§. 239. 240.): nec repugnat humilitati, si quis agnoscit, se hac vel ista virtute sive intellectuali sive morali præstare altero, sibi que deesse id vitii, quo laborat alter.

§. 469.

Immo cum famam suam tueri debeat, & in ea defendenda idem liceat, quod in defendenda vita per inculpatam tutelam licet (§. 463.): nec humilitati contrariatur, si quis famam defensus, alterius vitia intellectualia & moralia calumniarum fontem in apicum producit.

§. 470.

Immo cum a sensu perfectionis voluptas abesse nequeat (§. 95. *Psych.*): nec humilitati repugnat, si quis ex eadem voluptatem percipit (§. 467.), atque adeo hoc stimulo utitur ad se ulterius perficiendum.

§. 471.

Eo ipso autem dum ex perfectione voluptatem percipit: implicat, ut ex imperfectione eandem percipiat; quin potius eatenus discipulus
(P. II. *Tbüm. Inst. Phil. Pr.*) U pli.

plicet sibi metipſi, quatenus eandem intuetur (§. 99. *Psych*), atque hoc ſtimulo utitur ſeſe ab eadem pro virili liberaturus.

§. 472.

Ut arrogantiae medearis: primo omnium loco inquirendum, quodnam ſit illud bonum vel animi vel corporis vel fortunæ, quod caput ſupra alios elatum reddit homini faſtuoſo; deinde pro re nata evincendum, vel ipſorum exiguum eſſe gradum, comparatione cum aliis inſtituta, qui in eodem genere excellunt, vel quod circa ea nil debeamus nobis aut parum, vel quod denique bonum ſit caducum, cui fidendum non ſit; cogitandum præterea, non omnia poſſe omnes, & alterum nos alia in re anteire, quem in hac ſuperamus.

§. 473.

Pabulum faſtui ſuppeditatur, ſi quis in imperfectionem alterius tantum oculos convertere conſuevit, ut habeat, quod in aliis reprehendat.

§. 474.

Eidem adeo medemur & ad humilitatem deducimur, ſi contraria ratione in bonis, quæ alteri inſunt vel adſunt mentis pariter ac oculorum aciem deſigamus, vitiis non notatis niſi ad noſtram emendationem (§. 469.), quibus

quibus adeo non amplius inhæremus, quamprimum eadem ad nos retulimus scopo quæsito potiti.

§. 475.

Ex arrogantia sive fastu oriri posse ambitionem, utriusque vitii notio invicem collata satis prodet (§. 424. & 464.).

§. 476.

Extirpatur consequenter hoc in casu ambitio, fastu sublato (§. 472. & seqq.).

§. 477.

Fastui in defectu opponitur *animus abjectus*, quod est vitium, quo quis sese minoris facit, quam par est.

§. 478.

Non igitur agnoscit bona, quæ ipsi adsunt (§ 468.), famæque tuendæ curam abjicit (§. 469.), nec hoc stimulo nititur ad se ulterius perficiendum (§. 470.), qui abjecto est animo.

§. 479.

Idem quoque majoris facit alios, quam par est.

§. 480.

Quænam abjecto ex animo profluant damna, satis superque patet. Virtutum intellectualium nulla fere sollicitudine tanguntur;

in moralibus umbratilem quandam speciem se-
stantur, & in officiis cum sibi, tum aliis pluri-
mum defunt. Tot exempla nostro ævo sunt
obvia, ut rationibus confirmari non debeant ad-
eo manifesta,

§. 481.

Fieri subinde solet, ut non nemo singula-
rum circumstantiarum gratia, animum abje-
ctum prodatur: ubi medela ex iisdem dete-
genda.

§. 482.

Magnanimitatem dixere veteres, si appeti-
tum circa honores magnos naturali legi con-
formiter attemperamus. Enimvero cum ma-
gis & minus non variant speciem, opus non est,
ut peculiarem virtutem honoribus magnis di-
cemus.

§. 483.

Refertur subinde magnanimitas ad alia quo-
que bona externa, ut sunt fortunæ bona. Enim-
vero quæ hic deceant, ex præcedente de libera-
litate doctrina petuntur.

DE DILIGENTIA.

§. 484.

Diligentia est virtus determinandi laborem legi naturali convenienter.

§. 485.

Quoniam ideo laborandum, ne desint ad vitæ necessitatem, jucunditatem atque decorem necessaria (§. 60. *Jur. nat.*): diligentis est, ea in laborando assiduitate uti, quæ absque sanitatis viriumque dispendio, & salva vitæ jucunditate salvoque decore adhiberi potest.

§. 486.

Qui ergo majore assiduitate utitur, nimiam diligentiam adhibet, adeoque in vitium incurrit ntpote virtuti contrarium (§. 484. 485.).

§. 487.

In defectu e contrario peccat, qui ex alio voluptatem sentit a labore abhorrens, atque *pigræ* fert nomen.

§. 488.

Quoniam voluptuosus ex voluptate corporis seu delectationibus sensuum judicio de eo, quod bonum vel malum est, statuit; non quidem ab omni, ab eo tamen labore abhorret, ex

quo tædium percipit, quemque adeo voluptati inimicum arbitratur (§. 41. *Psych.*).

§. 489.

Immo si contingat, hominem voluptuosum ex aliquo laboris genere voluptatem percipere; eundem (§. §. *cit. Psych.*) appetit, consequenter nihil obstat, quo minus in eodem sese assiduum præbeat.

§. 490.

Ut igitur voluptuosus ad diligentiam alliciatur: opera nobis danda est, ut tædium, quod ex labore eidem suboriri poterat, leniatur; e contrario omnem lapidem movere convenit, ut ex eodem voluptatem sentiat. Non abhorrent hæc a praxi parentum, pueros ad voluptatem pronos ad discendum litteras adducentium.

§. 491.

Qui non honoris sive opum gratia assiduus in opere fuit, spe frustrata ad pigritiem recidit. Cessante enim diligentiae motivo, ipsa quoque cessat diligentia (§. 41. *Psych.*).

§. 492.

Qui tantum pecuniæ rationem habet, eum doceri præstat (§. 69. *Jur. nat.*), quod laboris adhuc alius detur finis, cujus perinde ratio habenda sit.

§. 493.

§. 493.

Quodsi avarus fuerit, eo sine laborans: remediis, quæ adversus avaritiam profunt (§. 275, & sqq.), ad meliorem sensum perducitur.

§. 494.

Qui honoris tantum consequendi gratia labore defungitur, verique cupidus est: is non modo docendus (§. 74. *Jur. nat.*), honorem non esse ex eorum numero, quæ in potestate nostra sunt, verum etiam perpendere debet, voluptatem ex ipsa operis perfectione oriundam (§. 95. *Psych.*), quodque eam comitetur acquiescentia in seipso (§. 120. *l. c.*).

§. 495.

Si quis vani honoris cupidus: huic exhibenda remedia, quæ adversus ambitionem (§. 431.) commendavimus

§. 496.

Nimia diligentia vel ambitioni vel avaritiæ debetur, vel indigentia ejus necessitatem imponit,

§. 497.

Ambitio vel avaritia ubi fuerit causa; utendum est remediis, quibus hæc profligantur vitia (§. 431. 375. & sqq.).

§. 498.

Indigentia ubi eam suaserit: inprimis perpendi meretur, quod nimia diligentia cum dispendio sanitatis sit conjuncta; morbo autem laborantibus indigentia multo intolerabilior. Circumstantiæ singulares loquentur, quibus aliis modis egestas sublevari queat.

§. 499.

Quæ de sanitate supra (§. 301. & sqq.) eum de temperantia ageremus, dicta sunt, hic quoque attentionis momentum postulant.

CAP. IX.

DE PATIENTIA.

§. 500.

Patientia est virtus dirigens actiones hominis legi naturali convenienter circa fortunam adversam.

§. 501.

Cum fortuna adversa non sit in potestate nostra (§. 78. *Jur. nat.*): ferendum, quod mutari nequit.

§. 502.

Et quoniam eadem confundi nullo modo licet

cet (§. 78. *Jur. nat.*): idem sit nobis animus, qui futurus erat, si eadem abesset.

§. 503.

Neutiquam igitur tristitiæ indulgere, aut indignationi locum concedere debemus.

§. 504.

Quodsi quis non ipse fuerit fortunæ adversæ faber: optimum in providentia divina situm est remedium (§. 75. *Theol. nat.*).

§. 505.

Atque adeo consultum est, ut quamprimum adversa nobis obtingunt, meditemur, quænam inde bona in nos redundare queant, & quod eadem convertere possimus in salutarem usum, utentes iisdem tanquam actionum motivis.

§. 506.

Quodsi quis adversitates experitur actionum malarum fructum, cum tactum infectum fieri nequeat; prudentia summa est, ubi iisdem utitur motivis ad virtutem.

§. 507.

Cogitandum præterea est, impatientiam non efficere, nisi ut adversitates intolerabiliores fiant. Eædem itaque cum displiceant,
U 5 quod

quod tædia creent; insanus est, qui tædia multiplicat.

§. 508.

Illud quoque annotare juvat, in adversitates, quibus affligimur, mentis aciem nimis intendendam non esse, sed ad alia objecta meditando convertendam.

§. 509.

Utile in primis erit, si in rebus secundis meditemur, quænam nos adversitates manere possint: undum enim experientia docuit, tela prævisa nocere minus.

§. 510.

Pro diversitate causarum, quibus adversitates debentur, diversis animus agitur affectibus, beneficio eorum compescendis, quæ superius cap. 2. §. 28. & seqq. de regimine affectuum docuimus.

CAP. X.

DE FORTITUDINE.

§. 511.

Fortitudo est virtus dirigens actiones hominis circa pericula imminencia legi naturali convenienter.

§. 512.

§. 512.

Quoniam vitæ pericula sunt omnium maxima, quæ subire tenentur militiæ operam navantes: fortitudini in bello potissimum locus est.

§. 513.

Ex malo imminente nascitur metus (§. 127. *Psych.*): fortitudo itaque metum moderatur (§. 511.).

§. 514.

Quoniam vitæ pericula vitanda sunt, quantum datur (§. 43. *Jur. nat.*), atque integritatis membrorum conservandæ cura omnibus incumbit (§. 47. *l. c.*): a fortitudine alienum est (§. 511.), vitam vel membra corporis præter necessitatem periculo exponere.

§. 515.

Excessus iste *audacia* dicitur; cumque legi naturæ contrarietur (§. 514.), inter vitia refertur (§. 56. *Pb. pr. un.*).

§. 516.

Quodsi vero officiis defueris sive in Deum, sive in alios, sive in teipsum, nisi vitæ vel integritatis corporis pericula subire velis; quin ea subeunda sint dubitari nequit (§. 47. *Ontol.*). Atque hoc in casu fortitudini locus est (§. 511.).

§. 517.

§. 517.

Qui nimirum refovinidat in hoc casu pericula, ad actiones officii istis contrarias pronus; is in moderando metu deficit, atque defectus iste, juri naturali contrarius (§. 516.), in vitio ponitur (§. 56. *Pb. pr. un.*).

§. 518.

Audacia corrigitur exemplis, ut ex alieno casu sapere discat, qui sero nimis saperet ex suo.

§. 519.

Rationes quoque adversus audaciam suppeditant circumstantiæ singulares, a quibus periculi magnitudo pendet.

§. 520.

Consultum hic est, ut tempestive meditemur, quantum damni ex hoc vel isto periculo in audaces redundare possit: ubi exempla quoque magnum pondus adjiciunt.

§. 521.

Nimia timiditas in causa est, ut fortunam secundam negligamus, quæ audenti non defutura erat.

§. 522.

Eventus ubi jacturam docuerit: poenitentia nimis sero excruciat (§. 121. *Psyeb.*).

§. 523.

§. 523.

Circumstantiæ singulares rationes suppeditant adversus timiditatem, per quas periculi tenuitas patescit.

§. 524.

Consultum hic quoque est, ut tempestive meditemur, quantum damni ex hoc vel isto periculo possit provenire, ne desint in casu singulari principia ex quibus de præsentī statuatur (§. 33. *Log.*).

§. 525.

Timiditati non sine negotio medemur, nec eadem nisi successive eradicatur. Quamobrem in pericula, quæ horret, adducendus est timidus, quibus feliciter exantlatis tandem fortitudini ceder.

CAP. XI.

DE AMORE UNIVERSALI
OMNIUM HOMINUM.

§. 526.

Quilibet homo alterum quemcunque amare debet tanquam seipsum (§. 83. *Jur. nat.*), ipsos etiam inimicos (§. 106. *l. c.*): ergo amor universalis omnium omnino hominum virtus est (§. 49. *Phil. pr. univ.*).

§. 527.

§. 527.

Amor iste universalis ut arrideat : probe considerandum est, quænam foret generis humani felicitas, si quidem omnes amore prosequerentur omnes. Etenim, qui alterum amat tanquam seipsum : is ex alterius felicitate eandem voluptatem percipit atque ex sua (§. 84. *Jur. nat.*). Quodsi ergo unusquisque hominem quemcunque alium amaret tanquam seipsum, quilibet alterius felicitatem promoveret pro virili. Nemini igitur deessent, quibus ad vitæ necessitatem atque jucunditatem haberet opus, & unusquisque alterum ad eandem perfectionem adducere niteretur, quam ipsemet consecutus est.

§. 528.

Quodsi objicias, aurea hæc secula optari, at sperari frustra, cum paucissimi hominum ex ratione vivant, plurima pars affectuum impetu ducatur: perpendendum tibi, cum tu ratione utaris, quantam voluptatem sis percepturus, ubi te nos esse causam præsentium calamitatum agnoveris. Locus enim erit acquiescentiæ in teipso (§. 120. *Psych.*), exulabit accusatio conscientiæ (§. 94. *Phil. pr. univ.*) cum mille, quæ creat, tædiis (§. 95. *l. c.*): conscientia autem te excusans (§. 94. *l. c.*) multam pariet voluptatem.

§. 529.

§. 529.

Quoniam amor ex eo oritur, quod in altero quidpiamprehendimus, unde voluptatem percipimus (§. 115. *Psychol.*); ad amorem universalem proderit, si a teneris unguiculis adsuefiant homines ad ea attendere, quæ laudem in alijs merentur atque in bonam partem interpretandum ista, quæ reprehensione digna videntur.

§. 530.

Quia odium amori contrariatur, ex offensa alterius oriri solitum (§. 118. *Psych.*), plurimum hic momenti trahit mansuetudo, quæ iram moderatur. Sed de ea mox plura.

§. 531.

Impedit amorem ambitio. Etenim cum ambitiosus honores appetat (§. 424.); non modo eum male habet, si alterum honore affici experitur, qui ipsi negatur, verum etiam quod alter honorem deferre nolit, quem anhelat. Inde cum oriatur odium (§. 115. *Psych.*), amor extinguatur.

§. 532.

Extirpanda igitur est ambitio (§. 431. & sqq.).

§. 533.

Multis cum istud remedium prematur difficult.

cultatibus (§. 5. cit.): qui alteri invidet honorem, docendus est, quod propterea non sit odio dignus, cum nulla in re nobis se præbuerit adversum. Alterum vero odisse absque ratione, ignominia summa sit.

§. 534.

Subinde circumstantiæ singulares argumenta pandunt, veluti cum alter ob honores, qui ipsi deferuntur, se supra alterum minime effert.

§. 535.

Cogitandum præterea, non ipsius culpa nobis deesse honorem, quo ipse fruitur, adeoque non adesse rationem, cur ipsi indignemur.

§. 536.

Me non monente apparet, in genere amoris adversari, si quis alteri adesse experitur, quod ipse anhelat, quo autem potiri nescit. Ratio enim in casu anteriori (§. 535.) allata hic quoque militat.

§. 537.

In omni hoc casu invidia amoris ponit obstacula (§. 118. *Psych.*): ea itaque compescenda est (§. 29. & sqq.).

§. 538.

Enimvero cum remedium hoc perquam multis subsit difficultatibus (§. cit.); eodem
uti

nti præstat remedio, quod in casu agnato paulo ante (§. 533.) commendavimus.

§. 539.

Sunt etiam, qui sibi persuadent, se felicitati propriæ obesse, alterius felicitatem promovendo. Obtinet hoc, si quis ex prærogativa voluptatem haurit.

§. 540.

Qui gaudet, dum qua in re alteri præstat: is vel convincendus est, quod prærogativam somniet cum alterius neglectu conjunctam, vel, si id veritati minus conveniat, quod ex ista prærogativa putatitia minus felicior reddatur. Rationes ad persuadendum ex circumstantiarum singularium fonte hauriuntur.

§. 541.

Qui in ea hæret opinione, se suam felicitatem negligere, alterius felicitatem promovendo: huic circumstantiæ singulares rimandæ sunt, quo appareat, annon per eas convinci possit, se suam potius felicitatem augere, alienam promovendo. Aliis deficientibus argumentis, huic constanter erit locus; quod alios nobis reddamus amicos. Ostendetur autem inferius, amicitiam in felicitate poni.

(P. II. *Tbüm. Inst. Phil. Pr.*) X §. 542.

§. 542.

Ne amorem nostrum aliquo in casu desiderari patiamur, egregie juvat, si, quoties nobis res fuerit cum aliis, recordemur regulæ: *quod tibi vis fieri, idem alteri feceris; quod autem tibi non vis fieri, idem nec feceris alteri.*

CAP. XII.

DE MANSUETUDINE.

§. 543.

Mansuetudo est virtus dirigens actiones hominis circa iram legi naturali convenienter.

§. 544.

Iraescimur illi, qui nobis vel aliis injurias intulit (§. 132. *Psych.*): mansuetudo adeo dirigat actiones circa injurias, ab aliis nobis illatas, legi naturali convenienter.

§. 545.

Mansuetus itaque non admittit, quæ tædium creant inimico (§. 103. *Jur. nat.*), nec odio eundem prosequitur (§. 104. *l. c.*), facilis est in condonando, dum quis aliqua in re ipsum læsit (§. 105. *l. c.*).

§. 546.

§. 546.

Multo minus adeo lædit alterum non inimicum, aut prorsus amicum (§. 93. *Jur. nat.*), nec damnum alteri infert (§. 96. l. c.).

§. 547.

Nimini igitur ægre faciet (§. 546.), nisi quatenus damnum avertendum (§. 99. *Jur. nat.*), a mediis durioribus abhorrens, ubi leniora profunt.

§. 548.

Mansuetudini opponitur *implacabilitas*, quæ est iræ perennitas, aut si mavis, condonandi difficultas ex iræ perennitate exorta.

§. 549.

Contrariatur quoque mansuetudini *iracundia*, quæ est vindictæ cupido.

§. 550.

Vindicta autem est studium pro malo rependendi malum.

§. 551.

Qui vindictæ insatiabilis est, *crudelis* appellatur, vel *atrox*.

§. 552.

Consequenter crudelis utitur mediis, quibus nti datur, omnium durissimis, ad depellendas aliorum injurias,

§. 553.

Caret ergo crudelis misericordia (§. 119. *Psychol.*), idemque implacabilis persistit (§. 548.).

§. 554.

Ut ad condonandum simus faciles: cogitandum est, nos perinde sæpissime offendere alios, sive ex præcipitantia, tale quid non cogitantes, sive ex odio adducti, & quod nobis tum placeat alterius ad condonandum facilitas.

§. 555.

Quoniam hic casus specialis est regulæ supra (§. 542.) inculcatæ, quod tibi fieri vis, idem & feceris alteri: ideo multum quantum refert, praxin ejus sibi reddere expeditam; id quod obtinebitur, si attenta mente consideremus, quantum opere placeant, quæ ab aliis nobis fiunt, atque extra affectuum impetum constituti liberrime meditemur, qua data occasione eadem a nobis alteri fieri possunt.

§. 556.

Modestus iram ita temperans, ne quidquam legi naturali adversum committat (§. 544.), ipsos etiam inimicos amare debet, ac si non essent inimici (§. 106. *Jur. nat.*): atque adeo ex ipsorum felicitate voluptatem percipit (§. 115. *Psychol.*), eandemque pro virili promovet (§. 107. *Jur. nat.*).

§. 557.

§. 557.

Studium promovendi felicitatem inimicorum *animi generosi* fert nomen. Posset etiam *magnanimitatis* nomine compellari, nisi vulgo vox latius acciperetur.

§. 558.

Sane quod crudelitas in numero vitiorum est, idem magnanimitas nostro sensu in numero virtutum.

§. 559.

Qui inimicum offendit: eum ad iram provocat ipsiusque adversus nos odium auget (§. 132. *Psych.*). Ex nostra itaque infelicitate tædium percipiens, vindictæ cupidine flagrat (§. 551.), atque adeo omnem occasionem aucupatur, qua nobis ægre facere damnumque inferre possit.

§. 560.

Contra qui inimicum amat, atque adeo ex ejus felicitate voluptatem sentiens, eam pro virili promovet: is eundem sibi reddit amicum (§. 85. *Jur. nat.* & 115. *Psych.*), aut minimum impedit, ne nobis aperte adversetur. Huc accedit, quod alios nobis reddamus amicos, si præter rationem alios nos odio prosequi animadvertant (§. 115. *Psych.* & 85. *Jur. nat.*): quo ipso sæpius ad misericordiam adducti

(§. 129. *Psych.*), vel ira adversus inimicos nostros flagrantēs (§. 132. *Psych.*), causam nostram tinentur.

§. 561.

Qui inimicum minime offendit, sed potius amat: is tranquillo utitur animo, dum damnum ipsi inferitur, conscientia eum excusante (§. 94. 95. *Phil. pr. un.*).

§. 562.

Ne ex inimicorum infelicitate lætitiā capiamus: non modo perpendendum, quod nobis quoque contingere possint adversa, quibus præsentibus maximopere displiceret irrisio, verum etiam quod inimici ad vindictam irritentur (§. 559.).

§. 563.

Qui rationis lumine ducti, bonum a malo discernunt, sensuum iudicio minime stantes: ad amorem inimicorum adducuntur, virtutis huius præstantiam atque magnitudinem meditati, cum pulchra videantur, quæ difficilia. Magnanimus, ergo ex amore inimicorum eandem voluptatem percipit, quam alii ex vindicta capiunt.

§. 564.

Qui opinantur, inimico cristas surrecturas eumque fore ad lædendum prouiores, ubi in-

intelligit, quod nos impune lædere possit: is perpendat velim, paucissimos mortalium eo usque esse malignos, ut, propterea quod malum bono rependas, magis inimici & ad nocendum proniores reddantur. Animo recolat velim, quod illæso inimicorum amore se defendere liceat; utque damnum avertatur, uti concessum sit mediis, quibus solis averti potest, etsi durioribus (§. 110. *Jur. nat.*).

CAP. XIII.

DE AMICITIA.

§. 565.

Amicitia est amor mutuus, mutuis officiis declaratus.

§. 566.

Amor ex eo oritur, quod in altero quidpiam deprehendamus, unde voluptatem percipimus (§. 115. *Psychol.*). Quodsi ergo idem fuerit legi naturali conforme, amicitia virtus est (§. 49. *Phil. pr. un.*); si vero repugnet, vitium (§. 56. *l. c.*).

§. 567.

Quoniam lex naturæ est immutabilis necessitatis (§. 25. *Ph. pr. un.*); mutua illa officia, quibus amor mutuus testificatur (§. 557.), legi naturali consentanea sint necesse est.

§. 568.

Quodsi in nobis fuerit, quod alteri magis displicet, quam placet istud, quod amicitiae causa fuerat (§. 565.): amicitia evanescit, immo amicus inimici personam induere valet (§. 85. *Jur. nat.* & 116. *Psych.*).

§. 569.

Neque in nostra positum est potestate, amicitiam conservare integram. Fieri enim potest, ut amicus a nobis fieri velit, quæ juri naturali repugnant: id quod cum fieri nequeat (§. 567.); amicum in nos animum deponere potest.

§. 570.

Cante ergo cum amicis conversandum, ne inimicis factis præsto sit ansa nocendi.

§. 571.

Scopulos hosce evitabit, qui constanter cogitat, amicum fieri posse inimicum, atque adeo in singulis, quæ ad eum quomodocunque referuntur, actionibus examinandum, num inde nocendi ansam accipere possit, factus nobis inimicus,

§. 572.

Non metuendum est, nos hac ratione defuturos officiis amici. Etenim officia alia non

non sunt amicorum, nisi quæ juri naturali conformia (§. 567.). Eadem vero adhuc facta et atque subsistunt, ubi ex amico factus fuerit inimicus (§. 106. *Jur. nat.*).

§. 573.

Ne igitur nimium amicitiae credamus: in ejus rationem inquirendum est (§. 566.). Exinde enim de constantia conjectare licet.

§. 574.

Si fundamentum lubricum deprehendatur: danda nobis erit opera, ut firmitus accedat; id quod fiet, ubi perpenderis, quænam placeant alteri & quodnam horum juri naturali minime repugnet (§. 567.).

§. 575.

Per eandem rationum normam (§. 573.) amicitiae limites sunt emetiendi.

§. 576.

Eos autem nosse proderit, ne officia ab amico poscamus, nobis certo deneganda.

§. 577.

Quoniam maximus est eorum numerus, qui a virtute alieni nocent aliis, quos emolumentis privatis adversos arbitrantur: amicitiam colere tenemur, tum ne noceant alii,

tum ne defint causam nostram adversus inimicos tuentes. Unde porro liquet, quamnam felicitatis partem absolvat, multos habere amicos.

CAP. XIV.

DE VERITATE & TACITURNITATE.

§. 578.

Veritas seu veracitas est virtus dirigens sermonem legi naturali convenienter.

§. 579.

Latius sumimus vocabulum hoc, quam *Aristoteles*, qui veritatem ad sermonem de se restringit.

§. 580.

Verax itaque non modo a mendacio abhorret (§. 118. *Jur. nat.*), verum etiam falsiloquiis, etsi in nullius cedant damnum, temere non utitur, modo non sint medium unicum avertendi damnum, coꝛ imodum nostrum vel alterius promovendi, aut damnum præsentissimum coërcendi (§. 121. *Jur. nat.*).

§. 581.

Quem mendacem experiuntur alii: is omnem denique amittit fidem, cujus tamen magnum est in vita humana momentum.

§. 582.

§. 582.

Fugiunt mendacem alii , ne data occasione
mentiendo noceat.

§. 583.

Qui alterum de se mentitum experitur :
odium adversus eum concipit (§. 116. *Psych.*),
inimicitiae sæpissime causam (§. 45. *Jur. nat.*),
cum amor inimicorum rarissima sit virtus (§.
108. *Jur. nat.*).

§. 584.

Prodit præterea mentiendi & temere falsa lo-
quendi habitus hominem nullius conscientiae
(§. 93. *Phil. pr. univ.*), cum sciens proferat ser-
monem animi sui sententiae adversum , sæpissi-
me in alterius, immo sui ipsius damnum (§. 115.
Jur. nat.), adeoque contra conscientiam practice
practicam agat (§. 88. *Phil. pr. univ.*).

§. 585.

Elucet hinc vitii hujus turpitudine , & cur ab
istiusmodi homine abhorreant, quotquot hone-
statem amant.

§. 586.

Quoniam tamen plurimi hoc vitio conta-
minati : idcirco suspendendum est judicium,
quoties de aliis narratur honestati adversa , &
danda opera , ut, quantum fieri possit , quæ
de

de aliis referuntur, in meliorem partem interpretemur,

§. 587.

Enimvero si quæ sunt, quæ nos tangunt: hoc non obstante, juvat ad narrata attendere, quatenus ad prudentem actionum directionem facit, ut damnum nobis metuendum avertatur.

§. 588.

Verax cum dirigat sermonem legi naturali conformiter (§. 570.): a contestationibus quoque temerariis (§. 143. & seqq. *Jur. nat.*) atque juramentis (§. 129. *l. c.*), consequenter multo magis a perjuriis nec non a maledictionibus (§. 130. *l. c.*) abhorret.

§. 589.

Taciturnitas est virtus, qua cavemus, ne proferantur intempellive, quæ reticeri officia sive erga Deum, sive erga alios, sive erga teipsum præcipiant.

§. 590.

Quando tacendo nocetur nemini; dubium vero est, annon nobis vel aliis detrimento sit, si quis, quæ novit, eloquatur: taciturnus silet.

§. 591.

§. 591.

Neque igitur de se, neque de aliis loquitur, nisi officiis in Deum, nos atque alios repugnet reticere, quæ novit.

§. 592.

Arduum cum sit adeo circumspicere attendere ad sermonem, præsertim cum deficiat in conversatione confabulandi argumentum: non mirum videri debet, taciturnitatem raram esse avem.

§. 593.

Magnum taciturnitatis præmium est, quod minime det occasionem inimicitiae, nec inimicos irriter, plurimorumque amicitiam conciliet.

§. 594.

Taceo, quod multa sint in republica munera, quæ taciturnitatem postulant: quæ si ambit taciturnitate commendatus, palmam ceteris, in aliis se minime superioribus, facile præripit.

§. 595.

Quotidiana autem loquuntur exempla, quantum sibi damna arcessant, qui taciturnitatis leges violant.

DE JUSTITIA.

§. 596.

Justitia est virtus dirigens amorem sive sui ipsius sive aliorum juxta sapientiam.

§. 597.

Sapientis est omnes actiones dirigere ad sui perfectionem (§. 103. *Phil. pr. univ.*), adeoque & ad aliorum perfectionem (§. 67. *l. c.*), Deique gloriam (§. 66. *l. c.*), tanquam ad finem ultimum. Justus ergo ita moderatur amorem (§. 588.), ne impellatur ad agenda juri naturali adversa (§. 24. *Phil. pr. univ.*).

§. 598.

Quoniam nec amor sui, nec aliorum obstat, quo minus agat justus, quod juri naturali convenit (§. 589.): ideo pacta servat (§. 138. *Jur. nat.*), neque vero ad paciscendum inducit alterum, sive metu, sive dolo (§. 144. 145. *l. cit.*), nec rem alterius appetit (§. 159. *l. c.*), nec cum alterius detrimento rem suam familiarem auget (§. 162. *Jur. nat.*), nec in contractibus damnum infert alteri,

§. 599.

§. 599.

Apparet facile, quomodo hinc omnes actiones justæ determinantur, non modo in contractibus, verum aliis etiam in casibus.

§. 600.

Quoniam amor sui aliorumque omnium facillime homines impellit, ut in contractibus vel in sui, vel amicorum gratiam lædant alterum: ideo justitia inter privatos in contractibus potissimum elucet.

§. 601.

Hinc *Aristoteles* peculiarem constituit justitiæ speciem, quam *commutativam* appellat, quæ definiri poterat per virtutem dirigendi actiones hominum legi naturali convenienter in contractibus.

§. 602.

Justitia autem prout a nobis (§. 588.) sumitur, coincidit revera cum *justitia*, quam *Aristoteles universalem* appellat, quæ actiones nostras determinat respectu aliorum, ne in eos simus injurii, seu quidquam agamus nostri vel alterius gratia, quod conjungitur cum damno tertii.

§. 603.

§. 603

Apparet adeo, justum actiones non modo referre ad sui, verum etiam ad aliorum commodum atque emolumentum.

§. 604.

Ut consequenter justus sis, ubi alterum amas tanquam teipsum, ex ejus felicitate tantundem voluptatis percipiens, quam ex propria.

§. 605.

Studendum vero etiam sapientiæ (§. 588.), ne nimium tribuas amori alterius.

§. 606.

Quænam sint amoris & sapientiæ media, satis superque exposuimus in superioribus (§. 182. & sqq. §. 527. & sqq.).

§. 607.

Quæ de *justitia vindicativa* vulgo adduntur, ad Politicam spectant, suo loco a nobis excutienda.

SECTIO IV.

DE PIETATE PHILOSOPHICA.

CAPUT I.

DE PIETATE PHILOSOPHICA IN GENERE.

§. 608.

Per pietatem philosophicam intelligimus virtutem, quæ dirigit actiones hominum attributis divinis convenienter.

§. 609.

Dirigit autem homo actiones suas attributis divinis convenienter, quando utitur attributis divinis tanquam actionum motivis.

§. 610.

Cum adeo actiones hasce edat, istas omittat, quod Deum his vel istis attributis radiantem agnoscit (§. 609.); actiones suas dirigit ad Dei gloriam.

§. 611.

Cum nemo attributis divinis tanquam actionum suarum motivis uti possit, nisi Deum agnoscat; agnitio Dei medium est ad pietatem philosophicam perveniendi (§. 608.).

(P. II. *Thüm. Inst. Phil. Pr.*) Y §. 612.

§. 612.

Vult Deus, ut homo actiones suas ad legem naturæ componat (§. 32. *Pb. pr. un.*), immo non modo obligationis naturalis autor est (§. 30. *Pb. pr. un.*), verum etiam peculiari adhuc ratione eundem ad actiones legi naturali conformes obligat (§. 34. *l. c.*), & legislator parentis personam tuetur, non nisi salutaria præcipientis & adversa vetantis (§. 81. *l. c.*). Quicunque igitur voluntate Numinis, pœnis atque præmiis divinis (§. 46. *l. c.*), pronoque ipsius in ferenda lege naturali in nos affectu semper tanquam actionum morivis utitur; is omnibus in actionibus pius (§. 608.), Deique gloriam illustrat (§. 610.).

§. 613.

Enimvero in casibus specialibus dantur quoque rationes peculiare, quibus actiones per attributa divina determinantur, veluti cum propter finium a Deo sapientissime factam subordinationem (§. 32. *Theol. nat.*), Deo tribuimus, quod cibus corpus bene nutriat, atque adeo bonitatis divinæ memores (§. 83. *l. c.*) grato in eum animo (§. 124. *Psych.*), adeoque & amore flagrant (§. 115. *l. c.*), immo gaudio ob bonitatem Numinis elati (§. 113. *l. c.*), cibum capimus.

§. 614.

In unam igitur actionem cum multiplici ratio-

rione influant attributa divina ; motiva augent (§. 141. *Psych.*) : & quatenus affectus excitant in actionis legi conformis determinationem influentes ; appetitum sensitivum ad rationalem reducant (§. 111. *l. c.*), ut non modo fortior fiat appetitus (§. 143. *l. c.*), verum etiam imperium in sensus , imaginationem atque affectus obtineatur (§. 118. *Phil. pr. un.*).

§. 615.

Pietas ergo omnes virtutes ceteras ad eminentiorem gradum elevat.

§. 616.

Et si autem in ipsa hypothesi impossibili athei adhuc subsistat jus naturæ (§. 21. *Phil. pr. un.*), nec vivendi licentia ex eadem fluat (§. 22. *l. c.*) ; obligatio tamen naturalis sola longe minoris efficaciam , quam ubi accesserit divina (§. 612. & 614.).

§. 617.

Unde patet hypothesin athei esse virtuti adversam, etiamsi theoretica fuerit, atheismo ex errore intellectus ortum ducente,

§. 618.

Virtutem naturalem appellamus, ubi actiones determinantur per solam honestatem & turpitudinem intrinsecam; *christianam* vero,

ubi determinationem ingrediuntur veritates e regno gratiæ petitiæ: pietas igitur philosophica medius gradus est, inter virtutem naturalem & christianam (§. 608.).

§. 619.

Ex iisdem principiis ostendi potest, quod pietas christiana antecellat philosophicam, atque sic virtus christiana ab eadem minime separabilis, longe quid excellentius firminusque sit, virtute naturali, hujus respectu non nisi umbratilem quandam speciem exhibente: qua de re philosophus in notis ad orationem de philosophia practica Sinarum conferendus.

§. 620.

Pietas cum se per motiva prodat (§. 614.); non opus est, ut nimis anxie circumspiciamus signa, quibus ad eam agnoscendam opus est.

CAP. II.

DE STUDIO AGNOSCENDI DEUM.

§. 621.

CUm nemo pius esse possit, nisi qui Deum novit (§. 611.), & de veritate cognitionis fuerit convictus (§. 112. *Phil. pr. univ.*); omnis

nobis moyendus est lapis, ut in Numinis agnitione indies magis magisque confirmemur.

§. 622.

Qui ardore vitæ honestæ flagrat (§. 110. *Phil. pr. un.*), in agnitionem Numinis fertur (§. 140. *Psych.*), quoties præstantiam pietatis philosophicæ virtuti naturali junctam (§. 619.) & quomodo eadem virtutis studium facili ter, animo volvit revolvitque (§. 614.).

§. 623.

Eodem modo pater, quod pietatis fructus expertus anhelare debeat virtutem christianam, quamprimum eandem fuerit edoctus (§. 610. 619.).

§. 624.

Patebit autem ex virtutibus specialibus, in quas abit pietas, quantum ad felicitatem hominis conferat: etsi ipsa quoque felicitatis notio (§. 72. *Phil. pr. un.*) cum notione pietatis collata (§. 608.), idem prodat & pietatis studiosus in singulis actionibus abunde experiatur.

§. 625.

A priori cognoscimus Deum ex Theologia naturali: quæ cum Ontologiam, Cosmologiam & Psychologiam supponat, ex quibus demonstrationum principia petit, ut cognitio

fit viva, quæ sola pietatem juvat (§. 120. *Pb. pr. univ.*); omnem Metaphysicam indefesso studio pertractandam esse palam est (§. 2. *Ont.*).

§. 626.

Non licet excipere, hoc non convenire omni homini: neque enim nobis sermo est nisi de iis, qui studiis operam navant, & acumine pollent. Ceteris enim ad vivam cognitionem persuasio sufficit (§. 120. *Pbil. pr. un.*), a convictione procul adhuc remotis (§. 75. 78. *Log.*).

§. 627.

Firmior præterea Numinis cognitio ex sacris litteris hauritur ab iis, in quos non cadit naturalis (§. 625.).

§. 628.

A posteriori agnoscimus Deum & operum contemplatione speciali: cui fini inservit philosophi de finibus rerum naturalium tractatio,

§. 629.

Multum quoque juvat pietatem continua mentis a rebus naturalibus ad Deum ascensio.

§. 630.

Cognitio Numinis ex speciali operum contemplatione derivata, variis gaudet gradibus, & cum scientia rerum naturalium continua

capit incrementa, ita ut varietati ingeniorum mirifice conveniat, & singulis peculiari quodam modo satisfaciat.

§. 631.

Qui nulla Dei cognitione tenetur, ab omni pietate animum habet vacuum.

§. 632.

Qui erroribus de Deo obnoxiam habet opinionem, iisque utitur tanquam actionum motivis, gloriam Numinis obscurat, neque consequenter eundem tanquam Deum colit; cujus rei exemplum præbent pagani.

CAP. III.

DE AMORE DEI.

§. 633.

Tenetur homo Deum super omnia diligere (§. 16. *Jur. nat.*). Quoniam itaque amor Dei cognitionis vivæ fructus est (§. 15. *l. c.*); Deum amaturus eundem cognoscere studeat (§. 625. 627. 628.), & mens a creaturis continuo ad Deum ascendere jubeatur (§. 629.).

§. 634.

Quoniam amor Dei a cognitione Numinis pendet, quatenus viva, hoc est, de certitudi-

ne ejus firmiter sumus persuasi (§. 112. *Phil. pr. univ.*); gradus amoris divini a gradu certitudinis pendet.

§. 635.

Fieri adeo potest, ut homo plebejus in confusa Numinis agnitione acquiescens, intensiori amore prosequatur Deum, quam philosophus omnes rationes ad demonstrationis leges quam exactissime examinans,

§. 636.

Multo magis igitur eadem valent de homine christiano, supernaturaliter veritatis convicto.

§. 637.

Idem valere de omni cognitione boni, atque adeo ad omnem extendi posse virtutem patet.

§. 638.

Absit tamen, ut inde inferamus, homines a cultura intellectus esse arcendos. Ut enim taceamus, hoc institutum repugnare virtutibus intellectualibus (§. 74.), ad quas colendas omnis homo obligatur, quantum datur (§. 75.): confusa quoque notitia mater errorum (§. 64. *Log.*), praxi morali adversorum, ubi iisdem tanquam motivis utaris.

§. 639.

Quodsi cognitio a priori in Theologia natura-

turali eruta per contemplationem operum naturæ specialem confirmetur, ratione atque experientia consentientibus; firmior evadit assensus, multo adhuc firmior futurus, ubi cum ratione atque experientia conspiret fides. Apparet adeo, quodnam sit medium amorem divinum intendendi.

§. 640.

Divinam quoque bonitatem esse amoris motivum, ex ipsis notionibus attendenti manifestum est (§. 33. *Theol. nat.* & 124. 115. *Psych.*).

§. 641.

Bonitatem divinam capit, qui omnia, quæ menti atque corpori insunt bona (§. 26. 50. *Theol. nat.*), omnia fortunæ bona, immo inventa omnia (§. 28. *l. c.*), omnem rerum artificialium usum (§. 36. *l. c.*) ipsam etiam adversitatum directionem ad finem bonum (§. 75. *l. c.*) tanquam beneficia ad Deum autorem refert. Pertinet huc, quæ de obligatione divina, bonitatis indice, supra (§. 34. *Phil. pr. univ.*) ivimus demonstratum,

§. 642.

Scrupuli circa bonitatem divinam amoris Numinis inimici, tolluntur per §. 84. *Theol. nat.*

§. 643.

Cum fieri nequeat, ut beneficiorum divi-
norum convictus Deum non amet (§. 640.);
frustra quæritur, an Deus sit amandus? quia
nobis bene facit.

§. 644.

Quodsi amor languescit, propterea quod
lex naturæ videatur onus, a Deo nobis impo-
situm (§. *Psycb.*): animo recolendum, Deum
legislatorem parentis personam tueri, non nisi
salutaria præcipientem, & adversa vetantem (§.
81. *Phil. pr. un.*).

§. 645.

Quoniam Deum qui amat, ex ipsius perfe-
ctionibus voluptatem percipit (§. 15. *Jur. nat.*);
amoris hujus indicium præbet, si quis cogni-
tione Dei & mentis in ipsum ascensione dele-
ctatur.

§. 646.

Nec minus hunc prodit, qui omnia bona
sibi obtingentia ad Deum autorem refert
(§. 641.).

CAP. IV.

DE TIMORE ET REVEREN-
TIA DEI.

§. 647.

EX amore nascitur *timor Dei*, quam *filialem* vocant (§. 17. *Jur. nat.*). Ut igitur Deum timeas, ante amandus erit.

§. 648.

Media igitur amoris (§. 633. & seqq.) sunt etiam timoris Dei.

§. 649.

Et timor filialis amoris Dei signum est certissimum.

§. 650.

Qui Deum timeret, continuo veretur, ne quidquam committat, voluntati Numinis adversum, vel omittat eidem conforme (§. 17. *Jur. nat.*): quamobrem animus non ante redditur tranquillus, quam ubi certus fuerit, actionem committendam esse voluntati Numinis conformem, omittendam vero eidem difformem.

§. 651.

Timor Dei consequenter impellit hominem ad vitam honestam transigendam.

§. 652.

Virtutis adeo studium timenti Deum
longe

longe facilius , quam eundem non timent.

§. 653.

Prodit autem timorem Dei, qui actionem æstimat ex voluntate Numinis.

§. 654.

Timor Dei cum firmissimum pariat propositum , non agendi nisi voluntati Numinis conformia; haud obscure colligitur , quam nocuus sit error, de conformitate actionum cum voluntate Numinis , timentibus ipsum.

§. 655.

Consideratio poenarum positivarum metum operatur, servilem dictum, quod servis proprius (§. 18. *Jur. nat.*).

§. 656.

Quoniam metu servili ductus, voluntati Numinis conformia agit , difformia omittit, ob metum poenæ: a vera virtute adhuc alienus est (§. 55.).

§. 657.

Danda igitur est opera, ut tandem degeneret in filialem (§. 17. *Jur. nat.*).

§. 658.

Enimvero cum præster , malas actiones omit.

omitti, quam committi, & e contrario bonas committi, quam omitti, atque ipsa bonarum repetita commissione & malarum omissione habitus istas committendi has omittendi comparatur: utendum est metu servili, quamdiu filiali nondum esse potest locus.

§. 659.

Ut igitur metus servilis incutiatur: convincendus erit homo cum de omniscientia divina (§. 16. *Theol. nat.*), tum de existentia poenarum positivarum (§. 47. *Phil. pr. un.*).

§. 660.

Qui sibi persuadet, Deum parum curare, quæ ab hominibus fiunt, rebus magis arduis, majestatem ipsius decentibus, intentum: is non modo contrarii convincendus (§. 16. *Tb. nat.*), verum etiam differentiæ, quæ inter Dei nostramque cognitionem intercedit (§. 20. *l. c.*).

§. 661.

Qui somniant, e poenarum numero excludenda esse, quæ causis naturalibus debentur & fortuita censentur: contrarii convincendi sunt (§. 43. *Phil. pr. un.*).

§. 662.

Si porro excipiant, quod fata hominum adversa non satis convenient actionibus,

bus, experientia teste; contrarii convincendi sunt ex §. 34. 35. *Phil. pr. un.*

§. 663.

Qui sumunt, fata eventura fuisse eadem, etsi vixisses aliter, propterea quod actiones tuæ in ista non influant, illa autem & semel constituto rerum ordine fuerint consecuta: illis eripitur præjudicium, ubi de præscientia divina (§. 22. 23. *Theol. nat.*) & ei convenienter instituto ordine rerum (§. 32, *l. c.*) meliora edocentur.

§. 664.

Deum super omnia reveretur, qui perfectionum divinarum magnitudinem admiratus, eundem & sibi & rebus ceteris omnibus præfett (§. 29. *Jur. nat.*). Reverentiæ igitur Numinis medium est magnitudinis perfectionum divinarum frequens meditatio: quem in finem non modo ex Theologia naturali ponderandæ sunt demonstrationes, quod Deo tributæ perfectiones eidem in gradu absolute summo competant, verum etiam ostendendum, quomodo opera naturæ loquantur immensitatem perfectionum divinarum, juxta ea, quæ philosophus in tractatu de finibus rerum docuit.

§. 665.

Ignorantia, & dubia rerum divinarum cogno-

gnitio cum obstat, quo minus Deum super omnia reverearis: cognitioni firmæ ac immotæ studendum.

§. 666.

Deum qui super omnia reveretur: impatenter fert de rebus divinis parum reverenter loquentes, vel creaturis nimium pretium statuentes.

§. 667.

Immo idem a perfectione in creaturis obvia in divinam ascendit, inque eadem lætatur.

CAP. V.

DE FIDUCIA ERGA DEUM ET
ACQUIESCENTIA IN IPSIUS
VOLUNTATE.

§. 668.

IN Deo fiduciam collocat, qui de bonitate divina satis persuasus firmo assensu completur, Deum unicuique creaturæ tantum boni tribuere, quantum ipsi tribui potest, ita ut etiam mala ad bonos fines dirigat (§. 20. *Jur. nat.*). Ut igitur fiduciam in eodem colles: non modo bonitatis divinæ convincendus (§. 83. *Theol. nat.*), abscissis singulis, quæ assensum morantur (§. 84. *l. c.*), verum etiam enitendum est, ut in sententia de bonitate Dei indies ipsa experientia confirmeris.

§. 669.

§. 669.

Attenta ideo mente scrutandum, quomodo omnia, quæ nobis vel aliis accidunt, adversa fata ad bonum tandem finem dirigantur, immo quomodo Deus ipsa mala moralia contra intentionem malignorum bonam in partem vertat.

§. 670.

Qui sibi metuit a justitia divina, vi cujus Deus (§. 93. *Theol. nat.*) finem universi manifestationem perfectionis suæ (§. 73. *l. c.*) consecuturus, mali quoque odium demonstrare debet, a quo voluntas ipsius abhorret (§. 42. *Th. nat.*): is metu non liberabitur, nisi veritatibus religionis christianæ in subsidium vocatis. Unde ejus præstantia insignis elucet.

§. 671.

Qui dubitat de bonitate Dei, propterea quod res suas sibi minime ex voto succedere experitur: is quidem instruendus est, quod nobis sæpissime imponamus, ubi de status nostri perfectione in singulari judicare voluerimus (§. 110. *Cosm.*). Perpendendum præterea, Deum vi sapientiæ & bonitatis summx, malum ad bonos dirigere fines (§. 75. *Th. nat.*). Præterea ad trutinam appendi convenit, quod optamus, ut appareat, quænam sit ipsius ad statum nostrum relatio.

§. 672.

§. 672.

Inprimis autem scrutandum, quomodo adversitatibus in rem præsentem uti liceat veluti mediis ad finem ducentibus. Ad talia qui attendit: re ipsa tandem experietur, Deum rectius nosse, quænam nobis conducant. Habenda nimirum ratio est, non modo præsentis, verum etiam futuri, & scrutandus nexus inter præsens atque futurum. Porro de specie adversitatis judicium fieri par est, qua Deus utitur ad animum flectendum: nam in his quoque sapientiæ atque bonitatis divinæ vestigia radiant.

§. 673.

Qui fiduciam in Deo collocat, tranquillo animo bonum venturum expectat, etiamsi non appareat, unde venturum sit (§. 668.): impatientia ergo in rebus adversis defectum fiduciæ erga Deum arguit.

§. 674.

Quoniam tamen patientiæ præter fiduciam erga Deum aliæ adhuc esse possunt causæ (§. 505. & sqq.): eadem de fiducia erga Deum minime testatur, nisi ubi patientiam ex attributorum divinorum trutinatione provenire certus sis.

(P. II. *Tbium. Inst. Phil. Pr.*) Z §. 675.

§. 675.

Hoc tamen non obstante patientiæ optimum medium fiducia erga Deum est (§. 20. *Jur. nat.*).

§. 676.

Animus hilaris atque tranquillus fiduciæ erga Deum individuus comes (§. 20. *Jur. nat.*), hanc virtutem mirifice commendat, quod magnam felicitatis partem constituit (§. 72. *Phil. pr. univ.*).

§. 677.

Atque hæc ipsa tranquillitas fiduciam erga Deum ostendit, quoties de olim venturis sermo incidit.

§. 678.

In Numinis voluntate acquiescit, atque probat quæ ab ea in mundo sunt vel permittuntur, qui persuasus est, Deum omnia dirigere ad bonos fines (§. 21. *Tb. nat.*). De hac itaque veritate convincendus est, non modo per rationes (§. 83. *l. c.*), verum etiam per experientiam.

§. 679.

Ex eodem consequenter fonte profluit, quo fiducia erga Deum manat (§. 608.). Atque adeo hæc virtutes sororio nexu cohærent,

§. 680.

Qui constanter in voluntate Numinis acqui-

quiescit: is quoque forte sua contentus nec opes appetit, nec honores.

§. 681.

Habemus ergo denuo remedium adversus ambitionem (§. 424.) atque avaritiam (§. 350).

§. 682.

Qui in voluntate Numinis acquiescit, Deoque confidit, ei ex voto omnia succedunt: neque enim optat, ut alia sibi eveniant, quam quæ Deus ipsi commoda decernit.

§. 683.

Apparet autem, hominis esse, omnem adhibere diligentiam, ne se tanquam mali præsentis causam accusare habeat opus.

§. 684.

Inprimis autem considerandum est, stante hoc rerum nexu, non omnia ad actum deduci posse (§. 18. *Cosmol.*), atque adeo bonitati divinæ minus repugnare, si quæ non eveniant, quæ nobis proficua judicamus (§. 83. *Theol. nat.*). Constat enim, neminem appetere, quæ saltem moraliter impossibilia reputantur.

§. 685.

Insignis vero denuo hic elucet christianæ religionis prærogativa, quod christiani fiduciam erga Deum firmaturi, & in voluntate

ipsius acquieturi, olim post hanc vitam ventura respiciant.

§. 686.

Patet præterea, eum, qui in voluntate Numinis acquiescit Deoque confidit, non invidere aliis sua bona (§. 682.), multo minus odio eosdem prosequi.

§. 687.

Liberatur consequenter hac acquiescentia animus a turbulentis affectibus, infelicitatis causis (§. 78. *Phil. pr. un.*).

§. 688.

Qui in Dei voluntate acquiescit, minime queritur de sorte sua aliorumque (§. 678.).

§. 689.

Abest illa acquiescentia, ubi quis animum despondet ob adversam, quo affligitur, fortunam (§. 678.).

§. 690.

Eadem efficit, ut omnem in obeundo munere diligentiam adhibeamus, nec animum abiciamus, etiamsi votis non semper respondeat eventus (§. *cit.*).

§. 691.

Quoniam vero Deus non patrat miracula, ubi causæ secundæ sufficiunt (§. 79. *Tb. nat.*):
fidu-

fiduciæ erga Deum repugnat, si quis negligit media ad finem consequendum ab eo destinata. Bene hinc veteres inculcarunt, cum oratione laborem esse conjungendum.

CAP. VI.

DE INVOCATIONE NUMINIS ET GRATIARUM ACTIONE.

§. 692.

Homo non modo actione mentis interna Deum invocare, verum etiam orare debet (§. 22. 24. *Jur. nat.*). Fons invocationis cum sit bonitatis divinæ trutinatio (§. 22. *l. c.*): eandem ita meditari convenit quotidie, ut, quæ nobis obtigere per diem bona, vel quæ a nobis declinata sunt mala, Deo auctori sapientique ejus directioni tribuamus, atque in animum revoce-
mus, quænam sint bona, quæ nobis per diem aut noctem obtingere, tum etiam mala, quæ evenire possent.

§. 693.

Apparet adeo invocationem Numinis supponere fiduciam erga Deum & acquiescentiam in voluntate ipsius (§. 20. 21. *Jur. nat.*), atque cum amore Numinis (§. 633.), consequenter & timore conjungi (§. 17. *Jur. nat.*).

§. 694.

Quoniam oratione exprimitur, quod animo concipimus Deum interne invocantes (§. 23. *Jur. nat.*); sola verborum recitatio orationem minime absolvit.

§. 695.

Handquaquam igitur preces ad Deum fundit, qui precum formulas ore recitat, quas non intelligit, vel ad quas minime attendit.

§. 696.

Absit tamen, ut ideo easdem rejiciamus. Usus enim præstant insignem, vel illis, qui ipsi-
met preces ad Deum fundere didicerant, dum ea in memoriam revocant, quorum meminisse debet Deum invocaturus (§. 41. *Psych.*).

§. 697.

Eminent præterea hoc usu, ut animus a cogitationibus peregrinis liberetur, attentionem impedituris; atque ut mentis acies in oratione firmitus defigatur.

§. 698.

Precum itaque formulæ ab iis sunt componendæ, qui majore rerum divinarum cognitione pollent, hoc modo, ut nobis beneficia Dei ejusdemque attributa una cum statu nostro ceterisque omnibus, quorum precantes me-
mi.

minisse debemus, in memoriam revocant, coerceant contra, quod attentionem atque ardorem precandi (§. 692. 693.) impedit,

§. 699.

Quamobrem verba sumenda sunt in significato proprio, ut a legente intelligi possint (§. 19. *Log.*), utque affectus excitentur, quibus appetitus sensitivus ad consensum cum rationali reducatur (§. 30.), utendum est formulis loquendi convenientibus, de quibus ex artis oratoriae legibus statuendum, eaque tenenda sunt, quæ de affectuum genesi diximus (§. 113. & sqq. *Psych.*).

§. 700.

Ut precum formulis recte utaris : danda est opera, ut easdem intelligas (§. 695.). Attendendum est ad vim & efficaciam formularum loquendi, quibus affectus excitari debent (§. 699.), atque ideo voce tarda proferendæ, ut intellectus ad statum nostrum applicentur (§. 699.).

§. 701.

Si invocatio Dei recte fit : cum amore Numinis ejusque timore conjungitur (§. 693.), consequenter medium pietatis est (§. 17. *Jur. nat.* & §. 608. *Eth.*), ac ad eminentiorem virtutum omnium gradum, atque imperium in sensus imaginationem atque affe-

Etus obtinendum maximum præsidium affert.

§. 702.

Similiter cum invocatio Numinis fiduciam erga Deum & acquiescentiam in voluntate ipsius supponat (§. 693.): preces ad Deum fundens in eadem indies magis magisque confirmatur, sicque animus ad tranquillitatem & lætitiā reducitur, atque adeo felicitatem nostram haud parum adauget (§. 72. *Phil. pr. univ.*).

§. 703.

Eodem pertinet, quod animus ex perfectionibus Dei atque beneficiis ipsius voluptatem percipiens (§. 95. 114. 115. *Psych.*) ad lætitiā disponatur (§. 113. *Psych.*), eamque durabilem (§. 74. *Phil. pr. univ.*).

§. 704.

Et quoniam precibus in proposito bene agendi confirmamur (§. 701.): ad virtutis autem exercitium vitiorumque fugam requiritur, ut propositi hujus constanter simus memores (§. 133. *Phil. pr. un.*): preces quoque hac ratione ad virtutis exercitium vitiorumque fugam profunt.

§. 705.

Gratiarum denique actio cum sit oratio, quæ Deo animum gratum ob beneficia nobis ex-

exhibita testamur (§. 26. *Jur. nat.*): ut ex veritate fiat, beneficia divina ita meditari præstat, quo eorum magnitudo fiat manifestior, & in aprium producantur, quæ latent vulgo, nec in beneficiorum numerum referuntur.

CAP. VII.

DE CULTU DEI EXTERNO.

§. 706.

C*ultus Dei* consistit in exercitio actionum, quarum motiva sunt attributa divina, & inde dependentia, consequenter quibus gloria divina illustratur (§. 11. *Phil. pr.un.*).

§. 707.

Quodsi actiones istæ fuerint internæ, hoc est, mentis cogitationes atque appetitus, *cultus* dicitur *internus*: si vero externæ, hoc est, corporis motus, *cultus* vocatur *externus*.

§. 708. 1

Pietas ergo (§. 608.), agnitio Dei (§. 611.), reverentia Numinis (§. 19. *Jur. nat.*), fiducia erga Deum & acquiescentia in voluntate ipsius (§. 20. 21. *l. c.*), una cum in vocatione Numinis interna & gratiarum actione (§. 22. 25. *Jur. nat.*) pertinent ad cultum Dei internum.

§. 709.

Horum igitur officiorum continuum sit exercitium, ubi quis cultui divino vacare decrevit.

§. 710.

Quoniam actiones externæ cum internis consentire debent (§. 17. *Phil. pr. un.*): ad cultum externum spectant actiones externæ in universum omnes, quæ cum officiis erga Deum consentiunt (§. 707.).

§. 711.

Ad cultum igitur externum pertinet oratio (§. 23. *Phil. pr. univ.*), gratiarum actio (§. 26. l. c.), sermo cultus interni interpres, & actiones quæcunque externæ, ex cultu interno manantes, veluti lectio librorum, unde in cognitione Numinis atque voluntatis ipsius proficimus, auscultatio sermonis aliorum de Deo ejusque voluntate nos instruendum &c.

§. 712.

Immo cum pius omnes actiones suas per attributa divina determinet (§. 609.), adeoque totus Deo vivat (§. 14. *Jur. nat.*): hominis pii actiones in universum omnes externæ ad cultum Numinis externum pertinent (§. 707.), vitæque ipsius tota est non nisi cultus divinus continuus (§. cit.).

§. 713.

§. 713.

Ceremoniæ, quia singula sunt, quorum in executione propositi meminisse debemus (§. 115. *Ph. pr. univ.*), ad cultum quoque externum spectant, in memoriam revocantes, quæ ad cultum cum internum, tum externum requiruntur.

§. 714.

Ipsæ autem ceremoniæ dijudicandæ sunt ex notione supra (§. 115. *Ph. pr. univ.*) stabilita.

§. 715.

Ut homines instruantur de Deo ejusque voluntate Numinisque cultu continuo (§. 709.): statis temporibus in locis publicis convenire præstat.

§. 716.

Testari autem debent in conventibus istis vultu, ore, gestu, ac omni opere reverentiam Numinis (§. 19. *Jur. nat.*).

§. 717.

Fundendæ sunt ad Deum preces non modo ob earum fructum ex conjunctis precibus uberiores (§. 596. & seqq.), verum etiam quod suo exemplo alter alteri prodest (§. 24. *Jur. nat.*).

§. 718.

§. 718.

Inprimis autem cantionibus seu hymnis sacris ibidem locus est, propterea, quod a multitudine animis oribusque conjunctis commodius quam preces recitentur, quod animum fortius commoveant, quod denique memoriæ firmitus contenta imprimant.

FINIS ETHICÆ SEU PHILOSOPHIÆ
MORALIS.

INSTITUTIONES
POLITICÆ
SEU
PHILOSOPHIÆ
CIVILIS.

INSTI.

THE HISTORY
OF THE
CITY OF
BOSTON
FROM 1630 TO 1880
BY
JOHN H. COVINGTON
BOSTON
PUBLISHED BY
J. B. LEECH & CO.,
125 NASSAU ST., N. Y.



INSTITUTIONES POLITICÆ
 seu
 PHILOSOPHIÆ CIVILIS.
 PROLEGOMENA.

§. 1.

P*hilosophia civilis seu Politica* est scientia practica salutem atque tranquillitatem rei-publicæ promovendi.

§. 2.

Respublica est ingens hominum multitudo in societatem coalescens, ut conjunctis viribus commune bonum promoveant, & contra hostiles aliorum insultus sese defendere queant (§. 392. *Jur. nat.*): in Politica igitur præcipiendum, tum qua ratione commune bonum promoveri possit, tum quomodo omnia, quæ ab aliis obijciuntur impedimenta, removeri queant.

§. 3.

Quoniam respublica non ex hominibus singularibus, sed ex societatibus simplicibus, nuptiali, paterna & herili, atque ex minus com-

compositis, quales sunt domus, & porro ex his coalescentes vici seu pagi, coalescit (§. 390. 391. *Jur. nat.*): in Politica quoque docendum, quid factu opus sit, ut in societatibus simplicibus minusque compositis singuli satisfaciant officio suo.

§. 4.

Quodsi tamen quis maluerit cum aliis hoc de argumento sub peculiari *œconomix* nomine tractare: illi non refragabimur, non tam de nominibus, quam de rebus solliciti.

§. 5.

Enimvero cum cura dirigendi societates simplices & ex iis compositam domum iis relinquatur personis, quibus vi juris naturalis competit (§. 309. 310. 322. 363. 371. 328. *Jur. nat.*): placet Politicam dividere in duas partes, quarum illam *œconomicam*, hanc *politicam* in sensu strictiori appellamus.

§. 6.

In parte igitur *œconomica* docendum erit, quibus utendum sit mediis, & quænam removeri debeant obstacula, ut in societatibus simplicibus atque domo singuli satisfaciant officiis suis.

§. 7.

Quoniam omnis habitus officio suo satisfac-

ci.

ciendi, virtus est (§. 49. *Phil. pr. un. & 9. Eth.*): pars œconomica docet modum perveniendi ad virtutes, quæ singulas personas in societatibus simplicibus atque domo, tanquam membra illarum societatum ornant.

§. 8.

In parte politica similiter docendum est, quibusnam utendum sit mediis, & quænam removenda obstacula, ut imperantes potissimum, deinde etiam parentes officio suo satisfaciant.

§. 9.

Unde eodem, quo ante (§. 7.) modo patet, partem politicam tradere modum perveniendi ad virtutes, quæ in republica cum imperantibus parentibus ornant.

§. 10.

Varia sunt, quæ jus naturæ præscribit, tum rerumpublicarum formis, tum de rep. constituenda, administranda, defendenda: in parte igitur politica præcipiendum, quomodo circa singula legi naturali satisfiat.

§. 11.

Elucet hinc abunde, cum partis œconomicae, tum politicae utilitas.

Pars I. sive Oeconomica.

DE SALUTE SOCIETATUM SIMPLICIUM PROMOVENDA.

CAPUT I.

DE PROMOVENDA SALUTE SOCIETATIS NUPTIALIS.

§. 12.

Salus societatis consistit in non impedita promotione boni communis, conjunctis viribus obtinendi (§. 265. *Jur. nat.*). Quamobrem cum in societate nuptiali omnia ad liberorum procreationem & educationem tendant (§. 283. *l. c.*): ut salus societatis nuptialis obtineatur, ab utroque conjuge danda est opera, ut liberi cum corporis habitu, tum animi dotibus atque virtutibus valentes reip. fistantur cives.

§. 13.

Unde statim apparet, quantum intersit reip. ut salus societatis nuptialis vigeat.

§. 14.

Quoniam juri naturali non convenit nisi coitus sobolis procreandæ gratia susceptus (§. 285. 286. *Jur. nat.*): conjugibus quoque con-

venit temperare appetitum circa venerem, consequenter castitas (§. 329. *Eth.*).

§. 15.

Quamobrem & conjuges a verbis, gestibus aliisque actionibus lascivis abstinere jubentur (§. 334. *Eth.*).

§. 16.

Multo magis itaque ab adulterio (§. 297. *Jur. nat.*), omnique re venerea, cum personis aliis exercenda, abstinere debent.

§. 17.

Vilescit mariti autoritas penes uxorem, si in re venerea se turpem ipsi præbuerit, quod imperio ipsi debito (§. 310. *Jur. nat.*) inimicum.

§. 18.

E contrario uxor ubi rem cum aliis habuerit, ut eadem penes alios vilescat in causa est: quod si ex alio conceperit, non modo onus educandi sobolem alienam in maritum devolvit, verum etiam liberis legitimis portionem hereditariam minuit, immo subinde impedit, quo minus sumptus educationi ipsorum sufficiant.

§. 19.

Conjugum est commune suum & liberorum educandorum bonum pro virili promo-

vere (§. 303. *Jur. nat.*) : quod ut fiat, uterque conjugum alterum amare debet tanquam seipsum (§. 83.), ita quidem ut maritus præferat salutem uxoris, uxor autem salutem mariti ceterorum quorumvis hominum saluti, quocunque tandem nomine veniat (§. 280. *Jur. nat.*).

§. 20.

Mutui hujus amoris indicia ubi constanter sibi præbent conjuges : liberi quoque, quorum est imitari alios, a teneris unguiculis amoris parentum adfuefiunt, ut consuetudo in naturam abeat.

§. 21.

Incenditur amor mutuus, si uterque conjugum mentis aciem intendant in bona animi, corporis atque fortunæ alterius, & quænam inde in societatem suam, imino in suam personam redundant commoda, sedulo meditentur (§. 115. *Ph. b.*).

§. 22.

Utile quoque erit, si aliorum conjugia cum nostris conferamus, ut appareat, quænam nostri sit prærogativa, & quænam aliis, quæ præstare videntur, mala indivulso nexu coherant.

§. 23.

§. 23.

Qui amat alterum, ex ipsius felicitate (§. 115. *Psych.*), consequenter ex lætitia, qua effertur (§. 72. *Pb. pr. un.*) voluptatem, adeoque ex ipsius tristitia & tædio tædium percipit. Amore itaque mutuo si sese prosequuntur conjuges; neuter eorum appetit, quod displicet alteri. Quamobrem uxor facile paret marito, & is vicissim saniora monentis consilium lubens sequitur, nec nisi lenibus ac blandis verbis eidem imperat, quod factu optimum indicat legi naturali convenienter (§. 310. 311. *Jur. nat.*).

§. 24.

Nascitur adeo ex amore mutuo mutuus animorum consensus, ut uterque conjugum appetat idem & aversetur idem.

§. 25.

Uterque conjugum cum in idem consentiat (§. 24.): neuter alteri tædium crea-

§. 26.

Patet hinc tandem, mutuo conjugum amore mutuoque animorum consensu arceri infelicitatem, obtinerique felicitatem conjugiorum (§. 72. 78. *Pb. pr. un.*).

§. 27.

Porro inde sequitur, in contrahendis matrimoniis primam habendam esse rationem, num ea sit contrahentium indoles eaque conditio, ut mutuus inter ipsos amor animorumque consensus perennare queat: quo fine ulterius perpendendum, num quæ ad vitæ necessitatem, decorem atque jucunditatem requiruntur, a conjugibus parari queant.

§. 28.

Qui hæc ad animum revocat: illi haud obsecura erit tot conjugiorum infelicitas, tanto certior exitura, ubi falsis persuasionibus inducatur pars altera.

§. 29.

Dolus autem cum honestati minime contrariari vulgo censeatur, nec felicitis matrimonii requisita satis pateant in casibus singularibus (§. 27.): virum videri nequit, quod matrimonii contractus sit alex plenissimus.

§. 30.

Quoniam maritus ex felicitate uxoris voluptatem percipit, eandemque amat (§. 115. *Psychol.* & 72. *Ph. pr. un.*): non modo occasione quavis data agit, quæ voluptatem ipsi creant, verum etiam cavet, ne bona ab uxore il-

illata dilapidentur, neque a se parta conserventur, ne post mortem desint ad vitæ necessitatem requisita; quo ipso juri naturali satisficit (§. 306. 313. *Jur. nat.*).

CAP. II.

DE PROMOVENDA SALUTE SOCIETATIS PATERNÆ.

§. 31.

Salus societatis consistit in non impedita promotione boni communis, conjunctis viribus obtinendi (§. 265. *Jur. nat.*). Quamobrem cum in societate paterna omnia ad liberorum educationem redeant (§. 314. *l. c.*): ut salus hujus societatis vigeat, parentibus opera incumbit, ne quidquam desit ad educationem necessarium, sublaris obstaculis, quæ eidem adversantur.

§. 32.

Liberi parentum cura adducendi sunt, ut officiis circa mentem, corpus natumque externum atque erga Deum & alios satisfaciant, habitumque iisdem satisfaciendi acquirant (§. 39. *Jur. nat.*). Ergo studium virtutum (§. 49. *Pb. pr. un.*), tum intellectualium tum moralium (§. 74. 223. *Eth.*), tum denique pietatis (§. 608. *Eth.*) ipsis familiare reddere tenentur.

§. 33.

Ut prima mentis operatio exerceatur, notionibus primum clavis licet confusis, dein distinctis operam dare debent (§. 75. *Log.*).

§. 34.

Ut notiones acquirant tantum claras: multa oculis ipsorum objicienda sunt objecta, linguæque compotes nomina enunciare teneantur. Ita nimirum rem unamquamque proprio insignire nomine adfuescunt (§. 41. *Psych.*), & ad tertiam mentis operationem manum ducuntur (§. 76. *Psych.* & §. 33. *Log.*).

§. 35.

Notiones confusæ in distinctas abeunt, si quæ diversa sunt a se invicem distinguuntur: & ad singula sigillatim attentione adhibita mox eadem inter se conferuntur, ordo, quo se invicem consequuntur & nexus, quo inter se coherent, perspicitur (§. 53. *Log.*). Quamobrem ut per hæc attentio & super iis, quæ percipiunt, reflectendi studium concilietur: objectum diu oculis præsens sistendum, digito monstraveris, quæ insunt, & nominibus indicatis. Varietas enim eorum, quæ in objecto objiciuntur, attentionem conservat, & ubi nominibus infantes eadem distinguunt, instituto præsertim examine, reflexioni adfuescunt.

§. 36.

Hoc exercitio præparati ubi ad ætatem paulo maturiorem perveniunt: figurarum in Geometria & numerorum in Arithmetica prostantium analysi utiliter exercentur, instituta cum syllabizatione comparatione,

§. 37.

Perficietur hac ratione acumen (§. 107. *l.c.*), & ad intelligentiam manu ducentur (§. 114. & *sqq. Eth.*).

§. 38.

Ingenium cum sit facilitas observandi rerum similitudines (§. 87. *Psych.*): ut illud excolant, tempestive ad eas attendere adsuavescent: id quod a teneris unguiculis fieri poterit, ubi individua ejusdem speciei mox ejusdem generis iisdem monstrantur, & singulorum nomen specificum vel genericum ex iis sciscitetur,

§. 39.

Maturiori ætati conveniunt, cæ in *Ethica* (§. 176. 179.) præscriptus ingenii exercendi media.

§. 40.

Ad judicia intuitiva formanda ingenio & acumine opus est (§. 54. *Log.* & §. 63. 87. *Psych.*); ad discursiva notionibus & propositionibus universalibus cum habitu ratiocinandi (§. 58.

Log.) : pueris itaque nondum convenit intelligentia atque scientia (§. 109. 118. *Eth.*). Dogmata igitur scitu ipsis salutaria tamdiu memoria mandare tenentur, donec maturior ætas probationem a posteriori vel demonstrationem a priori capiat.

§. 41.

Ne tamen præjudicium autoritatis ipsorum animis tenellis ingeneretur: tempestive adsuefiant, quærere rationem ejus, quod est, vel quod fieri debet. Ita nimirum principium rationis sufficientis ipsis instillabitur, adversus præjudicium autoritatis optimum præsidium (§. 8. *Ontol.*).

§. 42.

Pater etiam hac ratione promoveri usum rationis (§. 88. *Psych.*).

§. 43.

Quomodo maturior ætas exercitiis variis ad virtutes intellectuales sit adducenda, ex iis hauritur, quæ hoc de argumento in *Ethicæ* sectione II. docuimus.

§. 44.

Ad virtutes morales alliciuntur liberi, si efficias, ut voluntas non appetat nisi actiones ad nostram aliorumque perfectionem ac gloriam

riam Dei tendentes, nec aversetur nisi nostræ aliorumque perfectioni ac gloriæ Dei adversas (§. 15. *Etb.*).

§. 45.

Quamdiu itaque bonum a malo ipsimet discernere non valent: vi potestatis patriæ obligandi sunt (§. 321. *Jur. natur.*), statutis præmiis actionum bonarum commissioni, & malarum omissioni, atque pœnis malarum commissioni & bonarum omissioni (§. 18. *Phil. pr. un.*), prout inclinatio naturalis requisiverit; hac tamen adhibita cautione, ne pravæ inclinationes foveamus.

§. 46.

Et quoniam consuetudines pravæ præsertim a teneris unguiculis contractæ difficulter corriguntur (§. 25. *Etb.*): non exigua parentum cura esto, ut eas præcaveant, præscindentes non modo occasionem patrândi, & ab aliis patrata mala videndi, verum etiam præmia pœnasque quæ constituebantur exequentes, ubi deliquerit (§. 18. *Etb.*).

§. 47.

Abstergitur, ut ipsimet parentes malo sint liberis exemplo: studeant potius laudabili præire exemplo, quod imitari debent.

§. 48.

Magnus cum sit in flectenda voluntate hi-

sto-

istoriarum & fabularum usus (§. 17. *Etb.*): selectiores libri commendentur, in quibus virtutis decus, vitiōrum turpitudine cum morum urbanitate & oppositorum rusticitate graphice delineatur.

§. 49.

Ludus cum sit actio fallendi temporis gratia suscepta: ne otio adsuescant, iudis tempus consumere possunt.

§. 50.

Decet autem ludis ejuscemodi adsuescieri actionibus, quibus olim in negotiis seriis habebunt opus, & veritates in vita utiles animis tenellis implantari.

§. 51.

Tempestive quoque docendi sunt numis uti. Quamobrem conveniens videtur ipsis credere levem quandam numorum summam, de qua ad arbitrium ita disponant, ut tamen expensarum rationem reddere teneantur.

§. 52.

Inprimis docendi sunt, quam difficulter pecunia paretur, quam autem facile perita erogetur.

§. 53.

Opera inprimis danda est, ut benefactorum conscientia latentur, & hoc stimulo ad præclara

clara præstanda in omni virtutum genere incitentur (§. 56. *Eth.*).

§. 54.

Observanda tamen hic sunt, quæ de officiis circa honorem (§. 73. & seqq. *Jur. nat.*) inculcavimus, & de modestia præcepimus (§. 430. *Eth.*).

§. 55.

Liberi ut alios honore prosequantur : caveant parentes, ne ipsis præsentibus indigne de aliis loquantur, multo minus eos indigno quopiam modo tractent. Instillanda ipsis est opinio, juvenibus reverendos esse senes, atque tempestive monendi sunt, esse etiam in vilioris conditionis hominibus, quæ cum laude imitentur.

§. 56.

Me tacente perspicuum esse arbitror, ea, quæ docenda esse præcepimus, non generalibus monitis, sed specialibus exemplis urgenda esse, teneriorem ætatem decentibus.

§. 57.

Veritati & taciturnitati ut adsueſcant liberi: severius in ipsos animadvertendum, ubi vel mendaciis se excusant, vel garruli effutiant, quæ viderunt aut audiverunt, præsertim ubi iteratis monitis non fuerint obedientes. Leniri autem, immo subinde remitti debet

bet poena, ubi culpam non celant, nedum mendaces factum negent; & ut taciturnitatis fiant renaces, ex ipsis sciscitandum non est, quid viderint apud alios, quidve audiverint.

§. 58.

Cum pietatis maximum sit monumentum, omnes quippe virtutes ad sublimiorem longe gradum evehenti (§. 615. *Eth.*), penitus autem a cognitione Numinis pendentis (§. 611. *Eth.*): Dei quoque cognitione imbuendi sunt sedulo animi tenelli, & ad officia erga Deum, preces præsertim serias omni studio adducendi, juxta ea, quæ in *Ethices* sectione ultima tradidimus.

§. 59.

Quoniam parentum est dirigere actiones liberorum, & præcipere, quid ab ipsis fieri debeat (§. 316. *Jur. nat.*): liberos obedientia decet. Quam ut liberi promte præstent: non modo ad hæc fieri debent mature, ut insciis parentibus ac leviter nihil agant, verum etiam docendi præterea, quod parentes non intendant, nisi quæ ipsis salutaria. Quamobrem in iis, quæ noxia non sunt; consensus parentum difficilis haud esto.

§. 60.

Ut gratus liberorum erga parentes efformetur animus, indeque porro amor & timor

Filialis nascatur (§. 325. 326. 327. *Jur. nat.*): iisdem exaggeranda sunt beneficia a parentibus collata, ministerio hominum præsertim aliorum, ut magis concedant fidem affirmantibus (§. 67. *Log.*). Rationibus autem utendum est singularibus, cum a parentum, tum a liberorum aliorum conditione petitis.

§. 61.

Amor liberorum erga parentes ubi fuerit sincerus: non alio opus est stimulo, ut olim ad fortunam meliorem evecti, parentibus egenis opem ferant, aut omni ratione ipsorum commodis serviant, etsi non desint ad vitæ necessitatem necessaria.

§. 62.

Ut reverentiam præstent liberi: parentibus præsentibus eloqui vel patrare, quod nefas habeatur, prohibentur; nec parentibus convenit loqui vel patrare, præsentibus & consociis liberis, quod dedecet. Ita enim persuasissimi erunt, revera istiusmodi dicta vel facta applicere parentibus, adeoque timori si nondum filiali (§. 17. *Jur. nat.*), minimum servili ex metu pœnæ orto (§. 18. *l. c.*), facile cedent locum.

§. 63.

Enimvero ne liberorum reverentia studium celandi actiones gignat: ea observan-
da

da veniunt, quæ paulo ante eam in rem præcepimus.

§. 64.

Beneficiorum quoque a parentibus exhibitorum & singularis, quæ circa educationem ipsos sollicitos tenet, curæ distincta explicatio liberos impellit ad parentes venerandos (§. 328. *Jur. nat.*).

CAP. III.

DE PROMOVENDA SALUTE
SOCIETATIS HERILIS.

§. 65.

Salus societatis consistit in non impedita promotione boni communis conjunctis viribus obtinendi (§. 265. *Jur. nat.*). Quamobrem cum in societate herili omnia huc redeant, ut servi promte exequantur, quæ ab hero legi naturali pactoque congrua imperantur, herus vero vicissim eidem præstet, quæ ex pacto præstare tenetur (§. 358. 359. *Jur. nat.*): opera danda est, quo salus hujus societatis vigeat, ut & herus & servus pro virili pactum adimpleat.

§. 66.

Ne dissolvatur societas, nisi pacto adimpleto (§. 360. *Jur. nat.*): perpendendum est hero, ser-

servum sine gravi causa haudquaquam in suspicionem adducendum esse nocuam (§ 96. *Jur. nat.*), neque etiam famæ propriæ maculam esse adspargendam (§. 74. *Jur. nat.*); id quod accidere solet, si levi quavis de causa a pacto recedas.

§. 67.

Eodem fine perpendendum est servo, famæ ipsius conducere, ubi heri morosi jugum patienter tolerat: nocere e contrario, si absque urgente necessitate a pacto recedat.

§. 68.

Servus ut prompte exequatur, quæ ex pacto debet (§. 358. *Jur. nat.*), utque se diligentem præbeat; commoda hinc enata perpendenda sunt. Nimirum labor non modo nihil tædii creat, si suo tempore eodem defungatur servus, verum etiam non est, quod sibi metuat ab heri negligentia indignante. Amorem sibi conciliat heri, ut ad ipsius commoda promovenda fiat proclivis: quo ipso haud raro obtinetur, ut per omnem vitam fruatur diligentia fructibus. Negligentia & pertinacia contraria est ratio.

§. 69.

Est vero heri agnoscere servi diligentiam & promptitudinem in exequendis jussis & blandius corrigere aberrantem, ab initio præsertim, ubi ipsi nondum constituerit de voluntate sua:
(P. II. *Tbüm. Inst. Phil. Pr.*) B b quo

quo ipso calcar additur ad virtutem continuandam.

§. 70.

Huc etiam spectat, quod herus petenti indulgere debeat otium, ad negotia quædam sua curanda (§. 361. *Jur. nat.*).

§. 71.

E contrario diligentia sapius in negligentiam degenerat, & promptitudo jussa exequendi frigescit, ubi præter meritum servus tractatur durius.

§. 72.

Nè tale quid metuendum sit: herus quoque servo haud imperet, ad quæ ex pacto non tenetur, nec ab uno præter necessitatem exigat, quod servo alteri incumbit.

§. 73.

Inimò nec ferre debet, ut unus sponte agat quod est alterius: propterea quod non modo alter segnitiei adsuescit, verum etiam non absque ratione necessitas inter servos intercedere solet, hero lupius damnosa.

§. 74.

Quodsi servus non agit, quod vi pacti debet, vel quod alias sui officii est: absit ut herus ira excandescat, propterea quod affectus impetu sibi potius quam servo nocet, nec aliud obtinet, quam quod oris vultusque severitate obtinere poterat, nempe ut ab he-

ro sibi metuat servus in casu simili. Immo cum ira præpeditus extra oleas evagari soleat: servus sæpius affectui tribuit, quod animi sententiæ tribuendum fuerat, atque ideo minus sibi metuit ab hero.

§. 75.

Servum ad laborem viribus superiorem minime compellet, nec victum sanitati nocuum præbebit herus, ubi ad animum revocaverit, quantum bonum isti sit sanitas, corporisque vigor, cum homo istiusmodi non habeat, unde vivat, sanitate deficiente. Nec minus proderit, ubi pacti rationem perpenderit (§. 355 *Jur. nat.*), modo non sit a justitia alienus (§. 596. *Eth.*).

§. 76.

In primis servo ipsi perpendendum, quod omnis felicitas, qua in hac vita frui ipsi datur, a corporis sanitate ac vigore pendeat: ita enim nihil committet eidem adversum.

§. 77.

Ut servus promte exequatur heri iussa (§. 358. *Jur. nat.*), & data quavis occasione ipsius commoda, quantum potest, promoveat (§. 366. *Jur. nat.*): herum amet necesse est. Qui enim alterum amat, is ex felicitate ipsius percipit voluptatem (§. 115. *Psych.*), adeoque agit, quod eidem volupe.

§. 78.

Quoniam vero alterum amamus, si quid in eo deprehendimus, quod nobis placet (§. 115. *Pfych.*): ideo considerata sunt beneficia ab heri exhibita, quatenus pacto ex sua parte satisfacit, æquum in omni casu se præbet, ac servi salutem curæ cordique habet.

§. 79.

Unde elucet, quantum intersit, ut herus satisfaciat officiis suis (§. 350. 365. *Jur. nat.*), atque amoris indicia præbeat servo, ubi voluerit, ut & hic sponte agat, non coacte, quod sui est officii.

§. 80.

Considerandum quoque venit servo, heri commoda promoturo, quod eo ipso suum commodum promoveat, heri nimirum favorem sibi concilians aliorumque hominum, quibus arri-det, quod est laudis atque virtutis.

CAP. IV.

DE PROMOVENDA SALUTE
DOMUS.

§. 81.

Salus societatis consistit in non impedita promotione boni communis conjunctis viribus obtinendi (§. 265. *Jur. nat.*). Quoniam itaque in domo omnis cura huc redit, ut actiones singulorum ita dirigantur, ne finis unius societatis simplicis obineatur cum detrimen-

et alterius, quin potius e contrario una societas prosequendo finem suum, alteram in prosequendo suo juvet (§. 384. *Jur. nat.*); ut salus domus vigeat, non modo unusquisque agere tenetur, quod vi societatis simplicis sui officii est, sed paterfamilias (§. 382. *l. c.*) etiam actiones singulorum ita dirigat necesse est, ne sibi mutuo contrariantur.

§. 82.

Quoniam in domo imperium penes patremfamilias existit (§. 382. *Jur. nat.*): matrefamilias incumbit, ut auctoritatem ejus conserve, ipsamet se jussis ipsius obedientem præbens (§. 310. *l. c.*), nec liberis ac servis præsentibus eidem contradicens, aut vultu, ore, gestu aut opere ipso contemptui ipsum habens.

§. 83.

Multo minus autem convenit, ut de eodem parum honorifice ad liberos & servos loquatur, cum sic ipsius auctoritas collabascatur.

§. 84.

In matrefamilias inde plurimum commoda redundant. Etenim auctoritate patrefamilias inviolata subsistente, tanquam medio utitur præsentissimo flectendi & liberorum & servorum voluntatem, dum jussa voluntati patrefamilias conformia pronunciat atque minatur, se eidem nunciaturam, si qua sunt, quæ parum decent. Ita nec odium sibi conciliet liberorum & servorum, urgenti quæ parum

placent; nec ira sibi, ac ubi gravida fuerit, foetui in utero nocet,

§. 85.

Abfit autem ut amorem liberorum & servorum sibi conciliatura causam eorundem agat, ubi paterfamilias malefactis irascitur, aliter quam intercedendo: in hoc enim casu & metus erga patremfamilias & amor erga ipsum una conservatur; in altero autem ille perit, hic delinquendi audaciam gignit, liberi autem atque servi in officio suo minime continentur,

§. 86.

Liquet hinc, omnem domus salutem conservare, si continuæ sint inter patrem atque matremfamilias rixæ,

§. 87.

Non minus ergo patrifamilias incumbit, ut auctoritatem matrisfamilias conservet, ne irritum sit imperium in liberos atque servos, prodens data quavis occasione signa tenerrimi amoris, ut intelligant, huc impune eandem lacescere; haudquaquam vero præsentibus liberis atque servis duriores se erga ipsam præbeat.

§. 88.

Perspicuum hinc satis est, ubi patrisfamilias conservatur auctoritas a matrefamilias, eo ipso quoque propriam hujus auctoritatem stabiliri.

§. 89.

§. 89.

Quoniam patrifamilias curæ esse debet, ut actionum consensus omnium domesticorum ad commune totius domus bonum obtineatur (§. 385. *Jur. nat.*): liberos a consortio famulitii removere debet, ne videant audiantque, quod a bonis moribus alienum.

§. 90.

Neque ferendum, ut famulitium celet mala liberorum facta patri vel matrifamilias, cum sic principiis obstat non liceat, medicina sero nimis paranda.

§. 91.

Servis tamen non permittendum, ut propria autoritate imperent liberis, vel prorsus plagis eos afficiant: quoniam parentum id est officii (§. 316. *Jur. nat.*), & præterea reverentiæ atque amoris erga parentes inimicum.

§. 92.

Eadem ratio loquitur, nec liberis permittendum esse, ut propria autoritate imperent servis, vel eos increpent.

§. 93.

Accedit, quod sic animo efferantur liberi, & se parentibus pares existimantes, ab obedientia iisdem præstanda tandem alieniores fiant.

§. 94.

Ne autem patrifamilias levioris momenti videantur, quæ cum præsentissimo damno negliguntur; ad ea attendat, quod admissio uno

absurdo sequantur plura. Hic permultum ex alieno casu sapere licet.

§. 95.

Postquam paterfamilias certa condidit decreta, ad quæ domesticorum actiones attemperari jubet, ut omnium obtineatur consensus (§. 83. *Jur. nat.*): ejus quoque est, non ferre, ut quis impune delinquat. Adhibenda itaque sunt remedia, ex iis derivanda, quæ de societatibus simplicibus, ex quibus domus coalescit dicta sunt: nec facile quidpiam immutandum, quod non male positum experimur.

§. 96.

Competit adeo patrifamilias ad omnes domesticorum actiones attendere, atque in eas inquirere, quo ipso *vigilantia*, propria ipsi virtus, continetur.

§. 97.

Impune consequenter non ferat, si malefacta tegantur.

§. 98.

Ne tamen hinc discordiarum semina spargantur: reticere debet autorem, qui clam monuit de factis voluntati ejus adversis.

§. 99.

Quodsi contingit, ut ordo ab ipso præscriptus fuerit interruptus, tempestive redintegrandus (§. 95.).

Pars II. sive Politica

DE SALUTE TOTIUS REIPUBLICÆ
PROMOVENDA.

SECTIO I.

DE REPUBLICA CONSTITUENDA.

CAPUT I.

DE FORMA REIP. ELIGENDA.

§. 100.

Cura administrandæ reip. vel uni vel pluribus committi potest, & quidem vel absolute vel certis sub conditionibus (§. 409. *Jur. nat.*). Quamobrem si contingat, ut forma reip. sit eligenda, vel pristina immutanda: disquisitioni locus est, quænam alteri in dato casu præster.

§. 101.

Et si vero rebuspubl. constitutis inutilis videri poterat hæc doctrina, cum citra imperantium & parentium, nonnunquam etiam egerarum rerump. consensum immutatio fieri nequeat: utilitate tamen sua non caret, non modo quando casus formæ introducendæ vel immutandæ existit, verum etiam quando de forma constituta singulare judicium ferendum, quod prodest imperanti sponte actiones suas ad aliam formam attemperanti, quando e reipublicæ commodo videtur.

§. 102.

In genere notandum est, imperantes vel referre omnia ad salutem & tranquillitatem publicam, tanquam ad finem ultimum, vel ad utilitatem propriam, cui tanquam medium subordinatur salus atque tranquillitas publica. Istud cum sit juri naturali conforme, hoc minus (§. 394. *Jur. nat.*): prior reip. forma dicitur *recta*; posterior *aberrans*.

§. 103.

Recta reip. forma, in qua cura salutis & tranquillitatis publicæ seu summa potestas & potentia civilis est penes unum, dicitur *monarchia* sive *regnum*: eidem opposita forma aberrans *tyrannis*.

§. 104.

Recta reip. forma, in qua summa potestas & potentia civilis est penes optimates, *aristocratia* vocatur: opposita aberrans *oligarchia*.

§. 105.

Recta reip. forma, in qua summa potestas & potentia civilis est penes populum, *politica* appellatur: forma opposita aberrans *democratia*.

§. 106.

Atque hæc quidem reip. formæ, sive rectæ fuerint sive aberrantes, *simplices* salutantur: quibus opponuntur *mixtæ*, ubi alia formæ monarchicæ, alia aristocraticæ, alia po-

politicae, vel ubi alia sunt formae rectae, alia aberrantis,

§. 107.

Unde liquet, formas mixtas multis modis differre posse.

§. 108.

In forma reipubl. recta imperantium finis ultimus est salus & tranquillitas publica (§. 102.): imperantes ergo non modo nosse debent, quænam sint illa media, quibus salus & tranquillitas publica obtinetur, verum etiam constans & perpetua eorum sit voluntas, nil quidquam decernendi vel exequendi, nisi salutis & tranquillitatis publicæ gratia.

§. 109.

Scientia igitur, sapientia, prudentia (§. 118. 181. 198. *Etb.*), omnique virtute morali (§. 223. *I.c.*) polleat imperans.

§. 110.

Omni adeo virtute intellectuali atque morali cum eminere imperantes debeant (§. 109.); iudicium inde fieri potest, quando, cum conveniat monarchia, quando aristocratia, quando democratia, quando ex his diversimode mixta.

§. 111.

Quoniam in statu monarchico omnis potentia & potestas est penes unum (§. 103.): non inutilis est in deliberationibus accelerandis & consiliis cœptis celandis, consequenter ceteris formis eadem præstat, ubi deliberandi mo-

ra nocet & in consiliis celandis magnum momentum situm est.

§. 112.

Ex eadem vero ratione in monarchia facilior est potestatis & potentiae abusus, cum in oneribus imponendis, tum in bellis inferendis & continuandis, tum in consiliis nocuis exequendis.

§. 113.

E contrario in aristocratia, ubi plurimum requiritur ad statuendum consensus (§. 104.), abusus iste difficilior, sive vitio intellectus, sive voluntatis tribuendus: facile tamen hic odia privata transeunt in damnum publicum, uno alteri ex causis privatis refragante.

§. 114.

Hoc incommodo Politicam quoque laborare constat (§. 105.): in eadem vero difficillimus potestatis & potentiae abusus, ob plurimorum consensum.

§. 115.

Interim tamen in politia, ubi plurimi rerum gerendarum non satis gnari, facile fieri potest, ut privatum bonum publico præferatur, politia in democratiâ degenerante,

§. 116.

In politia autem omnium maxime partium studia nocent, & longa consiliorum mora; insidiæ quoque intestinae facillime locum inveniunt.

CAP. II.

DE CURA IMPERANTIS CIRCA
NUMERUM CIVIUM.

§. 117.

Imperantis est, curare, ne minor sit subditorum numerus, quam qui salutis & defensionis reipub. sufficit (§. 421. *Jur. nat.*): de civium itaque numero augendo cogitet, quando opus fuerit.

§. 118.

Eo fine matrimonia injungenda sunt hominibus ad sobolem procreandam & educandam idoneis (§. 283. *Jur. nat.*).

§. 119.

Curandum ergo, ut mares mature ad eum statum perveniant, quo familiæ sustentandæ fuerint pares.

§. 120.

Dirigenda quoque est liberorum educatio, ne facile sanitatis atque vitæ ipsius jacturam faciant.

§. 121.

Porro exteri in regionem, subditorum numero sufficienti destitutam, alliciendi cum privilegiis atque immunitatibus concessis, tum ea regiminis ratione electa, quæ civibus minime onerosa perplacet.

§. 122.

Tempestive quoque morbis contagiosis occurrendum, ne strages civium edatur.

§. 123.

Danda præterea est opera, ut omnibus affluant bonis, ad vitæ necessitatem & jucunditatem acquisitis, & ut occasio eadem acquirendi unicuique in singulari haud desit. Ita nimirum nemini erit desiderium in alias regiones emigrandi, alii contra flagrabunt desiderio inter nos sedem suam figendi.

§. 124.

Eum in finem non concedenda monopolia, quæ lucrum unius promovent cum plurimorum damno, reip. tanto magis inimica, quando advenis conceduntur, opes partas in alias regiones deportaturis.

§. 125.

Ne divites e rep. discedant: cavetur (§. 423. 424. *Jur. nat.*), si pars bonorum, quæ possident abituri, fisco cedat; maxime autem, si subditis bene sit, ut discedere jussi manere malint.

CAP. III.

DE CURA IMPERANTIS CIRCA
VIRTUTES INTELLECTUALES.

§. 126.

IN rep. cura gerenda est, ut liberi absque sumtu parentibus oneroso instituantur, atque ad futurum vitæ genus præparentur (§. 429. *Jur. nat.*). Erigendæ igitur sunt *scholæ* & *academiæ*, in quarum prioribus ætas imbecil-

cillior docetur prima literarum elementa, & quæ memoriæ mandasse juvat in ætate matura; posterioribus autem scientiæ atque artes in vitæ utiles.

§. 127.

In scholis nimirum memoria exercetur a ludimagistris, memoriæ mandanda proponentibus; in academiis vero intellectus perficitur a Professoribus, scientias & artes profitentibus.

§. 128.

Docentium igitur numero adscribendus non est, nisi qui in scientia & arte, quam profitetur, excellit, dono docendi pollet, & ab omni negligentia procul abest.

§. 129.

Nisi imperantes hæc præcipue tangat cura: mala erit reip. administratio, concedenda quippe hominibus ad hæc vel ista negotia gerenda, ad hoc vel istud munus obeundum, parum idoneis.

§. 130.

Ne vero docentibus tædiosa sit diligentia: prospiciendum ipsis est cum de redditibus largis, tum de honoribus civilibus.

§. 131.

Eodem modo obtinebis, ut docentium munus non fastidiant viri in scientiis ac artibus excellentes.

§. 132.

§. 132.

Ferendum quoque non est, ut docentibus ad præclara nitentibus homines importuni sint molesti, propterea quod tædia impediunt, quo minus animus scientiis atque artibus excolendis sit intentus.

§. 133.

Reditus largi cum motivum industriæ esse debeant (§. 130.): cum hac quoque indivulso nexu cohæreant.

§. 134.

Quoniam a docentibus maxima salutis publicæ pars pendet (§. 129.): eorum numero adscribi nequit, nisi qui & eruditionis & industriæ specimina luculenta dedit.

§. 135.

Ut discentes fidem habeant docentibus, salutaria præcipientibus, neque de ipsorum eruditione, scientia atque arte dubii sint: non modo viri celebritatem nominis consecuti docentium numero adscribendi, verum etiam docentes ad celebritatem nominis eniti decet.

§. 136.

Et ne docentes celebritati nominis officiant penes discentes: a moribus abstinendum, quibus in contemptum discantium facile irruunt.

§. 137.

Eadem de causa docentium est, mutuis officiis tueri mutuam autoritatem, nec ferendum, ut unus alterius autoritati deroget.

§. 138.

§. 138.

Cavendum igitur, ne redituum & honorum inæqualitas major, discordiis pabulo sit.

§. 139.

Amorem porro discentium sibi concilient docentes, ita nimirum in doctrinis ipsorum hauriendis indefessam operam præstabunt, ut voluptate perfundant docentes (§. 115. *Psych.*).

§. 140.

Ut docentibus discentium profectus innotescant, examinando & disputando exercere eosdem par erit. Examina enim produnt, quomodo doctrinæ memoriæ fuerint mandatæ; disputationes autem num easdem defendere possint, vim & efficaciam earundem tenentes.

§. 141.

Docentibus quoque convenit potestas obligandi discentes ad tractanda hæc vel ista studia & ad diligentiam in studiis adhibendam, ubi saniora monenti aurem non præbent benignam, secus enim oleum & operam perdunt.

§. 142.

Nimia igitur in studendo libertas discentibus obest.

§. 143.

Quoniam vero & docentes potestate sua abuti possunt cum discentium damno, igitur nec ipsis conveniat absoluta, sed ad certas leges adstringenda.

(P. II. *Thim. Inst. Phil. Pr.*)

Cc §. 144.

§. 144.

Ne defint viri, qui cum emolumento reip.
muneribus publicis præficientur: nec discen-
tium numero promiscue quicunque adscribendi
sunt, verum ingeniorum selectu habito, ad
quodvis studiorum & artium genus non admit-
tendi sunt, nisi illi, qui & ingenii dotibus & so-
lertia sunt instructi.

§. 145.

Quodsi hisce deficient studiorum sumtus: sti-
pendia iisdem conferenda, dotibus ingenii & so-
lertiæ proportionata; non tamen ad luxum suf-
ficientia, ne studiis obstacula ponant.

§. 146.

Paret hinc stipendia etiam dari posse illis,
quibus proprii sumtus non sufficiunt ad magis
præclara præstanda, ad quæ ingenii vires atque
solertia sufficiunt.

§. 147.

Ne autem literatorum numerus major reip.
sit oneri; a litterarum studiis arceri debent, qui-
bus ingenium modicum, sumtus proprii nulli.

§. 148.

Et si autem alterna ament Camœnæ, neque
adeo neganda sit conveniens animi recreatio, ut
alacris sit redeuntium ad studia animus: ma-
ximopere tamen cavendum, ne ansa voluptati-
bus sit, quippe quæ studiis admodum contra-
riantur.

§. 149.

Et ne odium adversus docentes concipiant discentes (§. 116. *Psych.*) amor, quo flagrare debent, advers^{um} (§. 139.): docentes a nimia severitate sibi temperare tenentur.

§. 150.

Quoniam viris aliorum negotiorum mole obrutis, non vacat artibus atque scientiis excolendis invigilare; *academia scientiarum* condenda, cujus curæ committuntur incrementa scientiarum & artium.

§. 151.

Ejus itaque est, veritates per libros & homines sparsas colligere, collectas ad trutinam rationis & experientiæ exigere, & probatas inter se connectere.

§. 152.

Academici consequenter præstent arte observandi, experimentandi, inveniendi & veritates examinandi; salariis, unde dignitati convenienter vivant, instruendi, & honorum prærogativis ornandi; ne vel ipsi in colendis scientiis & artibus laboris tandem pertæsi segnes evadant, vel suo vivendi genere scientias in contemptum trahant.

§. 153.

Satis elucet, academiæ scientiarum concedendam esse libertatem sentiendi, cujus abusus minime metuendus, cum academicorum numero non adscribatur, nisi qui veritati dijudi-

candæ fufficit, cumque publicæ luci non exponatur, nifi communi fociorum calculo comprobatum.

§. 154.

Hujus etiam academix eft, de omnibus artibus, quocunque tandem nomine veniant, perficiendis, immo & de ftatu reip. meliorando cogitare.

§. 155.

Quoniam fieri haudquaquam poteft, ut unus omni fcientiarum generi vacet: unicuique membro demandanda eft illius cultura, in qua præ ceteris excellit.

§. 156.

Præfes tamen academix, cujus curæ directio commiffa omnis, in quovis fcientiarum genere ubi fuerit verfatus: & membris agenda præfcribere, & eorum inventa examinare, veritates probatas inter fe connectere atque in fyftema redigere poterit.

§. 157.

Quodfi academia fcientiarum fatisfaciat muneri fuo: ab eadem expectare licet exactam hiftoriam litterariam, five eruditorum, fcientiarum atque artium; optimos in unoquoque fcientiarum genere ad instituendos alios libros, ut resp. abundet viris folida doctrina imbutis; item artis medicæ perfectionem, ac meliorem reipubl. formam.

§. 158.

§. 158.

In academiis artium ipsæ artes docentur, quæ adeo ab academia scientiarum differunt in scientia artium acquiescente.

§. 159.

Artium igitur academix condendæ, ut præclaros educare liceat artifices, tirones in omnibus urbibus optime instituturos.

§. 160.

Immo opificum quoque officinæ celebres condi juvat, in quibus opifices præstantes educantur.

§. 161.

Nec negligendæ scholæ, in quibus ex scientiis & artibus liberalibus docentur, opificibus profutura.

§. 162.

Subsint autem academix scientiarum, ne inutilia utilibus præferant, vel præpostera utantur docendi methodo.

CAP. IV.

DE CURA IMPERANTIS CIRCA
VIRTUTES MORALES & CULTUM
DIVINUM.

§. 163.

Imperantis haud postrema sit cura, ut non modo liberi a primis incunabilis ad virtutis culturam & vitiorum fugam adducantur, verum etiam ut adulti in virtutis tramite detine-

antur & a vitiis devitiis retineantur (§. 430. *Jur. nat.*): constituendi igitur sunt docentes publici, qui cum pueros atque adolescentes boni malique discrimen cum praxi morali doceant; tum etiam adultis, quæ in ætate juvenili didicerunt, in memoriam revocent & ad virtutis studium, vitiorumque fugam hortentur (§. 105. *Phil. pr. univ.*).

§. 164.

Ætatis minus adultæ mores in scholis formari possunt, ubi ad virtutes intellectuales manducantur (§. 125.); adultis autem satisfaciunt doctores peculiare, quos nostris moribus ecclesiæ ministros veneramus.

§. 165.

Doctores itaque publicorum numero adscribendi non sunt, nisi qui solida rerum divinarum, boni malique scientia instructi, nec propria experientia destituti, & ipsimet in virtutis studio haud contemnendos fecerunt progressus & in observandis aliorum vitiis nunquam passi sunt desiderari in lustram suam,

§. 166.

Scribendi sunt libri typisque mandandi, quorum lectione in virtutum studio proficere licet.

§. 167.

Conventus quoque publicos statuto tempore celebrandos esse constat (§. 163.), quos & cultus Numinis postulat (§. 715. *Eth.*): nemini adeo negligendos, cum non modo erudiendi, verum etiam

etiam adhortandi & commonefaciendi gratia instituantur (§. 163.).

§. 168.

Doctorum publicorum officium sit necesse est inquirere, num parentes domi, atque docentes in scholis satisfaciant officio in erudiendis liberis de Deo atque officiis?

§. 169.

Ut pauci doctores sufficiant, nec munus præter necessitatem reddatur molestum: decernendi sunt publica auctoritate dies festi, quibus conventus publici celebrandi, & templa condenda istis commoda.

§. 170.

In conventibus istis satisfieri par est, quæ de cultu Dei, præsertim externo alibi (§. 716. & sq. *Eth.*) præcepimus.

§. 171.

Comœdiæ atque tragœdiæ cum repræsentent facta hominum cum secundis vel sinistris eventibus eadem comitantibus, ut exempla veluti viva & quæ inter se connexa sunt uno veluti obtutu comprehendenda sistant: praxi morali hand contemnendum adferunt adjumentum (§. 111. *Pb. pr. un.*).

§. 172.

Non ergo inanes, quibus stant, sunt sumtus, modo evitetur abusus cum se exerens, quando vitiis pabulum ministratur.

CAP. V.

DE CURA IMPERANTIS CIR-
CA HONESTATEM EX-
TERNAM.

§. 173.

Quoniam in potestate imperantis non est, ut omnes cives subditos ad virtutem perducatur, cogi nesciam (§. 52. *Pb. pr. un.*): danda minimum est opera, ut externi actus cum lege naturali consentiant (§. 403. *Jur. nat.*); quem consensum *honestatem externam* salutamus. Introducenda ergo est obligatio civilis, ubi naturalis non sufficit, ad impediendos actus externos, salutis & tranquillitati publicæ adversos (§. 420. *Jur. nat.*).

§. 174.

Pœnarum & præmiorum constitutione introducitur obligatio (§. 18. *Pb. pr.*). Imperans igitur actionibus honestis præmia, aut earum omissioni pœnas; actionibus contra turpibus pœnas aut earum omissioni præmia decernere debet.

§. 175.

Pœnæ sunt malum, quod cum actione connectit legislator tanquam motivum eam omit-
tendi vel committendi: præmia contra bonum, quod cum actione eum in finem connectit (§. 39. 40. *Phil. pr. un.*). Subditos ergo obligaturus imperans bonum quoddam sive fortunæ sive corporis conferre tenetur in committentes actionem legi conformem, vel omit-
tentes disformem; aut malo sive fortunæ sive corporis
affi-

afficere committentes legi difformem, omittentes eidem conformem (§. 453. *Fur. nat.*).

§. 176.

Inter bona fortunæ eminent opes & honor, quorum jactura censetur mala. Vicem igitur pœnæ subit jactura numorum atque honoris, quantum illa *multa*, hæc *infamiae* nomen fert.

§. 177.

Dolor quoque corporis cum inter mala corporis referatur (§. 101. *Psych.*): idem pœnas corporis *afflictivas* constituit. Eidem agnata est pœna carceris, ob tædium, quod percipit incarceratus.

§. 178.

Cumque mors sit ultima linea rerum: ipsa mortis illatio pœnam *capitalem* absolvit.

§. 179.

Inter præmia locum imprimis habent *dignitates & exstimationes* civiles (§. 446. *Fur. nat.*): iis adeo conferendæ, quorum actiones externæ cum lege consentiunt, ut nemo habeat, quod jure in iis reprehendat (§. 175.). Hoc sane stimulo generosi animi excitantur ad præclara præstanda (§. 122. *Psych.*); alii vero vel ipsa invidia duce ipsos æmulantur (§. 118. *l. c.*): quæ æmulationis etsi virtutis non sit (§. 72. *Pb. pr. un.*), ad honestatem tamen externam, quæ hic intenditur, sufficit (§. 173.).

§. 180.

Pœnæ vero corporis *afflictivæ & capitales*,

pœna item carceris, mulctæ & infamiæ locum habent in delictis, quibus vel civibus singulis, vel toti reip. damnum inferitur (§. 475. *Jur. nat.* & sqq.).

§. 181.

Cum igitur hæ pœnæ potissimum locum habeant, ne unus alterum lædat (§. 180.): gravitas pœnæ proportionanda est magnitudini damni actione dati, atque frequentiæ delicti (§. 475. 495. *Jur. nat.*), necnon gradui malitiæ, propterea quod ad malas actiones committendas quis promptior sit, quo malitiosior, consequenter non nisi duriori pœna compescendus.

§. 182.

Pœnæ constitutæ ne infirmentur: exequendæ sunt, ut adeo præstet, pœnas decerni leviores, sed quæ executioni demandentur, quam duriores, quæ delinquentibus vel remittuntur, vel eorum gratia in leviores transformantur.

§. 183.

Quodsi singularis ratio suadeat, ut pœna vel remittatur, vel emolliatur: danda omnino est opera, ne præjudicium de pœna non exequenda invalescat, ut ratio ista singulis innotescat, cura rigore recessum fuerit.

§. 184.

Pœnæ igitur cum non modo ad emendationem eorum, quibus infliguntur, verum potissimum & capitales quidem unice ad terro-

rem.

rem aliis incutiendum, ut idem flagitium horreant (§. 173.) tendant; ideo publice infligendæ sunt, nec in infligendis habenda est ratio delinquentis, an scilicet pœna mollior ipsi emendando sufficiat, nec ne.

§. 185.

Pœnis cum maectentur delinquentes, ut aliis terror incutiatur, ne idem flagitium committant (§. 186.): in publica earum executione prælegendum est delictum, ipsa delinquentis confessione confirmandum, ne dubium supersit multitudini.

§. 186.

Ex eadem ratione pœna capitali plectendus per viam longiorem ad locum supplicii deducendus, haud procul a via regia situm, ut cada-ver omnium prætereuntium oculis exponatur.

§. 187.

Ut delicti turpitudinem animo concipiat plebs, rationis ignara: locus supplicii idem esse debet cum carnificina, infamiae macula notandus.

§. 188.

Eo fine quoque non absque ceremoniis supplicia exequenda esse, ex ipsa harum notione colligimus (§. 115. *Pb. pr. un.*), quæ præter turpitudinem delicti, iudicis quoque in puniendo severitatem loquantur (§. 182.).

DE CURA IMPERANTIS CIR-
CA RELIGIONEM.

§. 189.

Religio est cultus divinus voluntati Numinis conformis.

§. 190.

Qui adeo eidem difformis est, non nisi speciem religionis mentitur, & quia talis apparet, *falsa religio* nuncupatur.

§. 191.

Quoniam Deus velle nequit, quæ perfectionibus suis repugnant (§. 53. *Theol. nat.*): cultus divinus, qui absolvitur actionibus per attributa ipsius tanquam motiva determinatis (§. 706. *Eth.*), religio est (§. 189.).

§. 192.

Quodsi acquiescamus in iis, quæ sola luminis naturalis ope de Deo agnoscuntur, in Theologia naturali, vel etiam per creaturarum contemplationem (§. 628. *Eth.*): *religio naturalis* salutatur.

§. 193.

Quoniam voluntas Numinis per revelationem immediatam quoque innotescit (§. 55. *Th. nat.*): cultus a Deo revelatus religio est (§. 189.), diciturque *religio revelata*.

§. 194.

Dari religionem revelatam probant criteria revelationis (§. 55. 56. 57. 58. *Th. nat.*), ad religionem

nem christianam applicata, cujus prærogativa præ naturali & necessitas patet (§. 625. *Eth.* & 125. *Pb. pr. un.*).

§. 195.

Ad religionem quoque spectat continuum officiorum erga Deum exercitium (§. 709. *Eth.* & 189. *Polit.*): quod cum sit firmissimum virtutis præsidium (§. 614. *Eth.*): imperantis quoque est curare, ut religio inter cives floreat (§. 430. *Jur. nat.*).

§. 196.

Neque dubium est, quod magis valeat sincerum religionis studium, quam omnis poena. Etenim poena neminem terret, qui sperat, vel delictum celari posse, vel negando efficere, ne ejusdem convincatur in admissi suspensionem adductus; nec voluntatem emendat (§. 55. *Pb. pr. un.*). E contrario metus Numinis, religionis ipsius naturalis pars haud postrema (§. 647. *Eth.*), siue filialis fuerit siue adhuc servilis, impedit, quominus clanculum mala committere velis (§. 17. 18. *Jur. nat.*).

§. 197.

Patebit quoque inferius juramentorum in rep. utilitas: quæ cum deferri non possint nisi illis, qui credunt dari Deum mali vindicem (§. 127. *Jur. nat.*), Dei autem agnitio ad ipsius cultum (§. 621. *Eth.*) adeoque ad religionem (§. 189.) spectet; exinde quoque religionis in rep. necessitas elucet.

§. 198.

Quoniam imperantis est curare, ut religio civibus in pretio sit (§ 195.): doctores publici cum in scholis tum in ecclesia constituendi sunt (§. 164.) viri, & Dei & virtutum moralium scientia, ac virtute, præsertim pietate pollentes, non modo ut cives recta docere possint, verum etiam ne sinceritatem religionis exemplo suo in suspensionem trahant, tandem in contemptum ipsius degeneraturam.

§. 199.

Sinceri religionis studii signa præbent imperantes, si ipsimet reverenter habeant publicos ecclesiæ doctores atque ministros, & cultui divino publico decenter vacent.

§. 200.

Multo magis igitur curare debent, ut eosdem & cives habeant reverenter, & cultui divino publico decenter vacent, imprimis ut viri doctrina, dignitate atque autoritate in rep. eminentes aliis sint exemplo.

§. 201.

Athei consequenter Deum esse negantes, adeoque omnem religionem vilipendentes, in rep. tolerari nequeunt.

§. 202.

Qui vero aperte Deum non negat: hand temere ab aliis in suspensionem atheismi trahendus est, (præsertim si acumine atque scientia præstans habetur,) propterea quod alii ejus ju-

judicio multum tribuentes, nec de veritate religionis satis convicti, circa eam vacillant, & mox ab ea fiunt alieniores. Temerarius itaque ausus, salutis reip. inimicus (§. 197.) pœnaque coercendus (§. 174.) est.

§. 203.

Nocet præterea atheismus reip. ob sublatum juramentorum usum in eadem adeo necessarium (§. 197.), & ob vitæ pravitatem ejus tantum non semper comitem, tum etiam ob medium obligandi, ne scelera clanculum committantur (§. 196.), atque ob medium virtutis præsentissimum (§. 195.) sublatum.

§. 204.

Nimirum etsi in ipsa hypothese impossibili athei subsistat jus naturæ (§. 21. *Pb. pr. un.*), nec ulla consequentia inferatur, non datur Deus, ergo sceleribus est indulgendum, modo a pœna civili tutus sis: paucissimi tamen sunt athei, qui tanta ratione præditi, ut obligationi naturali (§. 19. *Pb. pr. un.*) locum concedant. Accedit, quod errore suo alios ad pravitatem vitæ inducant, etsi ipsi ab eadem fuerint alieniores.

§. 205.

Facile apparet, nec permittendum esse in rep. ut errores disseminentur religioni adversi (§. 195. & sqq.). Quamobrem si monitus ab iis disseminandis non desistat: pœna coercendus est (§. 173. 174.).

DE CURA IMPERANTIS CIR-
CA JUSTITIAM.

§. 206.

Justitia est, unicuique tribuere quod suum est (§. 596. 602. *Eth.*). Quamobrem cum sæpissime unus alteri tribuere nolit, quod debet: vi adigendus est ab imperante, ut id faciat (§. 403. *Jur. nat.*).

§. 207.

Quoniam imperantis est, eum, qui damnum dedit, ad ejus restitutionem adigere (§. 431. *Jur. nat.*), & curare, ut contractus legitime celebrentur, illegitimos vero rescindere (§. 432. *l. c.*), immo & in nonnullis contractibus prospicere securitati ejus, qui aleam subit (§. 433. *l. c.*), famamque tueri civium & quascunque injurias ipsis illatas vindicare (§. 447. 448. *l. c.*): ideo constituendi sunt judices, quorum est de causis civium controversis judicare, parti læsæ jus suum vindicare, & omne damnum, quantum datur, avertere.

§. 208.

Eligendi adeo sunt judices, jurium periti, & habitu ea ad facta applicandi valentes, æquitatis amantissimi, ne vel per errorem, vel affectibus inducti statuunt, quod a lege alienum.

§. 209.

Præter potestatem autem jus dicendi ipsos quoque ornat potentia, ut sententiam latam
exe-

exequi possint, vi adigentes refractarios, ut eisdem se submittant.

§. 210.

Executioni ergo locus est, si quis sententiæ lætæ intra terminum præstitutum non satisfacit.

§. 211.

Quodsi objectum executionis fuerit nullum, veluti si quidpiam facere jubeatur: pœna carceris vel multa in subsidium vocanda, ut ad obedientiam præstandam obligetur (§. 18. *Ph. pr. un.*).

§. 212.

In contractu emtionis & venditionis ne dolus committatur: merces venales inspiciendæ & taxandæ. Ita nimirum nec emtor pretium justo majus solvit cum suo damno, nec justo minus cum venditoris damno, nec idem merces deterioris notæ accipit.

§. 213.

Idem quoque fieri debere in usum permutationis, liquet abunde (§. 172. *Jur. nat.*).

§. 214.

In contractu mutui determinandæ sunt usuræ (§. 210. & sqq. *Jur. nat.*), ne locus sit fœnori debitoribus damnofo (§. 215. *l. c.*).

§. 215.

Quoniam in casibus singularibus usuræ per principia juris naturalis diversimode determinantur (§. 210. *Jur. nat.*): ad minuendam in judi-

(P. II. *Thüm. Inst. Phil. Pr.*) D d ciis

ciis litem constanter quadam ratione determinandæ (§. 210. & sqq. *Jur. nat.*), ita ut non liceat usuras majores exigere; etsi minores, immo nullas urgere integrum sit æquitatis naturalis cultori (§. 211, 212. *Jur. nat.*).

§. 216.

Cum obligatio pœnæ constitutione nitatur (§. 41. *Pb. pr. un.*): muletæ locus hic erit commodus, propterea quod avarus usuras immodicas postulat (§. 349. *Etb.*), cui jactura nummorum maxime molesta.

§. 217.

Quoniam nemini otia dum (§. 67. *Jur. nat.*): nec ferendum est, ut multi ex usuris vitam tollerent. Quodsi conveniens labor alius decerni nequeat: admovendi sunt divitiis abundantes muneribus, ex quibus honoratiores potius, quam locupletiores fiunt; etsi hic quoque attendi mereatur, numistis obeundis sint pares (§. 395. *Jur. nat.*).

§. 218.

Ne creditor cum periculo suo debitori credat pecuniam suam: de securitate publica auctoritate prospiciendum, ita ut non consentiat magistratus in mutuum, nisi certus fuerit, debitorem esse solvendo, & ut debita publico consensu confirmata solvantur ante reliqua eodem destituta, etsi priora.

§. 219.

Similiter non admittendus est fidejussor, ne-

gato publico consensu, ubi eum non esse solvendo constet, vel ubi fidejussio cum pernicie sua suæque familiæ conjuncta (§. 237. *Jur. nat.*).

§. 220.

Nisi quoque fidejussor beneficio excussionis renunciaverit: creditor (§. 239. *l. c.*) excusso principali debitore, cum solvendo non sit (§. 238. *Jur. nat.*), fidejussorem excutere debet (§. 235. *l. c.*), si vel maxime ad incitas redigatur (§. 240. *l. c.*).

§. 221.

In contractupignoris, venditionem pignoris, ubi debitor vel in mora vel prorsus solvendo non est (§. 231. 233. *Jur. nat.*), publica magistratus autoritate fieri par est, ita ut adjudicetur plus licitanti.

§. 222.

Quoniam vero hic dolus facile irrepit, si pignori adjiciatur conditio, ut creditori cedat, solutione intra terminum præstitutum non facta: ex eadem ratione, qua scæus proscribitur, non ferendum, ut ista adjiciatur, sed in transgressores animadvertendum (§. 216.).

§. 223.

In genere perspicuum est, judicem alteram contrahentium partem adigere debere, ut contractui satisfaciatur, ubi pars læsa opem ipsius implorat (§. 207.).

§. 224.

Similiter liquet, ne homines tenuioris fortis

lædantur, operarum mercedem publica autoritate determinandam esse (§. 175. *Jur. nat.*).

§. 225.

Immo eadem de causa opificum operibus atque operis statuendum est pretium. Accedit altera ratio, ne quis cum ceterorum damno leviori pretio contentus, sit fortunæ suæ parum tenax.

CAP. VIII.

DE CURA IMPERANTIS CIRCA INJURIAS.

§. 226.

OMnis actio, qua quis sciens atque volens alterum lædit (§. 95. *Jur. nat.*), dicitur *injuria*.

§. 227.

Quoniam in rep. non ferendum, ut unus alterum vel ejus famam lædat (§. 447. 448. *Jur. nat.*), adeoque injuria unus alterum afficiat (§. 226.); poenæ decernendæ sunt injurias inferentibus (§. 452. *Jur. nat.*), earumque exequendarum cura judicibus committenda.

§. 228.

Actus judicis, quo poenam infligit ob injurias illatas, & partem lædentem ad damni reparationem cogit, dicitur *vindicta*.

§. 229.

Quoniam concedendum non est, ut quis illatas sibi injurias ipsemet vindicet (§. 449. *Jur. nat.*),

nat.), injuriæ tamen illatæ ad iram concitent læsum, animumque disponant ad voluptatem ex lædentis infelicitate percipiendam (§. 116. 132. *Psych.*), atque adeo ad vindictam privatam impellunt: eandem quoque pœnis coërceri convenit (§. 452. *Jur. nat.*).

§. 230.

Vindicta privata cum in rep. exulare jubeatur (§. 449. *Jur. nat.*): omnium minime ferenda sunt *certamina singularia* sive *duella*, ad ulciscendum injurias illatas subeunda; cum ipsius vitæ periculum incurrant, ipsa suscipientes.

§. 231.

Certaminibus itaque istis, præsertim ubi invalescunt, non modo gravissimæ pœnæ decerpendæ, verum etiam injuriæ eorum causæ severis pœnis coërcendæ (§. 450. *Jur. nat.*).

§. 232.

Quis autem non videt, cum vindicta privata proscribi minime posse jus inculpatæ tutelæ, quoniam idem non obtinet, nisi in eo casu, in quo aggressor violentus vi depellendus, nec judicis opem implorare licet (§. 111. *Jur. nat.*)?

§. 233.

Privatio vitæ læsio omnium maxima merito habetur. Maxima ergo ei decernenda est pœna, qui sciens ac volens violentas alteri infert manus.

§. 234.

Actio, qua quis mortem alteri infert, cum eam vel minorem læsionem intenderet, *homicidium dolosum* vocatur. Si vero præter intentionem ab agente prorsus aliud, nulla sui culpa alteri mors inferatur, *homicidium erit casuale*; si quid culpæ adhæreat, *culposum*.

§. 235.

Casuale homicidium cum committenti imputari nequeat: fortunæ tribuendum (§. 78. *Jur. nat.*), nec pœna adversus idem valet (§. 452. *l.c.*).

§. 236.

Pœna capitalis cum sit supremus pœnarum gradus: dubio caret, homicidium dolosum pœna capitali dignum esse (§. 233. 234.); culposum autem, veluti si regularius tegula dejecta prætercuntem interimit, nulla monitione facta, pœna leviori dignum, pro diverso culpæ gradu diversa.

§. 237.

Quoniam jus inculpatæ tutelæ in rep. unicuique integrum manet (§. 251.): homicidium quoque in statu inculpatæ tutelæ commissum pœna vacat (§. 452. *Jur. nat.*).

CAP. IX.

DE CURA IMPERANTIS CIRCA VITÆ NECESSITATEM.

§. 238.

Prima in rep. cura esto, ne deficient bona naturalia ad victum, amictum atque ædes
ne.

necessaria (§. 425. *Jur. nat.*). Oeconomia igitur ruralis floreat necesse est, consequenter agriculturæ, horticulturæ, sylviculturæ & rei pecuariæ perfectio omni studio promovenda, nec quidquam permittendum, quod ullo modo eidem repugnet (§. 441. *Jur. nat.*). Patet igitur constitutionum ruralium necessitas.

§. 239.

Et cum imperantis quoque sit curare, ut cives ex bonis naturalibus, tanquam materia, artificialia effingant, sive in usus proprios, sive in usum commerciorum (§. 425. *Jur. nat.*): omnis quoque generis opifices alendi, eorumque numerus determinandus, ne justo major officiat ipsis opificibus atque artificibus, justo minor autem concivibus. Palam est, in priori casu vix acquiri vitæ necessitati inservientia, in posteriori autem pretium rerum ultra modum intendi.

§. 240.

Ne desint ulli ad vitæ commoditatem requisita: pretia rerum determinanda sunt autoritate publica, quantum fieri potest, ne commerciis obex ponatur. Habenda vero potissimum illorum ratio, quæ ad vitæ promiscue omnium necessitates requiruntur, veluti annonæ.

§. 241.

Et ne luxui dediti postrema vitæ parte in paupertatem incidant: publica lege is proscribendus (§. 437. *Jur. nat.*). Unde patet legum sum.

tuariarum necessitas, circa victum & amictum potissimum versantium,

§. 242.

Interim tamen probe notandum, circa victum & amictum non necessitatis solius habendam esse rationem, non modo per rationes morales (§. 50. *Jur. nat.*), verum etiam per rationes politicas; cum in magna hominum multitudine plurimis foret otiaudum, si tantummodo de necessariis cogitandum, in rep. autem ferendum non sit, ut otio diffuant, quibus vires ad laborandum suppetunt (§. 426. *l. c.*). Accedit, quod quidam artifices ex solis necessariis vitam tolerare nequeant, veluti pictores & cælatores,

§. 343.

In rep. ferendum non est, ut eleemosynas petat, cui vires sunt ad laborandum, neque ampliores petat, quam quæ vitæ necessitatibus sufficiunt, aut perpetuas, ubi sufficiunt extraordinariæ (§. 438. & sqq. *Jur. nat.*): ut igitur legi naturali satisfiat; quantum datur (§. 403. *l. c.*), *eleemosynaria* constituenda, ita ut eleemosynarii judicent de egestate stipem emendicantium, & quantitatem hinc determinent.

§. 244.

Qui labores fastidiunt, ne negatis eleemosynis aliorum opibus insidias struant, vel juvenculæ ex corpore quæstum faciant: *ergastula* condenda, in quibus ad labores vi compellantur, donec ad sanio rem mentem redeant,

§. 245.

Ut illorum, quibus vires ad laborandum minime sufficiunt, & desunt agnati, quorum beneficio alantur, necessitati succurratur: *xenodochia* constituenda, in quibus sumtibus publicis & divitum munificentia alantur,

§. 246.

Si pupilli fuerint egeni, quorum educationi sumtus impendere nequeunt agnati, vel amici parentum defunctorum: *orphanotropha* condenda, ne iidem negligantur,

§. 247.

In illorum commodum, quibus exiguae ad laborandum vires suppetunt, erigenda sunt *onochotrophia*, in quibus sumtibus aluntur publicis, sed ita ut lucellum modico labore partum publico acquiratur,

§. 248.

Ne didactra parentibus sint onerosa: præter scholas publicas *schola pauperum* in usum utriusque sexus condendæ (§. 429. *Jur. nat.*).

§. 249.

Immo cum opificibus atque artificibus sæpe desint sumtus necessarii ad utiles reip. operas præstandas: *ærarium publicum* constitui oportet (§. 125. *Jur. nat.*), ex quo pecunia mutuo detur modicas usuras soluturis. Cives enim opulentiores, quibus gratior est in credendo ære securitas, quam usuræ largiores, in ærarium istud opes suas lubentissime conferent,

§. 250.

Incendiis vastantur ædes, consumuntur opes & ad paupertatem rediguntur vel opulenti: publicis igitur constitutionibus sanciri debet, quomodo cum præcavenda, tum, ubi exorta fuerint, restringenda sint, ne latius repant.

§. 251.

Pertinet huc multa, quam dant negligentia, tum in præcavendis incendiis, tum in exortis celandis, cum principio haud difficulter obsistere licuisset.

§. 252.

Curæ reliquæ, quæ imperanti circa ædificia incumbit (§. 443. *Jur. nat.*), satisfit partim constitutionibus de re ædificatoria, partim si architecti alantur & fabri.

§. 253.

Ne pupillorum opes a tutoribus male administrantur: *muneri tutelari* præficiendi sunt viri graves, quorum consensu administratio geratur.

§. 254.

Bona igitur ipsorum immobilia in casu necessitatis alienari nequeunt, nisi horum consensu (§. 339. *Jur. nat.*), & quotannis iisdem administratorum bonorum rationes reddere tenentur tutores (§. 340. *l. c.*), immo ad contractus minorennium vel pupillorum consummandos requirere eorundem consensum (§. 342. *l. c.*).

§. 255.

Dilatio rationum cum ferenda non sit (§. 344. *Jur. nat.*): pœna eidem decernenda.

§. 256.

§. 256.

Paupertatis avertendæ gratiâ prohibenda sunt dona, legi naturali minime conformia (§. 246. & sq. *Jur. nat.*), ea præsertim, quæ, ubi in consuetudinem abiire, plurimis onerosa atque salutis publicæ sunt adversa.

CAP. X.

DE CURA IMPERANTIS CIR-
CA MORBOS PRÆSERTIM
CONTAGIOSOS.

§. 257.

Imperantis est curam gerere, ne quis sanitatis atque membrorum integritatis jacturam facere possit (§. 434. *Jur. nat.*): ne igitur labore nimio cum sanitatis dispendio quis fungi habeat opus; nec plurimum munerum obeundorum cura uni demandanda, nec salaria nimis tenuia constituenda, merces diurna operariis extemplo solvenda determinanda, ciborum sanitati nocuorum venditio prohibenda, potus & ciborum venalium inspectio non negligenda, ne aër sordibus fœtorem contrahat cavendum, quæ in ædificiorum structura sanitati proficua injungenda, rædia, quibus homines consumuntur, omni ratione arcenda.

§. 258.

Cum vitæ nullus morbus magis insidietur peste, eidem avertendæ maxima impendenda est cura, plurimum sublevanda, ubi ex historia
pe-

Pestis pleniori, detectæ fuerint tanti mali causæ,

§. 259.

Ne alii morbi contagiosi irruant: venditio prohibenda ciborum, quæ sanitati insidias certo anni tempore struere solent, & imprimis cavendum, ne ex annonæ difficultate, cibo inusitato famem tolerant, egestate pressi.

§. 260.

Imperantis est providere, ut præsto sint media curandi morbos (§. 434. *Jur. nat.*). Alendi igitur sunt medici & chirurgi periti, nec nostris moribus permittendum, ut doctoris gradus conferatur indignis, multa gravi a facultate medica exigenda, quæ ex collatione privilegiorum doctoralium quæstum facit. Eo quoque sine instruenda sunt pharmacopolia, stato tempore visitanda.

§. 261.

Qui ob egestatem non habent, unde sumtus tollendo morbo impendendos faciant: iis elemosynarii extraordinariis donis succurrere jubentur; vel in casu majoris egestatis in *nosocomiis* propterea extruendis, & dotandis eorundem saluti prospiciatur.

§. 262.

Immo eorum gratia publicis sumtibus alendus medicus, qui gratis fert operam egenis, ad dignitatem eminentiorem & lautiorē sortem præ ceteris promovendus, ubi se in obeundo munere assiduum præstiterit.

§. 263.

§. 263.

Ne contagiosi morbi latius serpent, præsertim ubi homines tenuioris fuerint sortis: ut deficiat loci commoditas, nosocomia peculiaria construenda, quibus vernaculo sermone a Lazaro nomen derivatur. Posses *nosocomia Jobæ* appellare.

§. 264.

Consultum quoque foret, ut in ædibus divitum *valetudinaria* commoda struerentur.

§. 265.

Ne pestis longius repat: hac lue infecti extra urbem cum omnibus inquilinis domus, publica autoritate occludendæ, sub tuguriis in campo excitandis commorari debent; eadem vero extinctorum corpora in profundis cavernis sepelienda. Plura aliquando suppeditabit plenior pestis historia, cum scientia physica & medica combinata.

§. 266.

Vix quoque publicæ, plateæ, pontes minime obstacula ponere debere incessus securitati, facile intelligitur (§. 434. *Jur. nat.*).

CAP. XI.

DE CURA IMPERANTIS CIR-
CA VITÆ JUCUNDITATEM.

§. 267.

Imperantis quoque est de sensuum oblectamenti innocuis curam quandam adhibere (§. 445.

(§.445. *Jur. nat.*). Oculos pascunt imagines atque statuae, quæ, præter voluptatem, qua mentem perfundunt, utilitati servant, ubi in memoriam revocant, quæ virtutis ergo meminisse juvat. Spectant huc porro, vireta, nemora, ædificia pulchra, fontes & ignes artificiales, variaque artis opera, una cum comœdiis, tragœdiis, schœnobatica, præstigiis &c. modo caveatur abusus, ne scilicet sint vitiorum tomes.

§. 268.

Aures demulcet musica cum vocalis tum instrumentalis, maximi ad virtutem usus, si morum ac vitæ præcepta ejus ope memoriæ firmiter insigantur & affectibus socientur (§.41. *Psych.*), ut appetitus sensitivus ad consensum cum rationali reducat. In hunc quoque censum veniunt orationes juxta artis regulas compositæ, poemata, præsertim hymni, murmura aquarum, præsertim in catarractis, cantus avium, tonitrua tormentorum, sonitus campanarum & camporum, præsertim ubi tempore nocturno Jupiter tonat.

§. 269.

Odori servant flores cum aliis rebus odoriferis, quæ in officinis prostare debent. Ne autem foetor sit naribus molestus, sordes extra urbem exportandæ, cerdones ad extremos urbis angulos aut extra eam relegandi, lanienæ in iisdem assignandus locus, nec in urbibus, ubi
agri-

agricultura & repecuaria ad vitam tolerandam non indigent incolæ, permittendum, ut vaccæ, sues atque oves foveantur. Inprimis cura esto, ne cloacæ earumque expurgatio fœtore suo sint molestæ.

§. 270.

Quoniam cibo uti sapido nihil vetat, modo sanitati conducatur (§. 49. *Jur. nat.*): gustus quoque hic habenda est ratio, modo caveatur, ne sapor grata fiant irritamenta voluptatis, & luxum pariant.

§. 271.

Ludi cum sint actiones fallendi temporis gratia suscepti (§. 49.), omnes autem actiones inter se consentire debeant (§. 17. *Pb. pr. un.*); cura esto, ut non permittantur, nisi qui vel attentionem & deliberationem acuunt, probabilitatem æstimandi donum conciliant, virtutum exercitia insinuant, sanitati conducunt, verbo virtuti inserviunt. Ast interdicens, qui quæstus gratia sunt, & rixis, prodigalitati, cædi, otio aliisque vitiis fomitem subministrant.

CAP. XII.

DE CURA IMPERANTIS CIR-
CA HONORES.

§. 272.

IN rep. prærogativarum jura iis concedenda, qui honoribus digni sunt (§. 446. *Jur. nat.*). Ad dignitates igitur civiles præ ceteris even-

hendi, qui se honore dignos præstiterunt, speciminibusque eodem dignos comprobarunt (§. 73. 74. l. c.): quod erit stimulo aliis ad præclara suscipienda.

§. 273.

Quoniam vero fieri nequit, ut omnes ad dignitates civiles evehantur, quos honoratius haberi in rep. convenit, ob insignem, quam præstant, utilitatem; honorum quoque tituli cum connexis prærogativis nemini concedendi, nisi iis, qui eodem honore sunt digni, ipsa dignitate titulis istis designata fulgentes.

§. 274.

Absit igitur, ut tituli sint venales: vilescunt enim, immo cum ipsis vilescunt dignitates civiles iis designatæ. Accedit, quod titulis superbientes, sæpius expensas ament, quibus si non ipsi, eorum tamen liberi ad incitas rediguntur.

§. 275.

Ad vitium proclive vulgus ad imitationem honorum civilium excogitavit voces, quibus ignominia actionem confusam sociavit ad alios infamandos. Quoniam in rep. injuriæ quoque verbales vindicem manum flagitant (§. 226.); verborum quoque contumeliosorum usus prorsus proscribendus, illorum præsertim, quæ certaminibus causam præbent (§. 230.).

§. 276.

Multo minus igitur impune ferendum, ut libellis famosis alterius famæ insidiæ struantur, qui-

quibus nempe crimina objicit autor alteri suppresso nomine vel sub nomine ficto latens. Immo cum libellorum famosorum autores securius noceant, quod lateant: non modo ipso facto pro infamibus habendi, verum etiam poena severiori in eosdem, ubi innotuerunt, animadvertendum, ut alii ab eodem facinore deterreantur.

SECTIO III.

DE ADMINISTRANDA REPUBLICA.

CAPUT I.

DE SUMMÆ POTESTATIS ET POTENTIÆ COLLATIONE.

§. 277.

IN monarchia sive regno unus (§. 103.) imperat. Pervenit autem ad imperium vel *electione* sive populi, sive optimatum, sive quorundam illorum, quibus eligendi cura commissa; vel *successione*, ita ut patre mortuo transferatur vel in filium sive primogenitum, sive a parente designandum, aut in agnatum; vel denique *designatione*, ita ut monarcha sibi pro arbitrio constituat successorem, quo jure usi sunt Sinæ ab initio conditi imperii.

§. 278.

In monarchia penes imperantes est absoluta omnis potestas omnisque potentia (§. 103.), atque adeo in collatione imperii nihil observandum. (P. II, *Thüm. Inst. Phil. Pr.*) Ecce dum.

dum. Limitatio enim naturalis, quæ hic locum habet (§. 473. *Jur. nat.*), per se intelligitur.

§. 279.

Quodsi resp. fuerit mixta ex monarchia & aristocratia, vel ex monarchia & politia: unus quidem imperat vi formæ monarchicæ (§. 103.); sed potestas in nonnullis restringitur vi aristocratix vel politiæ, ita ut sine optimatum vel populi consensu non possit decernere, & pars potentiæ sit itidem vel penes optimates vel penes integrum populum (§. 104. 105.). Quando itaque imperaturo fasces conferuntur, tum obligandus est ad *leges fundamentales*, hoc est, regulas, quibus potestatis atque potentiæ limitationes continentur.

§. 280.

Juramento consequenter confirmet, se contra leges fundamentales nihil admissurum: quod ut sit motivum servandi promissi, adeoque vim obligandi habeat (§. 13. *Ph. pr. un.*): Deum timeat imperans (§. 17. *Jur. nat.*), atque adeo cognitione ipsius (§. 19. *l. c.*), eaque viva (§. *Ph. pr. un.*) instructus sit, necesse est.

§. 281.

Elucet hinc præstantia religionis christianæ, ob statum vitæ futuræ, quem ignorat ratio: cuius etiam maximum pondus est in monarchia; ne imperium absolutum degeneret in tyrannidem (§. 103.).

§. 282.

§. 282.

Cum adeo plurimum referat, præsertim in monarchia, ut imperans vero timore Dei instructus sit; magna penes ipsum concionatoris aulici autoritas esse debet.

§. 283.

Juramentum quidem vim obligandi etiam inde acquirit, quod imperans idem susque deque habens, fidem suam suspectam reddat exteris, & ipsorum civium animos a se alieniores: quod utrumque sæpius valde nocere potest.

§. 284.

Si juramento soli non tuto fidendum: pars potentiae, nonnunquam potentia omnis, penes optimates vel penes populum relinquitur. Irritum enim est decretum, nisi idem executioni demandari possit.

§. 285.

Ad potentiam refertur pecunia rerum gerendarum nervus (§. 483. *Fur. nat.*). Potentia igitur limitatur, si imperanti non permittitur, absque optimatum consensu civibus onera imponere, nec nova onerum genera introducere, &, si *thesaurarius* constituatur, qui pecunias in usum publicum exactas recipit & erogat. Sinæ olim omnes sumtus publicos per leges fundamentales determinarunt, tum etiam in privatos imperantisque familiae usus impendendos.

§. 286.

Referuntur porro ad potentiam imperantis milites (§. 483. *Jur. nat.*). Quamobrem ea limitatur, si *dux belli* creatur, a cujus nutu pendet miles, ipse autem a jussu imperantis, ad leges quasdam status fundamentales attemperato.

§. 287.

Refertur denique ad potentiam jus constituendi & removendi magistratus ac judices in oppidis, pagis atque provinciis, conferendi munera publica & dignitates civiles (§. 483. *Jur. nat.*). Limitatur adeo potentia *jure denominandi*, hoc est, potestate collegio concessa, ut, si munus vacet, nominent personas aliquot dignas ipsorum judicio, quæ eidem admoveantur.

§. 288.

Nihil autem hac ratione decedit majestati principis. Etsi enim per potestatem atque potentiam junctim sumtam constituatur (§. 486. *Jur. nat.*); utraque tamen ipso jure naturali limitata est (§. 470. *l. c.*), eo ipso nimirum, quod jure naturali limitatur potestas, potentia quoque restringitur non nisi ad certos usus, consequenter & ipsa limitatur. Quoniam vero limitatio civilis haud repugnare debet naturali: imperans sane, qui muneri suo satisfacit, potestate & potentia absoluta eodem modo utitur, ac si limitata esset, & limitata eodem, ac si illimitata esset. Quamobrem prudens, etsi despo-

ticum sit imperium (§. 473. *Jur. nat.*): ipsemet tamen sibi leges fundamentales figit, ad quas actiones suas attemperat.

§. 289.

Quæ de rep. ex monarchia & aristocratia vel politia mixta diximus: eadem sine multo negotio mutatis mutandis ad eam applicantur, quæ miscetur ex aristocratia & politia.

§. 290.

Cum potestas sit facultas ferendi leges, & obligandi subditos, atque disponendi de salute & tranquillitate publica (§. 469. *Jur. nat.*): eandem esse in rep. omni potestatem patet.

§. 291.

Enimvero quoniam ad potentiam referuntur pecuniæ, milites, jus constituendi magistratus & judices ac conferendi munera publica & dignitates civiles (§. 483. *Jur. nat.*): potentia in diversis rebusp. admodum est diversa; & eo major censetur resp. quo potentior.

§. 292.

Potens vero est resp. quæ civibus atque divitiis abundat (§. 482. *Jur. nat.*).

§. 293.

Potens adeo redditur resp. si numerus civium atque opes augmentur (§. 292.).

§. 294.

Lædunt subditi majestatem, si contra imperantis potestatem atque potentiam quidquam moliuntur (§. 487. *Jur. nat.*). Obligandi igitur

sunt subditi, ne id criminis committant, non modo poenis (§. 490. l. c.), verum etiam *homagio*, hoc est, juramento, quod præstant imperanti ad imperium evecto. Unde denuo patet religionis non modo naturalis, verum etiam præcipue christianæ necessitas, eadem qua supra (§. 281.) evidentiâ.

§. 295.

Ut majestatem non coacte, sed sponte reverantur cives, propter multitudinem, ex ratione de eadem statuere nescientem, opus est splendore externo, qui omnium oculos animosque perstringat; quem in finem sumtus necessarij determinandi, sed sine potentia detrimento (§. 291.).

CAP. II.

DE REGIMINE IN GENERE.

§. 296.

Bene regnat, qui potestate & potentia summa non utitur nisi ad promovendam salutem & tranquillitatem publicam (§. 492. *Jur. nat.*). Ex civium itaque felicitate voluptatem percipiat constantem (§. 140. *Psych.* & §. 71. *Pb. pr. un.*), consequenter cives impense amet necesse est (§. 115. *Psych.*).

§. 297.

Ut in amorem civium sit pronus, veram potentia & autoritatis penes externos notionem medietur (§. 291. 292.).

§. 298.

§. 298.

Hoc ipso stimulo veluti sponte sua omnibus satisfaciet, quæ de boni regiminis legibus inculcavimus (§. 493. & sqq. *Jur. nat.*), modo satis intelligat: id quod hic supponitur.

CAP. III.

DE JUSTITIÆ ADMINISTRATIONE.

§. 299.

Judices constituit imperans, quorum est de controversiis civilibus sententiam ferre, latamque exequi (§. 497. 498. *Jur. nat.*). Judices ergo inferiores remittendi sunt ad superiores, & superiores ad summum quoddam tribunal, quod *tribunal appellationum* dici suevit, ita ut judici superiori, qui de causis gravioribus jus dicit, examinare & reformare liceat sententiam ab inferiori latam, si pars alterutra litigantium in ea acquiescere nolit, & idem jus competat tribunali summo in judicem superiorem.

§. 300.

Ista provocatio ab judice inferiori ad superiorem ob latam ab isto sententiam *appellatio* nuncupatur.

§. 301.

Ne autem temere quis appellare possit, non modo juramento confirmare debet, sibi firmiter eam animo sedere opinionem, quod sententia lata sit adversus causam bonam, quam tueatur, verum etiam multa constituenda temere appellantibus a judice superiori executioni demandanda, facta causæ cognitione.

§. 302.

Appellationum is quoque est usus, ne iudex inferior in ferendis sententiis nimium affectui tribuat.

§. 303.

Unde etiam litigantibus in foro non deneganda est facultas deferendi querelas ad iudicem superiorem ob denegatam iustitiam, ad præcavendum abusum multa temeritatem coercendo.

§. 304.

Ne in irrogandis pœnis & inquirendis delictis desint officio suo magistratus, quibus id curæ demandatum est (§. 496. *Jur. nat.*); tribunal quoddam *summum criminale* constituendum, ad quod mittenda sunt acta inquisitionis, ita ut sententia lata executioni demandari nequeat, nisi ab eodem summi imperantis nomine confirmata.

§. 305.

Atque hoc ipso iudices inferiores obligantur, ne in inquirendis delictis ac irrogandis pœnis desint officio suo (§. 18. *Pb. pr. un.*).

§. 306.

Sententia cum in causis civilibus, tum in criminalibus secundum leges civiles ferenda (§. 496. *Jur. nat.*), aut iis deficientibus juxta legem naturalem civilium normam (§. 403. *l. c.*). Omnis ergo sententia in causis civilibus hoc syllogismo practico continetur:

Si tale fuerit factum, hæc ferri debet sententia.

At-

Atqui factum est tale.

Ergo hæc ferenda sententia.

Major est lex: minor factum per acta probatum.
E.gr. Si Titius accusetur ob rationes tutelares non redditas, hinc locum habet syllogismus:

Tutor debet rationes reddere administratorum bonorum pupilli (§. 253.).

Atqui Titius est tutor.

Ergo debet reddere rationes, &c.

§. 307.

Apparet adeo, ne inutiles in causis civilibus decidendis nestantur moræ (§. 505. *Jur. nat.*), opera danda est, ne causæ cognitioni multum temporis sit impendendum. Et hæc sane est ratio, cur lites in foro mercatorum atque judæorum statim finiantur & cur causis levioris momenti in judiciis inferioribus parum temporis impendatur,

§. 308.

Eodem, quo ante (§. 306.), modo patet, in causis criminalibus sententiam omnem niti hoc syllogismo practico:

Qui hoc delictum commisit, hac afficiendus est pæna.

Atqui Titius hoc delictum commisit.

Ergo hac pæna afficiendus.

Major itidem lex est: minor vero factum per acta probatum, sive a delinquente confessum, postquam fuit convictus.

§. 309.

In processu adeo criminali danda potissimum

est opera, ut reus criminis, cujus postulatur, convincatur & ad propriam confessionem adigatur, ne poena videatur statui in innocentem.

§. 310.

Delictum a iudice in aprium producitur per testes juratos, ne de veritate testimonii dubitari possit (§. 67. *Log.* & 200. *Jur. nat.*).

§. 311.

Quodsi neget pertinaciter reus, quæ consensu testium juratorum confirmantur; *confrontationi* locus est, testibus præsentem reo testimonium deponentibus & ejus assensum urgentibus.

§. 312.

Si ad quæstiones partim ex narratione rei, partim ex testimoniis depositis formatas dubie responderit reus, aut prorsus sibi contradicat, nec monitus ad veritatis confessionem permoveri possit; quin *tortura* dignus sit, non dubitabit, qui necessitatem in poenis exequendis propriæ rei confessionis perpendit.

§. 313.

Non obstat, torture metu etiam innocentem ad delicti confessionem simulatam adigi: nam innocentis quoque poena plecti potest, si testimonio testium unice fidamus. Rarior autem cum sit casus, ubi tortura fallax est remedium veritatis detegendæ, nisi temere ad eam progrediaris (§. 312.); hæc ratio sufficiens non est, ut isto medio abstinenceatur.

§. 314.

Liquet autem non nisi in causis capitalibus locum esse torturæ: in aliis levioribus sufficere *juramentum purgatorium*, quod *torturam spirituales* vocant, & quo quis jurat, se id criminis, cujus postulatur, non commisisse.

§. 315.

Si reus fuga sibi consulit, antequam in carcerem conjiciatur, ex eodem responsurus; omnem movere lapidem tenetur iudex, ut comprehendatur & carceri committatur.

§. 316.

Requirendi igitur sunt aliorum locorum iudices, ut ubi ibidem comparuerit, eundem comprehensum tamdiu in carcere detineant, donec inde in locum delicti reducatur, sumtibus, qui impenduntur, refusus.

§. 317.

Quodsi per literas significaverit, antequam comprehensus fuerit, esse sibi animum sese in iudicio sistendi & iudicatum solvendi, modo a squalore carceris immunis esse queat; dubio caret, quod saluum conductum eidem impertiri iudici liceat.

§. 318.

Ne tamen iudicium eludatur, cautio præstanda vel pecunia parata in iudicio deposita, vel per hypothecam aut fideiussorem, tum quod in iudicio citatus comparere, tum pœnæ decretæ sese submittere velit (§. 317.).

§. 319.

§. 319.

Quoniam vero fuga, qua sibi jam ante consulere nitebatur, satis probat, quod eandem repetiturus sit, si vel tortura vel poena capitalis aut corporis minimum afflictiva adversus eum decernatur; in hoc casu expirare saluum conductum evidens est, consequenter eo minime obstante in vincula conjiciendus reus, antequam tale quid suspicari possit.

§. 320.

Quæ de juramenti usu in foro diximus (§ 280.) religionis præsertim christianæ necessitatem denuo eodem, quo supra (§. 280. 214.) modo probant.

CAP. IV.

DE SALUTE SUBDITORUM LIBI-
VIS LOCORUM PROMOVENDA.

§. 321.

UT bene regnet imperans, salutem & tranquillitatem publicam pro virili promoveat (§. 401. *Jur. nat.*). Enimvero cum fieri nequeat, ut ob tantum rerum gerendarum numerum, de quibus in sectione præcedente diximus, omnibus exequendis unus sufficiat, illam curam demandare debet aliis, concessa potestate & potentia ad id necessaria. Hinc origo *magistratum oppidanorum & paganorum.*

§. 322.

Etsi autem horum magistratum non sit nisi
exc-

exequi a summo imperante iussa (§. 321.), adeoque absoluta potestate minime gaudeant, nec propria autoritate imperent; causæ tamen levioris momenti, præsertim si plurimæ summo imperanti fuerint provinciæ, ipsorum libertati relinquendæ, veluti interdictio ciborum certa anni tempestate nocuorum, aut quæ subitam postulant decisionem.

§. 323.

In causis tamen majoris momenti quæ videntur commoda, ad summum imperantem deferant, antequam imperari possint.

§. 324.

Enimvero si ob numerum provinciarum & in illarum numero quoque occurrant quæ molem rerum gerendarum nimis aggravant, magistratui tamen inferiori non commode permittuntur; creandi sunt magistratus superiores, quorum requirendus est consensus, antequam executioni demandentur, quæ salus & tranquillitas civitatis vel pagi postulare videtur. Istiusmodi magistratus sunt *Provinciarum Præfecti*, itemque *Vice - Reges*.

§. 325.

Summi imperii est munera publica conferre & dignitates civiles (§. 483. *Jur. nat.*). Si quæ tamen levioris fuerint commatis, eorum collatio committitur arbitrio magistratus inferioris: quod tamen nullum est, si imperanti summo libuerit, cui conferre, quod vacat munus.

§. 326.

§. 326.

Facile autem patet, magistratus oppidani & pagani hanc esse legem supremam: *Fac ea, quæ salutem & tranquillitatem urbis vel pagi promoveant, omitte iisdem contraria* (§. 405. *Jur. nat.*).

§. 327.

Nec absimili modo liquet, præfectui provinciae sacram esse hanc legem, actionum normam: *Fac ea, quæ salutem & tranquillitatem provinciae promoveant, omitte iisdem contraria.*

§. 328.

Magistratui autem inferiori cum perspectæ sint qualitates personarum loci sui, ut de habilitate earundem optime judicare possint; ipsis quoque concedendum jus denominandi, quando munus quoddam majoris momenti vacat.

§. 329.

Variis autem modis caveri potest, ne jure denominationi abutantur, immo nec abusum impune ferendum statuimus.

CAP. V.

DE OPIBUS CIVIUM CONSERVANDIS AUGENDISQUE.

§. 330.

Cum pecunia sit rerum gerendarum nervus, nec postremam potentiae partem absolvat (§. 483. *Jur. nat.*), immo ut resp. potens reddatur, opes augendæ sint (§. 293.); ideo boni regiminis numeros quoque explet cura de
opi.

opibus civium conservandis & amplificandis (§. 491. *Jur. nat.*).

§. 331.

Opum conservandarum gratia summus imperans caveat, ne ex suis regionibus in exteras deferatur pecunia (§. 511. *Jur. nat.*). Quamobrem ab adportandis mercibus peregrinis, quæ parata pecunia ab exteris emendæ, abstinendum, si iisdem vel prorsus carere vel in eorum locum alias substituere possimus.

§. 332.

Cautione tamen hic, ut in omnibus negotiis politicis, opus est, nimirum ne mercium peregrinarum asportatio prohibeatur, si exteri perinde prohibere possint, ne merces ex nostris regionibus ad ipsos asportentur, præsertim ubi id cum præsentè damno fieri potest.

§. 333.

Probe quoque considerandum, num merces peregrinæ in nostras oras delatæ in alias peregrinas ex nostris iterum deportentur, lucro nobis relicto.

§. 334.

Immo nec hoc negligendum, num merces peregrinæ alliciant emtores earum, quæ nostra suppeditat regio, ut majus hinc sperandum sit lucrum, quam ex illarum asportatione metuatur damnum.

§. 335.

Eadem de causa non ubivis locorum consultum est, ut bonis naturalibus ipsimet utamur ad conficiendas merces.

§. 336.

§. 336.

Unde tandem intelligitur, quanti negotii sit, circa commercia statuere, quæ reip. conducunt, ut vel hoc nomine consultius judicetur omnem eorundem curam arbitrio mercatorum relinquere, certe non nisi consilio eorundem de commerciis statuere, in quo tamen expendendo cautione multa opus est, ne ex privata utilitate profectum de publica interpreteris.

§. 337.

Ne in exteras regiones deferatur pecunia (§. 511. *Jur. nat.*), promiscue quoque concedenda non sunt itinera in regiones peregrinas juvenibus ditioribus vel studiorum, vel illarum visendarum gratia.

§. 338.

In priori casu circumspectio adhibenda est, ne studiis obicem ponentes plus damni inferamus reip. quam ex tenui lucro obtento sperari potest utilitas.

§. 339.

Ne propter victum pecunia exportanda, agriculturæ, horticulturæ, rei pecuariæ &c. perficiendæ studendum: quod politico amplissimum consiliorum campum pandit, ubi ad singularia descendere voluerit.

§. 340.

Inprimis autem mature exequenda consilia de granariis publicis (§. 257.); ut annona flagelletur: quo in casu plurimum nummorum in alias excurrunt regiones.

§. 341.

§. 341.

Enimvero cum divitiis reip. nihil magis inimicum sit bello; ideoque nulla ipsi salus esse dicatur: ab eo quoque abstinendum, quamdiu non summa urserit necessitas, cum absque eo salus publica conservari nequeat.

§. 342.

Eadem de causa concedendum non est, ut cives divites sedem suam figant in alia regione.

§. 343.

Immo si agyrtæ, circulatores, histriones, aleatores & alii ejusdem furfuris plures secum auferant nummos, quam quos nostra in regione consumunt: tolerandi iidem non sunt, etsi ceteroquin accessus negandus non foret (§. 267. 259.).

§. 344.

Opum augendarum gratia (§. 483. *Jur. nat.*) cura rei metallicæ habenda est, ubi adfuerint metallifodinæ, præsertim ubi divites fuerint proventus, nec ad metallicorum operas & victum curandum majores sumptus faciendi sint, quam fructus ex metallifodinis regioni superest.

§. 345.

Eadem de causa alliciendi ad nos sunt exteri bono regimine, quod nulli inprimis oneri esse celebratur.

§. 346.

Alliciendi quoque sunt, qui iter faciunt per nostras regiones & in eas studiorum vel animi gratia excurrunt. ^{posteriores} Priorem in finem caveatur, ne peregrini nummis emungantur in diversoriis, commoditate licet ipsorum neglecta: & ne victigal sit oneri, præsertim si via patet alia. Posterioris finis ergo academiis & gymnasiis doctores eruditionis fama docendique dono præstantes præficiendi, & studiorum commoditati velificandum, urbes ædificiis affabre constructis exornandæ, iisque satisfaciendum, quæ circa vitæ jucunditatem (§. 267. & sqq.) atque aulæ splendorem (§. 295.) præcepimus.

§. 347.

Non autem si ab argenti & aurifodinis discesseris, datur aliud medium augendarum divitiarum utilius commerciis, quorum ideo tanto magis habenda est ratio, ut consiliis parum maturis obicem ponas (§. 336.).

§. 348.

Commercia ut invalescant, imperantem cu-

ra decet, ut bona naturalia abunde proveniant, merces levi sumtu inde præparentur, & magno numero in alias regiones exportentur: quod ut fiat, cavendum, ne nimium vetigal efficiat earum pretium immodicum.

§. 349.

Imperanti quoque id agendum, ut pecunia conveniente ratione inter incolas distribuat, ne unus abundet opibus cum ceterorum damno (§. 512. *Jur. nat.*). Ut igitur hujus curæ tenaces sint, neque eam tanquam levioris vel nullius momenti abjiciant: perpendendum est, quod sic onera civibus futura sint parum molesta, consequenter e medio tollantur querelæ de eorum gravitate, statui publico inimicæ.

§. 350.

Ne nummi ab avaris vel hominibus diioribus arcæ vinculis detineantur, prospiciendum est de credendarum securitate: quorsum facit ærarium superius commendatum (§. 249.).

§. 351.

Divitibus eum in finem convenit lautius ac splendidius vivendi genus, cujus rationes alias in medium attulimus supra (§. 217.).

§. 352.

Immo huc quoque confert splendor aulae, modo caveatur, ne exteri potius quam indigenae lucrum inde percipiant.

§. 353.

Utramque etiam paginam hic faciunt oeconomiae ^{re}moralis perfectio, & mercium praeparatio.

§. 354.

Ea denique fini liberum esto unicuique; ut ad arbitrium merces conficiat, unde lucrum expectet: etsi enim minus necessariae aliunde asportari minime debeant; alia tamen longe est ratio, cum ab indigenis praeparentur.

CAP. VI.

DE CONSILIARIIS.

§. 355.

Quodsi quis singula ad animum revocet, tum quae de cura imperantis salutis publicae ac tranquillitatis ergo eidem incumbente, in jure naturali politico; tum quae de eadem in politica haecenus praecipimus: non dubito fore, ut gravissimam rerum gerendarum molem, quae imperantis humeros premit,

mit, percipiens eam humeros unius hominis longe superare pronunciet.

§. 356.

Equidem non desunt, qui affirmant, parva sapientia regi mundum, propterea quod non adeo arduam subinde experiantur illorum sapientiam ceterasque virtutes intellectuales, qui ad clavum reip. sedent. Enimvero non una est ratio, cur hoc iudicium præcipitur. Qui enim sic sentiunt, nullam habent rationem experientiæ plurimum in negotiis gerendis valentis; minime perpendunt, quod in negotia gerenda quoque influant multi viri eruditione, scientia, sapientia, prudentia præstantes, qui publicis provinciæ muneribus præfecti; multo minus cogitant sapientiam, scientiam & experientiam illorum, quibus ab antiquissimis temporibus debentur constitutiones politicæ ad nos propagatæ. Tacemus alia, quæ una expendi merebantur.

§. 357.

Summus imperans solus non sufficiens omnibus ad trutinam examinandis, quæ salutis & tranquillitatis publicæ gratia decernenda sunt; ideo opus habet aliorum in rebus decernendis consilio, consequenter *consiliarios* creare debet.

§. 358.

Enimvero quoniam rerum gerendarum varietas tanta est, ut nec unus singulis expendendis sufficiat; ideo plures sunt constituendæ consiliariorum classes.

§. 359.

Ipsa autem ratio, cur consilarii adhibendi sint (§. 514. *Jur. nat.*) suadet, in eorum numerum admittendos non esse, nisi rebus gerendis pares, sapientia, prudentia, scientia huc requisita instructi, ut quid conducatur reip. judicare valeant, tum etiam ea virtute ornati, ut animi sui sententiam libere exponant, nec utilitatis privatae gratia fucum faciunt.

§. 360.

Eligendi consequenter non sunt nisi probatae virtutis.

§. 361.

Consiliariorum cum sit, cognita atque perspecta ad facta applicare, ab iis non requisiveris, ut inventores agant, praesertim cum nec tempus istiusmodi meditationibus suppetat.

§. 362.

Quoniam tamen in administranda rep. occurrere solent non quotidiana, quibus decidendis parum sufficiunt principia hactenus

nota, & quorum nobis exempla non succurrunt, quæ imitemur; ideo philosophus suator est, ut peculiare collegium constituatur constans ex viris dono meditando & arte inveniendi præstantibus, cui committenda est inquisitio eorum, quæ ex usu reip. esse possunt.

§. 363.

Quæ igitur hi meditationibus suis fuere assecuti, ea consiliariis exponant, ut facta deliberatione, consilia sua summo imperanti imperari valeant.

§. 364.

Olim apud *Sinas* hoc officium erat philosophorum eminentium, quos tanquam oraculum consulebant in casibus dubiis imperatores.

CAP. VII.

DE ONERIBUS PUBLICIS.

§. 365.

Summo imperanti competit jus imponendi civibus onera, ne desint sumtus ad executionem operis cujuscunque necessarii (§. 473. *Jur.nat.*) & ad splendorem majestatis tuendum (§. 295. 346.). Quamobrem si qui fuerint,

rint, qui moras neſtunt, iſti vi compellendi ſunt, ut, quod debent, ſolvant.

§. 366.

Operam autem dare debet imperans, ne onera premant ſubditos, ut tandem iſſis deficient ſumtus ad operas ſuas neceſſarii, vel ad vitæ neceſſitates tolerandas requiſiti.

§. 367.

Secus ſi fecerit, & juſtis locus erit querelis, quarum rumor ad exteros manans autoritatem minuit imperantis, & iſſi tandem cives ad paupertatem rediguntur.

§. 368.

Varii hætenus excogitati ſunt onerum imponendorum modi; ſed quinam ceteris præſtet, majorem deliberationem poſtulat, quam fert præſens inſtitutum.

§. 369.

Enimvero hand parum facit ad ſublevandam onerum molem, ſi redditus ad ſplendorem aulae conſervandum requiſiti diſtinguantur a ceteris publico uſui deſtinatis, nec æraria diverſa confundantur (§. 235.).

CAP. VIII.

DE TUENDA REPUBLICA ADVERSUS INSULTUS HOSTILES.

§. 370.

Cum bellum avertere deceat imperantem, quantum datur (§. 341. *Polit.* & §. 524. *Jur. nat.*); pacis amantissimus sit.

§. 371.

Quodsi mediis lenioribus frustra tentatis (§. 325. *Jur. nat.*) ad arma tandem deveniendum; subditorum est, promte conferre summus belli necessarios: qui etsi majores fuerint, de principe tamen cur conquerantur, non habent.

§. 372.

Ne bellum reip. nimis sit onerosum, tempestive *fœdera* percutienda cum aliis, quæ non sunt nisi pacta de conjungendis viribus adversus hostem alterutrius partis (§. 530. *Jur. nat.*).

§. 373.

Confœderatorum potentia cum sic cum nostra coalescat; magis quoque nos metuit hostis, quam si nobis soli relinqueremur.

§. 374.

Quemadmodum vero pacta legitima omnia (§. 138. *Jur. nat.*), ita quoque fœdera sanctissime sunt servanda. Accedit ratio politica, ne alio tempore parvi æstimetur fides, ubi confœderandos quærimus.

§. 375.

Felix cum sit respublica quæ pacis tempore de bello cogitat, nonmodo miles perpetuus alendus, fortalitia condenda & reparanda, quoties opus fuerit, armamentaria armis instruenda, verum etiam pecuniæ quædam in casum necessitatis conservandæ.

§. 376.

Eodem medio obtinebis, ne ipsum belli principium gravet subditos.

§. 377.

Immo hostem prævenire licebit, quod melius est quam præveniri, dudum experientia diuturna confirmatum.

§. 378.

Ut animi civium erigantur & tedium ex oneribus gravioribus belli causa impositis subortum in lætitiâ abeat; publicis lætitiæ signis opus est, quotiescunque victoria in hostes

ites fuerit obtenta. Rationibus politicis contenti theologicas theologis exponendas relin-
quimus.

§. 379.

Quando belli mole pressi fuere cives, æquum est, ut pacis restitutæ quoque fructus percipiant. Imperantis adeo est omnem movere lapidem, ut, quantum fieri possit, onera minuantur, immunitatibus quibusdam concessis.

§. 380.

Ea quoque fini tanto majori studio in id enitendum, ut pace restituta floreat respublica.

FINIS POLITICÆ.



Conspectus generalis Tomi posterioris.

1. Institutiones philosophiæ practicae universalis.	p. 3.
2. Inst. Juris naturalis ethici.	49
3. Inst. Juris naturalis politici.	111
4. Inst. philosophiæ moralis seu Ethica.	181
5. Inst. philosophiæ civilis partis æconomicae.	370
6. Inst. philosophiæ civilis partis politicae.	393



Index Verborum ac Rerum utrius- que Tomi.

Numerus prior denotat Tomum,
posterior paginam.

A.	A.
A <i>Abstrahere</i> quid sit I. 132	consistit II. 53. vide infra Deus
<i>Academia</i> num erigendæ II. 397. in iis quid curandum II. 398. Doctores quinam eis præficiendi ibid.	<i>Actio</i> I. 61. quæ moraliter bona, mala II. 13. earum effectus cur in poenarum & præmiorum numero habendus II. 15
<i>Academiae scientiarum</i> cur condendæ II. 403. earum quid officii II. 403. sqq. libertas sentiendi iis concedenda II. 404. earum præsidis quæ requiratur qualitas, cura II. 404	<i>Actiones</i> hominum quotuplices II. 4. sqq. bonæ cur per se appetibiles, malæ cur averfæbiles II. 5. gaudent rationibus suis finalibus II. 6
<i>Academiae artium</i> cur condendæ II. 405. subesse debent academiis scientiarum ibid.	<i>Actus</i> I. 42
<i>Accidens</i> I. 62	<i>Acumen intellectus</i> ejus definitio I. 131. II. 207. cur inter virtutes intellectuales numerandum II. 208. quomodo acquiri possit II. 208 seq. utilitas exinde resultans insignis II. 210
<i>Acquiescentia</i> quid sit I. 147. quomodo pellenda II. 196	<i>Adjunctum</i> I 67
<i>Acquiescentia</i> in voluntate numinis in quo (P. II, Tbüm. Inst. Pb. Pr.)	Gg Ad.

Index verborum ac rerum

- Admiratio* est ignorantiae filia II. 221
- Adperceptio* quid? I. 119 unde derivetur I. 161. plures actus involvit I. 161
- Adulterium* est iusta matrimonii dissolvendi causa II. 118
- Aelipila* quid sit I. 281. quibusnam inserviat observationibus I. 282. seq.
- Aequalitas, aequale* I. 48
- Aequilibrium* solidorum demonstratur ope staterae I. 366. quodnam ei insituto inserviat experimentum I. 367
- Aer* ejus gravitas demonstratur I. 26. 27. non tam facile dividitur ac fluida I. 255. nisu gaudet se dilatandi I. 258. 259. est gravis I. 260. seqq. potest Comprimi I. 262. calore rarefit, frigore condensatur I. 263. varios edit effectus I. 264-272. universae terrae circumfunditur I. 429. poros corporum replet I. 429 non extenditur usque ad lunam I. 431. vaporosus quid causatur I. 431. seq.
- Aerarium publicum* in re- publ. constituendum II. 425
- Aëstus maris* vid. Fluxus ac refluxus.
- Aether* I. 409
- Affectus* quid? I. 145. quando vehementior I. 149. quid ferant damni ibid. cum appetitu rationali consentiunt, dissentiant II. 58. cur & quomodo compescendi II. 188. 191. quomodo præsens coercendus II. 188. quomodo sedandi II. 190. Affectu correptis quid observandum ibid. in iis corrigendis quæ cura impendenda II. 190. 201. seq. praxis eos domandi quo redit II. 192
- Agnitio Dei* vid. Deus.
- Agyptæ* num in republica sint tolerandi II. 449
- Aleatores* an tolerandi in republica II. 449
- Alumen* I. 447
- Ambitio.* Ejus definitio II. 295. quomodo corrigenda II. 297. seqq. oriri potest ex fastu II. 307. remedium adversus eam II. 355
- Amicitia* quid sit II. 327. quæ

quatenus vitio, virtuti
ducenda ibid. quando
evanescit ll. 328. num
eam conservare flet
penes nos ll. 328. in ea
confirmanda quibus
cautelis opus ibid. qua-
re colenda ll. 329

Amicus quis eo nomine
insigniendus ll. 69

Amor. Ejus definitio I.
146. quomodo suffo-
catur ll. 193

Amor Dei vid. Deus.

Amor universalis an o-
mnium hominum de-
beat esse virtus ll. 317.
ad eum promovend-
um quæ requirantur
ll. 318. seqq. ei quid
obstet ll. 319. remedia
quæ profint ll. 320. seqq.

Analogon rationis I. 208

Anima existit I. 118. qua-
lis ei competat pote-
stas circa sensationes I.
122. quam in appe-
tendo & averfando
observeat regulam I.
151. non agit necessa-
rio I. 153. se ipsam
determinat. I. 153.
intelligit actionem ad
quam se determinat I.
154. ad agendum di-
citur per naturam in-

differentia I. 154. spon-
taneitate gaudet & li-
bertate I. 155 num ha-
bet commercium cum
corpore I. 156. 157. seq.
cur ei tribuitur regi-
men corporis I. 159.
sui conscia I. 160. quid
sit I. 162. 166. ejus quo
tendit vis unica I. 163.
169. essentia I. 164.
perceptiones sentien-
tis quæ sint & a quibus
differant I. 165. anima
ac corpus substantiæ
prorsus diversæ I. 184.
est incorruptibilis I.
198. seq. creata ll. 199.
immortalis I. 200. seq.
spiritus I. 202

Animalcula spermatica
num dentur I 508. co-
rum quæ transforma-
tio I. 509

Animus abjectus in qui-
busnam se exerit ll.
307. quid pariat da-
mini ll. 307. seq.

Antlia pneumatica I. 255
ejus inventor I. 256.
descriptio ibid. & seq.
modus experimentan-
di I. 257. seq.

Appellatio non temere
instituenda ll. 439. ea-
rum usus ibid. 440

Index verborum ac rerum

- Appetitus sensitivus* quid? I. 144. quæ huc concurrant I. 145. oritur e vi animæ repræsentativa I. 178. seq.
- Appetitus rationalis* quid sit I. 150. 182. quæ ejus cum sensitivo mixtura I. 151. vehementia unde I. 152. 180
- Aqua*. Ejus fluiditas unde I. 296. proprietates I. 467. fluxus in fluviis I. 467. 470. num suis unde profluxit fontibus restituatur ex oceano I. 468. corpora gravia quomodo secum ducere potest I. 470. in vacuo saliens quas supeditet observationes I. 374. descendens cur conatus major I. 375. vi gravitatis quomodo comprimat corpora ibid. per aërem gravitatem movetur I. 376
- Araometron* I. 250. vulgare I. 252. constans I. 253
- Arbores*. Earum descriptio I. 485. inversa plantatio ibid. earum cortex ac medulla cujus indolis I. 486. quomodo fiant crassiores I. 492. cortice evulsa cur enecentur ibid.
- Aristocratia* II. 394. quæ ei connexa incommoda II. 396
- Arrogans* quis vocatur II. 304
- Arrogantia* quid sit II. 304. ei quomodo mendandum II. 306
- Ars*. Ejus definitio II. 242. acquiritur exercitio II. 243
- Ars characteristica* inter desiderata ponitur I. 133
- Ars inveniendi* I. 139. ideam ejus exhibet Arithmetica practica, pleniorẽ Algebra ib. unde pendet I. 177. habet locum in anima ibid.
- Ars mnemonica* I. 128
- Athei* num teneantur obligatione naturali II. 8. illorum quæ sententia II. 16. non tolerandi in republica II. 414
- Atheismus* reipublicæ nocivus II. 415
- Attentio* potest intendi I. 129. impediri I. 130
- Atramentum sympatheticum* I. 321. ejus præparatio ibid. seq.
- Attributa* I. 44
- Ava*

- Avaritia* quid sit ll. 277. ejus causæ ll. 285. seq. quodnam adversus eam præsidium ll. 284. quomodo corrigenda ll. 286. sorditiem nonnunquam habet sociam ll. 289. contra eam quod remedium ll. 355
- Avarus* quis ll. 277. 292. unde talis ll. 283. ejus proprium ibid. sui quomodo erroris convincendus ll. 284
- Aversatio sensitiva* l. 144. ejus quæ differentia l. 145. nascitur ex vi animæ repræsentativa universi l. 179. earum vehementia unde l. 180
- Aversatio rationalis* l. 150. quid sit l. 152
- Aves* in vacuo quomodo se gerant l. 363
- Audacia* quid? ll. 315. quomodo coercenda ll. 316
- Auditus* omnium post visum sensus quare perfectissimus l. 172
- Aurora borealis* quid sit l. 463. ejus causa l. 464. seq.
- Aurum* cur omnium metallorum gravissimum l. 251
- Autochiria* cur illicita ll. 59
- Autoritatis* præjudicium unde l. 30
- Axioma* l. 14
- B.
- Barometrum* s. *Baroscopium* l. 273. ejus inventor l. 273. compositum l. 274. usus l. 275
- Beatitudo* ll. 20. philosophicæ definitio ll. 22. quomodo ad eam perveniendum ll. 30. 31. seq. vid. Bonum summum.
- Bellum* quid sit ll. 174. num licitum ibid. offensivum, defensivum ll. 174. 175. utrumque quando licet, quando non ll. 175. ab eo in quo casu abstinendum ll. 175. 449. quomodo evitandum ll. 176. quæ ligent in bello quæ minus ibid. in fini-endo quid curandum ll. 177
- Beneficentia* quid sit ll. 294. unde oriatur ibid.
- Bona* eorum communio cur impossibilis ll. 87
- Bonitas moralis* ll. 13
- Bonum* l. 144. verum ll. 24. apparens ibid. eorum

Index verborum ac rerum

rum fucus quomodo
detegendus ll. 187

Bonum summum, quid sit
ll. 22. quomodo possit
obtineri, amitti ll. 22.
30. seq. consequens ll.
23

Brutum cum eorum cor-
poribus unitæ sunt a-
nimæ I. 206. sibi sunt
conscia I. 207. ratio-
ne carent ibid. imagi-
natio, memoria, sen-
sus iis tribuuntur ibid.
gaudent appetitu sen-
sitivo & aversatione
sensitiva ibid. destitu-
untur libera volunta-
te I. 208

C.

Calor per vacuum move-
tur I. 291. calorifica
materia quid I. 291.
in corporum poros
penetrans fluida ac so-
lida rarefacit I. 292.
seq. major, minor pro
diversitate corporum
I. 293. excitatur ma-
teriis frigidis inter se
connexis I. 293. quo-
modo producitur I.
294

Calumnia ll. 301. optima
adversus eam quæ de-
fensio ll. 303

Camera obscura I. 306. cur
ibi imagines in majori
distantia minus distin-
cta evadunt & tandem
evanescent I. 325

Cancro in vacuo diu vi-
vunt I. 364

Castitas quid ll. 272. ejus
studiosus quomodo se-
gerit ll. 288. quid inde
resultat utilitatis ibid.
ejus quodnam signum
ll. 291

Causa I. 63. efficiens, so-
litaria, sociæ ib. prin-
cipalis, instrumentalis
I. 64. impulsiva I. 65

Causæ civiles earum co-
gnitio cur acceleranda
ll. 441. sententia in iis
secundum quam nor-
mam ferenda ll. 441

Causæ criminales, secun-
dum quam normam
decidendæ ll. 441. ea-
rum processus quo-
modo instituendus ll.
442

Cautio cur præstanda in
judiciis ll. 443

Ceremonia quinam illa-
rum fons ll. 34. quid
sint ibid.

Chylus animalium ho-
minumque quomodo
separatur & in sangui-
nem

- nem vertitur I. 497.
498
- Chirurgi** in republ. sunt
alendi ll. 428
- Cibus** quomodo dissecatur I. 491. mastica-
tur I. 496. deglutitur,
digeritur ibid. eorum
quæ ratio habenda ll.
60. ejus quantitas ll.
252. qualitas quomo-
do dijudicanda ll. 253.
quis sanus ibid.
- Circulatio sanguinis** I.
497. a quonam dete-
cta I. 498
- Circulatores** num in re-
publica tolerandi ll.
449
- Cives** eorum opes quo-
modo conservandæ &
amplificandæ ll. 447.
divites ne in alia regi-
one sedem figant ca-
vendum ll. 449.
- Claritas** unde pendet I.
119
- Cogitatio** quid involvat I.
119
- Cogitare** quando dicimur
I. 118. cogitandi mo-
dus communis non
differt a demonstrati-
onibus geometrarum
I. 138
- Cognitio** vera, falsa I. 28.
29. intuitiva, symboli-
ca I. 133. symbolicæ
usus I. 134. ab univer-
sali cur ad immateria-
litatem animæ con-
cludatur I. 173. quo-
modo fit voluntatis
motivum ll. 33. viva,
mortua ibid. distincta
cur magis magisque
redigenda in nostram
potestatem ll. 57. quæ
reliquis præferenda
ibid. num majorem si-
bi comparandi occasio
negligenda ll. 204. seq.
- Cognoscendi modus** quo-
tuplex I. 141
- Coitus** juri naturali quis
conveniens, inconve-
niens ll. 116. libidinosi
damnantur ibid.
- Color** unde I. 315. sunt
varii I. 316. non pro-
deunt ex luminis cum
umbra commixtione I.
317. prismatici cur im-
mutabiles ib. non in-
sunt subjecto I. 319.
seq. qui ortum debent
acido ab eodem non
immutantur sed qui
eundem ad alcali refe-
runt I. 321. possunt
mutari pro mutatione
luminis I. 322. compo-
situs prodit a simpli-
cibus

Index verborum ac rerum.

- cibus qui miscentur
prorsus diversus ibid.
- Comædiæ* an prosint & in
eas habendas sumtus
impendendi ll. 407
- Commercium*. Eorum cu-
ra quibusnam relin-
quenda l. 448, quomo-
do sint promovenda ll.
450, eorum impedi-
menta quomodo re-
movenda ll. 323
- Cometæ* num sint in at-
mosphæra l. 418. an
proprium habeant lu-
men l. 419. quid sint l.
420. cur non sæpius
apparent ibid. num
portendant aliquid l.
421. eorum cauda l.
420. effectus l. 421
- Compositum* l. 53. potest
esse majus, minus l. 55.
habet figuram l. 56.
quid ejus essentiam ab-
solvat l. 57. interrup-
ptum continuum l. 55.
divisibile l. 56
- Conceptio*. Ejus modus l.
507
- Concionator* aulici penes
imperantem magna
auctoritas ll. 435
- Condonatio* ut ad eam fa-
ciles simus quid opus
ll. 324
- Conductor* quæ ejus offi-
cia ll. 102
- Confrontatio* quando ei
locus ll. 442
- Conjux* eorum officia ll.
371. seq. 119. seq. inde
resultans felicitas ll.
373. seq.
- Conclusio* l. 17
- Connexa inter se* quæ di-
cantur l. 73
- Conservatio* l. 232
- Consiliarius* num iis opus
sit imperanti ll. 452.
seqq. eorum classes cur
constituendæ ll. 453.
quinam eorum nume-
ro aggregandi ll. 454.
eorum quid officii ib.
- Conscientia* quatenus tri-
buatur homini ll. 25.
seq. ejus scrupuli unde?
ib. eorum tollen-
dorum medium ll. 37.
quando dicitur excu-
sare, accusare ll. 27.
quid inde? ll. 28. ejus
morsus ll. 28. quando
sentiuntur ll. 37. re-
medium adversus eos
unde petendum ibid.
ejus somnus ll. 28.
quando dicitur evigila-
re ll. 29. tranquilla ib.
ejus custodia ll. 29. 26.
ad quid nos obligat ll.
29. re-

29. recta, certa, quomodo acquiratur ll. 36
Conscientia / *ius* quis appellandus ll. 27
Consuetudo agendi I. 153. pravæ cur difficulter immutandæ ll. 187. quomodo corrigendæ ll. 188

Contestationes quid sint ll. 79. num & quando iis utendum ibid.

Continentia quid? ll. 276. quomodo acquirenda ll. 288. ejus utilitas ibid. signum ll. 291

Contingens I. 46. est mutabile I. 47. num sit hypothetice necessarium ibid. quid supponat I. 26 non involvunt contradictionem I. 78

Contractus quid sint ll. 94. ab utraque parte cur explendi ib. quando non validi ibid. mutui, in iis quid observandum ll. 98. seq. contractus locationis ll. 101

Conventus publici num habendi ll. 363. in iis quomodo se gerendum ll. 363. seq. an negligendi ll. 406. sq.

Copula quid? ponitur vel

explicite vel implicite I. 12

Cor. Ejus palpitatio accedentes inde effectus quomodo observandi I. 363. systole, diastole I. 498

Corpus. quid sit I. 82. 85. eorum proprietates I. 83. seqq. 392. 393. seqq. 346. unde eorum differentia I. 393. seq. 387. seq. mathematicum, physicum I. 385. absolute durum I. 390. rarum I. 391. porousum ibid. totalia quæ sint I. 401. cur dicantur machinæ I. 75

Corpus mixtum I. 383. inter se differunt ib. habent interstitia illius qua constant materiæ vacua I. 384

Corpusculum mixtum I. 383

Corpus ejus neglectus dissuadetur ll. 265. 266. 271. ejus cura cur habenda ll. 265. 267. est medium longævitatis ll. 267. quæ nimia ll. 265

Cosmologia quid? I. 71. ejus utilitas ibid. præmittenda psychologiæ

Index verborum ac rerum

& Theologiæ naturalis I. 71. sequitur Ontologiam ibid.

Creatio quid? I. 231

Crepusculum matutinum, vespertinum unde I. 430

Crypsis I. 12

Crudelis quis vocetur II. 324

Cultus Dei quid II. 361. internus, ad eum quid pertinet ibid. externus, ad eum quid spectat II. 362. seq.

D.

Damnum nemini inferendum II. 72. num & quando resarciendum ibid. quæ ejus avertendi media ibid.

Decorum quid constituat II. 182

Defectus I. 51

Definitio quid sit I. 8. ejus requisita ibid. divisio in nominalem, realem I. 8. 9

Democratia I. 394

Demonstrandi habitus quomodo acquirendus II. 218. utilitas II. 219, 220

Demonstratio I. 21

Dens. Eorum differentia I. 395

Depositum quid salutetur II. 109. ejus num detur

usus ib. num & quando resarciendum ibid. ejus custodia utrum gratis præstanda nec ne II. 110

Desiderium I. 149. ne molestum fiat quid curæ? II. 200

Desperatio I. 148. quomodo arcenda II. 199

Deus existit I. 211-214. ejus attributa in genere I. 214. seq. est spiritus I. 216. præditus intellectu ac libera voluntate I. 216. 238. omniscius I. 217. caret sensu & imaginatione omniaque intuitive agnoscit ibid. gaudet intellectu puro I. 217. ejus immensitas I. 218. præscientia ibid. ejus intellectus est fons possibilitatis & intrinsecæ & extrinsecæ adeoque essentiarum I. 219. veritatis & perfectionis I. 221. est omnium inventor solus I. 220. summaratione præditus I. 221. sapientissimus I. 222. seq. Ejus voluntas fertur in optimum libertate haud violata I. 225. sqq. est

est fons actualitatis I.
227. non fertur in im-
possibilia I. 226. com-
petit ei potentia, o-
mnipotentia I. 226. in-
differentia exercitii
ibid. decretum I. 229.
seqq. non est causa
mali I. 235. quomodo
versatur circa malum
I. 233. seqq. est bonus,
infinitus I. 237. immu-
tabilis I. 237. 238. caret
appetitu sensitivo &
aversatione sensitiva,
consequenter affecti-
bus I. 239. est unicus ib.
justissimus, beatus I.
240. legis & obligati-
onis naturalis auctor
ll. 11. 12. quibus utitur
mediis pro impetran-
do scopo ll. 13. quate-
nus audiat legislator
ll. 14. & tueatur simul
parentis personam ll.
25. eius agnitio cur
magis magisque con-
firmanda ll. 341. unde
agnoscatur a priori ll.
341. a posteriori ll.
342. agnitio a poste-
riori num admittat
gradus ll. 343. est a-
mandus ll. 343. 346. a-
moris divini gradus
unde ll. 344. illius ex-

citandi medium ll.
345. motivum ll. 345.
criterion ll. 346. ejus
timor quid supponat
ibid. medium ll. 347.
impellit hominem ad
vitam honestam ll. 347
Deum timenti virtutis
studium facile ll. 348.
timoris medium ll.
350. criterion ll. 357.
in Deo fiduciam quis
collocare dicitur ll.
351. quomodo exci-
tanda ll. 351. 353. ejus
præstantia singularis
ll. 352. ejus individuus
comes est hilaris ac
tranquillus animus ll.
354. in ejus voluntate
quis acquiescat ll. 354.
seqq. hujus acquiescen-
tiæ quis fons ib. quan-
do cessat ll. 356. non
respuit media ll. 356.
seq. Dei invocatio quid
supponat ll. 357. ejus
fons ibid. an medium
pietatis ll. 359. quid
pariat commodi ll. 360

Deo vivere quis dicatur
ll. 49

Diabolus Cartesianus I.
271

Differentia specifica
quid? I. 7
Dili-

Index verborum ac rerum

- Diligentia** quid? ll. 309.
 ejus studioſo quid obſervandum ibid. poteſt eſſe nimia ibid. illa unde proficiſcitur ll. 311. quomodo ei medendum ibid.
- Diſcentium** numero quinam adſcribendi ll. 402. iis quomodo de ſumtibus ſtudiorum proſpiciendum ibid. iis concedendæ recreations ibid.
- Diſſimilia** I. 45
- Diſplicentia** I. 143
- Diſpoſitio naturalis** I. 44
- Diſputantes** eorum quæ officia I. 35
- Doctores** eorum numero quinam adſcribendi ll. 399. ſeq. num iis proſpiciendum de honoribus ac creditibus ibid. eorum invicem quæ officia ll. 409. erga diſcentes ll. 401. qualis iis danda poteſtas ibid. a nimia ſeveritate cur iis abſtinendum ll. 403
- Domicilium** quare opus ſit ll. 61. quæ eorum ratio habenda ibid.
- Dominium.** Ejus definitio ll. 88. cur introducendum fuit ibid. non eſt turbandum ll. 89. quomodo & in quid exercendum ibid. ejus finis ll. 90. uſus & abusus ibid. poteſt transferri ll. 91
- Domus** quæ ſit perfecta, imperfecta ll. 137. imperium in eam cui competat ibid. ejus ſalus quomodo promovenda ll. 388. ſeq.
- Donatio** eo nomine quid veniat ll. 107
- Donum** quid ſit ll. 276. qui iisdem ornandi ll. 107. ſeq. quæ laudem merentur ll. 108. quo caſu licite accipi poſſint ibid. num iisdem alterius favor conciliandus ll. 108
- Duellum.** Sunt illicita, poenis coërcenda ll. 421 E.
- Ebrietas** quid? ll. 259. exinde quid oriatur damni ll. 259. 260. cur fugienda ll. 261. ei quomodo medendum ll. 262. ſeq.
- Eccleſiæ miniſtri** eorum numero quinam adſcribendi ll. 406. 414. eorum officia ll. 407
- Effectus** I. 630
- Educatio liberorum** quibus-

- busnam suscipienda II.
116. 117. ad agnatos
quando ejus cura de-
volvitur II. 131
- Eleemosynæ* quid sint II.
107. 277. quibus offe-
rendæ II. 107. 424
- Eleemosynaria* cur con-
stituenda II. 424
- Elementa* quid sint? I. 103
quid perperam pro iis
venditur ibid. non
sunt similia sed dissi-
milia I. 103. 104. an
differant a punctis
Zenonicis I. 108. num
eorum ratio a posterio-
ri indaganda ibid.
- Emtio* II. 94. quæ circa
eam consideranda II.
95. seq.
- Ens* I. 42. impossibile,
possibile I. 43. rationis
I. 43. idem, diversum
I. 45. singulare s. in-
dividuum ibid. univer-
sale ibid. permanens
I. 49. successivum ibid.
verum I. 50. composi-
tum I. 53. extensum I.
55. simplex I. 58. ejus
status I. 61
- Ens a se* quid? I. 211. ejus
affectiones ibid. & 212.
non est mundus nec
natura rerum I. 213.
non elementa rerum
materialium ibid. non
anima ibid. sed Deus
I. 214
- Enthymema* I. 19
- Enunciatio* vid. Proposi-
tio.
- Ergastula* cur sint con-
denda II. 424
- Errare* quis dicitur I. 29.
30
- Essentia* I. 43
- Ethica* quid sit II. 181. in
ea quæ sint præcipien-
da ibid. seqq. ejus uti-
litas ac præstantia I.
183
- Exceptio* I. 51
- Exercitium* quid sit II.
206. sibi acquirit ha-
bitum ibid.
- Existentia* I. 42. nostra
quomodo probatur I.
116. 117
- Experientia*, ei non sunt
admiscendæ præcon-
ceptæ opiniones I. 24
- Experimentandi* ars phy-
sico necessaria atque
utilis II. 227
- Experiri* quid hoc nomi-
ne veniat II. 22. 134
- Exteri* quomodo in regi-
onem alliciendi II. 450
- Extra nos extra se invi-
cem* quæ repræsentan-
tur I. 51. 52
- Facul-*

Index verborum ac rerum

F.

- Facultas** I. 62. cognoscitivæ pars quæ superior, inferior I. 120. appetitivæ quæ pars superior, inferior I. 142. 150. sensitiva unde habeat appellationem I. 121. imaginandi unde ejus nomen I. 123. facultas fingendi I. 125. abstrahendi I. 132
- Falsiloquium.** Ejus definitio II. 77. quando evadit mendacium ibid. in quo casu iis abstinendum ib. utendum II. 78. quæ cautio adhibenda ibid.
- Fastus** quid II. 304. unde ejus pabulum II. 306. ei quomodo mendandum ibid.
- Favor** I. 148. quando cessat II. 198
- Felicitas hominis** in quo consistit II. 23
- Festi dies** num decernendi II. 407
- Fides** I. 30. ejus requisita ibid.
- Fidejussor** II. 105. si plures, quid notandum II. 106
- Fidejussio** num licita II. 105. ad eam num obligemur II. 106
- Fiducia erga Deum** vid. Deus.
- Fiducia** quid sit I. 148. quando evanescit II. 198
- Figmenta** quid audiant I. 125
- Figura** I. 56. earum diversitas unde I. 385
- Finis** I. 64. principalis I. 65. minus principalis ibid. ultimus, intermedius, subordinatus ibid.
- Finiti ac infiniti** quæ differentia I. 61
- Fluidum.** Eorum æquilibrium quomodo examinatur I. 244. 246. pressio quomodo iis competat I. 246. qualis corporum gravitas in iisdem I. 249. seq. quibusnam examinatur instrumentis I. 250. eorum gravitas cur æstate minor, quam hieme ibid. corpus specificè gravius cur majori vi in fluido descendat quam levius I. 252. circa levius quæ porro notanda I. 252. 253. corpora specificè graviora cur propter cavitatem inclusam fluidi

do

- do innatant I. 253. specifice leviora gravioribus sociata cur hæc in fluido attollant I. 254. eorum unde pendeat motus I. 372. 376
- Flumina** cur frigore intensiori quasi fument I. 298
- Fluxus ac refluxus maris.** Ejus descriptio I. 471. seq. causa principalis I. 472. seq. causæ accidentales I. 475
- Fædus** eorum quis usus II. 457. num& quare servanda sint II. 458
- Fœnus** eo nomine quid veniat II. 101. num licitum ibid.
- Fœtus** quomodo nutritur in ovis I. 509. in utero matris ibid. ex imaginatione matris quid in eum redundet damni ibid. non respirat in utero I. 510. quomodo excluditur ibid.
- Foliorum** structura qualis I. 486
- Fontes** artificiales unde vim habeant ascendi I. 372. quando ad majorem ascendunt altitudinem I. 373. quid ascensum minuat I. 374
- Forma** I. 66
- Fortitudo** quid? II. 314. ubi ea opus II. 315. ejus effectus ibid. ab ea quid alienum ibid.
- Fortuna** quid? II. 67. cur secunda non efferri, adversa confundi oportet ibid.
- Frigus** quid? I. 295. varix observationes I. 296. seq.
- Frigorifica** materia unde paratur I. 296
- Fulgur** quando majus, minus apparet I. 458
- Fulmen** quid? I. 452. ejus causa ibid. de ejus distantia quomodo judicandum I. 459. lapides fulminares num dentur ibid. & seq.
- Futurum** quid nomine-
mus I. 53
- G.
- Gemini** quomodo in utero efformantur I. 510
- Gemmae arborum** quomodo gignuntur I. 481. earum color ib. unde erumpunt I. 491. ac in plantarum medullam deferuntur I. 494
- Generatio animalium homi-**

Index verborum ac rerum

- hominumque* fit per co-
itum maris ac feminæ
I. 506. ex ovulo I. 507
- Generositas* s. animus ge-
nerosus in virtutum
numero eminet II. 325.
multa parit commoda
ibid. & seq.
- Genus* quid? I. 7. 46. quan-
do ex dato genere in-
vestigantur species I.
24
- Glacies* unde existit I.
296
- Gloria* I. 147. quando
exulat II. 196. cur non
exstirpanda sed tan-
tum moderanda II. 197
- Granarium.* Eorum pu-
blicus usus II. 448
- Grando* quid? I. 449.
quomodo generatur
ibid. in aëre sustenta-
tur I. 450. unde ejus
vis ibid.
- Gratiarum* actio quid?
II. 54. 360. qualitas e-
jus II. 361
- Gratitudo* quid sit I. 148.
II. 54. quando evane-
scit II. 197
- Gravitas* fluidorum spe-
cifica I. 250. solido-
rum quomodo inveni-
enda I. 251. unde pen-
deat I. 397. gravifica-
num detur materia I.
398. quomodo con-
cipienda I. 399
- Gustus* cur ceteris sensus
imperfectior I. 172. in
quo consistat I. 504
H.
- Habitus* quid sit II. 17
- Hæceitas* I. 46
- Halo,* quæ eorum causa I.
453. figura I. 454
- Heronis* pila, describitur
I. 377
- Herus, Hera* utriusque
quæ sint officia II. 132.
seq. 385. seq.
- Histriones* in republica
non tolerandi II. 449
- Homo* potest malum ap-
petere pro bono id re-
putans & vice versa I.
151. quâ ratione di-
catur aliquid invenire
I. 320. quotupliciter
considerandus II. 47.
Deo vivere tenetur II.
49. quis non in servi-
tutem redigendus II.
136. an proprium mo-
do commodum debe-
at sectari II. 10. quis
vitam componat ad
voluntatem numinis
II. 12. tenetur actiones
dirigere ad sui perfe-
ctionem II. 20. 21
Homi.

- Homicidium* dolosum, causale, culposum ll. 422. num & qua pœna coercendum ibid.
- Honestas* intrinseca in quo consistat ll. 5. externa quid sit ll. 408
- Honor* quid ll. 66. num appetendus ibid. a quo nam alteri deferendus ll. 67. num conservandus ll. 67
- Honorum* tituli quibusnam conferendi ll. 432 non sint venales ibid.
- Hostis* an præveniendus ll. 458
- Humilis* ll. 304
- Humilitas* quid ll. 304. ejus quæ connexa ll. 305
- Humor* chrySTALLINUS ex oculo animalis exemptus lentis convexæ vicem sustinet I. 326
- Hygrometrum* s. *Hygroscopeum* quid sit I. 289. ejus compositio ibid.
- Hypotheca* quid eo nomine insigniatur ll. 103. cur creditori assignanda ibid.
- I.
- Idea* quid sit I. 119. immateriales in cerebro respondent immaterialibus in mente I. (P. II. *Thüm. Inst. Pb. Pr.*)
167. 168. materiales in cerebro ab ideis immaterialibus sensuum excitantur I. 169
- Ignavia* ei quomodo mendandum ll. 205
- Ignis* quid sit, & quomodo oriatur I. 299. seq. conservatur libero aëris affluxu I. 301. ejus in vacuo & aëre effectus diversi I. 302. sqq.
- Ignes fatui* unde ortum trahant I. 465
- Ignes lambentes* quæ eorum causa I. 466
- Ignominia* quid sit ll. 300. ea quis dignus ll. 301. quando ei non locus ibid. quæ cautelæ circa eam observandæ ll. 302
- Ignorantia* cur vitanda ll. 57. vincibilis, invincibilis ibid.
- Illiberalis* ll. 279
- Imaginatio* quid? I. 123. non singula satis clare repræsentat ibid. cur ejus vires majores in tenebris I. 124. certis regulis se attemperat ibid. ejus lex ibid. gradibus gaudet I. 128. ejus vires possunt extendi ib. plurimum confert ad affectus I. 149
- Hh illi-

Index verborum ac rerum

- illius regulæ ratio unde liquet I. 169. turbatur læso cerebro ib. in quo casu sit impedimento ll. 35. quomodo ei dominandum ibid.
- Imber* quomodo oriatur I. 448
- Immortale* I. 199
- Immortalitas animæ*, quomodo adstruenda I. 198. seq.
- Impatientia* in rebus adversis arguit defectum fiduciæ erga Deum ll. 253
- Impedimentum* quid sit ll. 32
- Imperans* vid. Magistratus.
- Imperantes summi.* Eorum potestas in quo casu restricta ll. 434. per quid limitata ll. 161. possunt constituere pœnas in legum transgressores ll. 162. num iis jus vitæ & necis ibid. jus imponendi onera ll. 163. jus convocandi subditos & ad comparandum obligandi ll. 163. eorum potestas in quo consistat ibid. ad eam quid referatur ll. 164. ejus majestatem quid constituat ll. 166. in regenda republica quid ei curandum ll. 172. num teneatur alijs suppetias ferre ll. 177. & viros prudentes consulere ll. 173. quis eorum finis in forma reipubl. recta ll. 395. eorum requisita ll. 395. seq. officia circa civium numerum ll. 397. 398. circa virtutes intellectuales ll. 398. seqq. circa virtutes morales & cultum divinum ll. 405. seq. circa honestatem externam conservandam ll. 408. seqq. circa religionem ll. 412. seq. circa justitiam ll. 416. circa injurias ll. 420. circa vitæ necessitatem ll. 422. circa morbos ll. 427. circa vitæ jucunditatem ll. 429. circa honores ll. 431. ad leges fundamentales quando obligandus ll. 434. potentia ejus quomodo limitetur ll. 435. seqq. illa limitatio num majestati deroget ll. 436. ei cur opus splendore ll. 438. pacis am-

mantissimus sit neces-
se est ll. 457

Imperium, quid sit de-
spoticum, absolutum
ll. 161. quotuplex ad
illud perveniendi via
ll. 433

Implacabilitas quid sit
ll. 323

Impossibile I. 42

Impotentia naturalis ll.
19

Inambitiositas quid sit ll.
295. quis ea laboret
ll. 296

Incuria unde oriatur ll.
279. quomodo fugan-
da ll. 280. seq. quid fe-
rat damni ll. 281

Incuriosus opum acqui-
rendarum quis sit? ll.
278. unde talis ll. 280

Indecorum quid absolvat
ll. 182

Indifferentia exercitii I.
154. perfecti æquili-
brii I. 155

Indigentia quid sit ll. 269

Infamia. Ejus definitio
ll. 409

Infelicitas hominis quid
sit ll. 24. ejus causa
ibid. a pparens unde
dignoscenda ibid.

Infirmetas naturalis ll.
19

Ingenium quid? 140, e-

manat e vi repræsen-
tativa universi I. 177.
pendet a cerebri con-
stitutione ibid. ejus
cultura pertinet ad
virtutes intellectuales
ll. 231. cur urgenda
& quomodo perfici-
enda ibid. ll. 232

Inimicus quis? ll. 69. a-
lios ne nobis redda-
mus inimicos cur ca-
vendum ll. 69. 70. de
ejus infelicitate non
lætandum ll. 326

Injuria ll. 420. verbali-
um usus plane proscri-
bendus ll. 432

Innocentia ejus vindica-
tio num & quando li-
cita ll. 303

Intellectus quid? I. 131.
tribuitur ei profundi-
tas, quæ differt ab a-
cumine ibid. in quo
casu pyrus appelletur
I. 132. summus quid?
I. 175. ab ejus perfe-
ctione num emenda-
tio voluntatis profi-
ciscatur ll. 191. circa
ejus emendationem
quæ notanda ll. 185.
cognitione cur imbu-
endus omni? ll. 57

Intelligentia quid ll. 212.
virtutum intellectu-
alium

Index verborum ac rerum

- Hum num prima? ibid.
 quis ea polleat ll. 213.
 ejus quodnam initium
 ibid. ejus studioso quid
 observandum ll. 214
 quis ea carere dicatur
 ll. 214
Intemperantia quid ll.
 254. ejus motivum
 quid sit ibid. ei quo-
 modo medendum ll.
 254-259
Inveniendi ars quid ll.
 224. an inter virtutes
 intellectuales referen-
 da ibid. ea cur opus
 ll. 225. quotuplex ib.
 quomodo consequen-
 da ll. 227. seq. ejus æ-
 stimatio unde? ll. 229.
 utilitas ll. 230
Invidia quid sit I. 147.
 quomodo supprima-
 tur ll. 195
Invocatio numinis inter-
 na quibus absolvatur
 partibus ll. 53. num
 sufficiat ibid. vid. Deus.
Ira quid sit I. 149. quo-
 modo extinguitur ll.
 260
Iracundia. Ejus definitio
 I. 323
Iris quomodo generetur
 I. 450. ejus unde co-
 lores I. 451. cur quis-
 que videat aliam ibid.
 quando appareat I.
 452. cur arcus repræ-
 sentet figuram ibid. se-
 cundaria quomodo
 gignatur & quando I.
 452. pars ejus quan-
 do appareat tantum I.
 453. lunares sunt ra-
 riores ibid.
Irrisio quid sit? I. 147.
 quando cesset ll. 194
Itinera num promiscue
 concedenda in regio-
 nes peregrinas ll. 448
Index cur & quinam sint
 constituendi ll. 171.
 416. 168. ejus quæ
 potestas, potentia &
 quid officii I. 169. ll.
 317. seq. inferiores cur
 remittendi ad superi-
 ores ll. 439. qualis eo-
 rum autoritas I. 171
Iudicium quid? I. 11. 12.
 intuitivum I. 23. dis-
 cursivum I. 25. 136. de
 utroque quid obser-
 vandum I. 30. quomo-
 do sint investiganda
 a priori I. 25. quod-
 libet peculiarem ex-
 primit animæ statum
 I. 138. per ideas mate-
 riales in cerebro re-
 præsentantur I. 174
Iudicare quando dica-
 mur I. 134
Jupiter quot circa eum
 sa-

- satellites** I. 402. observati a quonam primum ibid. rotatur circa axem motu vertiginis I. 424
- Iuramentum** quid sit II. 79. cui deferendum ib. quando licitum, illicitum II. 80. purgatorium II. 443
- Ius inculpatæ tutelæ** quid sit II. 76. cuique manet integrum II. 421. vacat poena II. 422
- Ius naturæ** quid sit II. 47. quotuplex II. 48. continet Ethicæ theoriam II. 183. cur a Wolfio in Ethica traditum ib.
- Iustitia** unde I. 239. quid sit II. 334. ejus studioso quid factu opus ib. & 336. commutativa, universalis II. 335
- L.**
- Labyrinthus philosophorum** I. 55
- Labor** num omnibus competat II. 64
- Lasio** quid sit II. 71. cur nemo lædendus ibid.
- Latitia** quid sit I. 146. quæ durabilis, minus durabilis II. 32. ejus affectus quomodo infringendus II. 192
- Laniæne** extra urbes relegandæ II. 43
- Lapides.** Eorum generis I. 483. figuratorum quæ causa I. 479. petrefactorum iis inclusorum quæ ratio I. 479
- Laterna magica** I. 328. potest facile converti in microscopium I. 329
- Lex** quid sit II. 9. naturalis ibid. num naturalis immutabilis & æterna ibid. transire potest in civilem II. 157. adæquata II. 9. divina II. 11. civilis II. 157. civiles cur naturalibus addendæ II. 158. utriusque diversitas ib. a quibus ferendæ, concipiendæ & confirmandæ II. 159. cur promulgandæ II. 160. possunt meliorari II. 168
- Leges fundamentales** II. 434
- Libelli famosi** in republica non ferendi II. 432. in eorum auctores animadvertendum II. 433
- Liberalitas** quid late dicta II. 275. quas sub se complectatur particulares virtutes II. 276. stricte dicta ibid. ejus motiva II. 293

Index Verborum ac rerum

Liberi quæ eorum officia erga parentes II. 122. seq. 124 sqq. erga tutores II. 127. minorennes quamdiu II. 123. eorum contractus num validi II. 124. majorennes II. 124

Libertas animæ quid sit I. 155. cur conveniat menti I. 184. 185

Libido quomodo & cur fugienda II. 274

Libri historici I. 31. quid attendendum in iis I. 31. 32. dogmatici I. 31. eorum quæ ratio habenda I. 32. lectoris officium I. 33. cur scribendi typis mandandi II. 407

Linea horizontalis I. 245

Locatio. Res locata cur non deterioranda II. 101. usui idonea sit necesse est II. 102

Locus I. 50

Logica. Ejus definitio I. 3. divisio I. 3. usus I. 4.

Logico-morales regulæ I. 184

Ludus quid II. 380. num & qualis concedi possit II. 431

Lumen propagatur in aëre per lineam rectam I. 307. ejus radii

possunt dividi ibid. ejus refraction variatur I. 309. in contactu corporis e via sua aliquantisper dimovetur I. 310. sq. excitatur corporum affrictu in tenebris I. 312. affrictu quoque Mercurii & Tubi Barometrici I. 313. lumen per vacuum vitri cavitatem fulgurans excitatur affrictu externo vitri evacuati I. 314. ejus excitationi aër resistit I. 134. ratio cur I. 135. solare ex radiis heterogeneis componitur gradu refrangibilitatis a se invicem differentiibus I. 318. radii reflexibilitatis gradu differunt I. 319. propagationis celeritas I. 407. modus I. 408. differentia I. 410

Luna est corpus ut terra I. 412. sq. ejus lux unde ibid. habet atmosphæram I. 414. quando videatur pallere I. 456

Luxus quid? II. 278. ejus quis fons I. 282. quomodo corrigendus ib. & sqq. *Magi-*

M.

Magistratus. Oppidanorum & paganorum origo ll. 445. officia ll. 445. seqq. lex quæ iis suprema ll. 446. num jus denominandi iis competat ll. 446. superiores quando creandi ll. 445. eos inter ac subditos quid intercedat pacti ll. 143. qualis eorum ad subditos habitudo ll. 145

Magnanimitas ll. 308

Magnes. Visejus attractiva invenitur in duobus punctis oppositis s. polis I. 343. armati cur fortius trahant ib. tribuitur ei vis directiva I. 344. duorum poli diversi nominis cur se mutuo attrahant I. 344. 345. magnetica materia quid? ibid. circa magnetem movetur ibid. ferro vim attractivam ac directivam communicat I. 346. acus magnetica quem habeat usum I. 347. aer num contribuat ad attractiones magneticas I. 348. virtus magnetica an suam habeat activitatis sphæ-

ram I. 349. ejus inclinatio, declinatio I.

558

Magnificentia quid sit ll.

275

Magnitudo I. 48

Magnitudines homogeneæ I. 54

Majestas quid eo nomine insigniatur ll. 166. læsæ majestatis crimen qualem exigit pœnam ibid.

Majus quid appellemus I. 48

Maledicere quid? est illicitum ll. 80

Matum quid audiat I. 144. summum quid? ll. 22. unde ll. 23

Mancipium quid ll. 134. eorum officia ll. 134. eorum conditio qualis ibid. quibus mediis compellenda sint ad obsequium ll. 135. seqq.

Manometrum. Ejus auctor I. 279. seq. descriptio I. 280. usus I. 281

Mansuetudo ll. 322. ejus studioso quid factu opus ll. 323

Maritus. Ei cur imperium in uxorem ll. 121. ejus circa uxorem officia ll. 374. seq.

Mars circa axem rotatur

Index verborum ac rerum

- Moralitas** intrinseca actionum in quo consistat II. 5. illam dijudicaturus quid attendendum II. 6
- Mores** hominum quomodo conjectandi II. 38. seqq.
- Mors** quando evenit I. 511. ejus causæ I. 511
- Motivum** quid? I. 151. quotuplicia sint I. 152. quæ completa, incompleta ibid.
- Motus** I. 56
- Motus**, leges naturales quid sint I. 88. seqq. difficultates earum quomodo enodandæ I. 94
- Motus regula** I. 88. corporum elasticorum unde deriventur I. 96. num absolute necessariæ sint ibid. quibusnam experimentis examinandæ I. 369. 372
- Motus** miraculosus I. 101
- Mulcta** quid? II. 409
- Mundus** quid? I. 72. qualis in eo nexus successivorum, simultaneorum I. 73. 74. quomodo in esse suo determinatur ibid. est unus ib. in entium compositorum numerum referendus ibid. cur machina appelletur I. 75. an plures sint possibiles I. 79. 80. ejus unde enascatur perfectio I. 107. eadem in quo consistat I. 109. cur incomprehensibilis I. 110. habet regulas ib. ejus in partibus unde imperfectiones I. 110. quo respectu perfectior, quis ibi ordo I. 111. optimus quis dicatur I. 224
- Mundi systema.** Ejus descriptio I. 421. seqq.
- Musculi** quid sint I. 504. cujus usus sint in corpore ibid.
- Mutatio** quid sit essentialis, accidentalis I. 386. quo redeat omnis I. 388. quæ sint pendentes a materia variabili & interlabente. I. 393
N.
- Natura** quid sit I. 86. a quo differat I. 87. natura rerum universa simpliciter quid? I. 87. an libera a necessitate absoluta I. 97. ejus ordo I. 111. illius ordinis quot regulæ ibid. num sit perfectus I. 112. non cum perfectione confundendus ibid.

utriusque Tomi.

ibid. naturæ convenienter viventi quid observandum ll. 35
Naturæ cursus I. 112
Naturale quid appellemus I. 98
Naturæ lex ll. 9. unde innotescat ll. 10. ejus principium ll. 10. auctor ll. 11
Nebula quid sit I. 443. quomodo oriatur *ibid.* quando descendat I. 444. cur non abeat in glaciem *ibid.*
Necessarium I. 46. immutabile, absolutum, hypotheticum I. 47
Necessitas, physica, naturalis, geometrica, metaphysica, hypothetica I. 77
Nervi. Eorum læsio quid pariat damni I. 505. unde oriatur *ibid.*
Nexus rerum in universo cur non agnoscatur vulgo I. 101
Nimbus quando oriatur I. 448
Noluntas quid sit I. 150
Non ens I. 42
Nosocomium. Eorum in republica necessitas ll. 428. Jobæum ll. 429
Notio. Ejus definitio I. 4. divisio I. 5-7. quomo-

do investigentur a posteriori I. 22. a priori I. 24. universales quomodo acquirendæ I. 130. quid per eas designetur *ibid.* num & quatenus in corpore repræsententur I. 174. ad distinctas quomodo perveniendum I. 130. distinctarum gradus I. 131. analysi *ibid.* cur non excedant vim universi repræsentativam I. 173
Notitia sui quomodo acquirenda ll. 248. quoad animam & corpus ll. 249. egregiam parit utilitatem ll. 250
Nox cur æstate fruatur luce crepusculari I. 430
Nubes quid sint. I. 444. quando orientur & dispareant I. 455. quando terribes, crassæ *ibid.* earum figura I. 446. distantia a terra *ibid.*
Numerus I. 48
Nutritio corporis quomodo fiat I. 495. seq. I. 550

O.

Objectum I. 67
Obligatio quid sit ll. 7. in singulari ad quos spectet ll. 56. naturalis ll. 84

Index verborum ac rerum

- ll. 8. divina ll. 11. 12.
 civilis ll. 157. num in-
 troducenda ll. 408
Oblivio I. 127
Obscæna cur sint velanda
 ll. 61
Obscuritas unde ? I. 119
Observandi ars quid sit
 ll. 225. illius usus ll.
 226
Oculi cur claudantur I.
 124. quomodo com-
 parati I. 501
Odium quid sit I. 146. quo-
 modo fugetur ll. 194.
Odor cur ceteris sensus
 imperfectior I. 172
Odoratus quomodo effici-
 atur I. 502
Officium quid sit ll. 49.
 erga Deum in quo
 consistat ibid. quibus
 absolvatur partibus ll.
 50. 51. seq.
Officia erga se ipsum quid
 sint ll. 55. varia sunt
 pro diverso respectu
 ibid. quot & quæ ll.
 64. 65
Officia erga alios ll. 68.
 sunt eadem cum offi-
 ciis erga se ipsum ibid.
 quando præstanda ll.
 68. quot & quæ sint
 ll. 69. seqq.
Officia erga amicos cur
 sint præstanda ll. 73
Officia erga inimicos quæ
 sint ll. 73. 74
Officia circa sermonem
 ll. 77
Officia circa pacta ll. 81
*Officia circa rerum do-
 minia* ll. 87
Officiositas quid sit ll. 293.
 ejus quæ motiva ll.
 294. unde proficiscat-
 ur ibid.
Oligarchia ll. 394
Onera publica num vi
 exigenda ll. 456. ne
 premant providen-
 dum ibid. ad eorum
 molem sublevandam
 quid faciat ibid.
Onochotrophia in repu-
 blica requiruntur ll.
 425
Ontologia est prima Me-
 taphysicæ pars I. 39
Opera, earum gratuita
 præstatio respondet
 donis ll. 108
Opes quid sint ll. 62. num
 acquirendæ ll. 63. 64.
 num administrandæ ll.
 65
Opinio quid sit I. 29
Opponens quis audiat I.
 39 ejus quæ officia ib.
Orare quis dicatur ll. 53
Oratio, quæ ejus utilitas
 ll. 54
Orbes chrySTALLINI rejici-
 untur I. 431
Ordo

Ordo quid sit I. 49. habet
suas regulas ibid.

Organa sensoria I. 121

Orphanotrophea. Eorum
in republica necessitas
II. 425

Offa. Eorum qualis natu-
ra I. 500

Otiari quis dicatur II. 64

Ovarium, num maneat
in iis cicatriculæ ovu-
lis avulsis I. 508

Ovulum quomodo de-
veniat in uterum I. 507

P.

Pactum quid sit II. 81.
num & quando ser-
vandum II. 82 - 84.

quando dissolubile II.
85. cautelæ quæ adhi-
bendæ II. 86. in ejus in-
terpretatione quomo-
do versandum II. 86. 87

Pagani an Deum glori-
ficent ac colant II. 343

Paganismus unde traxe-
rit ortum I. 239

Paraselena. Eorum quæ
causa I. 454. seq.

Parbelii unde oriantur
I. 453. seqq.

Parens. Eorum quæ offi-
cia ergo liberos II. 122.
126. 375-384

Pars I. 45

Parimonia quid sit II.
276. 278

Partus. Ejus descriptio
I. 510

Passio I. 6

Pater familias quis ap-
pelletur II. 137. an
competat ei imperi-
um in universam do-
mum II. 137. & vigi-
lantia II. 392. ejus quid
officii II. 138. erga ma-
trem familias II. 390.
liberos & famulitium
II. 391

Patientia num fiduciæ
erga Deum testis II.
353. quodnamejus o-
ptimum medium II.
354. quid sit II. 312.
ejus utilitas II. 313

Pax quid sit II. 174

Pecunia cur inventa II.
93. ex qua materia sit
constanda ib. cur cer-
tum eidem pondus as-
signandum ibid. si mu-
tuo de'yr quid obser-
vandum II. 99

Perceptiones quomodo
differant inter se I.
119. 120. quæ clara, ob-
scura ibid. distincta,
confusa ibid. in statu
confusarum, distincta-
rum quando sumus I.
120. complexa num
fundamentum judici-
orum intuitivorum I.
134. *Per-*

Index verborum ac rerum

- Percepturatio** I. 178
Percipere quando dicamur I. 118
Perduellio quid sit II. 166
Perfectio metaphysica, simplex, composita I. 50. habet suos gradus I. 51. mentis qualis sit acquirenda II. 33. regulæ II. 34
Permutatio rerum cur facienda II. 91. quid supponat ibid. cur æqualitas servanda ibid. quo in casu ad transferrandum dominium sufficiat II. 92. 93
Persona I. 199
Persuasio unde I. 34. vitaturo eam quid notandum I. 35
Pestis ejus avertendæ cura cui competat II. 427. quomodo instituenda II. 429
Philosophia. Experimentalis definitio I. 243. utilitas ibid. cur physica præmittenda I. 382. practicæ definitio II. 3. utilitas II. 4. moralis II. 181
Physica quid sit I. 381. respuit hypothesen ficticias I. 381. nititur experimentis I. 382, num & quatenus admittat hypothesen ib.
Physiognomia, de ea quid sentiendum II. 43. unde pro se acquirit argumentum II. 43. cautelæ II. 44
Phosphorus curiosas supeditat observationes I. 306. seqq.
Pietas philosophica quid? II. 337. ejus medium ibid. quis ei deditus II. 338. elevat ceteras virtutes omnes ad eminentiorem gradum II. 339. constituit medium gradum inter virtutem naturalem & christianam II. 340
Pignus quid appelletur II. 103. cur creditori tradendum ibid. quomodo debeat esse comparatum ibid. num & quando ejus detur usus II. 104. quando pereat suo domino ibid. in quo casu queat vendi II. 104. 105
Pigri quis ferat nomen II. 309
Pisces in vacuo sub aqua demersi quomodo se habeant I. 364
Planetae quot sint I. 402. instructi num sint mon-

- montibus I. 415. an
habeant atmosphæ-
ram ibid. an corpora
telluri simillima I. 416.
habeantne suos inco-
las ibid.
- Plantæ.* Earum anatomi-
am quis tradiderit I.
483. partes ibid. trans-
piratio I. 493. nutri-
mentum I. 448. seq.
crescendi modus I. 490.
sq. quando vivæ, mor-
tuæ I. 493. earum pro-
pagatio I. 494. unde
deferantur in semina
ibid. num generentur
ex ovo I. 508
- Pluvia* quid? 448. ejus
quantitas per 15 an-
nos observata I. 287.
causa I. 285. sqq. ignea
quomodo potest fisti
I. 312
- Pæna* quid sit II. 14. natu-
ralis II. 15. positiva ib.
capitalis II. 409. *affli-*
ctiva iis quando locus
II. 410. ejus gravitas
proportionanda deli-
ctis ibid. cur exequen-
dæ & publice infligen-
dæ II. 411
- Penitentia* quid sit I. 147
quando cesset II. 197
- Politia* quid sit II. 394.
ei quæ connexa in-
- commoda II. 396
- Politica.* Ejus definitio
II. 367. objectum ibid.
quotuplex II. 368. ejus
utilitas II. 369
- Polygamia* num sit licita
II. 117. seq.
- Pori* num insint corpo-
ribus fluidis ac solidis
I. 338. variæ addu-
cuntur observationes
I. 360. seqq.
- Possibile* quid vocetur I.
21
- Possibilitas* interna I. 42.
extrinseca ibid.
- Postulatum* I. 14
- Potentia* I. 61. passiva I.
62. activa I. 226
- Potestas.* Quæ sint in no-
stra quæ non II. 56.
patria in liberos quan-
do locum habeat II.
123. 124. summa quid
sit II. 160. quis eam
teneat II. 611
- Prædicatum* quid sit II.
14. naturale, positi-
vum II. 15
- Præmissæ* I. 17
- Præsens* quid vocetur I.
52
- Præses* quis nuncupetur
I. 35. quodnam ejus
officium I. 36
- Præteritum* quid nomi-
nemus I. 53.
- Pre-*

Index verborum ac rerum

- Preces** cur fundendæ II. 363. num sola verborum recitatione absolvantur II. 383. earum formulæ an prorsus rejiciendæ & quomodo adhibendæ II. 358. 359
- Principiatum** I. 65
- Principium individuationis** I. 7. 46
- Principium essendi**, cognoscendi I. 63. indiscernibilium I. 104. contradictionis I. 40. rationis sufficientis I. 41
- Probatio** I. 21
- Problema** I. 14
- Prodigus** quis II. 278. unde talis II. 280. seq. quomodo corrigendus II. 283. num simul possit esse avarus II. 286
- Productio ex nihilo** I. 231
- Profunditas** quid sit II. 211. num referenda inter virtutes intellectuales ibid. an negligenda ibid. quomodo comparanda II. 211. 212
- Promissum** quid sit II. 80. qualia sint danda ibid. quando iis non standum II. 81
- Propositio**. Ejus definitio I. 12. divisio I. 13-18
- Proprietas** v. Dominium.
- Provincia**. Earum præfecti num & quando creandi II. 445. eis quæ lex tanquam norma II. 446
- Prudentia**. Ejus definitio II. 238. necessitas ibid. objectum II. 239. num cadat in Deum II. 240. unde addiscenda II. 241. cur senibus atque expertis propria ibid. ejus an regulæ II. 241. seq.
- Pruina**. Ejus genesis I. 447
- Pruna**. Earum halitus in aëre vaporoso sunt lethales I. 365
- Psychologia** quid sit I. 115 empirica præcedit rationalem I. 115. quæ suppeditet principia I. 116. rationalis I. 115
- Pudor** quid sit I. 148. quando extinguatur II. 197
- Pulmones**. Eorum mutatio in vacuo qualis I. 364. seqq. singularis eorum motus I. 506.
- Pupilli** qui? II. 127. eorum quæ officia erga tutores II. 127-130
- Pusilla**

utriusque Tomi.

Puſſillanimitas quid ſit I.
149. quomodo ei me-
dendum II. 200

Q.

Qualitates occultæ I. 220

Quantitas I. 43

R.

Radix. Ejus partes I. 484

qualis ſtructure I. 485

Ranæ in vacuo diu vi-
vunt I. 364

Ratio quid ſit I. 41. 140.

quæ vocetur pura I. 141

ei quid conforme, con-
trarium ibid. an repu-
gnet revelationi II. 14

Ratiocinium quid? I. 137.

quæ affirmativa, nega-
tiva I. 15. 16. quodnam
utriusque fundamen-
tum ibid.

Reſectere quid dicamus

I. 130

Refutaturi officia quæ
ſint illa? I. 35

Regimen. Ejus forma II.

167. quando bonum,
malum II. 167. 439

Regnum II. 394

Religio quid? II. 412. fal-

ſa, naturalis, revelata
ibid. ejus ſtudium ma-
gis valet quam omnis
pœna II. 413. neceſſi-
tas ibid. revelatæ qua-
le pondus in monar-
chia II. 434

(P. II, Thüm, Inſt. Pb. Pr.)

Reminiſcentia. Ejus de-
finitio I. 128

Repreſſaliarum nomine
quid veniat? II. 176

Reſpublica. Ejus defini-
tio II. 140. neceſſitas

ibid. ſinis II. 141. ſu-

prema lex ibid. in ea
quid non ferendum II.

141. 149 cura ejus num-
certis perſonis traden-

da II. 143. 144. diver-
ſæ unde earum formæ

ibid. in ea conſtituen-

da quid obſervandum

II. 146. ſeqq. ingenia

eminentia cur juvan-

da in iis II. 149. quæ

haberi debeat in illis

cura circa opes II. 150.

ſqq. contractus II. 151.

circa hominis ſanita-

tem ibid. circa auto-

chiriam II. 152. circa

nimum laborem ibid.

circa iherendicos ib. cir-
ca eleemoſynas II. 153.
circa œconomiam ru-
ralem ibid. circa ebri-
etatem ibid. ædificia
II. 154. circa ſenſuum
oblectamenta II. 155.
excogitandi cur in ea
honorum tituli ibid.
vindictæ privatæ non
in ea concedendus lo-
cus II. 156. qualis in ea

Ii

pote-

Index verborum ac rerum

- potestas ll. 431. quomodo tuenda adversus hostiles insultus ll. 457 in forma ejus eligenda s. immutanda quid observandum ll. 339. forma ejus quæ recta, quæ aberrans? ll. 394. simplex, mixta ibid.
- Respondens* quis I. 35. ejus officium I. 36
- Revelatio*, immediatæ quænam criteria I. 229
- Reverentia* numinis in quo consistat? ll. 52
- Ros*. Ejus definitio I. 446. genesis ibid. & seqq.
- S.
- Sal* acidum, alcalinum, commune ll. 476
- Sal petrae* I. 477
- Sanguis* movetur in corpore I. 497. in pulmonibus ei admiscetur aër I. 497. varias causatur secretiones in partibus I. 499. 500. non defertur ad pulmones in embryone. ll. 510
- Sanitas* quid sit ll. 59. cur servanda ll. 59. 60. 268. seq. ei quæ inimica & quomodo pellenda? ll. ll. 269
- Sapientia* quid sit I. 205.
- ll. 233. cur comparanda ibid. ejus quæ media ll. 234. sqq. in iis decernendis quid observandum ll. 236. ejus criterion ll. 237. perfectissima quid? I. 205
- Saturnus* quot circa eum satellites I. 402. quis primus observaverit eosdem I. 402. an corpus opacum I. 415. cingitur annulo I. 416
- Schola* num erigendæ ll. 398 in iis quid curandum ll. 399. 406. scholæ pauperum cur condendæ ll. 425
- Scientia* quid sit I. 29. II. 215. quid præsupponat ibid. cur ei opera navanda ll. 216. si deficit quid inde damni? ib. an conscientia custodiendæ sit medium ll. 216. intellectualium virtutum numero cur adscribenda ll. 217. ejus usus ll. 220. ejus quis dicatur amans II. 221
- Scintille* cur in vacuo collisione silicis & chalybis nullæ eliciantur? I. 302
- Scire* quis dicatur I. 29
- Semen*

- Semen** maris num im-
mittatur in uterum fe-
mellæ I. 507. num sint
in eo animalcula I. 508
- Semen**, planta quomodo
inde surgat ? I. 487.
seq. I. 494
- Sensationes** ad animam
quomodo referendæ
I. 121. an inter se dif-
ferant ibid. num obfu-
scent imaginationem
I. 123
- Sensus** I. 121. ubi esse pos-
sint impedimento ? II.
34. quomodo iis do-
minandum II. 35. cur
in vigore conservandi
II. 270
- Sermo** unde constituatur
I. 503
- Servus, serva.** Eorum
quæ sint officia II. 132.
seqq. ex diligenti of-
ficiorum præstatione
quid metant commo-
di II. 385
- Signum, signatum** de-
monstrativum, pro-
gnosticum, remorati-
vum I. 67. quæ sint
naturalia, artificialia s.
arbitraria data s. ad
placitum I. 68
- Similia**, quomodo pos-
sint discerni I. 45
- Similitudo** I. 45
- Simplex** I. 58. 59. non o-
ritur ex composito ib.
indivisibile necessari-
um I. 60. simplicium
philosophia quid pro-
fit I. 63. exinde nascan-
tur composita I. 107
- Simulatio** quid sit II. 41.
quomodo detegenda
ib. 42.
- Simultanea & successiva**
num inter se connexæ
I. 73
- Sinceritas**, Eius definitio
II. 41
- Singulare** quid sit I. 7
- Sipho** cur per eos fluat a-
qua I. 377.
- Sobrietas** II. 263
- Societas** quid sit II. 111.
ejus salus in quo con-
sistat II. 112. 370. finis
ibid. cui & quando ab
ea discedere licitum II.
112. 113
- Societas berilis** quid sit
II. 131. ejus salus quo-
modo provehenda II.
284
- Societas nuptialis** quid
sit II. 115. cujus gratia
ineunda II. 117. ad eam
qui idonei ibid. finis
II. 120. ejus salus quo-
modo promovenda II.
370

Index verborum ac rerum

Societas paterna, Ejus definitio I. 122, salus provehenda II. 175.

Socius, Eorum quid officii? II. 113. 114

Sol est ignis I. 405. habet maculas ib. macularum historia I. 405. movetur circa axem I. 406. habet atmosphæram ibid, operationis ejus diversitas in corporibus calefaciendis unde? I. 411. cur antequam oritur in horizonte appareat? I. 431

Soliditas quid sit II. 222, quomodo assequenda ib. criterion II. 222. 223. in virtutibus intellectualibus cur ponenda & excolenda II. 223. 224. seq.

Somnium quid sit I. 171. eorum unde clarescat ratio I. 124. imaginatio quid contribuat in iis I. 170. simplex, compositum, naturale, supernaturale I. 170. 171. eorum initium debetur alicui sensationi ibid.

Somnus quid respectu animæ? I. 168. in eo cur imaginatio cesset I. 170

Sonus propagatur per ærem I. 351. sit major in aëre compresso I. 351. quantum conficiat intervallum unius minuti secundi spatio I. 352.

seq. unde soni magnitudo I. 353. in aure quid efficiat I. 502

Sordities avaritiæ quando comes II. 289. seq. cur contradistinguenda avaritiæ & parsimoniæ II. 290. quomodo corrigenda ibid, ejus criterion II. 291

Sordidus quis II. 279. ejus proprium II. 290

Spacium quid nominetur I. 52. imaginarium cum reali non confundendum ibid.

Species I. 7. 46. ex earum notionibus investigantur notiones generum I. 24

Speculum in convexis imagines sunt objecto minores at distinctæ I. 330. incurvatæ se repræsentant ib. cylindrica convexa imagines objectorum deformant, item conica I. 331. seq. concava singularibus nobilitantur phænomenis I. 332. eorum focus ibid, usus I. 333.

Spes quid sit I. 148. quando evanescat II. 198

Spiritus quid I. 202. inter eos non referenda elementa ibid, quatenus corpori dicatur uniri I. 203. perfectissimus quis I. 204.

- I. 204.** num rationis particeps ib. sapientie capax I. 205
- Sponsalia.** Eo nomine quid veniat ll. 119. an debeant præcedere matrimonium ibid. invalida quando? ibid.
- Stella fixæ** I. 401. earum numerus I. 402. magnitudo I. 403. apparent ac disparent I. 403. seq. 417. distantia earum a tellure I. 417. 426. an proprium habeant lumen & soles sint I. 417. cuique earum num systema planetarium tribuendum I. 427
- Stillicidium** quid appellemus I. 449
- Stipendia** num & quibusnam sint solvenda ll. 402
- Stultitia** I. 205
- Subditi.** Eos inter ac magistratus quid intercedat pacti? ll. 143. qualis eorum ad magistratus habitudo ll. 145. seq. cur homagio principi obligandi ll. 438. eorum si ad arma deveniendum quid officii? ll. 457. eorum salus ubivis locorum promovenda ll. 444
- Subiectum** quid sit I. 12. 66. an distincte semper ponatur? ibid.
- Subreptionis vitium** I. 24
- Substantia** I. 62
- Succinum** I. 477. 478
- Sulphur** ll. 477
- Sumtiones** I. 17
- Supernaturale** I. 98
- Supplicium.** Locus ejus infamiae macula cur notandus? ll. 411. non sine ceremoniis exequenda ibid.
- Syllogismus.** Ejus descriptio I. 17. 137. forma quotuplex I. 17-19. regulæ I. 18. divisio I. 19. 20. an medium sit inveniendæ veritatis I. 25. ejus usus I. 25. 137. num materialiter repræsentetur in cerebro? I. 175
- Systema adfistentiæ** s. causarum occasionalium I. 189. ejus quis auctor ib. inconvenientiæ inde fluentes I. 190. cur rejiciendum I. 191
- Systema harmoniæ præstabilitæ** I. 192. ejus auctor I. 192. difficultates quo redeant? I. 194. solvuntur I. 195. veritas ejus adstruitur I. 196. non extendendum ad operationes gratiæ ibid. seq. non Deo tribuit culpam circa actiones hominum malas I. 204. cuiusvis arbitrio relinquitur ibid. seq.

Index verborum ac rerum

- Systema influxus physici* quid sit I, 185. receptum ad Cartesii usque tempora I, 186. multis laborat difficultatibus I, 187. rejicitur I, 188. seq.
- T.
- Taciturnitas* quid sit II, 332. quando necessaria ibid. cur rara II, 333. eius quodnam præminum? ibid.
- Tactus* I, 504
- Tadium* unde oriatur I, 143. ejus differentia ibid. ejus modificationes quando cessent II, 189. quomodo differat a tristitia durabili II, 24
- Tellus* Ejus figura I, 427. illa unde? I, 428. cur persistat ibid. motus vertiginis circa axem I, 424
- Temperantia* quid sit II, 251. ejus quis studiosus ibid. unde dijudicanda II, 252. ei cur studendum II, 254. 257. quotupliciter sumatur II, 272
- Tempestas*. Earum differentia I, 436. statarum ratio I, 438. seq. vagarum ratio I, 440. seq.
- Templa* cur condenda sint in republica II, 407
- Terra*. Ejus dantur diversa strata I, 457
- Terra motus* quomodo oriatur I, 482
- Terror* quid sit I, 148. num
- & quatenus præven-
dus? II, 199
- Theorema* I, 14
- Thermometron*. Ejus au-
ctor I, 276. Florentinum I, 277. seq. illius descri-
ptio & usus I, 278. seq.
- Thesaurarius* in republica
num constituendus? II,
435
- Timiditas* quid pariat da-
mni? II, 316. ei quomo-
do medendum II, 317
- Timor Dei* vid. Deus.
- Tragædia* an praxi morali
asserant adjumentum II,
407
- Tranquillitas* animi quid
pariat commodi II, 288.
quomodo conservanda?
II, 289
- Transclementatio* elementor-
um perperam ab Ari-
stotelicis asseritur I, 282
- Transpiratio* a quonam pri-
mum sit observata I, 509.
quid præstet commodi?
ibid.
- Tribunal appellationum*, sum-
mum, criminale, eorum in
republica necessitas II,
439. 440
- Tristitia* quid sit I, 146 quo-
modo pellenda II, 193
- Tonitru*. Ejus genesis I, 457.
seq. effectus I, 459. seq.
- Tortura* quis ea dignus II,
442. num prorsus da-
mnanda? ibid.
- Tortu-


Tortura spiritalis ll. 443
Totum I. 47
Tubus Torricellianus. Ejus descriptio I. 261. quinam optici I. 329. astronomici, terrestres I. 330. stentoreophonici I. 355
Turpitudine intrinseca in quo consistat ll. 5. moralis quid sit? ll. 13
Tutelare munus cur in republica necessarium ll. 426. quinam eidem viri præficiendi? ll. 426
Tutores qui? ll. 127. eorum officia ll. 128. seq.
Tyrannis. ll. 394
 U.
Vacillatio animi quid sit I. 148. quomodo ei medendum ll. 200
Vacuum non datur disseminatum I. 348. recensentur experimenta quæ in eo circa viventia institui possunt I. 363. seq.
Vapores unde existant I. 285. seqq. quid sint? I. 286. eorum ascensionis modus & causa I. 441. seq. quando tenues, crassi I. 443. coalescendi modus I. 447. in nivem quando abeunt ibid.
Venditio ll. 94. circa eam quæ observanda ll. 95. 96
Ventus. Eorum causæ I. 283. seq. 439. quomodo di-

judicandæ I. 434. an vapores in eorum genesis influere possint ibid. eorum diversitas I. 434. sq. quinam sint calidi ibid. frigidi I. 435. sicci ibid. humidi ibid.
Venus, quale corpus I. 415. an ibi montes ib. rotatur circa axem motu vertiginis I. 424
Verba quid sint I. 10. quæ in iis observatu digna I. 11.
Veracitas ll. 330
Verax. Ejus definitio ll. 330. abhorret a maledictionibus & perjuriis ll. 332
Veritas quando dicamur illius convinci I. 33. alterum convicturi quodnam officium I. 34. a parte convincendi quid requiratur ib. quid in sensu metaphysico I. 58
Veritas determinata I. 77
Vestimentum. Cur corpus iisdem munniendum ll. 61. eorum qualis ratio habenda ibid.
Vice-reges num & quando creandi? ll. 445
Vigilia quid denotent? I. 171
Vindicta quid sit ll. 323. num privatam exercere licitum ll. 156. 420
Virtus quid sit ll. 116. ejus studioso quid competat ll. 16. 17. quis dicatur ea præditus ll. 18. philosophica

Index verborum ac rerum utriusque Tomi.

- phica II. 20. naturalis II. 339. christiana II. 340. cuiusque prærogativa ibid. cur anbelanda II. 341
- Virtutes intellectuales.* Earum definitio II. 203. necessitas ibid. cultura II. 203. 204. seqq.
- Virtutes morales.* Earum definitio II. 244. differentia ibid. iis studentibus necessitas II. 246. lqq.
- Virtutis studium* quid requirat II. 184. circa quid versetur potissimum? II. 185. seqq.
- Vis s. Virtus* I. 82
- Vis inertia*, passiva, activa I. 84. motrix I. 86. elastica I. 92. seqq. 258. æquatur vi percussione I. 95. repræsentativa universi omnium rationem reddit quæ animo insunt I. 183
- Visus* cur omnium sensus perfectissimus II. 172
- Vita.* Quid sit I. 511. quamdiu durabilis ibid. cur conservanda I. 267
- Viciosus* quis nominetur II. 18. quomodo corrigendus II. 19
- Vitium.* Ejus definitio II. 18. morale quid vocetur II. 245. eorum varietas ib.
- Vitriolum* I. 477
- Vitrum causticum.* Eorum vires quomodo intendenda I. 300. stupendi effectus I. 301
- Vitrum opticum.* Eorum stupendus effectus I. 323. ratio ibid. quid circa ea observatu dignum I. 325. seqq. 328. Meniscorum varia sunt genera I. 329
- Vnitas* I. 47. 48
- Vniversum v. Mundus.*
- Voluntas* quid sit I. 150. antecedens, consequens I. 152. circa ejus emendationem quæ notanda II. 185. seqq.
- Voluptas* unde oriatur I. 142. quæ mutabilis, constans ibid. an possit intendi I. 143. quomodo differat durabilis a minus durabili II. 23. ejus modificationes per quid tollendæ II. 189
- Voluptuosus* num & quatenus horreat laborem II. 309. seqq. ad diligentiam quomodo alliciendus II. 310
- Vsura* num exigendæ II. 100. immodicæ quæ sint II. 101
- Vxor* in quo casu maneat ei dotis substantia II. 120. cur creditoribus ceteris præferenda ibid. seqq. ejus officium II. 121
- X.
- Xenodosbia.* Eorum in republica necessitas II. 425

ff. 301
lu-
3.
ea
5.
m
9
8






Fig 22










Fig 29




Exper E Ta







































optima
Cognitio ab attentione ad
notiones nostras proficere

Aether ordinis, modus, etc.

crystallus non solum in se, sed et in aliis
zinnib. et in aliis, etc.

Clai Magni vna vna, etc.

Scheuchzeri sui de rebus. phys. et
in vna de rebus, etc.

Potestatem vna de rebus, etc.

in vna de rebus, etc.

et vna de rebus, etc.

et vna de rebus, etc.

fulgur, etc.

Fulmen, etc.

et vna de rebus, etc.

et vna de rebus, etc.

et vna de rebus, etc.

et vna de rebus, etc.

et vna de rebus, etc.

Errata typograph. Philos. tract. Thum.

ata editione observata

p. 360 § 703. l. 3. pro percipientij lege percipientij

452 § 353. l. 2. pro moralij : ruralij

295 § 187. l. 6. qua pro qui.

255. §. 263. l. ult. adversari pro adservari.



